

# რ ე ვ ა ზ

# მ ი შ ვ ე ლ ა ძ ე

## ჩ რ ე უ ლ ი თ ხ ზ უ ლ ე ბ ა ნ ი

ო ც დ ა ხ ე თ ი ც ო მ ა რ



## მ ნ ე რ ლ ი დ ა მ ო გ ზ ა უ რ ი ს ზ უ რ ბ რ ა ნ თ ა

ც ო მ ი  
XXII

თანამედროვე ქართული ლიტერატურის კლასიკოსის, რუსთაველის პრემიის ლაურეატის, რევაზ მიშველაძის შემოქმედება კარგანანია მსოფლიო ლიტერატურის ორგანულ ნაწილად იქცა.

„საქართველოს მაცნე“ გამოსცემს პროზის დიდოსტატის რევაზ მიშველაძის რჩეულ თხზულებათა ოცდახუთტომეულს.

მკითხველი ამ ტომების წაკითხვისას ადვილად დარწმუნდება, რომ მწერლის ჟანრულად უაღრესად მდიდარ ნაწერებში ჩანს არა მარტო საქართველოს პრობლემები, არამედ ქართული სარკმლიდან დანახული მსოფლიოც.



ISBN 978-9941-16-228-2 (ოცდახუთივე ტომი)  
ISBN 978-9941-16-372-2 (XXII ტომი)

## ფინეთი – 1966

11.IX – 23.IX

უკან დარჩა საკადრო ფურცლების შევსებისა და დახასიათება-რეკომენდაციების შეგროვების ხანგრძლივი (მტანჯველი კინალამ წამომცდა) პროცესი. განსაკუთრებული პასუხისმგებლობით მოეკიდეთო, გაგვაფრთხილეს, გრაფებს: – „საზღვარგარეთ გყავთ თუ არა ნათესავები (თუ გყავთ, რა მიზეზით და რა დროიდან), ახლობელთაგან არის თუ არა რომელიმე რეპრესირებული (რომელ წელს და რა მიზეზით, რეაბილიტირებულია თუ არა), საზღვარგარეთ რა მიზნით მიემგზავრებით“ და ა. შ. თუ სიცრუეში დაგიჭირესო, გაგვაფრთხილეს კომკავშირის ცეკაში, სისხლის სამართლის პასუხგებაში მიცემა არ აგცდებათო. რა ვქნა, რა წყალში ჩავვარდე, არა და, ძალიან მინდა საზღვარგარეთ წასვლა. კადრების ფურცელში მაინც ჩავწერე: ბიძაჩემი ცუტუ მიშველაძე, სამამულო ომში უგზოუკვლოდ დაიკარგა. არავითარი შეტყობინება არ მიგვიღია. არ ვიცით, მკვდარია, თუ ცოცხალი-მეთქი. დახასიათება ჯერ უნივერსიტეტმა (მესამე კურსის ასპირანტი ვარ) მომცა, მერე ეს დახასიათება რაიკომმა დამიმტკიცა და ცხრავე საბუთს თავი რომ მოფუყარე, როგორც საიდუმლოდ გვაუწყეს, საბოლოო განჩინებისთვის კგბ-ში გადააგზავნეს. კგბ-დან ჩვენი ჯგუფის ყველა ნევრზე, ჩემს გარდა, დადებითი პასუხი მოვიდა. რამაზ გოგლიძემ მითხრა, ჩერქეზიას დავარეკინე და ყველაფერი რიგზე იქნებაო. რაიმე ხომ არ გენერა ანკეტაში ისეთიო. ბიძა მყავს ომში დაკარგული და ხომ არ დავმალავდი-მეთქი. შენცა ხარ, რაო,

რედაქტორი

**მერაბ ცაგარეიშვილი**

კომპიუტერული  
უზრუნველყოფა

**მავრა ბანცური**  
**ციალა ძიმისტარიშვილი**

© რევაზ მიშველაძე, **რჩეული თხზულებანი ოცდახუთი ტომად**

© **გამომცემლობა „საქართველოს მაცნე“**, თბილისი, 2013

მისამართი: თბილისი, 0179, ი. ჭავჭავაძის გამზ. №27

ბიძა ხომ ოჯახის წევრად არ ითვლება, რამ ჩაგანწერინაო. ორი დღის შემდეგ ჩემზეც მოვიდა „დაბრო“ და სიხარულით ცას ვენიე. ამით დამთავრდა სავიზო-სასაბუთებო ეპოპეა და ჩვენი თხუთმეტკაციანი ჯგუფი, ე. წ. ახალგაზრდული დელეგაცია ფინეთს მივემგზავრებით. ვისაც ვიცნობ, ესენი არიან: გურამ გაბუნია – დელეგაციის ხელმძღვანელი, მისი მეუღლე ქ-ნი ლია, ნორა გვრიტიშვილი, ნანული ბარათაშვილი, გურამ ზედგინიძე, სოლიკო ხაბეიშვილის მეუღლე გიული, მე, ლია ლორთქიფანიძე, კოტე ქორიძე... დანარჩენს გზაში გავიცნობ.

პირველად მივდივარ საზღვარგარეთ. რაც შეეხება მოსკოვს, სამჯერ ვარ ნამყოფი სადისერტაციო მივლინებით.

ორი დღე მატარებლით მგზავრობამ უფრო დაგვაახლოვა ერთმანეთს. გვიანობამდე არ ვიძინებთ. ჯერ იყო და ზესტაფონში და სამტრედიისში გურამ გაბუნიას (თბილისის ალკკ პირველი მდივანი) მისი მდივან-კოლეგები ზესტაფონის და სამტრედიის ალკკ მდივნები დახვდნენ, პურმარილით სავსე კალანჩხები და ღვინიანი ბოცები შემოდგეს ვაგონში. მერე, საქართველოს რომ გავცდით, მთელი მატარებელი ჩვენს ვაგონში იყრიდა თავს. კუპის კარი ღია გვექონდა და თუ ვინმე ჩაივლიდა, ჩაის ჭიქას ვანოდებდით.

მიკეცავს მატარებელი რუსეთის ტრამალებს. ლურჯად შეღებილი კოპნია, რუსული ხატა, მართლაც რომ, ლამაზია. ჭიშკართან ცხენი აბია და ეზოში ფრთებს ატკაცუნებენ ბატები. მატარებლის გამოჩენისას ყვავები ხიდან ხეზე იწაცვლებენ, ჩხავილით გვეხმაურებიან.

პატარა სადგურების წინ სახელდახელო დახლები ჩანს.

გაჩერდება თუ არა მატარებელი, პიჟამოიანი მგზავრები დახლებს შეესევნიან. ზოგჯერ ისე გაერთობიან ვაჭრობით, რომ დაძრულ მატარებელს დაქიჩმაჩებული მოსდევენ და კისრისტეხით აწყდებიან ვაგონებს.

ერთ გაჩერებაზე, სადგურ ტიხორეცკაიაში, მეც ჩავირბინე და მრგვალად მოხარშული დედალი, მთელი მათლაფა

სოკო-მარინადი და სამლიტრიანი ქილით მჟავე კიტრი შევმატე ჩვენს სუფრას. გამიკვირდა, აქ ყველაფერი სამჯერ უფრო იაფი ღირს, ვიდრე თბილისში ან ქუთაისში.

ორი დღის ნაქეიფარ-ნაჟუჟუნეებმა შესივებულ ყელზე ძლივს მოვირგეთ კვართ-ჰალსტუხები და ცხრას აღარაფერი აკლდა, მატარებელმა კურსკის სადგურს რომ მიაკივლა.

ამდენი ურიკიანი მებარგე არსად მინახავს.

ყველანი ჩვენი ვაგონისკენ მოახრიგინებენ ურიკებს.

ნიაზ დიასამიძის ანეკდოტი მომაგონდა: ნიაზი მოსკოვში ჩავიდა, ვაგონის კიბეზე დგას და ყვირის: „ნასილჩიკ! ნასილჩიკ! იდიდტე ვსე სუდა!“ მტვირთავები ფიქრობენ, ალბათ ბევრი ბარგი აქვს ამ კაცსო და ნიაზის ვაგონთან ორმოცდაათზე მეტი „ნასილჩიკი“ შეგროვდა. ნიაზმა ერთი გადახედა მტვირთავებს და გამოაცხადა: პრივეტ ოტ გრუზინსკის ნასილჩიკოვ!“

მიუხედავად იმისა, რომ ჩვენი ხორაგეულობა გზაში საკმაოდ შემსუბუქდა, მაინც დაგვჭირდა ხუთი ურიკა, რათა ტაქსის გაჩერებამდე მიგვეტანა ბარგი.

სადგურზე არავინ დაგვხვედრია.

გურამმა გადარეკ-გადმორეკა და დააზუსტა, რომ ჩვენთვის ნომრები სასტუმრო „სპუტნიკშია“ დაჯავშნული.

მივმეტროვდით „სპუტნიკში“. ფართო ქუჩებით და ჩვეულებრივზე უფრო ჩქარი ნაბიჯით მომავალი მოქალაქეებით მოსკოვი გრანდიოზული ქალაქის შთაბეჭდილებას ტოვებს.

„სპუტნიკში“ ჩვენ-ჩვენი ნომრების გასალეგები დაგვირიგეს, მე და გურამ ზედგინიძე ერთად ვართ 417-ე ნომერში.

აიტანეთ ბარგი და ახლავე ჩამობრუნდით. თერთმეტზე „ცენტრში“ უნდა ვიყოთ. ვისაც ძალიან გშიათ, იქ ბუფეტია და შეგიძლიათ ისაუზმოთო, გურამმა.

შიმშილით არც ერთს არ გვშია. ამ დილით ჯერ კიდევ ვაგონში დარჩენილი პურმარილი გეახელით და ბოლო მოხარშულ დედლებს ავახიეთ ბარკლები, მაგრამ დაღლილნი კი ძალიან ვართ.

დავანყეთ ჩემოდნები ნომერში. ხელ-პირი დავიბანეთ და ჩამოვლიფტით ფოიეში.

ისევ მეტრო და მისი ჯანი. მეტროზე მოსახერხებელი ტრანსპორტი მოსკოვში არ არისო, გურამმა. თუ გეჩქარება, სწორედ მეტროთი უნდა ნახვიდეო, რასაკვირველია, თუ ფული „ჯიბეს გიხევს“, ტაქსიც კარგია, მაგრამ მოსკოველი ტაქსისტები ჯიბიდან გავარდნილი ხალხია, თუ ჩამოსულობა-ხამობა შეგატყვევს, იმდენს გატარებენ, რომ ხელფასის ნახევარს დაგაყაჭიებენო.

„ცენტრში“ ორი ლექცია ნაგვიკითხეს. ერთს ერქვა „ფინეთის რესპუბლიკის პოლიტიკურ-ეკონომიკური დახასიათება და მეორეს „საბჭოთა დელეგაციის წევრის უფლება-მოვალეობანი და ქცევის ნორმები“.

ორივე ლექცია ერთმა კაცმა ნაგვიკითხა. მაღალი, მელიოტი, თავზე მარჯვენა საფეთქლიდან მარცხნივ გადაფენილი ქერაფცუა თმა ლაპარაკის დროს ჩამოემლებოდა და ხელით ისწორებდა.

ლურჯი კოსტიუმი ეცვა და თეთრ პერანგზე ჟღალი ფერის ნილონის ჰალსტუხი ეკეთა. ჰალსტუხი პერანგზე მამლისგამოსახულებიანი სამაგრით იყო დამაგრებული.

ლაპარაკით კარგად, გასაგებად ლაპარაკობდა.

თვითონაც რომ არ ეთქვა, უბის წიგნაკები მოიმარჯვეთ და რასაც გეტყვით, ჩაინერეთ, აუცილებლად გამოგადგებათო, მე მაინც მომარჯვებული მქონდა ბლოკნოტი და სანერკალამი.

ფინეთიო, გვითხრა საპარლამენტო რესპუბლიკაო. იგი მე-12 საუკუნიდან მეცხრამეტე საუკუნემდე, შვიდასი წელი შვედეთის შემადგენლობაში შედიოდაო. 1809 წელს ფინეთი შვედი ხალხის გადანყვეტილებით რუსეთს შეუერთდა. 1917 წელს რუსეთის იმპერია რომ დაინგრა, ფინელმა სეპარატისტებმა ფინეთი დამოუკიდებელ სახელმწიფოდ გამოაცხადესო. 1940 წლის 13 მარტიდან ფინეთმა საბჭოთა კავშირთან

სამშვიდობო ხელშეკრულება გააფორმა და კაპიტალისტური წყობის ქვეყანა გახლავთ, მაგრამ ამის მიუხედავად, ჩვენი მეგობარი სახელმწიფოაო.

ლექტორს არ უთქვამს, მაგრამ მე ხომ ვიცი, რომ არც 1809 წელს ჩამოშორებია ფინეთი შვედეთს ფინელი ხალხის ნებით. წაართვა რუსმა ფინეთი შვედეთს. „ყოვლისმცოდნე“ ლექტორმა ისიც დაგვიმალა, რომ 1939 წლის 30 ნოემბერს საბჭოთა ჯარები ფინეთში შეიჭრნენ და სისხლის კალო დაატრიალეს. სამთვიანი უთანასწორო, დაპყრობითი ომი ფინეთთან, მართალია, 1940 წლის 13 მარტის ხელშეკრულებით დამთავრდა, მაგრამ ამ ელვისებურმა ომმა იქეთ-აქეთ ათიათასობით ადამიანთა მსხვერპლი მოიტანა და ფინეთს საკმაოდ დიდი ტერიტორიაც წაგვარა რუსეთმა. დასავლეთის კოალიციამ დიდის ძალისხმევით გამოგლიჯა კბილებიდან საბჭოთა რუსეთს ფინეთი.

სამაგიეროდ, როგორ დავუკარგავ, სხვა რამ მართალი გვითხრა ფინეთზე ჩვენმა ლექტორ-პროპაგანდისტმა:

ფინეთშიო, ნესტიანი ჰავაა და ზამთარი თითქმის რვა თვეს გრძელდებაო, ბუნებრივი ნიალისეული რკინა, თუთია, ვერცხლი და სპილენძი მოეპოვებათო. რაც მთავარია, ფინეთი ხე-ტყით ძალიან მდიდარიაო. დიდი ქალაქებია ჰელსინკი (დედაქალაქი), ტამპერე, ტურკუ, ოულუ და ლაჰტიო. ქალაქებში ძირითადად საავეჯო წარმოებას, მსუბუქ მრეწველობას და რძის პროდუქტების (განსაკუთრებით ყველის) დამზადებას ეწევიანო. მძიმე მრეწველობა ჩანასახოვან მდგომარეობაში აქვთ. დაზგებს ჩვენ ვანვდით, თვითმფრინავებს და მანქანებს კი ამერიკა და გერმანიაო. სოფლად ძირითადად მესაქონლეობას, მეთევზეობას და ნადირობას მისდევნო.

პირველ ლექციაზე გადაბმული მეორე ლექციაც არანაკლებ საინტერესო და „მკაცრად შემეცნებითი“ გახლდათ. გახსოვდეთ, ფინეთი კაპიტალისტური სამყაროს ნაწილია და ყოველი ფეხის ნაბიჯზე პროვოკაციაა მოსალოდნელიო. ყოვ-



ლის საშუალებით ეცდებიან თქვენს ცდუნებას, რათა მერე გაზეთებში საბჭოური აღზრდის სისტემა გააკრიტიკონო. ამიტომაც ორჭოფული, ზედმეტად თავისუფალი ლაილაისგან თავი შეიკავეთო. ნომრებში ყველგან ჩამწერია დამონტაჟებული და ნურც ერთმანეთში ილაპარაკებთ სისულელეებსო. რაც უნდა მოგეწონოთ, არ გაიკვიროთ, ყველაფერი ჩვეულებრივად მიიღეთო. თქვენ ალბათ გაგაფრთხილეს, რომ ფინეთში მშრალი კანონია და ალკოჰოლური სასმელის მიღება მოქალაქეებს სასტიკად ეკრძალებათო. ამიტომაც თან მხოლოდ ერთი ბოთლი არყის ან კონიაკის წაღება შეგიძლიათ მხოლოდ პირადი მოხმარებისთვისო. თუ რამე კულტურულ ღონისძიებაზე წაგიყვანეს, როგორც არ უნდა მოგეწონოთ, აზრს ნუ გამოთქვამთ და მით უმეტეს, სანამ დამთავრდებოდეს, დარბაზიდან ნუ გამოხვალთო. მაღაზიაში თუ რამეს იყიდით, აუცილებლად ჩეკი გამოანერჩინეთ. თუ ფულის გადაუხდელად შექნილი ნივთით ხელში კარებისკენ თუნდაც ხუთ ნაბიჯს გადადგამთ, ეს უკვე ქურდობას ნიშნავს და ფინეთის ციხეში მოგინევთ 5 წლით ჯდომამო. „დამავინწყდა“ და „შემეშალა, არ ვიცოდი“ იქ არ გაგივართო.

ვერ მოვითმინე (მე ხომ ენამასწარა ვარ) და ვკითხე: თქვენ არაყზე და კონიაკზე ბრძანეთ, გასაგებია, რომ არაყი ან კონიაკი მხოლოდ თითო ბოთლი უნდა წავიღოთ, ღვინოზე არაფერი გითქვამთ, ღვინო ხომ განუსაზღვრელი რაოდენობით შეიძლება-მეთქი.

ლექტორს ჰომერული ხარხარი აუტყდა. სულ დამავინწყდა, რომ თქვენ ქართველები ხართო. სამწუხაროდ, ღვინოც და არაყიც მხოლოდ თითო ბოთლი შეიძლებაო.

– ესე იგი, ერთი ბოთლი არაყი და ერთი ბოთლი ღვინო, სულ ორი ბოთლი-მეთქი?

არაო, სიცილისგან აცრემლებულმა მიპასუხა, მხოლოდ ერთ-ერთი მათგანით.

მეორე შეკითხვაც მაქვს-მეთქი:

– ვთქვით, ვზივართ სასტუმროში და ვსვამთ პირადი მოხმარებისთვის წაღებულ ერთ ბოთლ არაყს, ამ დროს თუ შემოგვესწრო წესიერი ფინელი, ხომ შეიძლება ნახევარი ჭიქა დავეუსხათ და გაგუმასპინძლდეთ-მეთქი.

ამაზე უფრო ხმამაღლა გაიცინა. ეცადეთ აფიშირების გარეშე, თქვენთვის დაისხათ და დალიოთ. არაა საჭირო იმ ერთ ჭიქა არაყზე ქვეყანა შეყაროთო, სერიოზულად ამიხსნა.

თან ცდილობდა ჩემს თვალეში ამოეკითხა დავცინოდი თუ არა, უცხოეთში საბჭოთა ტურისტის ქცევის წესს.

გურამ გაბუნიას, ჩანს, იუმორის დიდი გრძნობა აქვს. ჩემს ირონიას მაშინვე მიხვდა და სიცილს ძლივს იკავებს. სიცილის შეგუბებისგან ყელის ძარღვები დაჰბერვია.

გადმოიხარა და მითხრა:

„კარგი, რეზო, დაანებე თავი, კაცს თავისი გასაჭირი ჰყოფნისო“.

ჩვენი წარმატებით დამოძღვრის ორი საათი რომ დამთავრდა, სასტუმროში დავბრუნდით.

ერთი სული მაქვს შხაპი მივიღო და ორი დღის განმავლობაში ვაგონში აკრებილი მტვერი ჩამოვირეცხო.

ავედით მეოთხე სართულზე მე და გურამ ზედგინიძე.

სართულის მორიგე ჩვენი ნომრის გასაღებს არ გვაძლევს.

– 417! 417! – ჩავძახი და საშვს ვანოდებ.

ვიცი, ვიციო, მშვიდად, აუღელვებლად გვპასუხობს. თქვენს ნომერში ელექტრობას ამონებენ და ცოტა ხანს შესვლა არ შეიძლებაო.

რამე საელექტრონო უნესრიგობა შენიშნეთ-მეთქი? ვეკითხები ისე, სიტყვის მასალად.

არაო, საერთოდ, ორ კვირაში ერთხელ ელექტრო და სახანძრო სამსახურები მოდიან და უსაფრთხოების მიზნით შენობას ამონებენო.

კეთილი და პატიოსანი, მაგრამ რაღა მაინცდამაინც ჩვენს ნომერში ამონებენ ელექტრობას და სახანძრო მონყობილობას, რატომ სხვა ნომერში არ ამონებენ-მეთქი.

იცით რაო, ცოტა არ იყოს გამწყრალი თვალები შემომ-  
ანათა, სხვა ნომრებში უკვე შეამონმეს. აქ მოსკოვია, ჩემო  
კარგო, თბილისი არ არის. ეგ პრეტენზიები შეგიძლიათ თქვე-  
ნი ჯგუფის ხელმძღვანელთან გამოთქვათ და, საერთოდ, რაც  
ნაკლებს ილაპარაკებთ, უკეთესიაო.

მორიგისთვის სხვა შეკითხვა არ მიმიცია.

როგორც მირჩია, ენას კბილი დავაჭირე.

დაახლოებით ერთი საათის მერე დერეფანში ჩქარი ნაბი-  
ჯით მომავალი ორი ჰალსტუხიანი ახალგაზრდა კაცი გა-  
მოჩნდა. ისინი მორიგის მაგიდას მოუახლოვდნენ, ჯერ ჩვენ  
შემოგვხედეს და მერე მორიგეს დაუგდეს – ვსეგო დობროვო!

– ნუ კაკ? ვსიო ვპარიადკე? – დაადევნა მორიგემ ლიფტ-  
ისკენ მიმავალთ.

„ელექტრიკებს“ ცნობისმოყვარე მორიგისთვის არაფერი  
უპასუხნიათ.

შევედით ჩვენს ნომერში.

გურამი თავის ჩემოდანს ეცა. გახსნა და შემომლიმილა –  
გავუჩხრეკივართ, აბა, ერთი შენი ნახე.

მე რა წითელი კვერცხი ვიქნებოდი-მეთქი, მივუგე.

მართლაც, ჩემი გულდასმით ჩანყობილ-ჩალაგებული  
ნივთები ჩემოდანში აბურდულ-დაბურდული დამხვდა. ერთი  
გაკვირვება ის გამიკვირდა, რომ ჩემი ჩემოდანი გასალებით  
იყო დაკეტილი და ახლაც გასალებით დაკეტილი დამხვდა.  
გასალები კი ჯიბეში მედო.

ეს ამბავი რომ გურამს გავანდე, გაეცინა.

რა მიამიტი კაცი ხარო, ესენი ჩემოდანს კი არა, ოცდამ-  
ვიდციფრიან სეიფს ალებენო.

მეორე დღეს დილით მატარებლით გავემგზავრეთ ლენ-  
ინგრადს და ლენინგრადიდან ჰელსინკის მატარებელზე გა-  
დავჯექით.

რისი დანახვაც ვაგონის სარკმლიდან შევძელი, ლენინ-

გრადი მოსკოვივით ნელ-ნელა, სოფელ-სოფელ როდი იწყება.  
დამთავრდა რკინიგზის გაღმა-გამოღმა ჩამწკრივებული ტყე  
და ერთბაშად აღიმართა ჩვენს წინ ლენინგრადი (ყოფილი პე-  
ტერბურგი). მატარებელს მოსდევენ ულამაზესი ძველებური  
ორსართულიანი სასახლეები და ძველებით დახუნძლული  
ქუჩები. ნევის პროსპექტის ნახვა ამჯერად არ მეღირსა. ნე-  
ტავ, როგორია ახლა პეტრე პირველის, პუშკინის და გოგო-  
ლის „ნევსკი პრასპექტი“?

ფინეთის საზღვარს რომ მივუახლოვდით, ერთი საათი  
მანც დაგვაყოვნეს საბაჟო შემონმებაზე. ჯერ ჩვენი ჯარის-  
კაცები ამოვიდნენ, პასპორტები ჩამოგვართვეს და გვთხოვეს,  
კუპეებიდან გამოვსულიყავით. მერე სათითაოდ გვიხმეს კუპე-  
ში და ჩვენ-ჩვენი ჩემოდნები გაგვახსნევინეს. თან გვეკითხე-  
ბოდნენ, ხატები, უცხოური ვალუტა ან ოქრო-მარგალიტის  
რა ძვირფასეულობა მიგვქონდა. მე დაჟინებით ჩამეკითხნენ;  
ვიცნობდი თუ არა ფინეთში მცხოვრებ რომელიმე ქართველს.  
საერთოდ თუ ცხოვრობენ ქართველები ფინეთში, წარმოდ-  
გენა არა მაქვს-მეთქი, გულწრფელად მივუგე.

როგორც იქნა, დამთავრდა საბაჟო პროცედურები ჩვენი  
(საბჭოთა) მხრიდან და ლურჯსამხედროფორმიანი ფინელი მე-  
ბაჟეები ამოვიდნენ. საბაჟო წესებს თუ იცნობთო, გვეკითხე-  
ბოდნენ, მერე პასპორტის სურათს დახედავდნენ, ღიმილით  
შემოგვაჩერებოდნენ, ვიზას ბეჭედს გაუტყაპუნებდნენ,  
საფეთქელთან ორი თითის მიტანით მოგვესალმებოდნენ,  
პასპორტს დაგვიბრუნებდნენ და მშვიდობიან მოგზაურობას  
გვისურვებდნენ.

რისი ჩხრეკა, რომელი ჩემოდნებში და ჯიბეებში ფათუ-  
რი... ფინელ მებაჟეებს ჩვენთვის მსგავი არაფერი უკადრები-  
ათ. ჩანს, საბჭოთა მებაჟეების სიფხიზლის იმედი ჰქონდათ.

მამ ასე, მატარებელი ფინეთის მიწაზე მიიჩნევა.

პირველი, რაც თვალში გეცემათ, არის მწვანე, ხასხასა

ბალახით დაფარული, კოხტა მინდვრები და მინდვრების გასწვრივ, ტყის გაყოლებაზე, ლურჯი ტბები. ტბა ფინეთში ყოველ ფეხის ნაბიჯზეა. მცირე ტბის შემოგარენი ყარყატებს, წეროებს და ბატებს გადაუთეთრებიათ. შედარებით დიდ ტბებზე ნიჩბიან ნავეებზე წახრილი მეთევზეები ჩანან. ჩემთვის სრულიად უჩვეულო პეიზაჟია. მთები თითქმის არ არის. მოსახლეობაც მეჩხერზე-მეჩხერია. ამხელა გზა გამოვიარეთ და 10-15-კომლიანი სოფლები შორი-შორ ჩანან. ერთი სიტყვით, მწვანე მინდორი, ტბა, დაბურული ტყე და ძროხები... უზარმაზარი ქრელი ძროხები.... ეს გახლავთ ფინეთის სანახების უმთავრესი ნიშანი.

კარგა შელამებულზე ჩავედით ჰელსინკში.

სადგურზე ჩვენი გიდი დაგვხვდა. თეთრთმიანი, მაღალი, ცისფერთვალეა, 25-30 წლის ქალი. მეო, მერიკე მქვიაო, დედით რუსი ვარ და მამით ფინელიო. ამიტომაც განსაკუთრებით მიყვარს ჩემი ხალხი როცა ჩამოდისო. „ჩემ ხალხში“ რატომ გვიგულისხმა ჩვენ – ქართველები, ვერ გავიგე. ეტყობა, იმ ინერციით, რომ საბჭოთა კავშირიდან ჩასულებს უცხოეთში ყველას რუსებს ეძახიან. ისე, როგორ დავუკარგავ, რუსულად უაქცენტოდ ლაპარაკობს და, როგორც ქალი, ძალიან მომხიბვლელია („სექსუალური“ კინალამ წამომცდა).

ულამაზესია ლამის ჰელსინკი.

ჩვენი ქალაქების ერთ ფერში განათებას თვალმიჩვეულმა ზღაპრულ გარემოში ვიგრძენი თავი. რეკლამები ლურჯად, მწვანედ, თეთრად, ვერცხლისფრად, ვარდისფრად, წითლად ციმციმებენ.

სასტუმრო „ჰელსინკს“ მიადგა ჩვენი ავტობუსი.

მე და გურამი კვლავინდებურად ერთ ნომერში ვართ.

წავახშმევს (უკვე თერთმეტს გადაშორებული იყო) ჩვენმა მერიკემ საკონფერენციო დარბაზში მიგვიწვია. დარბაზში როიალი იდგა. ჯერ თვითონ მიუჯდა როიალს და უცნობი

ფინელი კომპოზიტორის არც თუ ჰამოდმოსასმენი სიმფონიური პოემის ნაწყვეტი შემოგვთავაზა. მერე თავაზიანად გვკითხა, რომელიმე თქვენგანი ხომ არ დაუკრავსო. გურამ ზედგინიძეს ბევრი ხვეწნა არ დასჭირვებია, დიდებულად დაუკრა და იმღერა ორი ნეაპოლიტანური სიმღერა, ამას მოაყოლა „ჰიმნი“ ბეთჰოვენის მეცხრე სიმფონიიდან. გიდი აღფრთოვანებას ვერ მალავდა. თქვენ, ალბათ, პროფესიონალი მუსიკოსი ბრძანდებითო. არაო, გურამმა, მე თბილისის სახელმწიფო უნივერსიტეტის უფროსი მასწავლებელი ვარო. უბრალოდ, ჩვენთან ყველა ქართველი მღერისო. აბა, რამე ქართული კლასიკური შეასრულეთო, დაგვიკვეთა მასპინძელმა და როცა გურამმა და მე „მხოლოდ შენ ერთს“ დავაგუგუნეთ, მერიკემ ორივენი გადაგვკოცნა და აღფრთოვანებულმა გვითხრა: „ნე ზრია ნაზივამე გრუზიუ ჟემჩუჟინოი სავეტსკოგო საიუზა“.

შუალამისას გიდმა ძილი ნებისა გვისურვა და დაგვემშვიდობა.

დილით ჰელსინკის ღრუბლიან ქუჩაზე ფეხით გავუყევით. მგონი, ლამის ჰელსინკი უფრო ლამაზია.

სანამ ისტორიულ-ეთნოგრაფიულ მუზეუმში მივიდოდით, გზად ღია ლორთქიფანიძემ ყურადღება მიაქცია აბრას, რომელზეც ეწერა „ოკუპაციის მუზეუმი“. ხომ არ გამოვცდითო, თვალი ჩამიკრა და გიდს მიუბრუნდა, აი, „მუზეუმი“ აწერიაო. გიდი არც შეჩერებულა, ესაო ნაცისტების მუზეუმია, ფინელმა ვაიპატრიოტებმა რუსების გასაღიზიანებლად გახსნესო. ახლა ეს მუზეუმი დროებით დაკეტილია და მალე საერთოდ დაიხურება, რადგანაც რუსი და ფინელი ხალხის მეგობრობას ხელს არ უწყობსო.

„ოკუპაციის მუზეუმი“ ვერა, მაგრამ ჰელსინკის ისტორიულ-ეთნოგრაფიული მუზეუმი გულდასმით დავათვალიერეთ.

მე, უძველესი ქვეყნის წარმომადგენელი, ვარძიისა და „ვე-



ფხისტყაოსნის“ შემქმნელი ერის შვილი, გამაოცა ფინეთის წარსულმა. ამ ტერიტორიაზე ფინელები თურმე ჩვენს წელთაღრიცხვამდე ცხრა ათასი წლის წინათ დასახლებულან. ფინეთის ტერიტორიაზე აღმოჩენილია თურმე 3000 წლის წინათ შექმნილი თიხის ჭურჭლის ნიმუშები. მეცნიერებს დღემდე ვერ გაურკვევიათ, რა ენაზე ლაპარაკობდნენ ძველი ფინელები და როდიდან იყენებენ აქაური მცხოვრებნი უნგრულ-ფინურ ენას, რომელიც ინდოევროპულ ენათა მონათესავედ ითვლება.

ნასადილევს გიდმა გედების ტბა დაგვათვალისწინა.

უზარმაზარ ტბაში დაცურავდნენ თეთრი გედები, იხვები, ბატები და თოლიები. ერთმანეთს ხელს როდი უშლიდნენ, მისრიალებდნენ თავიანთ გედურ, იხვურ, ბატურ და თოლიურ საქმეებზე.

სანამ გიდი ტბაზე გვიამბობდა, თეთრი გედები მოგვიახლოვდნენ და თითქოს გიდს უსმენენო, გარინდულიყვნენ. ულამაზეს თავ-კისერსაც არ ამოძრავებდნენ.



ფინეთი, 1966. გედების ტბა

ცხოველებისა და ფრინველებისადმი ჩემი გადარეული სიყვარულის გადამკიდემ ველარ მოვითმინე და ნაპირთან მივედი. გედებმა, თითქოს მიცვენესო, კისრები წაიგრძელეს და მომიახლოვდნენ. რაკი დარწმუნდნენ, რომ ხელში მათი სასუსნავი არ მეჭირა, ზურგი როდი შემაქციეს, ჩუმად, მშვიდად იზვნენ წყალზე და მათვალისწინებდნენ.

სალამოსკენ მერიკემ „საიდუმლო საჩუქრად“ სექსფილმზე დაგვპატიჟა.

ჩვენი ქალებიდან სექსფილმზე ორიოდე გაბედული ქალბატონი წამოვიდა. დანარჩენებმა უარი თქვეს.

რომ გითხრათ, სექსფილმის ნახვა ფრიად მესიამოვნა-მეთქი, არ ვიქნები მართალი. რა თქმა უნდა, ხელოვნებასთან ამას საერთო არაფერი აქვს, მაგრამ მაინც ეგზოტიკური სანახაობაა და კაცმა ცხოვრებაში, რომელიმე ასაკში, ერთხელ მაინც უნდა ნახოს.


რა დამამახსოვრდა ათი დღის განმავლობაში ფინეთში ყოფნისას ყველაზე მეტად?

ისტორიულ-ეთნოგრაფიული მუზეუმის გარდა – ფინური ყველის გრანდიოზული ქარხანა. ოცდახუთ სხვადასხვა ტექნიკურ პროცესს გადის რძე, რომ უგემრიელეს ფინურ ყველად იქცეს.

საოცარი სისუფთავე ქუჩებში და შენობათა არა მარტო არქიტექტორული მხარის მაღალი ხარისხი, არამედ ფერთა შეხამებაც. ყველა სახლი გამორჩეულად ფერწერულია. შედებილია არა მყვირალა ფერებით, არამედ ნაცრისფრად, ფერფლისფრად და ღრუბლისფრად. ფანჯრები კი თეთრი საღებავითაა გამოყოფილი, რაც ქალაქს ერთიანი ანსამბლის იერს ანიჭებს ყველა შენობას თავის ულამაზესი სკვერი აქვს და აქა-იქ ძველი კათოლიკური ტაძრების გვერდით თვალს მოგტაცებთ მოდერნიზებული ტაძრები.

ტრამვაის ვატმანიდან დაწყებული, მოსწავლეებით დამთავრებული ყველას თავისი ფორმა, სპეცტანსაცმელი

აცვია. განსაკუთრებული თავაზიანობით პოლიციელები გამოირჩევიან. ისინი ორ-ორად „დასეირნობენ“ და ყველას უღიმიან.



ფინეთი, 1966. მოდერნიზებული ტაძარი.

მიუხედავად იმისა, რომ ფინეთში მშრალი კანონია და ალკოჰოლური სასმელები მაღაზიებში არ იყიდება (რესტორნებში დაშვებულია მხოლოდ უცხოელთათვის), ჰელსინკის ქუჩებში მაინც ხშირად შეხვდებით რწევით და ლილინით მიმავალ მთვრალს.

საერთოდ, მითხრეს, ფინეთში არაყი ძალიან უყვართ და ქუჩაში მიმავალ მთვრალს მოწონებით და კეთილი შურითაც ამიტომ შესცქერიანო.

ჰელსინკის გარდა ვიყავით ტამპერესა და ლაჰტიში, დავათვალიერეთ ხუთიოდე დიდი სანარმო, მათ შორის სასოფლო-სამეურნეო იარაღების, სამკერვალო და თევზის გადამამუშავებელი... ყველგან თვალშისაცემი გახლდათ ავტომატიზაცია. ყველაფერს ჭკვიანი მანქანა აკეთებს. ადამიანები მხოლოდ მეთვალყურის როლს ასრულებენ.

ტამპერეს პროფკავშირის ცენტრში დიდხანს დავყავით. პროფკავშირი იქ აქტიური, მოქმედი უწყებაა. ჩვენთან კი მხოლოდ და მხოლოდ ფორმალური გაერთიანებაა, რომელიც ოდენ სანევროებს კრებს და ათასში ერთხელ დასასვენებელი სახლის საგზურსაც გაიმეტებს. პროფკავშირი თავის წევრს არავის დააჩაგვრინებს. მას ხშირად მიმართავენ ფინელები სოციალური პრობლემების გადასაჭრელად.

წამოსვლის წინა დღეს, იქნებოდა ასე ათი საათი, ჩვენს კარებზე ვილაცამ დააკაკუნა.

გურამმა გაალო.

კარებში შავკოსტიუმისანი, შლაპისანი, ხელჯობისანი კაცი დგას.

ბოდიშს ვიხდი გვიან შენუხებისთვის, მე სამედიცინო კოლეჯის ერთი რიგითი მასწავლებელი ვარ. სტუდენტებს გერმანულს ვასწავლი, თქვენთან საუბარი მსურს თუ შეიძლებაო.

რას ვეტყოდით.

სტუმარი ღვთისაა.

შლაპა სკამზე ჩამოკიდა, პიჯაკის ჯიბიდან ბოთლი ამოიღო და მაგიდაზე დადო. ბოთლს „პშენიჩნაია“ ეწერა. არაყს შოკოლადის ორი ფილაც მიუდგა გვერდით.

ამ საკმაოდ უცერემონიო საქციელისთვის არაერთგზის მოგვიხადა ბოდიში. არ გაგიკვირდეთ ჩემი საქციელი, შემე-



ძლო რესტორანში დამეპატიუნეთ, მაგრამ არ მინდა „მაყურებელთან“ პრობლემები შეგიქმნათო.

რუსულს, რომ იტყვიან, ამტვრევს.

„მაყურებელი“ რას ნიშნავს-მეთქი.

რასაკვირველია, ტურისტულ ჯგუფს ყოველთვის ახლავს ერთი მეთვალყურე კგბ-დან. მე მგონი, ეს ამბავი თქვენთვის ახალი არ უნდა იყოსო.

დუმილით და თავის დაქნევით დავუდასტურეთ, რომ ჩვენც, „რასაკვირველია“ რალაც-რალაცებში ვერკვეოდით.

მერე ჩვენმა საუბარმა ასეთი სახე მიიღო:

სტუმარი – მოგეწონათ ფინეთი?

მე – ძალიან.

სტუმარი – თქვენ ხომ ძალიან შეზღუდული პროგრამა გქონდათ.

გურამი – არც ისე შეზღუდული. სამ ქალაქში ვიყავით და ამ ქალაქში თითქმის ყველაფერი დავათვალიერეთ.

სტუმარი – გული რაზე დაგნყდათ?

მე – კითხვა ვერ გავიგე?

სტუმარი – რას ისურვებდით, რომ თქვენს ქვეყანაშიც ყოფილიყო?

მე – რა ვიცი... ჩვენ ფინეთს მუშტრის თვალთ არ ვუყურებდით. შთაბეჭდილებები, რა თქმა უნდა, ბევრი გვაქვს. ჯერ შედარებისთვის არ მოგვიცლია.

სტუმარი – არ მოგეჩვენათ, რომ ფინეთთან შედარებით ძალიან ღარიბ ქვეყანაში ცხოვრობთ?

გურამი — მაგალითად? რას გულისხმობთ?

სტუმარი – თქვენთან ლუდიც კი თავისუფლად არ იშოვება, მაღაზიებში საღებავი რეზინიც არ იყიდება, არ გაგიკვირდათ, რომ ამ ჩრდილოეთის ქვეყანაში ტროპიკული ქვეყნების ხილი – ანანასი და ბანანი თავზე საყრელადაა?

გურამი – ჰო, ეგ, რა თქმა უნდა, ცუდი არ არის.

სტუმარი – იყიდეთ რამე? თქვენთვის და ახლობელებისთვის?

მე – რა რამე?

სტუმარი – ტანსაცმელი ან ფეხსაცმელი. საბჭოთა კავშირში ჯინსი მარტო მოსკოვში – „გუმში“ იყიდება და იქაც იმხელა რიგებია, რომ თუ ფრთხილად არ იქნა, შეიძლება დაორსულდეს ქალი (იცინის).

გურამი – ტანსაცმლის საყიდლად არ ჩამოვსულვართ. თბილისშიც ვახერხებთ ტანსაცმლის შოვნას და როგორც ხედავთ, არც თუ ცუდად გვაცვია.

სტუმარი – ალბათ, სპეკულანტებისგან ყიდულობთ.

გურამი – არც უმაგისობაა.

სტუმარი – იცით თუ არა, რომ ფინეთში საერთოდ არ არსებობს სიტყვა „სპეკულანტი“ – გადამყიდველი.

ამაზე ჩვენ არაფერი ვუპასუხეთ. უხერხული სიჩუმე ჩამოწვა. სტუმარმა არაყი სამ ჭიქაში ჩამოასხა. ჩვენს შეხვედრას გაუმარჯოსო. დალია და ჭიქები გამოგვინოდა. ჩვენც შევსვით „მშობლიური პშენიჩნაია“, როგორც სტუმარმა გვითხრა. მერე მოგვიბოდიშა.

სტუმარი – მაპატიეთ, რომ სოციალური თემით დავინყე საუბარი. სხვა რამ მინდოდა მეთქვა. იმ „სხვა რამის“ გაგებას თქვენ, რასაკვირველია, ათ დღეში ვერ მოასწრებდით. ეს გახლავთ პიროვნების თავისუფლება. თქვენ ახალგაზრდა, პროგრესული ინტელიგენტები ხართ, მითხრეს, რომ უნივერსიტეტის ასისტენტ-პროფესორები ხართ და უკვე გეცოდინებათ, რას ნიშნავს თავისუფლება. ფინეთში არც ერთი პოლიტიკური პატიმარი არ გვყავს, საბჭოთა ციხეები კი სავსეა პოლიტიკური პატიმრებით.

მე – ნება მომეცით, არ დაგეთანხმოთ, იქნებ მთლად სავსე არ არის, იქნებ ერთი-ორი ცარიელი ადგილია დარჩენილი.

სტუმარი – თქვენ ირონიის ნიჭი გქონიათ (გაიღიმა), მე

კარგად მესმის თქვენი მდგომარეობა. არ მენდობით, მაგრამ აბა გულში ჩაიხედეთ. რა თქმა უნდა, საბჭოთა კავშირში პოლიტიკური დანაშაულის გამო არ ასამართლებენ. სხვა საბაბს მოუძებნიან და თუ ვერ მოუძებნეს, ჭკუიდან შეშლიან და საგიჟეში განამწყვდენ.

გურამი – ჩვენ პოლიტიკოსები არა ვართ, არ შეიძლება უფრო მარტივ თემებზე ვილაპარაკოთ?

სტუმარი – მაპატიეთ, ჩემი დანყვევლილი ცნობისმოყვარეობა.

მე – ცნობისმოყვარეობა თუ პროფესია?

სტუმარი – თქვენ ორივენი ქართველები ხართ?

ორივემ თავი დაუჭინეთ.

სტუმარი – თქვენს შორის ერთ-ერთი ებრაელი ხომ არ არის?

მე – არა, ბატონო.

სტუმარი – არ გეჩვენებათ, რომ საქართველო, როგორც დამოუკიდებელი სახელმწიფო, დედამიწაზე არ არსებობს.

გურამი – არ გვეჩვენება.

სტუმარი – თქვენ რუსეთმა თითქმის ორასი წლის წინათ მოტყუებით დაგიპყროთ და სახელმწიფოებრიობა დაგაკარგვინათ. 1939 წელს ჩვენც იგივეს გვიპირებდა, მაგრამ ფეხი არ ჩაუვიდა, ყველანი როგორც ერთი, დავდექით და რუსი ლორები ფინეთში არ შემოვუშვით. მე ვიცი, რომ ქართველები თავისუფლებისმოყვარე ხალხი ხართ. რატომ ხართ ჩუმად. მსოფლიოს პატარა ერებმა გაიღვიძეს, თქვენ კი ხმას არ იღებთ.

გურამი – არ ფიქრობთ, რომ ცოტა არ იყოს, პათეტიკურად და პრავაკაციულად გველაპარაკებით?

მე – თავისუფლებისთვის ყველა ქართველი იბრძვის თავისებურად. მისი შესაძლებლობის ფარგლებში.

სტუმარი – სწორედ ეგ პასუხი მინდოდა თქვენგან მომესმინა. ნუ გეშინიათ, თქვენი სიტყვა წინ არ დაგხვდებათ. მე,

როგორც ებრაელი, ფინეთის მოქალაქე, ვალდებული ვარ, ერთი წინადადება შემოგთავაზოთ: დარჩით ფინეთში. აქ ყოველგვარ პირობებს შეგიქმნით.

გურამი – ვთქვათ, დაგეთანხმეთ. მერე?

სტუმარი – უბრალოდ თავისუფალ ქვეყანაში იცხოვრებთ. თქვენგან სანაცვლოდ არავითარ სამსახურს არ მოვითხოვთ. თუ გნებავთ, ამალამ ანონ-დანონეთ ყველაფერი და ხვალ დილით დაგირეკავთ პასუხისთვის.



ფინეთი, 1966.

თითქმის ყველა შენობას თავისი ულამაზესი სკვერი აქვს.

მე – შეგიძლიათ არ დარეკოთ. ჩვენ უკვე ავწონ-დავწონეთ.

სტუმარი – უარი?

მე – რა თქმა უნდა.

სტუმარი (გურამს მიუბრუნდა) – თქვენ?

გურამი – ჩვენ ცოტა მეტი ვიცი, ვიდრე თქვენ წარმოგიდგენიათ. რომ შემოხვედით, უკვე ვიცოდით, რაც უნდა გეთქვათ.

სტუმარი – იქნებ უფრო დამაჯერებელი უარი გეთქვათ.

მე – მეტი დამაჯერებელი რაღა გნებავთ. ჩვენ ქართველები ვართ.

სტუმარი – (თითქოს გაეხარდაო) – ეგ მართლაც პასუხია და კარგი პასუხიც...

კარგად ბრძანდებოდეთო, ხელი ჩამოგვართვა, შლაპა დაიხურა და წავიდა.

## ინგლისი – 1969

### 11 სექტემბერი

ლონდონის აეროპორტი. პასპორტსაც კი უგულოდ გვისინჯავენ. არავითარი ჩხრეკა, ვის დაეკარგე, ვინ გეძებს. სასტუმრო „ევროპა“, არცთუ ფეშენებელური.

ვიზიტი საელჩოში. საელჩოს პირველი მდივანი ანდრეი ჩერენცოვი კუზნეცოვზე გვესაუბრება. ცალ-ცალკე არ იართო, მაღაზიებში ნურაფერს მოიპარავთო. კომენდანტს ვკითხე ჩიკვაიძე, საელჩოს პირველი მდივანია ალექსანდრე ჩიკვაიძე – ოქრო ბიჭი, გამოვარდა, გადაგვეხვია.

მერე საშა ჩიკვაიძესთან ერთად სამსაათიანი სეირნობა ლონდონში. ზღაპარს ჰგავს. ღამდება. ეს ქალაქი კი არა მუზეუმია, გამოფენაა იმისა, რაც ადამიანის თვალსა და ხელს შეუქმნია დღემდე, აი ამ წუთამდე.

გოგონები! ულამაზესი ინგლისელი ლედი. თეთრი თმებით (გრძელი, სწორი თმა მკერდამდე წვდება, სახე ძლივს მოუჩანს). კაბა? ნულარ იკითხავთ. ეს კაბა არ არის, წელს ქვემოთ ერთი მტკაველი არ იქნება. მოდის ფეხშიშველა მანქანებით დაბურულ ქუჩაზე. ლონდონის გრილ ასფალტზე ფრაკიან მამაკაცებსა და „ბიტლს“ ბიჭუნებს შორის. მოდის ნახევრადშიშველი (ნახევრად) ფეხშიშველი ულამაზესი ქალი (ერთი კი არა უამრავი) როგორი სანახაობა იქნება!

ჰაიდ პარკი – ლონდონის ცენტრალური პარკი. ხელმძღვანელი დებილი გვყავს, არაფრით არ გაიკვირვოთო (!?)

ალბერტ ჰოლი – საკონცერტო დარბაზი შვიდი ათასი კაცისათვის.

ოქსფორდ სტრიტი – სავაჭრო ქუჩა.

პიკადილის მოედანი. უამრავი ხალხი ირევა. ყველა თავის ფიქრებში გართული. რომ ეს მანქანები არა, ლონდონში ბუზის გაფრენას გაიგონებ. ადამიანები ერთმანეთს ჩურჩულით

ელაპარაკებიან. არავითარი შესტიკულაცია. ჰოლში ტელევიზორიც კი ჩურჩულებს.

ტრაფალგარის მოედანი. „!ოჰო“ სტრიპტიზების და ბოზების ქუჩა. ნახევრადშიშველი ანგელოზები, ზღაპრული ფეხები ბოლომდე მოუჩანთ. ელიან მუშტარს. ინგლისში თუ ფული გაქვს, სიცოცხლის მანძილზე ერთ წუთსაც არ მოგწყინდება.

ტრაფალგარის მოედანი – ადმირალ ნელსონის უმაღლესი ქანდაკება. რატომ ასე მაღლა? აქედან ზღვა მოჩანსო, გიძმა.

სიტიში დედოფალს შესვლის უფლება არ აქვს. დემოკრატია, ტრადიცია.

ლონდონ-ბრიჯი – უძველესი ხიდი. ამერიკამ იყიდა.

ვილჰელმის სახლი – მე-10 საუკუნის ციხე – ციხე კი არა ქალაქია. აქ დედოფლის ძვირფასეულობა ინახება.

მეზღვაურთა ეკლესია. დაღუპული გემების მაკეტებით. „დაღუპულ მეზღვაურს ხომ სხვა სამარე არა აქვს“ – ამბობს გიდი.

ტემზას სანაპირო. ელიზაბეტ I-ის თეატრი. შექსპირი აქ გამოდიოდა. ვატერლოოს ხიდი – ისტორია. ლონდონის მუნიციპალიტეტის შენობა ტემზის ნაპირას.

პარლამენტის მოედანი. პარლამენტის სახლი – ულამაზესი. 190 წლისაა. „ბიგ ბენ“ – მთავარი საათი. „დაუნინგ სტრიტ“ 20 – იქ ახლაც ზის ვილსონი. სინათლე ანთია. სამსართულიანი სადა სახლი, შავი აგურით ნაშენები.

სალამო.

კვლავ ჩიკვაიძემ წაგვიყვანა თავისი მანქანით. კუზნეცოვის ამბავი გვიამბო. ჩვენი სასტუმროდან გაქცეულა. ახალგაზრდების ბარი. ღრიანცელი. ტევა არ არის. არ ცეკვავენ ადგილი არ არის, დგანან და ერთმანეთს ჭიპებით ეხახუნებიან. არავითარი არევ-დარევა. ზრდილობა. ადგილი არ არის, მაგრამ იმასაც გითმობენ! ლუდი დავლიეთ. ჩვენს ზევით, თავზე, გვერდზე, წინ წყვილები. კოცნა. თმის სუნი, დამატრობელია. ჩემამდე მოდის. მაღალი ანგელოზები. დაღლილსახიანი ბიჭები. გამხდრები. გრძელი თმებით.

## 12 სექტემბერი

დილაა. 7 საათი. ინგლისელები სამსახურში მიიჩქარიან. შარვლები ქალებს, კაცებსაც. ღამის ბარიდან თვალამოღამებული ახალგაზრდები ბრუნდებიან. თითქოს ერთი კოცნა დარჩათ (გეგმით გათვალისწინებული) და შუა ქუჩაში ამთავრებენ.

მარქსის საფლავი – ჰაიგეთის სასაფლაო. წარწერა „პროლეტარებო ყველა ქვეყნისა შეერთდით“ ფილოსოფოსები სხვადასხვაგვარად ხსნიდნენ სამყაროს, მთავარია შეცვალო იგი! ძველი სასაფლაოა. ჩვენს სასაფლაოებს წააგავს. რა გვინდოდა აქ? მძულს მარქსიზმი.

წმინდა პავლეს ტაძარი – კოლოსალური ნაგებობა. შიგნით სიგრძე 200 მეტრი იქნება. კედლის მხატვრობა არ არის, მაგრამ თვალში გვეცემა ზღაპრული ჩუქურთმები. ძალიან მაღალია. ტაძარში ისევ ფეხშიშველი გოგონები. თმები და სწორი, სუფთა, ღამაზი ბარკლები. ეს მოდა არ უნდა გადავარდეს. ინგლისში ზედ ტაძრის წინ ჩიტებივით ჩამომსხდარი „ჰიპები“ ძალიან უხდება ტაძარს. ჩემზე არცერთ ტაძარს არ უმოქმედნია არასოდეს ასეთი გრანდიოზულობით. სვეტიცხოველი სხვაა. სვეტიცხოველი ჩემი სულია, ჩემი სისხლი და ხორცი და ამიტომ არ ამოდის ჩემი გულიდან.

მე-10 საუკუნის სამეფო ციხე-ქალაქი მეფის სასახლით, ციხით. მის შემოვლას ჩქარი ნაბიჯით ერთი საათი უნდა.

სალამო.

ვნახე ფილმი „პირველი და უპირველესი“ მელოდრამა სიყვარულზე. მამაკაცი, ცოლი, 17 წლის საყვარელი, გაორება, გამშიშვლებული სექსუალიზმი, საბოლოოდ არაფერი.

ღამე. ლონდონის ზღაპრული ღამე. რეკლამები, რეკლამების ილუმინატორების თვალისმომჭრელი შუქი. გიდი მომყვება გვერდით. ინგლისური სად ისწავლეთო? ეს თუ სწავლაა, სკოლაში მეთქი.



### 13 სექტემბერი

საუზმის შემდეგ პარლამენტის შენობასთან და სააბატოსთან ვართ. ჩუქურთმების ზღაპრული სიმრავლე. პარლამენტის შენობაში ინგლისში გამოსული ყველა კანონი ინახება. ინგლისის დემოკრატია 500 წლისაა, თქვენი კი მხოლოდ 50-ის უყვართ თქმა ინგლისელებს.

პარლამენტის ყველა სხდომის სტენოგრამა გამოკრულია კედელზე, ვისი სიტყვაც გინდა წაიკითხე. პარლამენტმა თუ არ მოიწვია, მეფეს შენობაში შესვლის უფლება არა აქვს.



ლონდონი. ყვავი ტაურთან.

ჩემბერლენი. სკამი სადაც იჯდა ჩერჩილი. აქ იდგა ჩერჩილის კუბო. იგი პარლამენტის სასახლიდან გამოასვენეს. აქ ხდება მთავრობის წევრთა მიღება. შარშანწინ აქ მიიღო ვილსონმა კოსიგინი.

დიდი სააბატო ტაძარი. ვესტმინსტერის სააბატო. აქ დასაფლავებულია ლორდი ბაირონი, ტომას ელიოტი და სხვა პოეტები. პოეტები დაკრძალული ტაძარში. კარგია!

სადილად ქალაქ ვინძორში წაგვიყვანეს. 30 კილომეტრია ლონდონიდან. შექსპირის „ვინძორელი ჯამბაზები“ გამახსენდა.

### 14 სექტემბერი

ლივერპულში მივემგზავრებით მატარებლით. ქალაქგარეთ სტუდენტთა სასტუმრო ფეშენებელური. ირგვლივ ფეხბურთის და ჩოგბურთის უთვალავი სტადიონია. ჩვენ თუ გვათამაშებენ მეთქი, არაო, ეს საკუთარი მოედნებია, აქაური კლუბის წევრი უნდა იყოთ და სანევროს იხდიდეთო.

ოთახებში ცალ-ცალკე მოგვათავსეს. დიდი სანავსადგურო გემია. ცნობილი თურმე გარდა სხვა რამეებისა გარყვნილებითაც. ნავსდგურთან ჯგუფ-ჯგუფად იდგნენ ულამაზესი გოგოები. გიძმა ისინი მუშტარს ელიანო. ერთ ფუნტად თუ გინდა საფლავში ჩაგყვებიანო. მაგრამ საშიშია, ისინი ყოველგვარ ვენერიულ ავადმოყოფობას ავრცელებენო. ღმერთო გვისხენი ცდუნებისგან! ქალაქის მუნიციპალიტეტი. კეთილმონყობის სამმართველო. მთავარი არქიტექტორი გვლებულობს.

ლივერპული ერთ-ერთი ყველაზე დიდი პორტია დასავლეთ ინგლისში. ქალაქის ცენტრი გადატვირთულია და მთელი ქალაქის რეკონსტრუქციას ვახდენთო. დაწვრილებით გაგვაცნეს ქალაქის გენერალური გეგმა. ერთმა სულელმა რუსმა თავისი აზრიც კი გამოთქვა, კარგია, მომწონსო. ერთმანეთს რაღაც გადაულაპარაკეს ინგლისელებმა და გაეცინათ.

სერ არნოლდი მოგვმართავს, ყავით გაგიმასპინძლებითო. ვის უნდა ყავა ხელი აწიეთო. ყველამ ჩვენს დებილ



ხელმძღვანელს შეხედა. უხერხული სიჩუმე ჩამონვა. არ იცინა, რა ქნან. მე ავნიე ხელი – „ოჰო, კარგია ერთი ყავა“ – თქვა მასპინძელმა. ჩვენაო, ადგა ხელმძღვანელი, ახლახან ვისაუზმეთ და არ გვინდა ყავაო. სერ არნოლდი შეწუხდა. მე რომ ყავა მომიტანეს და სმა დავინყე, ეტყობა ყველას ნერწყვი მოადგა. ერთმანეთს რაღაც გადაულაპარაკეს, მერე ადგა ხელმძღვანელი და ამბობს რეზოს სოლიდარობის ხათრით ყველას მოგვიტანეთ ყავაო. ინგლისელები დანყდნენ სიცილით. ერთი სიკვდილი გავათავე. შუბლზე ცივი ოფლი წამომივიდა და რუსულად შევიგინე. ჩემს გვერდით მჯდომმა რუსმა ხელი მომიჭირა (კარგი, ბიჭო) გაჩერდი, თუ ძმა ხარ, თავისი უბედურებაც ეყოფათო.

ლივერპულში რეკონსტრუქციის შემდეგ ცალკე უნდა იყოს საცხოვრებელი ქალაქი. უამრავი აუზი, უამრავი სტადიონი, ინგლისი სპორტით ცოცხლობს. რამდენ ხანში შეასრულებთ ამ გენერალურ გეგმას მეთქი. 8 წელი უნდაო. მე ვიხუმრე ჩვენთან ხუთწლედს სამ წელიწადში ვასრულებთ, ჩვენი დელეგაციის ყველა წევრის თხოვნაა, იქნებ როგორმე შვიდ წელიწადში მოასწროთ მეთქი. გაიცინეს, ვეცდებითო. დელეგაციის ხელმძღვანელს კაპლი იუმორის არა აქვს. მოვიდა და ყურში მეუბნება – „что ж ты такие глупые вопросы задаёшь?“ მე გამეცინა.

ვისადილეთ ჩინურ რესტორანში. მერე დავათვალიერეთ ლივერპულის ეთნოგრაფიული მუზეუმი და დიდი აკვარიუმი.

## 16 სექტემბერი

ავტობუსში რადიომ გამოაცხადა: ახლა მოისმინეთ „რუსეთის ამბები“. გიძმა ჩუმად გადაულაპარაკა შოფერს. რადიო გამორთეს.

ვართ უზარმაზარ საკონდიტრო ქარხანაში. ათასგვარი კა-

მფეტი, შოკოლადი ბისკვიტი და „პეჩენია“ (ნამცხვარი) კეთდება“ ჯერ სანამ დავათვალიერებინებდნენ, მოგვიტანეს ყავა და ამ ქარხნის ნამცხვარი ათასგვარი. ჩემს გვერდით მჯდომ ტურისტს ვეუბნები; ეს ნამცხვარი სულ შევჭამოთ, თორემ ერთ-ერთში რადიოჩამწერია და ჩვენს ლაპარაკს ყველაფერს ინერს მეთქი. ორმა დამიჯერა. მივყევით და ვჭამეთ. ხელმძღვანელს ვეკითხები, სამი კოვზი შაქრის ჩაყრა თუ შეიძლება მეთქი, მომიბრუნდა და სერიოზულად მიხსნის : შეხედე სხვებს და რამდენიც სხვამ ჩაყაროს, შენც იმდენი ჩაყარეო. ერთი გაცინება ყველაფერს მირჩევნია, მაგრამ პატრონი არ მყავს.

შევედით ქარხანაში. ყოველ ფეხის ნაბიჯზე შოკოლადს და ბისკვიტს გვანოდებენ. უარის თქმა მრცხვენია და ვჭამ. ყელში ამომივიდა, მგონი ჩემს ცხოვრებაში აღარ შევჭამ შოკოლადს, ხომ იცი ჩემი ამბავი. მე ვთქვი მერე სანანებლად არ დამირჩეს მეთქი, თანაც ისეთი სიყვარულით გვანოდებენ, რომ უარს ვერ ეტყვი. მოსკოვში გაგვაფრთხილეს ტექნოლოგიაზე შეკითხვები არ მისცეთ, სულერთია მაინც არ გიპასუხებენო, იქ ყველაფერი ფული ღირსო. იმ კაცმა (დირექტორის მოადგილემ) დანვრილებით აგვიხსნა ყველაფერი. მერე ქარხნის სქემა და მთელი ტექნოლოგიური პროცესის ნახაზი სათითაოდ ყველას ჩამოგვირიგა საჩუქრად თანაც ამას დაუმატა ერთი ყუთი შოკოლადი. მაშინვე ყველამ ყუთებს დახედა და კითხვა დაიწყეს; რა ღირსო, მაშინ მე ლოზუნგი წამოვისროლე: „ნე სმეი პროდატ პადარკი“ სიცილით დაიხოცნენ.

საღამოს ლივერპულის დიდ სიმფონიურ კონცერტზე წაგვიყვანეს. პირველ ნომრად ბრამსის „აკადემიური ფესტივალის უვერტიურა“ შესრულდა. შესვენებაზე ერთ ჩვენს მეზუფეტე კომკავშირელ აქტივისტს ვეკითხები: როგორ მოგეწონა მეთქი. „ნიჩევო სებე არკესტრ. ნო ეტუ პერვუიუ სიმფონიუ კანერნო მოჟნო ბილო სოკრატიტ.“ გული შემინუხდა. სანამ თეატრში

მივიდოდით ყველამ ერთხმად უთხრა გიდს (კარგი ბიჭია, რობინი ჰქვია. ნამდვილი ჯენტლმენია) სიმფონიებზე ვგიჟდებითო. ახლა თეატრში ვარ. მე კარგად მესმის სიმფონია და ყურადღებით ვუსმენ. ჩვენები ზოგი ამთქნარებს, ზოგი კეფას იფხანს, ზოგი მეზობელს ესაუბრება და ზოგს უბრალოდ სძინავს. გიდი იმშუშნება „ვაი თქვენს პატრონს უბედურს“, ამბობს ალბათ გულში. შესვენებაზე გიდმა ჩვენი ყურადღება მიაქცია თეატრის ქერზე დაკიდებულ დიდ ვარსკვლავს. ესაო, სპეციალურად თქვენთვის დაკიდესო – გვითხრა ირონიულად. ზოგმა მართლა დაიჯერა და სერიოზული სახე მიიღო. რა იცინა რომ ეს ხუთქიმიანი ვარსკვლავი ამ დარბაზში 183 წლის წინ დაკიდეს.

### 17 სექტემბერი

დავათვალაიერეთ უზარმაზარი ტაძარი. მეგონა მე-12 საუკუნის აქეთ არ იქნებოდა აშენებული, გიდი გვეუბნება 40 წლისაა და კიდევ არ დაგვიმთავრებიაო. ეს ექსპერიმენტალური შენობააო. გვინდოდა გამოგვეცადა ამ ტექნიკის პირობებში შევძლებდით (და რამდენ ხანში შევძლებდით) თუ არა ძველებური ტაძრის აგებასო. რომ შეხედავ, სვეტიცხოველს მოგაგონებს. ოღონდ უფრო დიდია. გიდი გვიხსნის – მიუხედავად კოლოსალური ტექნიკისა, მაინც ვერ ვაშენებთ ისე სწრაფად, როგორც ამ ათასი წლის წინათ აშენებდნენო.

მერე დავათვალაიერეთ უახლესი ტაძარი მოდერნისტულ სტილში აგებული. ორლანი უკრავდა, აკუსტიკა ძლიერი. ვესტუმრეთ ლივერპულის უნივერსიტეტს. შეგვეგება სტუდენტთა ახალგაზრდული დეპარტამენტის თავმჯდომარე. გვკითხა სხვათაშორის; თქვენთან რა უფლებით სარგებლობს ახალგაზრდული ორგანიზაციაო, ადგა ერთი კრეტინი და ეუბნება ჩვენთან სტუდენტებს თუ არ მოსწონთ რექტორი ან პრორექტორი იმ წუთში შეუძლიათ მისი გაგდებაო. გაუკვირდა, მერე

ირონიულად გადაულაპარაკეს ერთმანეთს და თქვეს, „ყოჩაღ, თქვენ შესანიშნავი, ძლიერი ორგანიზაცია გქონიათო. აი, ჩვენ მაგალითად რექტორის მოხსნა არაფრით არ შეგვიძლიაო. ჩვენ შეგვიძლია საკითხი დავაყენოთ, ვინმე დავარწმუნოთ, მაგრამ რაც შეეხება უნივერსიტეტიდან გაგდებას, ეს არ ხელგვენიფებისო. აშკარად დავგვცინოდნენ. სისხლი ტვინში ამივარდა, ავდექი და ვთქვი: ჩვენი ამხანაგი ტყუილს ამბობს მეთქი. ჩვენთან სტუდენტებს არ შეუძლიათ რექტორის გამოცვლა მეთქი და საერთოდ არა მგონია რომ ჩვენი ახალგაზრდული ორგანიზაცია უფრო ძალმოსილი იყოს ვიდრე ინგლისშია მეთქი.

დამთავრდა შეხვედრა თუ არა, მომცვივდნენ და კინალამ დამახრჩვეს; შენ შეგვარცხვინეო, შენ საბჭოთა ქვეყნის პატრიოტი არ ყოფილხარო. მე ვუთხარი მე სიმართლის პატრიოტი ვარ მეთქი. მიმიფურთხებია თქვენი ტრაბახისთვის მეთქი, მე ჯაშუშად და პროპაგანდისტად არ გამოვუგზავნივართ, ტურისტად გამოგზავნეს მეთქი.

სალამოს ერთმა მშვენიერმა ოჯახმა, არქიტექტორმა თერთმეტივე შინ მიგვინვია. ძვირფასად მორთული ინგლისური კოტეჯი. ის კაცი, მთელი მისი ოჯახი გაოცებული იყო. ხელს გვკიდებდნენ, გვსინჯავდნენ, „უცნაურ“ შეკითხვებს გვაძლევდნენ. როგორ გამოგიშვეს საბჭოთა კავშირიდანო.

### 18 სექტემბერი

დავათვალაიერეთ კულინარიული სკოლები. დირექტორმა მიგვიღო, დიდებული სადილი გაგვიმართა. 15-16 წლის გოგონები თავს გვევლებოდნენ. მერე გაირკვა, ისინი თურმე გამოცდას აბარებდნენ. საოფიციანტო ფაკულტეტის დღის დასწრებული სტუდენტები იყვნენ. თითოს 33 ნაირი კერძი და 33 ჩანგალი მოგვიტანეს. გამოცდა ყველამ ჩააბარა. მხ-

ოლოდ ერთ პატარა ლამაზ გოგოს, სალათას რომ მანოდებდა ცოტა დაეღვარა. შენიშვნა მისცეს. უფრო აუკანკალდა ხელი, მე წავეხმარე და შეფს ვთხოვე ამაში ნიშანს ნუ დაუკლებთ მეთქი.

ქალაქის მერმა ბატონმა მაიერმა მიგვიღო მეუღლითურთ. დიდი სიყვარულით მოგვიკითხა, დაინტერესდა რა მოგვწონს ინგლისში. შენუხდა რომ დრო არა აქვს ყოველდღე იყოს ჩვენთან. ლივერპული დიდი ქალაქია, დღეში 13 საათს ვმუშაობო. მიღება დიდხანს გაგრძელდა. მერი ხომ არ გვეტყოდა წადითო. არა და ჩვენი ხელმძღვანელი ვერ ხვდება რომ დაემშვიდობოს. მერი და მისი მეუღლე ფეხზე დგანან. ვატყობ დაილაღნენ. ძალით იღიმებიან. ადგა ერთი „შეფ-მზარეული“ და მერს ეკითხება, რომელი ფეხბურთის გუნდის გულშემატკივარი ხართ. მერმა გაუღიმა, ფეხბურთისთვის არ მცალიაო. ავდექი და ვთქვი: ამხანაგებო უხერხულია ამდენ ხანს მერის მოცდენა. ჩვენთან ბუხრაშვილიც კი არასოდეს ღებულობს სხვა ქვეყნის ტურისტს. ამ კაცმა კი მიგვიღო და თავზე ნუ დავაჯდებით მეთქი. როგორც იქნა, მიხვდნენ რომ ვიზიტი დამთავრებული იყო.

სალამოს თავისუფალი დრო გვექონდა. წადი სადაც გინდა, აკეთე რაც გინდა, ყურადღებას არავინ გვაქცევს. ვახშმის შემდეგ ოჯახებში ჩამოგვარიგეს. ერთი ინგლისელი მუშის ოჯახში მოვხვდი. საკუთარი მანქანა და სახლი აქვს. 9 ოთახიანი, ორსართულიანი. მშენებლად ვმუშაობო. დიდხანს ვისაუბრეთ, თარჯიმანი არ გამომაყოლეს, შენ ცოტა რაღაცას მაინც გაიგებო. სამი საათი ველაპარაკე იმ ოჯახს ინგლისურად და მე თვითონ მიკვირდა. რაც მოვინდომე თითქმის ყველაფერი გავაგებინე. ბოლოს იმდენად გავიტეხე ენა, რომ უკვე თავისუფლად ვლაპარაკობდი. (ვანვებოდი, როგორმე ქართული აქცენტი არ მქონოდა) მასპინძელი ყოველნუთში მეუბნებოდა; რა მშვენივრად ლაპარაკობთო ინგლისურად. ალბათ მამხნევებდა. სალამოს ვიღაც უცხომ ექვსი

კაცი ბარში წაგვიყვანა. ლუდი გვასვა. რუსები ძალიან მიყვარსო.

ოჯახში ყოფნისას მასპინძელი ხშირად გვეკითხებოდა, გვაქვს თუ არა ტელევიზორი, რადიო. შეგვიძლია თუ არა, უსაშვებოდ ერთი ქალაქიდან მეორეში გადასვლა. შეგვიძლია თუ არა, გაზეთებში გამოვთქვათ ჩვენი პოლიტიკური შეხედულებანი. რას ვფიქრობთ ჩეხოსლოვაკიის საკითხზე და ა.შ.

ჩვენ, რა თქმა უნდა ვპასუხობდით, როგორც დაგვარიგეს. სანამ უნდა ვატყუოთ მსოფლიო? თუმცა ყველამ ყველაფერი იცის...

## 19 სექტემბერი

ლივერპულის კამფეტების ქარხანაში ვართ. თეთრი სუფთა ხალათები ჩაგვაცვებს და ქუდეები დაგვახურეს. გავლამაზდით. საამქროში ერთი რუსი მიუახლოვდა მუშას და ჰკითხა; „как вам работается?“ ვერც იმ მუშამ და ვერც თარჯიმანმა ვერ გაიგო, რა სურდა ამ ჭკუის კოლოფს.

## 22 სექტემბერი

ჩვენ აქ შუადღით ჩამოვედით. სამრეწველო ქალაქი. ორსართულიანი სახლებით. სასტუმროს თანამშრომელმა ახალგაზრდა ქალმა თავისი მანქანით 4 კაცი ფეხბურთზე წაგვიყვანა. მანჩესტერის და ბირმინჰემის გუნდები ხვდებოდნენ ერთმანეთს. აი სანახაობა ეს იყო...

მე ვიცოდი ინგლისელების სიღინჯის და სიღარბისლის შესახებ, ფეხბურთის მაყურებლებმა ერთბაშად გამიქარწყლეს ჩემი წარმოდგენა. ისინი სტადიონზე მოდიან დილით, საყვირებით, თვითნაკეთი მაშხალებით და ყველაფრით რითაც

კი შეიძლება ხმაურის ატეხვა. სტადიონზე ერთი ღრიანცელი სუფევს. სიმღერა, ტაში, დოლი, ღრიალი, გინება, ქება ერთმანეთშია არეული. აქტიურობენ ჯინსიანი გოგონები (ლამაზი ჭიპები რომ მოუჩანთ). ისინი გაჰყვირიან საოცრად ნაზი და სასიამოვნო ხმით. სიგარეტს ხელიდან გტაცებენ (ნაცნობს თუ უცნობს) და პირში იჩრიან, ვითომ ძალიან დელავენ. ეს ყველაფერი მშვენიერი სანახავია.

ბურთის გატანის შემდეგ ორმოცდაათამდე კაცი გავარდა მოედანზე და 3 წუთის განმავლობაში ეხვეოდნენ ბურთის გამტანს. პოლიციას ხმა არ ამოუღია. მერე დამშვიდნენ და ყველანი თავ-თავის ადგილს დაუბრუნდნენ. თამაში არც ისე საინტერესო, ძალისმიერი იყო. რომ დამთავრდა თითქმის მთელი სტადიონი მოედანზე შევარდა. გამარჯვებულებს ჰაერში ისვრიან, დამარცხებულებმა კი ძლივს შეასწრეს გვირაბში თავიანთ გაბრაზებულ გულშემატკივრებს.

სალამოს კინოში ვიყავით. ვნახეთ ორსერიანი ფილმი „ბრიტანეთის ბრძოლა“. სამამულო ომზე. გაუთავებელი სანახაობითი ფილმი, თვითმფრინავების ჩამოგდებაზე. ფილმი რომ დამთავრდა რობინს (ჩვენს გიდს) ვუთხარი რომ იგი სუსტი ფილმია, ამ და ამ მიზეზების გამო, არ დამეთანხმა. მითხრა რომ ეს ყველაფერი მე საბჭოთა ესთეტიკის გავლენით დავინახე, რომ ფილმი ბრწყინვალეა და იგი მთელს ინგლისში მალე უპოპულარესი ფილმი გახდებაო.

სალამოს ინგლისის ახალგაზრდა მუშებს შევხვდით. მომეჩვენა რომ მუშები გაუნათლებლები იყვნენ. თვით შექსპირიც კი წაკითხული არ ჰქონდათ. ატეხეს ღრიალის მაგვარი სიმღერა. ყვირიან გაუთავებლად. ერთ ხმაზე, არავითარი სმენა, არავითარი მუსიკალური მელოდია, ცდილობენ სიტყვები თქვან გამოთქმით და ამით, ეტყობა, დიდ სიამოვნებას პოულობენ. ვსვით ლუდი და დიდი მეგობრობით დავემშვიდობეთ. კარგია, მე მომწონს მუშური გულდიაობა, მაგრამ ფამილიარობას და ღრიანცელს ვერ ვიტან.

## 23 სექტემბერი

ისევ ლონდონში ვართ.

გზაში ერთი დიდი შოკოლადის ქარხანა დავათვალიერეთ; ყელში ამოვიდა შოკოლადი. ლონდონში უკვე აღარ დავიკარგებთ. საკუთარი ქალაქივითაა.

დილით ვესტუმრეთ „ტრეიდ-უნინთა“ საზოგადოებას (პროფკავშირებს). ორსაათიანი ლექცია გვიკითხეს ინგლისის პროფკავშირის უპირატესობაზე საბჭოთა პროფკავშირის მიმართ.

სადილის შემდეგ რას ვაკეთებთ მეთქი, ვკითხე დელეგაციის ხელმძღვანელს. სადილის შემდეგ პურის ქარხანაში მივდივართო. მე ვუთხარი, ხომ არ შეიშალებთ, ერთი დღე დაგვრჩა, ბრიტანეთის მუზეუმი არ დაგვითვალიერებია და „ხლებზავოდი“ რად გვინდა მეთქი, დაფიქრდა. ერთადერთი რაზეც დამეთანხმა ეგ იყო. შევცვალეთ პროგრამა და „ხლებზავოდის“ ნაცვლად ბრიტანეთის მუზეუმში მივდივართ.

რობინი მოდის ჩემთან, გაშლილი გაზეთი მოაქვს და მეუბნება თქვენ უტყუარი გემოვნება გქონიათო. რა იცით მეთქი, რა ვიცი და აგერ გაზეთში რეცენზიაა დაბეჭდილი ფილმზე „ინგლისი ომში“, რომელიც შენ გუშინ გააკრიტიკეო. საოცარია რეცენზენტს ზუსტად ის შენიშვნები აქვს გამოთქმული რაც შენ გამოთქვიო. მე ვუთხარი, იქნებ ორივე ვცდებით და იქნებ შენ მართალი ხარ მეთქი. არაო, მითხრა ეს კარგი ჟურნალისტია და მე მისი მჯერაო, ასე რომ ჩემი გუშინდელი სიტყვები უკან მიმაქვსო. აწი ყველაფერს დაგიჯერებთო. მესიამოვნა, მაგრამ არ შევიძრინე.

ინგლისელებმა ხშირად იციან კითხვა, ხელის დასაბანი ოთახი ხომ არ გაინტერესებთ? ეს იმას ნიშნავს, რომ ტუალეტის ოთახი (საპირფარეშო) ხომ არ გაინტერესებთო, ასეთი



შეკითხვით მოგვმართა ქალაქის მთავარმა არქიტექტორმა ლივერპულში. ჩვენმა ხელმძღვანელმა არ იცოდა, რას ნიშნავდა „ხელების დაბანა“ ადგა და სერიოზული სახით თქვა: „ჩვენ არ მოგვწონს რომ ასე ხშირად გვახსენებენ ხელის დაბანას, ჩვენ საბჭოთა ხალხი ვართ, ხელები სუფთა გვაქვს და თუ დაგვესვრება, როცა საჭიროა, თვითონ დავიბანთო.“ როცა არქიტექტორს ეს გადაუთარგმნეს, სირცხვილისგან განითლდა; დიდ ბოდიშს ვიხდი, მაგრამ ინგლისში ეს დიდ ყურადღებად და ზრდილობად ითვლებოდა. რუსული „ხომ არ გეფსმებას“ ნაცვლად ჩვენ ვამბობთ, ხელის დაბანა ხომ არ გინდათო.

ყველას ვეკითხები „ჰიპების“ შესახებ. როგორ შეიძლება ასეთი სიბინძურე და სანახაობითი სექსუალიზმი. მე აქ არ შემხვედრია კაცი რომელიც „ჰიპების“ მოქმედებას ამართლებდეს.

ინგლისში მუშები და ინჟინრები (ტექნიკური ინტელიგენცია) სხვადასხვა პროფკავშირს შეადგენენ. ინგლისელებს ძალიან არ უყვართ დილექტანტებთან და უვიცებთან კამათი. ამიტომ არჩევენ პროფესიონალურ კონტაქტებს, კლუბებს, თანამოაზრეთა აქტივებს, ვიდრე შემთხვევით პიროვნებათა ბაზრულ, ტოტალურ გაერთიანებას, როგორც ამას ადგილი აქვს ჩვენს „დიად“ ქვეყანაში. პროფკავშირის სანევროს ყველანი ერთნაირად 3 შილინგს იხდიან, მიუხედავად ხელფასისა.

ბრიტანეთის მუზეუმი განსაცვიფრებელია. იგი დედამიწაზე ყველაზე დიდი მუზეუმია. აქ ყველაფერია: ანტიკური ქანდაკებებიც და მუმიებიც, ქართული ხატიც ვნახე. გიდი მეუბნება სომხურიაო. კინალამ გავგიჟდი. აფსუს, მხოლოდ 2 საათი მოგვცეს ბრიტანეთის მუზეუმის დასათვალიერებლად. 2 საათში 2 დარბაზის გულდასმით დათვალიერებასაც ვერ მოასწრებ. არადა რამდენი დრო დავხარჯეთ სულელუ-

რი შეხვედრებისთვის მუშათა კლასთან და პროფკავშირის წევრებთან.

მაინც ბედნიერი ვარ, რომ 29 წლის ქართველი მწერალი საბჭოთა სატუსალოდან გამომიშვეს და ინგლისი მაჩვენეს.

ხვალ მოსკოვს მივემგზავრებით. ჩემოდნები გულდასმით გადაამოწმეთო, გიღმა, ვინმემ შემთხვევით პორნოგრაფიული ლიტერატურა ხომ არ ჩაგიდოთო. გადავამოწმე, არ ჩაუდვიათ. გადავრჩი.



26 ნოემბერი

თბილისის მატარებელმა დაიგვიანა. 1 საათზე ჩამოვედით მოსკოვში. კურსკის სადგურზე შუქრი აბაკელია დაგვხვდა. ენგურჰესის გვირაბგამყვანი ბრიგადის ხელმძღვანელი. უმაღლესი საბჭოს დეპუტატი, მკვეთრად გამოხატული მეგროული აქცენტით. კარგი ბიჭი ჩანს. ჩვენს დელეგაციაში 10 კაცია. სამი გოგონა: მანანა ზერაკიძე, ლალი ნიშნიანიძე, ნათელა სტურუა. ვაჟები: ჯიმშერ მაისურაძე (კიბერნეტიკოსია, კომკავშირის პრემიის ლაურეატი, ადრეც ვიცნობდი) გია გელაშვილი, თენგიზ გაბელია, ირაკლი ზედგენიძე, რუსი სერგეი, შუქრი და მე. სადგურიდან პირდაპირ „სპუტნიკში“ გავეშურეთ, იქ ლიტველთა ჯგუფი შემოგვიერთეს. ლიტველთა ჯგუფში ერთი ჩემი კოლეგაა, ვიტაუტას მარცინკიავიჩუსი, ახალგაზრდული ჟურნალის რედაქტორი. პოეტია, სიმღერებსაც წერს. მუხრან მაჭავარიანთან გავიცანი მგონი.

მივდექ-მოვდექი, მაგრამ სასტუმროსი ვერაფერი გავახერხეთ. როგორ არ მინდოდა ამერიკაში წასვლის წინ ორი ღამე „ალტაიში“ გამეთია. ჩემთვის კიდევ ვიშოვიდი ღამისგასათევს ცენტრში, მაგრამ არ მინდა ჯგუფს მოვწყდე. წესიერი, მხიარული ახალგაზრდები არიან.

იმ ღამეს სასტუმროდან არ გავსულვართ. ცენტრში გასვლას ვაპირებდით, მაგრამ სიშორემ და უკან დაბრუნების სიძნელემ დაგვაშლევინა, დავთვერით და დავწექით. გაბელია ხვრინავს. ნომერში ოთხნი ვართ.

27 ნოემბერი

ჩვენი დელეგაციის ხელმძღვანელია ვალერი ნიკოლაევიჩი განიჩევი. „მოლოდია გვარდიას“ დირექტორი. სერიოზული ამხანაგი ჩანს.

„სპუტნიკში“ ლექციებს გვიკითხავენ. გვამზადებენ. რვა ლექტორს მოვუსმინეთ. ახალი თითქმის არავის არაფერი უთქვამს. ასეთი საუბრები მე იმიტომ მეჩვენება უინტერესოდ, რომ საზღვარგარეთ ბევრჯერ ვყოფილვარ და მრავალჯერ გამივლია ეს გაკვეთილები. ვინც კაპიტალისტურ ქვეყანაში არის ნამყოფი, ჩემი ფიქრით „ლექციებიდან“ უნდა ათავისუფლებდნენ.

ამერიკის ნახვა ჩემი დიდი ხნის ოცნება იყო. მეშინია ცეკას კომისიის ტალღა მოსკოვში არ მომწვდეს. ნოდარ კიკვაძიდან ასეთ სისულელეს არ ველოდი. გული ძალიან მატკინეს. ცეკას მდივანი ვიქტორია სირაძე რომ არ ჩარეულიყო, კომისიამ ფაქტიურად უარი მითხრა! მოტივი? საზღვარგარეთ ხშირად დადიხართო! უკანასკნელად 1970 წელს ვიყავი. საქმე სხვა რამეშია, არაფერი მესმის...

6 საათზე საზღვარგერეთული პასპორტები დაგვირიგეს. ეტყობა ნავალ.

„მოსკოვში“ მე, შუქრიმ და ჯიმშერმა ვივახშმეთ. ლუდი ვსვით.

28 ნოემბერი

1 საათზე „შერემეტევოზე“ ვართ. საბაჟოს ანკეტები შევავსეთ. ამ დილით შხაპის შემდეგ მოსკოვის ყინვაში სასადილომდე ფეხით ვიარე და ეტყობა გავცივდი. რალაც უქეიფოდ ვარ.

საბაჟოს გასასვლელში „ავტომატები“ დაუყენებიათ. სახ-

აღისო სანახაობაა. ავტომატში უნდა გაიარო, ვისაც „რაიმე ისეთი“ მიაქვს, ზარი ანკრიალდება. ოთხჯერ გაატარეს ერთი ქალი, ამოუქექეს ჯიბეები, გახადეს პალტო, ზარმა კიდევ დარეკა. აქვე პატარა ოთახში შეიყვანეს. ალბათ უფრო გულმოდგინედ უნდა გაჩხრიკონ. ჩვენი რიგიც მოვიდა. ხელმძღვანელსაც აკადრეს ავტომატში გასვლა. ზარმა დაინკრიალა. ბოდიშის მოხდით ამოუბრუნეს ჯიბეები, ჩემი გასვლისას ზარი სდუმდა. მაინც ვერ გავიგე, რა ნივთებზე ფხიზლობდა ავტომატი.

„ილ-62-ში,, მოვთავსდით. უზარმაზარი თვითმფრინავია. ჩვენთან ერთად ამერიკელები და საბჭოთა მინისტრები (?) მგზავრობენ. მედეა ჩახავას მოვკარი თვალი. საბჭოთა კავშირ-ამერიკის მეგობრობის საზოგადოების წევრი ვარო. გვერდით საგარეო ვაჭრობის სამინისტროს წარმომადგენელი მიზის, საუბარი გავაბით. ხშირად მიხდება მივლინებით აშშ-ში ჩასვლაო. ჩვენს სავაჭრო ურთიერთობას დიდი მომავალი აქვსო. სხვათაშორის მითხრა 10 საათის შემდეგ ნიუ-ორკი ნაკლებად განათებულია, ქუჩაში არ გახვიდეთ. ბანდიტობის და ძარცვის საშიშროებააო. ჩვენი თვითმფრინავი არც თუ მაინცდამაინც ფეშენებელურია. ვცდილობ დავიძინო. ამაოდ. ლონდონში დავჯექით. ერთ საათს მოგვინევს დარჩენა. ნაცნობი აეროპორტის ნახვამ გამახარა. შუქრის ერთი ამერიკელი გადაეკიდა, დეპუტატის ნიშანი მაჩუქეო. შუქრი დგას და იცინის. მერე იმ ამერიკელმა ფული ამოიღო და შესთავაზა რამდენსაც გინდა მოგცემო. სამკერდე ნიშნების კოლექციას ვაგროვებ და ეს ნიშანი არ მაქვსო. მეტი გზა არ არის, შუქრის უნდა ვუშველო. ჩემი ინგლისურით შევეცადე ამეხსნა რომ ეს მთავრობის წევრობის ნიშანია და არა უბრალო „ზნაჩოკი“. (თუმცა თვითონაც, მე ვფიქრობ, მშვენივრად იცოდა რა ნიშანსაც იხვეწებოდა). უკმაყოფილოდ ამათვალიერა და გაგვეცალა. შუქრის ვუთხარი მოიხსენი და შეინახე მეთქი. დამიჯერა.

ისევ მოსაწყენი ხმაური თვითმფრინავში. თავი ვერაფრით გავირთე. 12 საათი ჰაერში ხუმრობა არ არის. მოსკოვის დროით ღამის სამის ნახევარზე ნიუ-იორკის ცაზე ვართ. ილუმინატორებს მივცვივდით. დიდებულად განათებული უზარმაზარი ქალაქია. მეტს ვერაფერს ვარჩევ. ცათამბჯენები აქედან არა ჩანს. ნიუ-იორკმა არ მიგვილო. თვითმფრინავმა ისევ მალლა აინია. კოკისპირულად წვიმს. სტიუარდესები სერიოზული სახეებით სათითაოდ გაიკრიფნენ სალონიდან და პილოტთა კაბინაში გაუჩინარდნენ. თვითმფრინავში სამარისებური სიჩუმე ჩამოწვა. ყველამ შეწყვიტა მხიარული მასლაათი. „ნიუ-იორკმა არ მიგვილო.“ ცუდია. ჩემს გვერდით მჯდომ რუსს დანა პირს არ უხსნის. სრულებითაც არ შემშინებია. აქ ჩემზე არაფერი არ არის დამოკიდებული. მე ვერაფერს შევცვლი. თვითმფრინავმა ერთხანს იფრინა და ისევ ნიუ-იორკს დაადგა. ვეშვებით. სადაცაა მიწას უნდა შევეხოთ. ვერ დასვა კარგად. პირდაპირ „დააგდო“ თვითმფრინავი. ყველამ შვებით ამოისუნთქა. „ნიუ-ორკში ვართ“. აეროპორტში ჩვენი თანამგზავრი ამერიკელების ტვირთი 5 წუთში ამოყარა „კონვეიერმა“. ჩვენ კი ნახევარ საათს მაინც გვალოდინეს. ალბათ ამერიკის საბაჟოს თავისი საზრუნავი აქვს. ამერიკელი მებაჟე მეკითხება, რა პროფესიის ვარ და რა მიზნით ჩამოვედი. მასწავლებელი ვარ მეთქი, ტურისტი. „ოკეი“ – თქვა და ჩემს საბუთებს ბეჭდის ბათქუნი აუყენა. საბაჟოში ამერიკელმა მასპინძლებმა გულდასმით გაგვსინჯეს. ყოველგვარი ავტომატის გარეშე, ჩემოდნები გაგვახსნევინეს. თან ბოდიშს გვიხდიდნენ; მხოლოდ ნარკოტიკების შემოტანის წინააღმდეგი ვართო. წესი წესია. ჩვენს ხელმძღვანელს ჩემოდანი ხომ პირწმინდად გაუსინჯეს. ჯიბეებიც ამოაღებინეს. ბევრიც რომ ამტკიცო, მე ხელმძღვანელი ვარ და დელეგაციას პატიოსნების მაგალითს ვაძლევო, ამიტომ ამათ თვალში ნუ მამცირებთო, საბაჟოს მოხელეები არ დაგიდევენ. მათთვის ყველაფერი სულერთია.

ძველი ნაცნობებივით ღიმილით და ყვავილებით დაგხვდა ახალგაზრდა ქალი-ვაჟი. გაგვეცნენ თქვენი გიდეები ვიქნებითო. როცა გაარკვიეს ყველანი ვართ თუ არა გასასვლელისკენ მიგვითითეს, იმ ავტობუსში ჩავსხდებით და სასტუმროში წავალთო.

დავინაურდი. ორი ჩემოდანი მომაქვს. კარებს მივუახლოვდი და გასაღებად ერთ ხელის გათავისუფლება დავაპირე თუ არა კარი გაიღო; მეორე კარს მივუახლოვდი მეორეც გაიღო. ავტომატურად იღება კარი, როგორც კი ერთ მეტრზე მიუახლოვდები. გარეთ კოკისპირულად წვიმს. კარგი ავტობუსია. ყველაფერს მუშტრის თვალით ვათვალიერებ. აეროპორტში საოცარი წესრიგი, სიმდიდრე და სისუფთავე იგრძნობა. გრძელი დერეფნით გავდივართ, აეროპორტი ულამაზესია. ესეც ამერიკა.

ქალაქისაკენ! ავტომანქანების ფეიერვერკი. ერთსართულიანი სახლები. რაც ნიუ-იორკს ვუახლოვდებით სართულები იმატებს და აი: ცათამბჯენები.

ეს ცენტრია? – ვეკითხები გიდს, თავს მიქნევს. ავტობუსიდან გადმოვედი. პირველივე მაღალ, შენობის სართულების დათვლა დავინწყე, სამოცს რომ ავცდი თვალი ამიჭრელდა. სასტუმროში გვიხმეს. ჩემოდნები დაანწყვეთ და სავახშმოდ ჩამოდიეთო. მე, შუქრი და ჯიმშერი ერთად ვართ. მეათე სართულზე ვცხოვრობთ. დაღლილობამ გამიარა. დავეშვიტე ლიფტით. პირველ სართულზე რომ აღმოვჩნდით, იქედან კიდევ ხუთი სართული ფეხით ჩამოვიარეთ. აქ თურმე პირველი სართული მეექვსედან იწყება. ამიტომაც ეტყობა ლიფტზე (თუ ქვემოთ ჩასვლა გინდა) რომელიღაც ლილაკს უნდა დააჭირო თითი. ნიუ-იორკის დროით ათი საათია. გიდი დაბეჯითებით გვთხოვს ქუჩაში არ გავიდეთ, სეირნობას მოვასწრებთო. ავდივართ და ვწვებით. ნომერში ტელევიზორია. თორმეტივე პროგრამა მოვსინჯეთ. ბოლოს ყველაზე „მსუბუქ“ პროგრამაზე შევჩერდით. დიდხანს არ

დაგვეძინა. დილის ოთხ საათზე გაგვეღვიძა. რა ვქნათ რვის ნახევრამდე? ტელევიზორს ვეცი. თურმე ლამის პროგრამაც არსებობს. განგსტერებზე, ძალადობაზე, გარყვნილებაზე, სექსზეა გადმოცემები. პოლიციის შეფი გამოდის და თავის სიტყვაში კინოკადრებს იყენებს დანაშაულებათა შესახებ. საინტერესოა.

რვის ნახევარზე ქვევით ვართ. დღის სინათლეზე ნიუ-იორკი. ქუჩაში ხმაური არ ისმის. ავტობუსში ვსხდებით და ვაშინგტონში მივდივართ. დაიძრა თუ არა ჩვენი ავტობუსი, უცებ სირენების კვილი გაისმა. რამდენიმე პოლიციის მანქანამ ჩაგვიქროლა. ნუ გეშინია ნიუ-იორკში ეს ჩვეულებრივი ამბავიაო, იღიმება გიდი. გიდს ტომასი ჰქვია.



აშშ. შუაში რევაზ მიშველაძე



გზა დიდებულია! ტრასა – ნიუ-იორკი-ვაშინგტონი. ბუნება არც თუ საინტერესო. „მოტელები“, ქარხნები, კემპინგები, ფერმები, ვილები – ყველგან. მინა მოყვითალო-მორუხო მაინცდამაინც ნოყიერი არ უნდა იყოს.

ვაშინგტონი. ყოველი ფეხის ნაბიჯზე ზანგები. თეთრი იშვიათი სანახაობა გახდა. 4-5 სართულიანი სახლები, ევროპული ტიპის ქალაქი. ცენტრი ქუთაისის ცენტრს ჩამოჰგავს. თეთრი სახლი! – დაიძახა გიძმა. მე ერმიტაჟი მინახავს, კრემლი, ლუვრი, ვერსალი, ბურბონების სასახლე, ინგლისის დედოფლის რეზიდენცია. ეს არის თეთრი სახლი! ეს ორსამსართულიანი ძველებური სტილის თეთრი შენობა, რომლის თავზეც ამერიკის შეერთებული შტატების დროშა ფრიალებს. აქ ცხოვრობს ნიქსონი? ეს არის აშშ-ს დედაქალაქი? ყველაფერი უბრალოდ, სიდიდით პატარად მეჩვენება. ვვახშმობთ და ვწვებით.

## 29 ნოემბერი

დილიდან ცუდად ვარ.

მაინც ავდექი.

დავავალიერეთ კაპიტოლიუმის შენობა. დიდებულია. სენატის სხდომაზე შევედით. ჩუმად ფეხაკრეფით, სენატორი ედუარდ კენედი ჩემგან ორი ფეხის ნაბიჯზე დგას. მაღალია, წითური, ძალიან ჩამოჰგავს თავის განსვენებულ ძმას – ჯონს. საოცარი ოჯახი აქვთ. გარეთ გამოსვლისას ვგრძნობ, რომ შუბლზე ცივი ოფლი მასხამს. ავად ვარ. გიდი სასტუმრომდე მაცილებს. სურდოს ნამლებს ყიდულობს გზაში და ლიმონის და ფორთოხლის წვენს.

ვწევარ ახლა ნომერში. დღეს უნდა ვინვე. არ გამირთულდეს. იღბალი არ გინდა? დღევანდელ პროგრამას ჩამოვრჩი. იქნებ ოფლი მოვიდინო. ზანგის ქალი შემოვიდა და ოთახი დააღაგა. „სერ ხომ არაფერს მიბრძანებთ?“ არა მეთქი. გუშინ

სალამოს ჩვენს საელჩოში მიგვიღეს. საელჩოს მდივანი თავს აქნევდა, ნიქსონის წინააღმდეგ მთელი კამპანია გაიშალა. არ ვიცით, თავს რითი დაიძვრენსო. ვაშინგტონში 70 პროცენტი ზანგები ცხოვრობენ, შეიძლება ქუჩაში ხანდახან თუნდაც იმიტომ გცემონ, რომ თეთრები ხართო. თუ რაიმე ინციდენტი შეგემთხვავთ ჩვენთან დარეკეთო.

## 30 ნოემბერი

ავად ვარ.

ავდექი ცოტა გავიარე, მაგრამ ვგრძნობ ვერ შევძლებ. ცივი ოფლი მასხამს. გიძმაც შემატყო ფერზე. თუ ცუდად ხართ დაბრუნდით ნომერში და დაწექითო.

აფსუს!

მაცივებს, ტელევიზორი ჩავრთე. საქმე ის იქნება, თუ ჩავწექი. თხუთმეტ წუთში გიძმა სამი-ოთხი თავი გრიპის წამალი, ფორთოხალი და ლიმონის წვენი მომიტანა.

სურდოს ვერც ამერიკული ნამლები არჩენს, მაგრამ ეს ერთი უფრო საიმედოაო.

დავლიე. ორ საათში სიცხემ უეცრად დაიკლო. ხელები და ფეხები გამიცვივდა. ცოტა შემეშინდა. სუნთქვა მიჭირს. ტომასი (გიდი) მეუბნება წამალმა იმოქმედაო. როცა შემატყო რომ გული ცუდად მაქვს, საელჩოში დარეკა! საელჩოს რუს ექიმს ელაპარაკა, თქვენი მოქალაქე ავად არის და მობრძანდით, ინახულეთო. ექიმმა ჩემთან ლაპარაკი მოინდომა. როცა ვუთხარი ქართველი ვარ მეთქი, მითხრა, დღეს არ მცალია, ხვალ მოგაკითხავო.

კომმარული ღამე მქონდა. თვალი არ მომიხუჭავს. საშინელ წელის ტკივილს ვგრძნობ. წელი არასოდეს მტკენია, თირკმლები არ იყოს.

გუშინ ქუჩაში ქართველი კაცი შეგვხდა, ვლადიმერ ბაბიშვილი. მე მგონი გვარი გადაკეთებული აქვს. გააჩერა მანქანა

და ქართულად დაგვიძახა. გვერდით ქალი ეჯდა. ესეც ქართველი ჯაფარიძეაო. რა მოხელე ხალხი ხართო. უბრალო, გახუნებული მოსასხამი ეცვა. რევაზ თაბუკაშვილს თუ იცნობო. მერე მე ვკითხე, რამდენი ხანია აქ ცხოვრობთ მეთქი; ომის შემდეგო. ტყვედ ნამყოფია. მინდა ტურისტად საქართველოში ჩამოსვლა, მაგრამ ფული არა მაქვსო. რა საქმიანობას ეწევი მეთქი, შერცხვა თქმად არ ღირსო. ჩვენც აღარ დავეკითხეთ. შუქრის ტელეფონის ნომერი მისცა. შუალამისას დავურეკეთ, მაგრამ სახლში არ იყო. ნეტავ ვინ არის, რას წარმოადენს, ენა დაება, რომ დაგვინახა. მანდილოსანი ჯაფარიძე ნეტავ ცოლი იყო მისი?

## 1 დეკემბერი

ექიმი იყო. გულდასმით გამსინჯა. ანთება არა გაქვს, მაგრამ გაცივებული მაგრად ხარო. 3 დღე მაინც უნდა იწვეო.

3 დღე! ვაშინგტონში. დღეს ოფლს მოვიდენ და ხვალ კარგად ვიქნები. ყველანი წავიდნენ, ვწევარ და ტელევიზორს ვუყურებ. ძალიან საინტერესო მულტფილმებია ბავშვებისთვის.

ზანგის მოახლე ქალი ნომრის დასალაგებლად შემოვიდა. ყოველდღე ცვლიან თეთრეულს. თეთრეული აბრეშუმითაა, გარეცხილია საოცრად.

წასაკითხი არაფერი მაქვს. ჩემს ნოველებს ვკითხულობ. ზოგი მართლა მომეწონა. მთელი დღე ტელევიზორს ვუყურებ, მოწყენა წუთითაც არ მიგრძვინია. ძალიან საინტერესო გადაცემებია.

## 2 დეკემბერი

ლამით ოფლი მქონდა. ამ დღით არა მიშავს. რაღაც უნდა დამიწდეს, უნდა ავდგე.

ის ის იყო ჰოლში ჩასვლას ვაპირებდით. რომ ჩემს ნომერს ვლადიმერ ბაბიშვილი მოადგა. სიმართლე გითხრათ მესიამოვნა. კარგა ორი-სამი საათი ვისაუბრეთ. ღარიბი კაცი ჩანს, დიდი განათლების არ უნდა იყოს. მაინტერესებს ყველაფერი რაც მას შეეხება.

ქალაქგარეთ ნაქირავებში ცხოვრობს. ტელევიზორების შემკეთებელი ვარო. მერე გვითხრა ახლა მთარგმნელობით მუშაობას ვწვევო. ჩემი ქართული გამომადგაო. რა აზრისა ხართ, ამერიკის ხმის ქართულ გადაცემებზეო. მე ვუთხარი, რომ ძალიან გლეხურ დონეზე არის მეთქი. გაეცინა, გეთანხმებო.

ფოთელი ყოფილა. გვარი გადაკეთებული მაქვსო. სინამდვილეში ღვარწკაია (თუ ლურწკაია) ვარ, ტყვედ ნამყოფი. ადრე მეშინოდა და გვარიც ამიტომ გამოვიცვალეო. ვკითხე რატომ არ დაბრუნდებით მეთქი, მითუმეტეს რომ მარტოხელა კაცი ხართ. ფოთში და-ძმა მყავსო. ვერ გავძლებო. მე თავისუფალ ცხოვრებას მივეჩვიე. თქვენთან კი ერთი ქალაქიდან მეორეში ვერ გადახვალ, თუ მილიციის ნებართვა არ გაქვსო. ვეცადე დამერწმუნებინა, რომ ასე არ არის. უბედური კაცია. სამშობლოს სიყვარულიც გაუცხოვებულა მისთვის. მე ქართული წარმოშობის ამერიკელი ვარო. ჩემს პასპორტში ამერიკელი წერიანო. ღმერთმა ხელი მოუმართოს. ვაშინგტონში თხუთმეტამდე ქართული ოჯახიაო. ერთმანეთს იშვიათად ვხვდებითო. ქართულ გაზეთებს – „კომუნისტს“, „ლელოს“, „სამშობლოს“ ვინერთ საბჭოთა საკონსულოდანო. სადილს მე თვითონ ვიმზადებო. სასმელს არ მიეკარა. კუჭი გაფუჭებული მაქვსო. ტურისტად წამოვიდოდი საქართველოში, მაგრამ ძალიან ძვირი ჯდებაო, საცხოვრებლად კი არავითარ შემთხვევაშიო.

დავემშვიდობეთ. ხომ არაფერს დამაბარებთ მეთქი თქვენს დასთან. არაო, წერილი სწორედ ახლახანს მივწერეო. ცოტა არ იყოს ცივად დამემშვიდობა. ერთი ბოთლი კონიაკი და



ქართული სიგარეტები ვაჩუქე. რევაზ გამყრელიძეც ახსენა ერთხელ.

თეთრ სახლში ვართ. შაბათ-კვირას ნიქსონი ქალაქგარეთ გადის. შაბათ-კვირას საერთოდ მთელი ვაშინგტონი ცარიელია. მაგრამ დღეს ნიქსონი თეთრ სახლშია. როგორ პრეზიდენტის იქ ყოფნის დროს ტურისტებს უშვებენ მეთქი? ვკითხე გიდას. გაეცინა, რა მოხდაო. დავათვალიერეთ მისაღები, სასტუმრო, სხდომათა, სასადილო ოთახები. თეთრ სახლში ორმოცდაათამდე ოთახი იქნება. იქ ცხოვრობენ მხოლოდ პრეზიდენტი და მისი მეუღლე. სივინროვის გამო თანაშემწეები ორ-ორად ან სამ-სამად სხედან. ნიქსონს ბევრი თანაშემწე ჰყავს. 3-4 პირადი მდივანი და დაცვა. ეს უკანასკნელი ჩვენ საკმაოდ შემცირებულად მოგვეჩვენა. თეთრი სახლის ეზოს ჭიშკართან ორი პოლიციელი მორიგეობს და ეზოშიც ამდენივე გადაცმული აგენტი დადის. კენედის ისტორია რომ ვიცით, ვფიქრობთ ცოტაა.

მეორე სართულზე ავდივართ. ნიქსონი ჩვენს გვერდით ოთახში ზის. სულ რამდენიმე ნაბიჯი გვაშორებს მისგან. ერთადერთ წინააღმდეგობას მდივანი ქალი წარმოადგენს. შეგიძლია პირდაპირ შეალო კარი და შეხვიდე. საერთოდ პრეზიდენტთან მოხვედრა როგორ ხდება მეთქი, ვკითხე გიდას. დაურეკავ, როგორც მდივანი ქალი ან თანაშემწე გიპასუხებთ, ეტყვიტ რა საკითხზე გინდათ მისი ნახვა და ვინ ხართ. გთხოვენ ყურმილი არ დაკიდოთ. ცოტა ხანში ან თვითონ ნიქსონს შეგაერთებენ, ან მიღების დროს დაგინიშნავენ ან ბოდიშის მოხდით იტყვიან ამ საკითხში პრეზიდენტი კომპეტენტური არ არისო და ამა და ამ კაცს მიმართეთო.

თეთრი სახლიდან ამერიკის პირველი პრეზიდენტის ვაშინგტონის სახლისკენ გავემართეთ. იგი ძველ ვაშინგტონშია, ქალაქიდან ცოტა მოშორებით. ვათვალიერებთ პრეზიდენტის, მისი მეუღლის, სამუშაო და საწოლ ოთახებს, სამზარეულოს. ძველი ვაშინგტონი უფრო მომწონს, ვიდრე ახალი.

სალამოს ვაშინგტონის პოლიციის შეფმა მიგვიპატიჟა. ერთად ოცდახუთი კაცი ვესტუმრეთ. ვისკით და გემრიელი ვახშმით გაგვიმასპინძლდა. ვახშამი პატარა მრგვალ მაგიდაზე იყო გაშლილი. თევზზე უნდა გადმოგელო რაც გსურდა და ფეხზე უნდა გეჭამა. დავილაღე. ერთ ხანშიშესულ მანდილოსანს ვესაუბრე ლიტერატურაზე. ბოლოს სრულიად უადგილოდ ჩაილაპარაკა ნიქსონი მძულსო. რატომ მეთქი, გულწრფელი კაცი არ არისო, პოლიტიკა არ ესმისო, ამერიკას დაღუპავსო, ხომ არ შეიძლება კონკრეტული მაგალითებით გაამყაროთ თქვენი აზრი ნიქსონზე მეთქი. კონკრეტულს ვერაფერს ამბობს. ტელევიზორი ჩართეს, ენერგო-კრიზისი, ასეთი გადმოცემა მიდიოდა. რომელიღაც ბიზნესმენი გამოთქვამდა საშიშროებას, რომ ბენზინის მარაგი იწურება. არაბეთმა უარი უთხრა ამერიკას ბენზინის მოყიდვაზე. ამასწინათ ტელევიზიით გადასცეს პრეზიდენტის პირადი თხოვნა, რათა მთელს ამერიკაში 80 კმ არ გადააჭარბონო. ბენზინი ნაკლები იწვის, თანაც 1 დეკემბრიდან კვირაობით ბენზინი აღარ გაიყიდება.

11 საათზე ვბრუნდებით სასტუმროში. ხვალ ჩიკაგოში მივფრინავთ.

### 3 დეკემბერი

ვაშინგტონის აეროპორტში ვართ.

ჩიკაგოში გაფრენის წინ, ავტომატურ „პროექტორში“ გაგვატარეს და ყველანი გულდასმით გაგვჩხრიკეს. ჩვენს გაკვირვებაზე გიღმა გვიპასუხა. ეს ორი წელია სენატმა მიიღო კანონი, რომ თვითმფრინავის ყველა მგზავრი სადაც არ უნდა მიდიოდეს იგი, გულდასმით უნდა გაიჩხრიკოს და ჩამოერთვას ცეცხლსასროლი იარაღი ან ბომბი, რადგანაც ხშირად ჰქონდა ადგილი თვითმფრინავების გატაცების შემთხვევებსო.

შესანიშნავი თვითმფრინავია. სტიუარდესებმა გულდას-  
მით აგვიხსნეს თუ როგორ უნდა მოვიქცეთ ავარიის შემთხ-  
ვევაში. ჩემს სავარძელთანაა სწორედ სათადარიგო კარები.  
თუ ძრავებმა მუშაობა შეწყვიტეს უნდა გავალო და გადავხტე,  
რადგანაც ასე გადარჩენის ნახევარი პროცენტი შანსი მაინც  
არის. კარგი შელავათია.

საათნახევარში ჩიკაგოში ვართ. ტიპიური ამერიკული ქა-  
ლაქი. ცათამბჯენები. ორსართულიანი ქუჩები. ქვევით მანქა-  
ნები, ზევით ტრამვაი, მატარებელი. ენით აუნერელი სიმდი-  
დრე. ხალხმრავლობა. უმრავლესობა აქაც ზანგებია.

ქალაქის დეპარტამენტში მიგვიღეს. დავათვალიერეთ  
გამოთვლითი ცენტრი, უსაფრთხოების და ხანძარსაწინააღ-  
მდეგო სამსახური, თუ ქალაქში რომელიმე სახლი ავარიულ  
მდგომარეობაში აღმოჩნდა, ავტომატი მაშინვე სიგნალს იძლ-  
ევს, ხოლო გამომთვლელი მანქანა ხუთ წუთში ადგენს თუ რა  
თანხის ზარალია მიყენებული და რა რემონტია ჩასატარებე-  
ლი. ჩიკაგოში უმაღლეს დონეზეა სახანძრო სამსახურიც. ავ-  
ტომატის და ტელეფონის საშუალებით ერთ წამში დგინდება  
რა ხანძარია და სად! ყოველდღიურად ქალაქში 150-200 ხან-  
ძრის შემთხვევაა. ასე რომ ჩიკაგოელ მეხანძრეებს სამუშაო  
აქვთ.

სალამოს ჩვენმა მასპინძლებმა, ჩვენით დაინტერესებულ  
ამერიკელ მოქალაქეებთან შეხვედრა მოგვინყეს. საათნახ-  
ევრის განმავლობაში ვუმტკიცებთ ახალგაზრდა ამერიკელ  
ცოლ-ქმარს, რომ ისრაელი თავს კი არ იცავს ( როგორც  
მათ სჯეროდათ) არამედ ცეცხლს უშენს გაერთიანებული  
არაბეთის ტერიტორიასა და სხვისი მიწების დატაცებას  
ცდილობს. თქვენაო მითხრა, არასწორი ინფორმაციებით  
დაბრმავებული ხართო, ისრაელი დაკავებულ ტერიტორიებს  
იმიტომ არ უბრუნებს არაბეთს, რომ ამ უკანასკნელთან  
უშუალო მეზობლობა არ სურს რათა თელავივს ცეცხლი არ

მინვდესო. მგონი იგი მართალი იყო. ჩვენი პრესა ხომ სი-  
მართლეს არ გეტყვის.

გვიან ღამემდე დავდივართ ჩიკაგოს ერთ-ერთ მთავარ  
ქუჩაზე. მდიდარი ვიტრინები, ფილმების შემადრწუნებე-  
ლი რეკლამები, ნარკომანები. საშოვარზე გამოსული ზანგი  
ლატაკები. თვალისმომჭრელი რეკლამები. მალე საახალწლო  
არდადეგები დაიწყება და ქალაქს ზღაპრულად რთავენ.

#### 4 დეკემბერი

დილით ავტობუსით „ამერიკან ჯენერალ მოტორსის“ კომ-  
პანიის ჩიკაგოს ავტოქარხანაში წავიყვანეს. აქ მზადდება  
თანამედროვე ამერიკის ერთ-ერთი სახელგანთქმული მან-  
ქანა „მატადორი“. წუთში ორი მანქანა გამოდის. უჟანგავი  
თუნუქი. სისუფთავე. საოცარი ავტომატიკა.

შუადღისას ჩიკაგოს სამხატვრო გალერეა დავათვალიერ-  
ეთ. ამ ტერიტორიაზე ნაპოვნი მაიას ტომის და ძველ ინ-  
დიელთა პერიოდის ნივთები და სკულპტურები. ამერიკას  
წარსული არა აქვს. იმპრესიონისტთა ნამუშევრები, მოდილ-  
იანის, გოგენის და პიკასოს ორიგინალები....

სალამოს ლიტველმა მეგობრებმა ლიტველ ემიგრანტთა  
შეხვედრაზე წავიყვანეს. დაუფინყარია. დიდი კლუბი პრო-  
გრესულ ემიგრანტთა. ოთხმოცმეტანეული მოხუცები.  
სიცივე თეატრში. მიტოვებული სცენა. ერთმანეთი ხელით  
მოჰყავთ. სიღარიბე. სევდა. ძალიან იმოქმედა ჩემზე. შენარ-  
ჩუნებული აქვთ ლიტვური სიმღერები და ცეკვები. ემიგრა-  
ცია კვდება. ჩვენი შვილები ამერიკელებად იწერებიანო.  
კლუბში აღარ მოდიანო. მართლაც სულ მოხუცები იყვნენ,  
სცემენ გაზეთს „ვილნო“ (ტალღა) დაგვათვალიერებინეს  
ტიპოგრაფია. სიტყვა ვთქვი. გამოგვაცილეს მოხუცებმა.  
საშინელებაა.

## 5 დეკემბერი

დილით წავიყვანეს ამერიკის მეცნიერებისა და ტექნიკის მიღწევათა მუზეუმში. უზარმაზარი გამოფენა მოწყობილია მასობრივი გასართობისა და ზოგჯერ თამაშობების ფორმით. რომ უფრო მეტი შემეცნებითი ღირებულება ჰქონდეს. აჩვენებენ ფილმებს. მოწყობილია ფიერვერკი. სტერეოფილმები. ვიდეოტელეფონი. მუზეუმი ძველი ქალაქის ქუჩებით. უამრავი დამთვალიერებელია. ბავშვები შეიძლება დატოვოთ სპეციალურ დარბაზებში, სადაც ისინი არაჩვეულებრივად გაერთობიან.

მერე ავტობუსით დაგვათვალიერებინეს ჩიკაგო.

ცათამბჯენები.

ასი, ასხუთი სართული.

მანქანა ზოგ სახლში მეორმოცე სართულზე ადის. მიწისქვეშა და მიწისზედა ავტოსადგომები.

დანესებულებაში ყველა პერანგით ზის.

სალამოს თავის სახლში მიღება მოგვინყო ჩიკაგოს ცნობილმა ადვოკატმა მისტერ კლერკმა. ფემენებელური 7-ოთახიანი ბინა 88-ე სართულზე. კარი ინდიელმა მოსამსახურე გოგონამ გაგვიღო. ათასგვარი სასმელები – ჯინი, ვისკი, ლუდი. არ მომწონს მხოლოდ, რომ ყველაფერში ყინულს ჰყრიან. სისუფთავე ზღაპრული. სამი აბაზანა აქვს. დაბალჭერიანი ბინა. სახლს მიწის დიდი კედლები აქვს. ფანჯარა არა აქვს. დავინტერესდი. აქ თურმე არ არსებობს ცნება, ფანჯრის გაღება და განიავება. თხუთმეტი წელია ამ ბინაში ვცხოვრობ და ფანჯარა ჯერ არ გამიღიაო. ორმოცდაათი კაცი ერთ ოთახში ვართ, ვენევით, სრულებით არაფერი იგრძნობა. არც სიცხე, არც სიცივე. კონდენსირებული ჰაერის სიკეთე. ზამთარ-ზაფხულ ბინაში ერთი და იგივე ტემპერატურაა.

ჩემი ყურადღება მიიქცია სურათმა კედელზე. მისტერ კლერკი და ჯონ კენედი. ისინი ხელს ართმევენ ერთმანეთს

და უღიმიან. ვკითხე. ისინი ახლო მეგობრები ყოფილან. ჯონი ჩამოვიდა ჩემთან ჩიკაგოში და გამანდო, პრეზიდენტობა მინდა და რას იტყვიო. მოვუწონე. გაიშალა საარჩევნო კამპანია. კენედის დღე და ღამე არ ეძინა. ტელევიზია, რადიო, გაზეთები, სიტყვით გამოსვლა, ამომრჩევლების მოსყიდვა, ამას დიდი ფული სჭირდებოდა. რაც შემეძლო ვეხმარებოდი. ფულიც ბევრი გავიღე. შევაგროვე დიდძალი თანხა ჩიკაგოს იურისტთა შორის. მერეც არაერთხელ შევხვდი. ჩიკაგოში ჩამოვიდოდა თუ არა სასტუმროდან პირველს მე მირეკავდა. დიდი პიროვნება იყო, ცრემლმორევით თქვა.

## 6 დეკემბერი

ჩიკაგოდან პატარა საუნივერსიტეტო ქალაქში – ობერლინში ჩავფრინდით. ჩიკაგოს შემდეგ უეცრად აღმოვჩნდით არაჩვეულებრივად წყნარ და მშვიდ გარემოცვაში. სტუდენტთა საერთო საცხოვრებელში მიგვიღეს. ეს არის ცალკე მდგომი სახლი, სადაც თითო ოთახში ცალ-ცალკე 19 სტუდენტი ცხოვრობს. ლამაზი, ქერა, სწორთმიანი გოგონები. სალამოს საციგურაო მოედანზე წავიყვანეს. პირველად შევდექი ციგურებზე.

მომათავსეს პროფესორის, სომეხ რან ასუნის ბინაში. კარგი ხალხია, ცოლ-ქმარი ახალგაზრდა. ასუნი მარქსისტია. მაჩვენა თავისი წიგნი ბაქოს კომუნაზე. დიდხანს ვისაუბრეთ. შარშანწინ თბილისში ყოფილა. ჯონდი მეტრეველი და კაკო სურგულაძე მისხენა. გვიან ღამემდე ვისაუბრეთ. ქართული წიგნები აქვს. საქართველო ძალიან უყვარს.

## 7 დეკემბერი

კოლეჯს და უნივერსიტეტს ვათვალიერებთ, ამერიკული სწავლების სისტემა. კოლეჯი. ორგვარი დიპლომი. უმაღლეს-

ში შესასვლელი და არშესასვლელი. გაკვეთილები. თვალსაჩინოება. სტუდენტთა და პროფესორთა ურთიერთობა. ერთმა სტუდენტმა გოგონამ კოლეჯის დირექტორს თითოთ მოუხმო. ყოფაქცევა. რაც შეიძლება თავისუფალი. ჯინსებით პირდაპირ იატაკზე სხდებიან. თავისუფალი ქცევა. საერთო საცხოვრებელში ხშირად ერთად ცხოვრობენ. არავითარი შეზღუდვა. აქვთ საგნები, რომელსაც როცა უნდათ მაშინ ჩააბარებენ ოთხი წლის განმავლობაში. არავითარი გამორიცხვა ან კურსზე დატოვება. ქალიშვილობაზე ლაპარაკი სასაცილოა. შედეგი? ყოველდღე სპეციალურ ტაბლეტებს ყლაპავენ. გავრცელებულია ნარკომანია და ალკოჰოლიზმი. ამ ქალაქში ალკოჰოლი აკრძალულია, ნარკომანია არა. თუუ ძალიან გადააჭარბა, აფრთხილებენ. თავად უნივერსიტეტის პროფესორის შვილი მიშა (ცოლ-ქმარი პროფესორი) საერთო საცხოვრებელში ცხოვრობს, ასე მირჩევენიაო. დამოუკიდებელ ცხოვრებას ეჩვევიან. ნიჭიერი სტუდენტები არიან. რაც ყველაზე მეტად მომეწონა; თვითონ მუშაობენ დღიურ სამუშაოზე, ბავშვებთან რჩებიან, გაკვეთილებს ატარებენ, სტუდენტთა სასაფლაოში მუშაობენ. ჭამა-სმა უფასო აქვთ, სწავლისთვის გადახდილი ფულიდან. ლექცია 50 წუთი. რა საგანსაც უნდათ, იმას ისმენენ. მოითხოვენ უნივერსიტეტის ადმინისტრაციისგან ესა და ეს საგანი დაუმატონ ან გაუგრძელონ. ნიშნები – ბალები ეწერებათ. კათედრის მაგივრად დეპარტამენტი არსებობს. ვინც კარგ ქულებზე დაამთავრებს, უფლება ეძლევა ჩააბაროს ასპირანტურაში. არ არსებობს მისაღები გამოცდები. როცა ამთავრებ კოლეჯს, უმთავრესი ყურადღება ექცევა იმ გარემოებას, როგორი დახასიათება გაქვს და რა ნიშნები. ასე რომ უნივერსიტეტში ჩაბარება ფაქტიურად სკოლაში ხდება. მერე შეგიძლია სხვადასხვა უნივერსიტეტში გააგზავნო განცხადება, შენი საბუთების ასლები. შეიძლება ერთდროულად ათ უნივერსიტეტში ჩაგრიცხონ. სამუშაოს პრობლემა არ არსებობს. ვისაც უნდა, ყველა იმუშავებს.

მანქანა განვადებით იყიდება. პირველად შეგაქვს ღირებულების 20 პროცენტი და სამუშაოს ცნობა. პროფესორს ეძახის თავის თავს ყველა. პროფესორს ზოგს ერთი წიგნი არ აქვს გამოცემული. მიგვიღეს ცოლ-ქმარმა პროფესორებმა. გულითადად ვისაუბრეთ. ჰუმანისტი, მშვიდობისმოყვარე ხალხია.

დღეს დავათვალიერეთ ვაშლის წვენის ქარხანა და სამედიცინო ხელსაწყოთა ფაბრიკა. სისხლის და შარდის უზუსტეს ანალიზს აკეთებენ 3 წუთში (ჩვენთან მეორე დღის 4 საათზე გიბარებენ).

## 8 დეკემბერი

დავათვალიერეთ დიდი სპორტული კომპლექსი. უფასოა. არც სტუდენტთა. არც სია, არც ფული. ყველას შეუძლია მოვიდეს და ივარჯიშოს, ათასნაირი დარბაზი. ვივარჯიშეთ. ფინური აბანო და მერე დუში დიდებულია.

დავემშვიდობეთ მასპინძლებს. 6 საათზე ნიუ-იორკში მივფრინავთ.

სალამოს ბროდვეიზე გავიარეთ. განათება. ბროდვეის სიგრძე 36 კილომეტრია. ყველაზე გრძელი ქუჩა მსოფლიოში.

## 9 დეკემბერი

ექსკურსია ნიუ-იორკში. წვიმა.

ქალაქელები წვიმაში სახეგანათებულნი დადიან. დღეს შეიძლება სუნთქვა. გიდი გვეუბნება, ჩვენ ახლა „პიდარასტების“ უბანში მივდივართო. სახელმწიფოს მიერ დაშვებულია მამაკაცთა შორის ქორწინებაც. თავიანთი კლუბები აქვთ. გაზეთებს უშვებენ. ტელევიზიაში სპეციალური გა-



დაცემაც აქვთ. არ მალავენ. განცხადებებში პირდაპირ ხაზს უსვამენ. საშინელება იყო. მოსმენაც კი საზიზღრობაა. არ მომწონს ასეთი „დემოკრატია“.

### 10 დეკემბერი

მსოფლიოს სავაჭრო ცენტრი.

110-სართულიანი. 412 მეტრი. ყველაზე დიდი შენობაა მსოფლიოში სიმაღლით.

გენიალურადაა გაკეთებული.

### 11 დეკემბერი

თავისუფლების ქანდაკება. 200 მეტრიანია. კუნძულზე. ხელში ჩირაღდანი უჭირავს. ჩირაღდანზე ლიფტი ადის. კატერით მივდივართ იქამდე. ნიუ-იორკი სულ სხვა ქალაქია. არცერთ ქალაქს არ ჰგავს. ცათამბჯენების ტყე.

კინოფილმი. რობოტები და კოვბოები. სისულელე.

მსოფლიოს ერთ-ერთი ულამაზესი შენობის „ემპაიერ სტეიტ ბილდინგის“ სახურავზე ავედით. უსწრაფესი ლიფტი. 102 სართულიდან გადავყურებთ ნიუ-იორკს.

სალამოს გამოსათხოვარი ვახშამი. ვითამადე, რაც შემეძლო. ებრაელების ქუჩაზე გავედით. ორი ქართველი ებრაელი შეგვხვდა. ისინკა მოშიაშვილი და დავით იაკობაშვილი. ისრაელიდან ვართო ჩამოსული. ქუთაისლები ვართო, ვვაჭრობთ იქაც. რა ვქნათ აბა სხვა ხელობა ჩვენ არ გვაქვსო. იტირეს. საქართველო ძალიან მოგვენატრაო.

### 12 დეკემბერი

შევხვდი პოეტ მაიკლ ბენედიქტს. 10 წიგნის ავტორია, თან კოლუმბიის უნივერსიტეტში ასწავლის. ამერიკაში ახლა ძალიან ძნელია გახდე პოპულარული პოეტი. პოლიტიკის გარეშე ვდგავართ. მწერლებს არ გვაინტერესებს რა ხდება ირგვლივო. თანამედროვე ამერიკული პოემა არ არსებობს. არის თუ არა, რაიმე სამწერლო ორგანიზაცია? – ვკითხე, არის მაგრამ ძნელია გახდე წევრიო. უმეტესად იწერება ლექსები პროზად. ძნელია პროფესიონალმა მწერალმა თავი იჩინოს. საერთოდ, ამერიკაში, დოკუმენტურ და დეტექტიურ ლიტერატურას კითხულობენ, სხვა წიგნების ტირაჟი ცოტაა, არ იყიდება და იმიტომ.

23 იანვარი

დელის აეროპორტზე დილაადრიან დავეშვით. ინდოეთი ჩემი ბავშვობის ოცნება იყო.

პირველი შეგრძნება რაც საბაჟოდან გამოსვლისას გამიჩინდა. ინდოეთი არცერთ აქამდე ჩემს მიერ ნანახ ქვეყანას არა ჰგავს.

ინდოელი დაბალი ტანის, წვრილთავა, გამხდარი, საოცრად ნაღვლიანი თვალებით.

აეროპორტიდან სასტუმრო „ხანჟიტამდე“, სადაც დავბინავდით, საკმაოდ შორია, ევროპული ტიპის სასტუმროა, ქალაქის ცენტრში გვხვდება მხოლოდ. ველისოპედზე ამხედრებული ინდოეთი, ძველი, ულამაზო, მსუბუქი მანქანები (იშვიათად) და მოტოციკლეტ-რიქშები.

პირველ ღამეს ვათევთ დელიში მე და ჩემი მეუღლე, მიუხედავად სამი ღამის უძილობისა, ძილი მაინც არ მეკარება. დღეს დავათვალიერეთ მეჩეთი. ფეხზე გავიხადეთ და ჭუჭყიან ქვაფენილზე დიდხანს ვიარეთ. ჩემი გონებიდან არ ამოვა ქუჩაში უპატრონოდ დაყრილი მილიონი კაცი.

ვირტუოზული მანუფაქტურა.

მყიდველი არ არის.


მათხოვრები, კეთროვნები.

საკმარისი გახდა პატარა მათხოვარისთვის ერთი რუპია გადამეგდო, რომ მთელი დუნია დამესია. გამონვდილი ხელები, მუდარით სავსე თვალები. მუცელზე ხელმიდებული პატარა კაცი – ვკვდები, მშია! სამი მათხოვარი ბავშვი კარგა ხანს ფეხდაფეხ მოსდევდა ჩვენს ავტობუსს.

ენით აუნერელი სიბინძურე.

ქუჩაში ყველას თვალწინ, ყველას დასანახად მოშარდვა

ჩვეულებრივ საქმედაა მიჩნეული. მეჩეთში პატარა ჭუჭყიან აუზში ხელ-ფეხს იბანენ და მერე დიდი მონინებითვე, სვამენ წყალს იმავე აუზიდან.



ინდოეთი. ღია ტუალეტი ქუჩაში

„კრასნი ფორტი“. ინდოელ მეფეთა რეზიდენცია. ულამაზესი არქიტექტურა. ხალხის სიყვარული პოეზიისადმი. რა ყურადღებით უსმენენ ლექსებს. შარტრის კრემაციის ადგილი. ჯავაჰარლალ ნერუს კრემაციის ადგილი. მაჰათმა განდის (პირველი პრეზიდენტის) კრემაციის ადგილი.

ჩემს წარმოდგენაში დელი (დელი და მთელი ინდოეთი) ეს არის მოკრიალებული ლურჯი ცა, მწვანე მდელოებზე ჯგუფ-ჯგუფად მდუმარედ დაყუნცული ინდოელები და ხელგანვდილი მათხოვრები.

სალამოს პროფესორმა ნატალია მიხაილოვნა კაზანოვამ წამიყვანა კრიშნასადმი მიძღვნილ წარმოდგენაზე „რაელილა“. 13-14 წლის ბიჭები გოგონების როლს თამაშობენ. წარმოდგე-

ნა რომ დამთავრდა, მთელი დარბაზი ფეხზე წამოდგა, სცენის კიბესთან რიგი გაიმართა, ფეხზე იხდიან, ადიან სცენაზე ფეხშიშველნი (მიუხედავად წოდებისა და მდგომარეობისა) და ფეხზე ჰკოცნიან იმ პოეტს თუ მსახიობს, ვისი გამოსვლაც მოენონათ. თანაც მის სახელზე დასტებად თეფშზე ფულს აწყობენ.

ხელოვანის სიყვარულის გამოხატვის უფრო ლამაზი ფორმა მე არ მინახავს.



ინდოეთი

## 24 იანვარი

დილით ბირლას ტაძარი დავათვალიერეთ. კრიშნას სადიდებლად აგებული გრანდიოზული ნაგებობა.

საფდარჯანდის მავზოლეუმი. გასაგიჟებელი ჩუქურთმები.

მთელი საათი ფეხშიშველი გვატარებდნენ თეთრი მარმარილოს იატაკზე. ტაძარში იდეალური სისუფთავეა. განუწყვეტლივ ისმის მორწმუნეთა სიმღერა.

ახალი დელი.

რამოდენა კონტრასტია ძველთან შედარებით. მდიდრული ვილები. სკოლებში ყველგან ფორმა აუცილებელია.

კუტეს მინარეთი 1199 წელს აგებული კოშკი. 72 მეტრი სიმაღლისა. ძალიან ლამაზია.

სალამოს ნატალია მიხაილოვნამ წამიყვანა პროფესორ მუკერჯის ბინაზე. ძალიან საინტერესო იყო. შესანიშნავი საზოგადოება. ბულგარეთის ელჩი, დელის უნივერსიტეტის პრორექტორი, გერმანელი გამომცემელი. თეფშზე გიდებს საჭმელს, ჩამოატარებს თვითონ მასპინძელი.

2-დან 6-მდე მოსაწყენი საათები გვექონდა ტიბეტის სავაჭრო ქუჩაზე. პროფესორ მუკერჯის სახლში სტუმრები თავს ლაღად გრძნობდნენ. თითო მათგანი ხუთ ენაზე მაინც ლაპარაკობდა. მე ჩემი დამტვრეული ინგლისურით მაინც-დამაინც ვერ ვბრწყინავდი. ბოლოს დელის უნივერსიტეტის პრორექტორმა მკითხა ინგლისურის, ქართულის და რუსულის გარდა, კიდევ რა ენები იცითო. მე პასუხად მოვუყევი ერთი კახური ანეკდოტი. კახელს უცხოელი სამ სხვადასხვა ენაზე დაელაპარაკა და მაინც ვერაფერი გააგებინა. ბოლოს ცოლმა უთხრა, ხომ გითხარი კაცო, ერთი უცხო ენა მაინც გესწავლა, გამოგადგებოდაო. მან ხომ ბევრი ენა იცის, განა მას კი ძალიან გამოადგაო – მიუგო კახელმა.

ჩვენი ხელმძღვანელი ნუგზარ ოდიშვილი, ცუდი ბიჭი არ ჩანს. საქმიანი, სერიოზული კაცია. არ მწყენია როცა მითხრა, მარტო ვერ გაგიშვებ, ორგანოს წარმომადგენელი უნდა გაგაყოლო, რა ვიცი სად მიდიხარო.


პროფესორ მუკერჯის წინადადება მივეცი, ერთი თავისი ასპირანტი თბილისში გამოგზავნოს ქართულ-ინდურ ენათა მსგავსების შესასწავლად.

ჩემი წიგნის თარგმანის სურვილი გამოთქვა.



დავათვალე ერთ თანამედროვე ხელოვნების გამოფენა.

ინდოეთის ულტრათანამედროვე ფერწერა, გრაფიკა, გრავიურა, ქედური ხელოვნება. გასაოცარი კონტრასტია – მილიონი წლის ინდოელ მხატვარს, რომელსაც ათასწლეულთა მიღმა განსაცვრიფებელი ტაძრები, ფრესკები და სკულპტურები შეუქმნია, გადაუწყვეტია „თანამედროვე“ მხატვრად ქცევა. პარიზში პიკასოსა და სხვა ხელოვნების ავანტიურისტებიდან გაკვეთილები მიუღია და კუბისტ-იმპერსიონისტ-იმაჟინისტ-თა ცუდი იმიტაციით ჯღაბნა დაუწყია. „ვირის კუდით“ ნახატიც ბევრი ვნახეთ.



ინდოეთი

ერთ-ერთ ნახატზე გიდი გვიყვებოდა აქ ესა და ეს ამბავია გამოხატულიო, ჩვენ პირდაღებულნი შევცქეროდით. ის

კი დაჟინებით და სერიოზულად გვიმტკიცებდა ეს ამას ნიშნავს, ეს კი ამასო. მერე, სხვა ნახატზე გადავიდა, წარწერა ნაიკითხა და ბოდიში მოგვისადა: რაც გითხარით, ამ ნახატზე კი არა, აი ამ ნახატზეაო. მოდი და ამის შემდეგ გჯეროდეს უაზრო, „აბსტრაქტული ხელოვნების“.

უგემოვნო, სუსტი, დაბალი დონის გამოფენაა.

ჩვენმა გიდიმა სკოლებში და უმაღლეს სასწავლებლებში არ შეგვახედა – ტექნიკურად დაბალ დონეზეა მოწყობილი და მთავრობამ აგვიკრძალაო.

შუადღისას, რომელიღაც ამერიკული, კოვბოური, სულელური ფილმი ვნახეთ. ბოლომდე არ დავრჩენილვართ, ინდოეთში ამერიკულ, კოვბოურ ფილმზე კაცი გაცდება? მითუმეტეს, რომ მხოლოდ ორიოდ დღით ვართ ჩამოსულნი.

საქმიანი, მდიდრული დელის ქალები განსაკუთრებით ლამაზები არიან.

ქუჩაში სახელოსნოები. ოსტატები სხედან და განსაცვიფრებელი რაოდენობით აკეთებენ სამაჯურებს, ძვირფასთვლიან ბეჭდებს, სამკაულებს, სათამაშოებს, სპილოს ძვლისა და ძვირფასი ხისგან გამოთლილ სუვენირებს და ყოველივე ამას ჩალის ფასად – ჩალა რა ოხრად უნდათ, ლუკმა-პურის ფასად ჰყიდიან.

ხალხური ხელოვნება უმაღლეს დონეზეა.

სალამოთი საქორწილო ცერემონიალს დავესწარი. ქორწილი ასეთია: ცალკე ოთახში ფეხზე ისადილებენ. მერე გამოდიან საქორწინო დარბაზში. დარბაზის კარებში მწვანე ფოთოლში გახვეულ ერთ ლუკმას მოგანვდიან. სავალდებულოა – ყველამ უნდა ჭამოს. ამ ერთ ლუკმაში შედის ათასწლეულით ნასწავლი დაახლოებით ოცდაათი სხვადასხვა სახის ბალახი-ნამალი. მეც მომანოდეს. დავლეჭე თუ არა, პირი გამევსო მოტკბო-მომლაშო გემოთი, რაც მთელი სამი საათის მანძილზე არ გამინელდა. თანაც გუნება გამიხალისდა.

ამიხსენს ეს არისო ძველი, ტრადიციული „ინდური ლუკმა“,



კუჭის, ღრძილების, სასუნთქი გზების და „ტონუსის ასანევი“ წამალი. თურმე ცოტა ჰაშიშსაც შეიცავს.

ქორწილში ყველა წვეული სათითაოდ უახლოვდება ნეფედდოფალს და ლოცავს მოკლე სიტყვით, მერე საჩუქარს მიართმევს. ქორწილი თურმე ზოგჯერ სამ დღესაც გრძელდება.

ნეტავ საიდან იცოდა ინდოეთი რუსთაველმა? ანდა რატომ იყო ტარიელი მაინცდამაინც ინდოელი?

სვეტამ ჩვენი წილი „რუპიები“ ისე კარგად „გაანანილა“, რომ მგონი ჭეშმარიტად ინდური სუვენირების გარეშე ვრჩებით.

რა უნდა იყიდო? შენი კაპიკები რას უნდა განვდეს. მე, ჩემდა თავად, მათხოვრებს (მათხოვრობის ოსტატობა უმაღლეს დონეზეა) დავურიგებდი რუპიებს და დავისვენებდი.

## 26 იანვარი

აგრა – ინდოეთის ძველი დედაქალაქისკენ მივფრინავთ.

ჩიტისხელა პილოტები რომ ამოვიდნენ თვითმფრინავში, ცოტა არ იყოს შევშინდი, ამათ იმედზე ყოფნა ძნელია მეთქი, მაგრამ სხვა რა გზა მქონდა.

ფრენის წესები ყველგან ერთნაირია, ყველგან ამონებენ. გულდასმით გაგვჩხრიკეს პოლიციელებმა თვითმფრინავში ჩასხდომის წინ.

სასტუმრო „კლარკ შირაზის“ ეზოშივე შეგვეგება ეგზოტიკური ინდოეთი. ქუჩის პირას კოცონი დაენტოთ და ფაკირი ცეცხლის ალში გადი-გამოდიოდა. ორ ინდოელს უზარმაზარი პითონი შემოხვია ტანზე და მნახველს უხმობდა. მესამე კი სალამურს უკრავდა და სალამურის ხმაზე გაქვავებულ გველს თვალებში შეჰყურებდა.

სასტუმროს ეზოში ლამაზად მორთული სპილო დაჰყავდათ და ტურისტებს თითო რუპიის ფასად სპილოთი გასეირნებას სთავაზობდნენ.

ტაჯმაჰალის მავზოლეუმი. მსოფლიოს საოცრება. თეთრი, უბრწყინვალესი მარმარილოსგან აგებული დიდებული ძეგლი ხელოვნებისა.


რა სიმეტრიაა, რა ჰაეროვნება, რა სილამაზე.

შემდეგ „აგრის ფორტს“, ციხესიმაგრეს ვესტუმრეთ.

რა ხელმა ააგო.

ციხე-ქალაქი შაჰის სასახლით. შაჰის საძინებელი ოთახი. ძვირფასი ქვებით მოოჭვილი მარმარილოს კედლები.

შადრევნები.



ინდოეთი. ტაჯმაჰალი

ტურისტები თურმე დღეს დანებით ჩიჩქნიან კედლებს ძვირფასი ქვების (ლალი, ფირუზი) ამოსაცლელად.

დავიღალე. ამდენი შთაბეჭდილების მიღება ერთ დღეს, ასე ერთბაშად, არ შეიძლება.

საღამოს ქალაქში გასეირნება დავაპირე, მაგრამ უკანვე დავბრუნდით. აქ ხალხი თითქმის არ სეირნობს და არც შენ მოგცემენ სეირნობის უფლებას.

ხან რიქმა-ველოსიპედმა გვსდია მე და სვეტას იაფად წაგი-  
ყვანთო, ხან ჩალმიანი ინდოელი აგვედევნა, საპონი ან დუხი  
მომეცითო, ბოლოს პატარა მათხოვარმა სული ამოგვართვა.

გუნება გაგვიფუჭდა და სასტუმროში დავბრუნდით.

## 27 იანვარი

მთელმა მსოფლიომ უნდა იზრუნოს იმისათვის, რათა ინ-  
დოეთი დიდ ნაკრძალად გამოცხადდეს. ყოველ ფეხის ნაბი-  
ჯზე ადამიანის შესაძლებლობათა ზეიმია. ინდოეთმა არ უნდა  
განავითაროს მძიმე მრეწველობა, ინდოეთმა არ უნდა დან-  
ისლოს მისი კრიალა ცა ფაბრიკა-ქარხნების ბოლით.

ინდოეთი ტურიზმით ირჩენს თავს. არაერთი ქვეყანა მო-  
მივლია, მაგრამ რა ისტორიული ძეგლებიც ვნახე, ყველგან  
ვგრძნობდი ზღვარს ისტორიულსა და დღევანდელს შორის.  
ვგრძნობდი, რომ მკვდარ სასახლეებს ვათვალისწინებდი. ტაძ-  
რებს შორის სხვა ადამიანები დააბიჯებდნენ და ყოველთვის  
მიჭირდა კოსტუმირებული კაცის და ათასი წლის ტაძრის ერთმა-  
ნეთთან დაკავშირება.

მგონი მხოლოდ ინდოეთში ეს ზღვარი გამქრალია, ინ-  
დოელთათვის დრო შეჩერებულია. შუა საუკუნეთა ზღაპრულ  
სრა-სასახლეთა შორის ისევ შუა საუკუნეების ადამიანები  
დააბიჯებენ. იგივე მორწმუნენი, იგივე ფეხშიშველა მონები,  
მათხოვრები და სარიში გახვეული ულამაზესი ქალები.

რა ჰაეროვანია, რა ქალური, რა ლამაზია ინდოელი ქალის  
სამოსი. სარი ქალს განსაცვიფრებელ კდემამოსილებას ანი-  
ჭებს.

დღეს სიკრის სასახლე დავათვალიერეთ. ენით აუწერელი  
მშვენიერება. აბრეშუმით დამორჩილებული მარმარილო.  
გზად სოფლები გავიარეთ. სიბინძურე, პრიმიტიული და-  
მუშავება მინის. სადმე თუ არსებობს ტრაქტორი და კომ-  
ბაინი ვერ წარმოიდგენ.

ბრინჯი, შაქრის ლერწამი, ბანანი, ანანასი, ციტრუსები,  
ფეიჭოია.

კამეჩები...

ფუნას ჭადის ფორმას აძლევენ, ახმოებენ და ზამთარში  
შეშად იყენებენ.

ვაზი არსად მინახავს.

სკოლაში შევიარეთ. სწავლება 4 წლიდან იწყება, „ნული  
კლასი“. მე-6 კლასამდე ქალ-ვაჟები ერთად სწავლობენ. მერე  
ცალ-ცალკე. მე-9 კლასამდე სწავლის ქირაა საჭირო, მერე  
ალარ. სწავლის ხანგრძლივობა ათი წელია. არავითარი კაბი-  
ნეტ-ლაბორატორიები. გაკვეთილებს ხშირად სკოლის ეზოში,  
ბალახზე ატარებენ. მასწავლებლის ხელფასი დაბალია, სა-  
შუალოდ 500 რუპია.



ინდოეთი. სკოლა

სადილის შემდეგ სპილოთი ვისეირნე. ჩემს მეტმა ჩვენი  
ჯგუფიდან ვერავინ „გარისკა“ სპილოზე შეჯდომა. სადი-  
ლის შემდეგ ინდოელმა ილუზიონისტმა ფოკუსები გვიჩვენა.

საერთოდ აქ ხელის სისწრაფე, ფოკუსის, ილუზიონისტის ხელოვნება მაღალ დონეზეა.

მე ვიხუმრე, საბჭოთა ხალხს „ფოკუსით“ ვერ გაგვაკვირვებთ მეთქი. ფოკუსი ჩვენ რომ ვაკეთებთ სწორედ ის არის მეთქი. აბა ეს ინდოელები თუ შეძლებენ 90 მანეთი ხელფასით ცოლ-შვილის რჩენას, როგორც ამას ჩვენში ბევრი ახერხებს მეთქი.

ღარიბი ინდოელის საცხოვრებელი, მიწური, არავითარი ლეიბ-საბანი.

## 28 იანვარი

მთელი დღე აგრაში „თავისუფალი“ გვექონდა. გასაოცრად მიყვარს ცოცხალი ქალაქი. ქალაქში ფეხით სიარული. გამვლელ-გამომვლელთა თვალიერება. ყველაზე მეტად და უკეთესად მაშინ აღიქვამ ქვეყანას, როცა უბის წიგნაკომპარჯვებული გიდს კი არ დასდევ წინ და უკან, არამედ მარტო მიაბიჯებ ქუჩაში.

რამდენი რამ იტაცებს თვალსა და გონებას.

საათობით ვუცქერი ქვისმთლელებს, ჩუქურთმისმჭრელებს, მქსოველებს. ქუჩაში აქეთ-იქეთ ჩამწკრივებულ პანანკინტელა სახელოსნოებში მაიმუნებივით ჩაცუცქული ინდოელები სასწაულს ახდენენ.

ჩემს თვალწინ ზუსტად ხუთ წუთში გამოთალა ხისაგან ოსტატმა სპილო. ყოველივე ჩარხისა და ტექნიკის დაუხმარებლად – ჯაყვით.

წალმა-უკუღმა ვარიგებთ ფანქრებს და ამით ვიგერიებთ მათხოვრებს, რომლებიც იმდენად კადნიერდებიან რომ გზას გვიღობავენ, ხელს გვკიდებენ და ცოტა არ იყოს კატეგორიულად მოითხოვენ „მონყალებას“. რა აქვთ ამდენი სანერი?

მშიერმა, გაძვალტყავებულმა რიქმა-ველოსიპედმა თითო რუპიად მთელი ქალაქი შემოგვატარა.

მაღაზიას რომ მიუახლოვდები სამი-ოთხი ინდოელი გამოვარდება და გემუდარება ჩემთან შემოდიო. როცა აუხსნი, რომ შენ ფული არა გაქვს და მხოლოდ ქალაქის დათვალიერება გინდა, უკან როდი იხევს. ნურაფერს იყიდით, ისე შემოიხედეთ, დაათვალიერეთო. როცა შეგიტყუებს ათასნაირ საქონელს დაგაყრის და სანამ რაიმეს არ გაგასაღებინებს არ მოგეშვება. თუ ფული არ გაქვს, რაიმეში გაგიცვლიო გეხვეწება, შენს გამონაცვალ წინდებსაც კი არ ითაკილებს, თუ გასაცვლელად შეეღევი!



ინდოეთი. საროსკიპო

დიდხანს ვერთობოდი ჩვენი სასტუმროს სპილოთი. როგორ არის დაბეჩავებული ეს საცოდავი. ეს ამოდენა გიგანტი მთელი დღე დგას და ტურისტებს „ემსახურება“. მარტო ერთხელ გაიღვიძა მასში მხეცმა. თურმე ავტობუსს ვერ იტანს. შემოვიდა თუ არა ეზოში ავტობუსი, ერთი კი დაიყმულა, ორ ფეხზე დადგა და იერიშზე წამოვიდა. ძლივს დააკავეს თორემ ავტობუსს კარგ დღეს არ დააყრიდა.



სალამოს ცხრა საათზე ჯაიპურში ჩამოვფრინდით და სასტუმრო „ამერში“ დავბინავდით. ორმა ქალმა ჩვენს მეზობელ ოთახში შესვლისთანავე საწოლზე ხვლიკები შენიშნა და ისეთი კვილი მორთეს, რომ მთელი სასტუმრო ფეხზე დადგა. ხვალ ჯაპურს დავათვალიერებთ.

## 29 იანვარი

ჯაიპური – ინდოეთის ერთ-ერთი უძველესი ქალაქი. ინდოეთში პირველად ვნახეთ მთები.

ჯაიპური ნითელ ქალაქს ნიშნავს, მართლაც მთელი ქალაქი აგებულია ნითელი ინდური ტუფისგან და ქალაქს რომ ერთიანი იერი ჰქონდეს, ის სახლებიც კი სხვა მასალისგან რომლებიცაა აგებული – შეღებილია ნითლად.

შუსაუკუნური აღმოსავლური ტიპური ქალაქი. სავსეა ხალხით, ყაყანით, სიღარიბით და სიბინძურით.

ჯაიპურს ირგვლივ ულამაზესი მთები აკრავს. ქართველ კაცს შორიდან იგი სიღნაღს მოაგონებს.

ამბერის სასახლისკენ გვიჭირავს გეზი.

ქალაქს რომ გავცდით, ერთბაშად თითქოს მთელი ათასი წლით უკან დავიხიეთ. ყოველი ფეხის ნაბიჯზე გვხვდება მიტოვებული უზარმაზარი სასახლეები. ამ დახავსებულ პალატებში რა თქმა უნდა აღარავინ ცხოვრობს, სახელმწიფოსაც დაავინწყდა ისინი, რადგანაც ამ „უბრალო“ ძეგლებისთვის კი არა ამბერის სასახლის შენახვისთვისაც არა გვაქვს თანხაო – ამბობს გიდი.

არა და „უბრალოდ“ ნათლავს გიდი მე-16, მე-17 საუკუნეებში აგებულ უაღრესად ორიგინალურ და მონუმენტურ სრა-სასახლეებს.

ამბერის კომპლექსს მართლაც ვერაფერი შეედრება. ასე მასშტაბური და გრანდიოზული თვით ცნობილი ტაჯ-მაჰალ-იც არ არის.

წარმოიდგინეთ დაახლოებით ათი კილომეტრის მანძილზე გაშლილი ამ ათასხუთასი წლის წინათ აშენებული ულამაზესი ქალაქი – მაჰარაჯათა მუდმივი რეზიდენცია. მაჰარაჯას საწოლი ოთახი. პალატები მისი ათასხუთასი ცოლისთვის.

თითოეული ცოლის ოთახი ერთმანეთისგან ისეა იზოლირებული, რომ სხვანი ვერ დაინახავდნენ საჭურისს როგორ მოჰყავდა მბრძანებლის საწოლისკენ რომელიმე ცოლი.

შადრევნები.

თეატრონი და საცეკვაო მოედანი.

სადაფითა და ლალით მოოჭვილი თეთრი მარმარილოს კედლები.

რომელ ერთ სასახლეს ნახავ, რომელ ერთ დარბაზში შეიხედავ. რის ნახვას მოასწრებ.

არსად, არცერთ ისტორიულ ძეგლზე ინდოეთში მცირე წარწერაც არ მინახავს უტიფარი მნახველის ხელით მიწერილი. ჩვენ რა ღმერთი გაგვინყრა?



ინდოეთი



სადილის შემდეგ მაჰარაჯას მუზეუმ-სასახლე დავათვალიერეთ ჯაიპურში. მაჰარაჯა ამავე დროს დიდი მეცნიერი და პოეტიც ყოფილა. დაახლოებით ერთ ჰექტარზე, ღია ცის ქვეშ, იმ დროისათვის უბრწყინვალესი ობსერვატორია მოუწყვია. მზის საათი, კალენდარი, გეომეტრიული სხეულები, ვარსკვლავთა სათვალთვალო კოშკი.

ნუთუ ამ ინდოელის გონება ახდენდა ასეთ სასწაულებს? ნუთუ ამ ინდოელის წინაპარი აზროვნებდა ასე მეფურად და პოეტურად, ნუთუ ამ ინდოელს ჰქონდა ასე დახვეწილი გემოვნება?

უყურებ შენს ირგვლივ შეჯარულ, ხელგამონვდილ, პირდაუბანელ, სარშემოხვეულ ინდოელებს და ვერ დაგიჯერებია – ნუთუ ამ ხალხმა ააშენა ეს ყველაფერი და გამოცანად დაუტოვა კაცობრიობას?

ამბერის სასახლემდე სპილოებზე ამხედრებულნი ავედით.

სპილო – ინდოეთის სიმბოლო. კეთილი და სანყალი სპილო.

მაჰარაჯათა სასახლეების ქონგურებზე მაიმუნები ემანჭებიან ტურისტებს ერთი ბენო შოკოლადის მისაღებად.

ბედის ირონია?

როცა საღამოობით ტურისტთა ფეხის ხმა მიწყდება და მოხელე-ინდოელებიც სახლებს მიაშურებენ, მაჰარაჯათა სრა-სასახლეებში მაიმუნები „დაბრძანდებიან“.

### 30 იანვარი

ბომბეი.

ინდოეთის (და მსოფლიოს) ერთ-ერთი უდიდესი ქალაქი.

სახელგანთქმული ნავსადგური.

ინდოეთის ოკეანის ნაპირებზე ორმოც კილომეტრზე გაჭიმულა. თვითმფრინავიდან კუნძულებზე გაშენებული

გვეგონა. აგვიხსნეს თქვენ რომ წყალი გგონიათ, ჭაობიაო. თვით შუა ქალაქში ჯერ კიდევ ბლომადაა ამოუშრობი ჭაობები (თავისი კოლოებით, ციებ-ცხელებითა და სხვა სიკეთით). სადაც მშენებლობა არ ხერხდება და ამიტომაც ბლომად შეხვედებით ბომბეიში „მინებსო“.

სასტუმრო ჰორიზონში დავბინავდით. „ჰორიზონი“ ზედ ზღვის ნაპირზეა. ჩემი ფანჯრიდან ინდოეთის ოკეანე მოჩანს.

ნასადილევს ქუჩებს მოვედეთ. ვინრო ქუჩები. ქობნახებთან ძვირფასი ვილები. საშუალო შესაძლებლობის ხალხის საცხოვრებელი არ ჩანს. მე ერთნაირად მძულს მათხოვარიც და მდიდარიც (ჰარამი შრომით გამდიდრებულზე მოგახსენებთ). პირველი უნიათო, მშიშარა და ზარმაცია. მეორე ფულის ყულაბას გამოდევნებული და ოქროთი გონებადანილული. მაგრამ სად ცხოვრობს იგი, ინდოეთის პატიოსანი მოქალაქე? ბომბეის ქუჩებში მათ კვალს ვერ იპოვით.

ქუჩამ რომ დამღალა, ზღვას მივაშურე. ინდოეთის მზის გულზე ვწევარ. პლაჟზეც საინტერესო სანახაობა ვიხილეთ. საოჯახო ცირკი. შავი ინდოელები (რატომლაც უფრო შავები, ვიდრე ჩვეულებრივ არიან) მოცვივდნენ დოლ-ბარაბანის გრგვინვით და დაიწყეს საცირკო ტრიუკების შესრულება. დედები, ბავშვები, მოხუცები, ახალგაზრდები – ყველა ასრულებს თითო საცირკო ნომერს და მერე ყველანი ხელგამონვდილნი გთხოვენ გასამრჯელოს. შენ არ მოგინვევია? მერე რა, წარმოდგენას ხომ უყურებდი, ახლა ვალდებული ხარ დაეხმარო.

მაღაზიები სავსეა, მაგრამ მყიდველი არ ჩანს. განა მოთხოვნილება არ არის, უბრალოდ ფული არა აქვთ და არათუ ფული არა აქვთ, ფულის შესანახი ჯიბეც არა აქვთ. ორმეტრიან ქსოვილს შემოიხვევს ტანზე და ჰაიდა, რა საბუთი, რა პარტილეთი, არაფერი მათ არ სჭირდებათ.

ბომბეის გრძელი დღე.

დიდი ევროპული ტიპის ქალაქი. გარშემორტყმული ლარიბთა ქოხებით. სამრეცხაოები ღია ცის ქვეშ. ამ შრომატევად და მძიმე სამუშაოს ინდოეთში (სხვა ქვეყნებისგან განსხვავებით) ძირითადად მამაკაცები ასრულებენ.

ზარათუსტრას სამლოცველო.

შემაზრზენი წესი ცხედრის გაპატიოსნებისა. მალლა ან-იშე დაასვენებენ, რათა სვავებმა შეჭამონ.

ბომბეის აკვარიუმი.

ბომბეის დაკიდებული ბალები.

შუადღის შემდეგ ისევ ინდოეთის ოკეანეში ბანაობა.

სალამოს ბომბეის ერთ ქრისტიანულ ეკლესიაში დაკრძალვას შევესწარით. დაკრძალვა სასაფლოზე – კუბოთი, რაც იშვიათია სხვა ტომისა და რწმენის ინდოელთათვის (ძირითადად კრემაციას ახდენენ). ცხედრის დამარხვის შემდეგ მიცვალებული ქირისუფლებთან დიდი რიგი გაიმართა. ამხნევებენ, ხელს ართმევენ, ანუგეშებენ.

ეკონომიკური დახმარება?

ავადმყოფობას გაიგებენ თუ არა, ნათესავები, ახლობლები და მეგობრები ავადმყოფის სახლს არ შორდებიან, შეუკრებენ ფულს, მიაქვთ სურსათი, პროდუქტები. რაც უფრო მძიმეა ავადმყოფი, მით მეტი ინტენსივობით ეხმარებიან. ასე რომ, გარდაცვალების შემდეგ, მის ოჯახს უკვე დაუგროვდა გარკვეული თანხა დასაფლავების ხარჯებისთვის.

განა ეს უფრო ქმედითი და სწორი დახმარება არ არის, ვიდრე გარდაცვალების შემდეგ (მოლასი და ფლავის არ იყოს) 100-100 მანეთის შეგროვება, როგორც ეს ზუგდიდში და სხვა ქალაქებში იცინან?

საფლავის მიწა უფასოა, მაგრამ ინდოელი ქრისტიანები თურმე საფლავის გაფორმებაზე თავს არ ინუხებენ, ხის ან რკინის ჯვარს დაასობენ და მორჩა.

დღეს ბომბეის მახლობელ კუნძულზე კატარლით ნაგვიყვანეს ე.წ. „სპილოების გამოქვაბულის“ დასათვალიერებლად.

„სპილოს გამოქვაბული“ რომ გვითხრეს, მე სიმართლე გითხრათ, მეგონა რომ სპილოების ნაკრძალში მივყავდით. სპილო თვალთ არ გვინახავს. ეს სახელი ძველითგანვე შეურქმევიათ, ერთ დროს სპილოებით მდიდარი ამ კუნძულისთვის.

ვნახეთ მინისქვეშა ტაძარი, რომლის მსგავსი რამ არსად მინახავს – მას სხვანაირად „შივას ტაძარი“ ჰქვია. გამოქვაბული სავსეა შივას ექვსმეტრიანი ქანდაკებებით და შივასთან დაკავშირებული სიუჟეტების ბარელიეფებით.

მაიმუნები ფეხებში გვედებიან. აქ იმდენი მაიმუნია რომ კუნძულს, ჩემი საქმე რომ იყოს, მაიმუნების კუნძულს დავარქმევდიო, იხუმრა გიძმა.

სადილის შემდეგ ისევ ბომბეის ქუჩებში ვართ. ყოველ ფეხის ნაბიჯზე ეგზოტიკა. სრულიად უჩვეულო საუბრის მანერა, ჟესტით და მიმიკით საუბარი. ქალებს უჩვეულოდ წვრილი ხმა აქვთ, კაცებს გამოკვეთილად ბოხი.

რაჯ-კაპური – ერთ-ერთი ყველაზე პოპულარული კაცია ინდოეთში. იქნებ მის სტუდიაში მივიდეთ, ათიოდე წუთი დაგვითმოს, დავათვალიეროთ, ვკითხოთ რაზე მუშაობს მეთქი, ჩამოვურაკრაკე აქაურ გიდს, მაგრამ წამიყრუა. ცოტა ხნის შემდეგ მითხრა: ამ ბოლო ხუთი წლის განმავლობაში რაჯ-კაპური საბჭოთა ტურისტებს მხოლოდ ერთხელ შეხვდა, თავს არიდებსო.

რატომ შემოგვწყნრა ეს დიდი მსახიობი და რეჟისორი? ვინ იცის.

სალამოს ახლა უკვე მეორე ქორწილს შევესწარით ინდოე-

თის მინაზე. ცეკვაც მომინია. აქაც ისეთივე ქორწილი დელი-  
ში რომ ვიხილეთ.

## 2 თებერვალი

ისევ ბომბეი.

მთელი დღე ზღვაზე გავატარეთ.

ოკეანე ღრმად და მიძიმედ სუნთქავს. ზღვის მიმოქცევა  
30-40 მეტრამდე აღწევს. ამიტომ ბომბეის უზარმაზარი პლა-  
ჟი აქვს. სიგანით დაახლოებით 100-120 მეტრი.

ოკეანის წყალი მღვრიე და ჭუჭყიანია, თანაც გულისამრე-  
ვად მარილიანი.



ინდოეთი. ბომბეი


## 3 თებერვალი

ექვსსაათნახევარი იფრინა ჩვენმა თვითმფრინავმა ოკეანის  
თავზე და დილის ცხრა საათიც არ იქნებოდა კაიროში რომ  
ჩამოგვიყვანა.

პირველი შთაბეჭდილება, ეგვიპტელი არაბები მაღალი,  
ვაჟკაცური გარეგნობისანი არიან. ქალები უმეტესწილად  
მსუქნები. ქუჩები დელი-ბომბეისთან შედარებით გაცილე-  
ბით სუფთაა.

საბაჟოს მოხელეები ჩვენს ჩემოდნებში დიდხანს და გააფ-  
თრებით ეძებდნენ რაღაცას.

სასტუმრო „ქაიროსი“ – ფეშენებელურობით ვერ დაი-  
კვებხნის.



ეგვიპტე

ქრისტიანული ეკლესია. წმინდა სერგის ტაძარი. მე-6 საუკუ-  
ნისა. მარიამ ღვთისმშობლისა და ქრისტეს დამალვის ადგილი.



სინაგოგა.

უიშვიათესი ხელნაწერები.

მუჰამედ ალი ფაშას მეჩეთი – გრანდიოზული ნაგებობა.

სალამოს პირამიდებთან დაკავშირებულ ლიტერატურულ-დრამატულ კომპოზიციას დავესწარი.

პირველად მეგონა დეკორაციებს შევცქეროდი თეატრში. თურმე ნამდვილი პირამიდების წინ ვიჯექი.

სასწაულია პირამიდა თავისი გრანდიოზულობით და იდუმალებით.

#### 4 თებერვალი

დილით ჩვენი საკონსულოს სტუმრები ვართ.

საკონსულოს თანამშრომელი გვიამბობს იმის შესახებ, თუ როგორ აინია ფასებმა ამ ბოლო დროს ეგვიპტეში (ბენზინი, საკვები, ოქრო).

უბინაობის მსოფლიო პრობლემა. ეგვიპტეს ეხმარება დოლარით ამერიკა და ინგლისი. აეროპორტიდან ორ კილომეტრში არის მუსლიმანთა სასაფლაო. ამ ბოლო ერთი წლის განმავლობაში უბინაო ხალხმა დაიწყო სასაფლაოს ოკუპირება. ცოცხლებმა გამოდევნეს მკვდრები საფლავებიდან. მუსლიმანთა სასაფლაოზე ქირაობენ ოთახებს, აკეთებენ ტრადიციულად. ასე რომ ამგვარი ოთახი-სასაფლაო უბინაოსთვის საცხოვრებლად ფრიად მოსახერხებელია.

სადათი ისრაელთან დამარცხებას და ქვეყნის ეკონომიურ სიდუხჭირეს საბჭოთა კავშირს აბრალებს.

ექსკურსია ქალაქში.

კაიროში 5 უნივერსიტეტი.

ხეოფსის, ხეფრინის და მიქემირონის პირამიდები!



ეგვიპტე

სულ 83 პირამიდაა ეგვიპტეში. მარტო ერთი სარკოფაგია მინის ქვეშ. ორი შესასვლელი აქვს. ნამდვილი შესასვლელი და ყალბი.

უცემენტოდ და უდუღაბოდ. 2700 წელი ჩვენს ერამდე. 137 მეტრი სიმაღლე აქვს ხეოფსისს. 20 წელი აშენებდნენ. საფრანგეთს ორჯერ შემონვდებოდა კედელი რითაც ეს პირამიდაა აშენებული. 4000 წლისაა. ტყუილია რომ თითქოს მონებს აშენებინოთ. 2 – ოთახია. ერთი ხეოფსისთვის და მეორე ცოლისთვის.

136 მეტრი ხეფრინის პირამიდა ალებასტრით იყო დაფარული.

ძველი ეგვიპტელები ალბათ იყვნენ მექსიკიდან, რადგანაც იქაცაა აშენებული პირამიდებიო, თქვა გიღმა.

ფარაონ ჰეფრინის სფინქსი სიმაღლე – 20, სიგრძე – 55 მეტრი. შამპილიონმა გახსნა იეროგლიფების საიდუმლო.



ნაპოლეონმა ააფეთქა სფინქსის ქანდაკება. მოტეხა ცხვირი. რატომ? რა უნდოდა?

მემფისი, საჰარა.

რამზეს მეორის უზარმაზარი ქანდაკება. 55 ცოლი ჰყავდა და 225 – შვილი.

ჯუსერის პირამიდა. 60 მეტრი – ყველასგან განსხვავებული. ფარაონ ჯუსერის აკლდამა მინისქვეშაა. იგი ერთადერთია ეგვიპტის 83 პირამიდიდან, რომლის გაძარცვაც ვერ მოასწრეს (თუ ვერ მოახერხეს) ქურდებმა.

გიდი ამბობს, არსებობს ვერსია, რომ შეიძლება პირამიდები არამინიერი, ციური, კოსმიური ადამიანების აშენებული იყოსო, რადგანაც მეცნიერთათვის დღესაც გამოცანად არის ქცეული პირამიდების აგების საიდუმლოება: რა ტექნიკით ხეთქავდნენ ამოდენა ლოდებს, როგორ აჰქონდათ მალლა. რა ხელსაწყოებით იცავდნენ პროპორციებს ასე ზუსტად.



ეგვიპტე

ლაბირინთით ჩავედით ჰეფრინის პირამიდის ცენტრში. ფარაონის აკლდამა. 4 ათასი წლის წინათ ჩაასვენეს ამ აკლდამაში ფარაონი და განსვენებულის „გამპატიოსნებელთაგან“ გარეთ გამოსვლისას ყველამ თავი მოიკლა, რომ პირამიდის საიდუმლო არავისთან წამოცდენოდათ.

დღეს იყო, ალბათ, ყველაზე დიდი დღე ჩემს ცხოვრებაში. ასეთი შთაბეჭდილება ჩემზე არასოდეს არაფერს მოუხდენია.

დედამინის ნომერ პირველი საოცრება – უზარმაზარი ხელოვნური მთები – პირამიდები. რა პატარანი და უსუსურნი ჩანდნენ ადამიანები მის გვერდით.

4 საათზე ალექსანდრიისაკენ მივდივართ ავტობუსით. ასფალტიანი გზა უსიცოცხლო უდაბნოში მიიკლავება.

კვლავ პირამიდები და ჰეფრინის სფინქსი, რამზესის ქანდაკება მიდგას თვალწინ.

პირამიდა თითქოს გულზე მანვეს და ამოსუნთქვის საშუალებას არ მაძლევს.

ლოდების ჩამოხეთქვის ერთი ხერხი ალბათ ასეთი იყოვო: კლდეში ხვრელს გააკეთებდნენ და ხეს ჩაასობდნენ. ნელნელა ხეს წყალს ასხამდნენ. ხე იფლინებოდა და ქვას ხეთქავდა. ქვების ტრანსპორტირების ხერხები ცნობილი არ არის. ნილოსით? ხეებზე დაგორებით? მალლა ატანა? ყოველ საფეხურს მინით ფარავდნენ და ასე მიიწევდნენ მალლა. მხოლოდ ქვის წყობა. არსად არ არის დულაბი!

## 5 თებერვალი

სასტუმრო „მეტროპოლი“.

ალექსანდრია. 2,5 მილიონი კაცი ცხოვრობს. აფრიკის ყველაზე დიდი ნავსადგური. 331 წელი ჩვენს წელთაღრიცხვამდე. ალექსანდრე მაკედონელმა დაარსა ეს ქალაქი.

ყოველ 22 წამში ბავშვი იბადება. ყოველ 66-ში კვდება

1 კაცი. ალექსანდრიის კატაკომბები. დასაფლავების კულტი ეგვიპტეში. ქვის აბანოები – მერე კუბოდ იყენებდნენ.

მინისქვეშა მთელი ქალაქია მიცვალებულთა განსასვენებლად.

მკვდარი ყველა თანასწორია.

ყველას თანაბარი აკლდამა აქვს.

პომპეუსის სვეტი.

სერაფიტის სფინქსი.

1845 წელს იტალიელმა არქეოლოგმა ბოტომ წაიკითხა წარწერები.

აღმოჩნდა რომ ეს სვეტი აგებული იყო 235 წელს ჩვენი წელთაღრიცხვით ბერძენი იმპერატორის დიოკლეტიანეს პატივსაცემად.

ბერძენმა იმპერატორმა ალყა შემორტყმულ ქალაქს საჭმელი გაუგზავნა. მტერი ალყას არტყამს ქალაქს (8 თვე) და მოსახლეობას საკვებს უგზავნის.

სიმაღლე არის 26 მეტრი. გარშემოწერილობა 2,5 მეტრი. ეს სფინქსი არის ჩვენს წელთაღრიცხვამდე 20 საუკუნის წინათ გაკეთებული.

ალექსანდრია ულამაზესი საკურორტო ქალაქია.

მსოფლიოს ყველა კუთხიდან ჩამოდიან აფრიკის ამ „ლურჯი მარგალიტის“ პლაჟებზე სანებივროდ.

საკურორტო ქალაქისთვის დამახასიათებელი ღამის ბარები და საექვო კლუბები.

მსოფლიოს შვიდ საოცრებათაგან ერთ-ერთი ალექსანდრიის შუქურა მინისძვრამ იავარქმნა. მისი წარჩენებიდან უშნო თურქული ციხეა აგებული ზღვის პირას.

ალექსანდრე მაკედონელის ქალაქი ძვირფასად ინახავს თავისი დამაარსებლის ხსოვნას.

ეგვიპტეში სახელმწიფო ცდილობს გამრავლების სწრაფი ტემპის ნორმალიზებას. იგი უფასოდ აძლევს ქალებს შობადობის საწინააღმდეგო საშუალებებს. ეგვიპტეს გამრავლების

ტემპით მსოფლიოში ერთ-ერთი პირველი ადგილი უჭირავს. ინტელიგენტთა ოჯახები თანხმდებიან გამრავლების საწინააღმდეგო საშუალებათა მიღებაზე, ხოლო დაბალი ფენა უარს ამბობს. ფელიპები (გლეხები) თვლიან, რომ ალაჰს რამდენიც სურს იმდენი უნდა გაჩნდეს. ეგვიპტეში თვითეულ ოჯახში საშუალოდ 6 ბავშვია.

ანეგდოტი. ქალი რომ აბებს ყლაპავდა და მაინც ორსულდება. ბავშვი დაიბადა და მუჭში აბები ეჭირა.

## 6 თებერვალი

დილით ალექსანდრიის ნავსადგური დავათვალიერეთ და შუადღისას კაიროსაკენ წავედით.

ისევ უსიცოცხლო უდაბნო.

უდაბნოს ჰკვეთს ადამიანის არსებობის ერთადერთი ნიშანი მაღალი ძაბვის ბოძები.

ეს ბოძები და გრანდიოზული ასუანის კაშხალი ჩვენ ვაჩუქეთ ეგვიპტეს.

კაირო და თითქმის მთელი ეგვიპტე რუსი კაცის შექმნილი ელექტროენერგიით საზრდოობს.

სანაცვლოდ სადათმა ბრანნი გვიჩვენა და ხმელთაშუა ზღვის კარები უსირცხვილოდ მიგვიხურა.

უმადურობაც ამას ჰქვია.

## 7 თებერვალი

ეგვიპტის ნაციონალური მუზეუმი. გიდი გვიამბობს, რომ ძველეგვიპტელთა ცხოვრება იდუმალებითაა მოცული.

უამრავი საიდუმლო ამოხსნილი არ არის.

დაბალზამების წესი.

საღებავის შეზავების წესი.



ეგვიპტე

კარგი, ადამიანის დაბალზამება შეძლეს, როგორ შეძლეს ტანსაცმლის ან ტუტანხამონის მუმიაზე დანყობილი ყვავილების ისე შენახვა, თითქოს ხუთი ათასი წლის წინათ კი არა გუშინ იყოს მოწყვეტილი!

ხომ განუმეორებელია ანტიკური ქანდაკებანი, მაგრამ მე ვფიქრობ ანტიკურ სკულპტურაში უფრო ნატურალიზმთან დაახლოვების, ზედმინევენიტი რეალურობის პრეტენზია იგრძნობა, მაშინ როცა ძველეგვიპტური ქანდაკება უფრო სტილიზებისაკენ ისწრაფვის. მასში უფრო მეტი ხელოვნებაა, მეტი პოეზია.

კომპოზიციის რა დახვეწილი გრძნობა, რაოდენი დინამიურობა და სისადავე იგრძნობა 4-5 ათასი წლის წინანდელი ეგვიპტელის ნაქანდაკეში.

მუმეების დარბაზი.

მინის ხუფის ქვეშ ერთმანეთის გვერდით წვანან ჩირადქცეული ფარაონები.

„სარკოფაგიდან დგება მუმია“ – ზარივით ჩამესმის, გალაქტიონის ლექსი.

საწყალ გალაქტიონს მუმია ალბათ არც უნახავს.

ხუთი ათასი წლის წინათ გარდაიცვალა ეს რამზეს მეორე. ერთი კვირის მკვდარივითაა.


შენარჩუნებულნი აქვთ თმები, კბილები, სახის კანი, ფეხის ფრჩხილები...

სად წავიდნენ ის „მეგვიპტელნი“.

რატომ ჩაიტანეს მინაში ამდენი მონაპოვარი ადამიანის გონებისა.

დაბალზამების წესს ხომ ისინი საუკუნეების განმავლობაში იმუშავებდნენ. რად გაუნყრნენ ასე შთამომავლობას?

– თანამედროვე არაბები იმ ძველ ეგვიპტელთა უშუალო მემკვიდრენი არიან?



ეგვიპტე



გიდს არ ესიამოვნა ეს შეკითხვა. რასაკვირველია, იგი განათლებული ბიჭია და მშვენივრად გრძნობს რომ დღევანდელ ეგვიპტეს თავის ლიტერატურით, სახვითი ხელოვნებით, არქიტექტურით, მუსიკით საერთო არაფერი აქვს ფარაონების ეგვიპტესთან.

ამიტომაც პირდაპირ პასუხს გაუბრუნებ. მიკიბულ-მოკიბულად მესაუბრება. ესაო, მთელი მსოფლიოს წარსულიაო, მთელი კაცობრიობის ისტორიააო. აქ დაირწაო ცივილიზაციის აკვანი. ამიტომაც რა მნიშვნელობა აქვსო ვინ იყვნენ ის „მეგვიპტელნი“ ისინი ჩვენიც, თქვენიც და საერთოდ ყველას წინაპრები არიანო.

ტუტანხამონის აკლდამა.

9 წლისა დაქორწინდა და 17 წლის იყო რომ მოკლეს (თავი აქვს მუმიას გატეხილი).

მისი პირამიდა გაუძარცვავი დარჩა.

ოთხი ერთმანეთში ჩადგმული ოქროს ყუთი.

მერე ორი ერთმანეთში ჩადგმული ოქროს სარკოფაგი ძვირფასი თვლებით მოოჭვილი და ბოლოს ტუტანხამონის მუშია. ყველაზე კარგად შენახული ყველა მუშიათა შორის.

აქ კი ნამდვილადაა დამარცხებული სიკვდილი.

კაიროს მუზეუმიდან გიდმა თითქმის სათითაოდ, ძალით გამოგვიყვანა. ისეთი გრძნობა მქონდა რომ თითქოს ამ სამი საათის განმავლობაში ვერაფრის ნახვა ვერ მოვასწარი.

კაიროში უსიამოვნო, ცივი წვიმა წვიმს.

ამ საღამოს მოსკოვში მივფრინავთ. რა დასამალია ზოგი ჩვენი დელეგაციის წევრი გარდა ღირსშესანიშნაობათა დათვალიერებისა, ცოტა არ იყოს, ვაჭრობითაც იყო გართული. ვერც დაძრახავდი. რა იყო ეს ვაჭრობა მოსკოვიდან ნამოღებულ ფოტოფირებს, ოდეკალონებს და კონიაკს (მხოლოდ 3 ლიტრის ნამოღების უფლება გვქონდა) ან ინდურ და ეგვიპტურ ეგზოტიკურ ნივთებს პირდაპირ ცვლიდნენ

ან ჰყიდდნენ და იმ ფულით ახლობლებისთვის სუვენირებს ყიდულობდნენ.

საბაჟოს ურცხვი მოხელეები დაგეშილები იყვნენ ტურისტების მოკრძალებულ „კონტრაბანდის“ წართმევაზე. არაერთი ჩვენი „კოლეგა-ტურისტი“ გაამწარეს. ამ თემაზე მოგზაურობის დროს სახუმარო ლექსებს ვწერდი და უკან დაბრუნებისას თვითმფრინავში ვკითხულობდი. გულიანად იცინოდნენ, იქნებ თქვენც გაგელიმოთ:

### კაიროს ლექსი

მოხელეები ღიმილით  
დაგვხვდნენ კაიროს ჭიშკართან,  
ბოლოსკენ მივხვდით რბეულნი  
ეს ღიმი რასაც ნიშნავდა.  
დადის და დარდობს ნუგზარი,  
– რად არ ვიციტო მოზომვა.  
აქ მოგვითავეს არაბთა  
რაც ვერ დაგვაკლო მოსკოვმა.  
... ჯერ ერთი გახსნეს, ნანულიმ  
რალა სულ ზევით შემოძვა,  
ყრუ სინანულით დავყურებთ  
ყველა ნანულის ჩემოდანს.  
ზოგს აღტაცება აღმოხდა  
ზოგმა – ნუ ვიზამთ ნამეტანს,  
თუმცალა რეკორდს ნანულის  
თვითონვე გადაამეტა.  
ბრძანეს: დახსენით ჩანთები,  
განყრნენ, თვით დათოც იფრინეს,  
და წართმეული ფირებით  
ყუთები დააპიპინეს.



რაც ჩვენგან ფირი წავიდა  
(მსგავსი მიუშვი მსგავსებთან)  
ერთ პირამიდას თავიდან  
ბოლომდე ამოავსებდა.  
– ნუ სტირი – ამბობს ზემფირა,  
მზიას ჩემოდანს ულაგებს,  
სხვამ რა თქვას, შალვა ბატონი  
მეორედ განაკულაკეს.  
დათო, კოტიკო, მურმანი  
ჰგვანან ნაცემს და ნაციებს  
ცრემლმორეულნი დასცქერენ  
გაქურდულ „დისერტაციებს„.  
გადი-გამოდის რევაზი  
ქუთაისური ჩანთითა,  
„მისტერ მოგვეში„ თითს უქნევს  
საბაჟოს კრეტინ კაპიტანს.  
„ბოკუჩავასთან ვუჩივლოთ„  
ვიღაც გაჰკივის ამასა,  
და ერთადერთი თამრიკო  
ოხრავს ნაზად და ლამაზად.  
– არ დაეზარდოთ შვილები,  
არ გაუდიდდეთ ხანია. –  
თვის გადარჩენილ საქონელს  
ბოჭავს და ფუთავს მანია.  
-არ გაგვაფრთხილეს! ნათელამ  
მე ვუძრახოო სხვასა ვით,  
რომ ეთქვათ; მაშინ მეც ას ფირს  
დავჯერდებოდი სხვასავით.  
თვითონ საქრთამოდ მოსულმა  
(ძალა ხელში აქვს, რად არა)  
ჩვენმა პუჭურა კონსულმა

კონტრაბანდისტებს გვადარა.  
გაფიცებ, ალექსანდრია,  
მაკედონელის მტვერსაო,  
მოგვეში, რაც ჩვენ დავგემართეს,  
მტერი არ უზამს მტვერსაო.  
ცივ ავტობუსში ოცდაათს  
სძინავს ვაჭრად და სირაჯად,  
ძილში ინდოეთს ხედავენ  
ძვირფას ზღაპრად და მირაჟად.  
ათფუნტიმედად დარჩენილს  
ცრემლი მიშრება თვალშია,  
შავი და ავი ფიქრები  
მიმდი-მომდიან თავშია.  
გიდი მამშვიდებს, მანყნარებს  
კატაკომბების ხვრელითა,  
ეჰ, რა მეკატაკომბება  
„ლუსტრა„ მეცლება ხელიდან.

## წყევლა

ვერ მოთოკოს ვინაც თავი  
ჩენჩაობა ისევ იწყოს  
ვინაც რეზო მიშველაძის  
სამი მცნება დაივიწყოს.  
ბომბეიში თვით სინდისს და  
ქართველობას აუმხედრდეს;  
საჩვენებლად ყველას თვალწინ  
შალვას კლიზმა გაუკეთდეს.

\* \* \*

ყველა მისთვის ჩირთი-ფირთობს,  
ყველა ცალკე იჩენჩება,  
ნიავეს მოაქვს მოძახილი:  
„რასაც დავლევ, ის შემრჩება“.

\* \* \*

შეიქმნა დიდი ვაჭრობა,  
როგორც ვაჭრობის წესია,  
აქ ჩნდება (ვით აბანოში)  
ვინ ვისზე უკეთესია.  
მე ადეკალონს გაჩუქებ,  
გულით ვაკეთებ ამასო,  
სანაცვლოდ შენგან ვიჩუქებ  
ბეჭედს და თორმეტ კაბასო.  
დეზადორს ვერ დაგიმატებ  
შენ ნუ გგონივარ გლახაო,  
ეგრე არ არი თაყაო,  
შენ რომ მამული გაჰყაო.  
გარეთ კოტიკო დახვდება  
სიტყვას აჩუქებს ამოსა  
გულს ნუ დაინყვეტ, დობილო  
რას ვიქმთ, მჭამელმა ჭამოსა.

\* \* \*

ვემშვიდობები ჯაიპურს  
ჩავდექ ბომბეის კვალსაო,  
ცრემლმორეული დავყურებ  
ყელმარგალიტის თვალსაო.  
ჩენჩობის ერთი საათი  
ვაჭრისთვის ერთი ყლუპია.

არც ჩენჩი გამომივიდა  
ვერც გადავლუნე რუპია,  
ჩანთას იხუტებს მატრონა,  
ლამარა კბილებს ილესავს,  
ციდან ბომბეის დავცქერი,  
ვით გადარჩენილ იმედსა.

## საბერძნეთი – კვიპროსი – იტალია

17.12.1976 – 02.01.1977

### 17 დეკემბერი

მოსკოვიდან სამსაათნახევრიანი ფრენის შემდეგ დავემ-  
ვით კვიპროსის ქალაქ ლარანაკას აეროპორტზე. დელეგაცია  
ძირითადად ქართველი მწერლებისგან შედგება : მედეა კახ-  
იძე, ლადო მრელაშვილი, ემზარ კვიციანიშვილი, მე...

პატარა აეროპორტია. მეგონა თვითმფრინავი მიწაზე  
დაეშვა. დიდხანს მიფრინავდა „ტუ-154“ თითქმის ზღვის  
ზედაპირზე და როგორც კი ხმელეთი გამოჩნდა მაშინვე  
დაეშვა.

საბაჟოში ვაშლის შემოტანა არ შეიძლება, ლადოს ჩან-  
თაში ათიოდე ვაშლი ედო. რა მეტი გზა გვქონდა, იქვე საბა-  
ჟოში შევჭამეთ სახელდახელოდ (ხომ არ გადავყრიდით).

კვიპროსის რესპუბლიკისთვის საკმაოდ ტრაგიკულ დროს  
ჩამოვსულვართ. კვიპროსის ნახევარი თურქეთს უპყრია,  
შემოგვჩივლა გიდმა. თითქოს ერთადერთ ხსნას ჩვენში ხე-  
დავდა.

ჩვენ ჩვენი გასაჭირიც ყელამდე გვაქვს.

მოსკოვში 15 გრადუსი ყინვა იყო, აქ კი ისე თბილა, რო-  
გორც ჩვენში ადრეულ შემოდგომაზე.

ავტობუსით ნიქოზიისკენ მივდივართ. გზაზე ულამაზესი  
კოტეჯები და მიტოვებული, დანგრეული ქოხები გარეკილი  
თურქების.

მთაგორიანი ქვეყანაა, პირნიშნადად გადატრუსული. მცე-  
ნარეული საფარი არ ჩანს. მარტო სახლების წინ ვხედავ  
ოქროსფერი ნაყოფით დახუნძლულ მანდარინის და ფორ-  
თოხლის ბუჩქებს. სახლები ძირითადად ერთსართულიანი.

ნიქოზია ისეთი მშვიდი და წყნარი ქალაქია, თითქოს სამი-  
ოდე კილომეტრზე ქალაქიდან დამპყრობელი თურქთა ჯარი  
არ იდგეს ქალაქისაკენ დამიზნებული ქვემეხებით.

ევროპული დამლელი სადილი პირველსა და მეორე კერ-  
ძს შორის საათნახევრიანი შესვენებით. ჩამოსვლისთანავე  
მაგიდას მივუჯექით, გეგონება სუფრასთან დასაჯდომად  
ჩამოვსულიყავით ამ სიშორეზე.

მასპინძელი ფირმის წარმომადგენელმა იხუმრა, მე ვიცი  
ქართველები მჭამელი ხალხია და შევეცდები თავი არ შევირ-  
ცხვინო.

სადილის შემდეგ ქალაქს ვათვალიერებთ. მაღაზიები სავსე  
ინგლისური, ამერიკული, იტალიური ნაწარმით. ჩვენი „ლა-  
დას“ მაღაზიასაც ჩავუარეთ. გვითხრეს საბჭოთა „ჟიგული“  
იაფია და კარგადაც იყიდებაო.

ხალხი საგაზაფხულოდაა გამოწყობილი.

სალამოს საბჭოთა კავშირისა და კვიპროსის მეგობრობის  
საზოგადოებაში მიღება გვქონდა. თავაზიანად მიგვიღეს. სა-  
სარგებლო დანესებულებაა. თაროებზე ტურისტულ ცნობარს  
– „საქართველო“ მოვკარი თვალი. რუსეთზე და უკრაინაზე  
ბევრი რამ იციან, ქართულ კულტურაზე ძალიან ცოტა. ჯერ-  
ჯერობით საქართველოს იმით ვიცნობთ, რომ ამასწინათ ჭია-  
თურის ცეკვის ანსამბლი იყო გასტროლებზე და კობა გუ-  
რულის ნამუშევრების გამოფენა მოვანწყვეთ საზოგადოების  
შენობაშიო.

ჯერჯერობით აქ არცერთი ქართული წიგნი არ გამოსულა.  
კვიპროსელ ბერძნებს რუსთაველის სახელიც არ გაუგიათ.

სალამოს ისევ გრძელი, დამლელი ვახშამი. ღვინოს  
(მწკლარტე, ბერძნული, იაფი) უზომოდ გვაძლევენ.

ლამით ფეხით გავიარეთ. ქალაქი ცხრა საათის შემდეგ  
ჩამკვდარია. ფანჯრები ჩამქრალი, ქუჩაში კაცის ჭაჭანება არ  
არის.

## 18 დეკემბერი

დილით დავათვალიერეთ ნიქოზიის მხარეთმცოდნეობის მუზეუმი. ვნახე მეექვსე ათასწლეულის სამარხი. ასეთი ტიპის სამარხი მსოფლიოში სამია თურმე. საბერძნეთში, საქართველოში (მარნეული) და აქ კვიპროსზე. გასაოცარია. ჯერ ხმამაღლა ვერ უთქვამს ჩვენს მეცნიერებს, თორემ არსებობს რაღაც ერთი კულტურული ხაზი, რომელიც ჩვენ განუყრელად გვაკავშირებს ანტიკურ (და უფრო ადრინდელ) კულტურასთან. ოთარ ჯაფარიძემ გამოთქვა ეს აზრი ამასწინათ საკმაოდ საბუთიანად.

განსაცვიფრებელია კვიპროსელ ბერძენთა ქანდაკებები. პრიმიტიულიდან დაწყებული კლასიკურ ხელოვნებამდე, უზარმაზარი ხელოვნება.

ჩვენ გვაქვს ორნამენტთა გენიალური კულტურა, მაგრამ ქართული ქანდაკების ტრადიცია არ არსებობს.

რატომ არ იყო საქართველოში ქანდაკება? რა ფასი ექნებოდა ახლა ჩვენივე თამარის, რუსთაველის, დავით აღმაშენებლის ქანდაკებებს?

სარგის ცაიშვილი ბრძანებს: ქრისტიანობამ გაანადგურა წარმართულ დროთა ქანდაკებებიო, რაღაც არ მჯერა.

სადილის შემდეგ დავათვალიერეთ ნიქოზიის ეთნოგრაფიული მუზეუმი. მოხუცი ქალები მუზეუმში ახლაც უსხედან უძველეს საქსოვ დაზგებს და ტურისტებისთვის გასაყიდად იქვე ქსოვენ.

საინტერესოა. თან ათვალიერებ, როგორ ქსოვენ, თან სამახსოვროდ იძენ ეროვნულ ნაწარმს. ჩვენთანაც რომ მოიფიქრებდნენ ასეთ რამეს, ცუდი როდია.

მერე დავათვალიერეთ კვიპროსის პრეზიდენტის მაკარიოსის სახლი. სადაც იგი ამჟამად ცხოვრობს და მუშაობს. ორსართულიანი საკმაოდ ლამაზი ნაგებობაა. იქვე გვერდით არის სპეციალურად მაკარიოსისათვის სალოცავი. აღ-

ბათ ერთ-ერთი ლოცვის დროს გამოეპარა მხედველობიდან თურქების შემოჭრა.

კვიპროსელები ძლიერ განიცდიან ორი წლის წინათ მომხდარ ტრაგედიას. ყველგან ავტობუსის ფანჯრებზე, ქუჩებში, რესტორნებში გაკრულია პლაკატი: კვიპროსი თეთრად, ჩრდილოეთი სისხლისფრად დაწინკლული (თურქეთის მიტაცებული ტერიტორია) წარწერა: „არ დავივინყებთ“.

საერთოდ კვიპროსზე ეროვნული სულის გამოღვიძება ძალიან იგრძნობა.

სალამოს ვახშმის შემდეგ ვნახეთ ნახევრადსეკულური ფილმი – „როგორი სიყვარული სჭირდება ქალს“. ზოგი საკმაოდ სასარგებლო რჩევაა ახალგაზრდებისთვის, ახალდაქორწინებულებისთვის.

## 19 დეკემბერი

დილის რვა საათზე ავტობუსში ვსხდებით და მივემართებით ქალაქ ლისამოლისაკენ. მთელი კვიპროსის კუნძული უნდა გადავსეროთ. ავტობუსში განსაკუთრებით გიგლა ფირცხალავა მხიარულობს.

ბუნება მკაცრი, მთაგორიანი. გზა არცთუ მაინცდამაინც სახარბიელო. მთებში მე-11 საუკუნის ეკლესია დავათვალიერეთ. საინტერესო ფრესკებია.

ყველა ერის მხატვარი თავისი ხალხის მსგავს ღმერთებს ხატავს. ჩვენ ბერძნებს ძალიან ვგავართ და გოცბული დავრჩი ჩვენი ფრესკების მსგავსებითაც. კედლებიდან მიყურებდნენ ქართველი ქრისტი, ქართველი ღვთისმშობელი, ქართველი მოციქულები.

კვიპროსელი ბერძნებიო, ამბობენ, ჩრდილოელ ბერძნებზე უფრო შავები (გასაგები მიზეზის გამო) და უფრო პატარები (ტანით) არიანო. მართლაც მესამე დღეა აქა ვართ და ქუჩაში ერთი მოსული ვაჟკაცი არ დამინახავს.



ოქრო და ლადო დევებივით ჩანან. მთიელები გზაზე ჩურჩხელას ყიდდნენ.

დავბინავდით სასტუმრო „ასტირში“. საკმაოდ ფეშენებელური ნომრებია.

სადილის შემდეგ თავისუფლები ვართ. ადრიატიკის ზღვის ნაპირას დავხეტიალობთ. ლისამოლი პატარა საკურორტო ქალაქია კვიპროსის სამხრეთ ნაწილში. ვინრო ქუჩები. ღამის ბარები. პორნოგრაფიული კლუბები. ყველაფერი რაც გასართობ ადგილს სჭირდება.

სალამოს ტელევიზორს მივუჯექით. ბერძნულ ენაზე რომელიღაც ინგლისურ კომედიას ვუცქერით. ეტყობა კარგია, რადგანაც თვითონ მსახიობები კვდებიან სიცილით.

ჩვენ ბერძნული არ ვიცით და სერიოზული სახეებით მივჩერებივართ ეკრანს.

რამდენიმე ტურისტს ჩაეძინა.

## 20 დეკემბერი

დილით ლისამოლის ღვინის ქარხანას ვესტუმრეთ. ქარხანა უზარმაზარია. ფირმა „კეოს“ ეკუთვნის. უშვებს მრავალგვარ ღვინოს, კონიაკს, („ბრენდის“) და ლუდსაც. ყველა საამქროში თავაზიანად გვიმასპინძლებიან ღვინით.

ასე რომ „დეგუსტაციაში“ რამდენიმე კაცი ისე ჩაგვათვრა ხელში, რომ თვითონ არც კი გაუგია.

ქარხნის დირექტორმა ჩვენი დელეგაციიდან 4-5 (შედარებით სოლიდური) კაცი აგვარჩია და თავის კაბინეტში მიგვიპატიჟა. დაგვაღვეინა ასი წლის ღვინო. მერე გვიამბო იმის შესახებ, რომ კვიპროსში დაახლოებით 23 ჯიშის ვაზია და მათი ღვინოები მსოფლიოში ცნობილია.

ლადომ უთხრა, რომ საქართველოში ხუთასამდე ჯიშის ვაზია და მარტო ჩემს სოფელში იყალთოში, ჩემს საკარმიდა-

მო ნაკვეთში თვრამეტი სხვადასხვა ჯიშის ყურძენი მოდისო. მასპინძელმა გაოცებისგან პირი გააღო, მაგრამ მალე დამშვიდდა (როგორც ჩანს ტურისტის ნათქვამი ხუმრობად მიიჩნია.)

ნატურალურ ღვინოს რომ ვეძახით ჩვენ (ყურძნის წვენს) ასეთი თითქმის დეფიციტია კვიპროსზე. ყველა ღვინო დამუშავებულია. დამატებულ-გამოკლებული აქვს სხვადასხვა რამ.

ერთი რამ მიკვირს, ჩვენ თითქმის ნახევარი კვიპროსი გავიარეთ და მე ვერსად ვერ ვნახე ვენახი, ვერც ხეხილის ბაღი ან რაიმე პლანტაცია. ვერ ვნახე ჩვენებურად კობტად მოვლილ-დამუშავებული ეზო. ეზოების კულტურა ეტყობა აქ არ არის.

ახლა ჩვენში სოფელ კაცს მოცლა არა აქვს, ათასი საქმეა - ვენახი, ყანა, ჩაი.

აქ მომუშავე კაცი ვერ ვნახე. გზისპირას ბარებში სხედან და დილიდან საღამომდე ლუდს ან ღვინოს სვამენ.

ლისამოლში ძალიან ვინრო ქუჩებია. მანქანის ბოლში სუნთქვა არ ხერხდება.

## 21 დეკემბერი

ერთი ყველაზე კარგი დღე იყო აქ ყოფნის განმავლობაში. ლიმასოლიდან ორი საათი გზა პათოსამდე. სხვათაშორის „პათოსი“ არა, მაგრამ ლარნაკი კი ქართული სიტყვა მეგონა.

პათოსი პატარა დაბის ტიპი ქალაქია. უძველესი. ვნახეთ პათოსის ციხე-სიმაგრე. მე ასეთი გრანდიოზული ციხე არ მინახავს. კედლის სისქე დაახლოებით 4 მეტრს უდრიდა. ციხე-სიმაგრის ირგვლივ ციტრუსების მაღაზიებია.

ისტორიულ ძეგლთა პატიოსან ფირმას უზრუნია იმისათვის, რათა დამთვალიერებლებს მანდარინით და ფორთოხლით უფასოდ გაუმასპინძლდნენ. კარგი ჩვეულებაა.

კამკაშა მზეა. ისეთი რომ ამ შუა ზამთარში პერანგშიც

კი მცხელა. შესანიშნავ ადგილას ვიბანავეთ. ხმელთაშუა ზღვაში. აფროდიტას დაბადების ადგილას. ზღაპრული სანახაობაა. ზღვაში აღმართული დიდი ლოდები.

გზას განვაგრძობთ. პათოსს ვუახლოვდებით. უძველესი ქალაქის ნანგრევები. ჩვენს ერამდე მე-10, მე-5 საუკუნისა. განთქმული ბერძნული თეატრი. ყველაფერი იავარქმნილა. ოდესღაც უზარმაზარ სასახლეთა ნაშთები. აქა-იქ სვეტებილა შემორჩენილა. ისინი კვლავ ჯიუტად დგანან და დროს ებრძვიან. სხვა ყველაფერი დაუსრავს და დაუქცევია ჟამს.

განსაცვიფრებელი მოზაიკა. ქვაში გამოკვეთილი ქალაქი. ძალიან ჰგავს ვარძიას.

სპეციალისტები ამბობენ რომ ეს (პათოსი) უნიკალური ისტორიული ძეგლია.

უკან რომ ვბრუნდებოდით მე და ემზარ კვიტაიშვილმა კვიპროსის თემაზე ვისაუბრეთ. ემზარი ამბობს, რომ კვიპროსს დიდი უბედურება სჭირს. წარმოიდგინე მდგომარეობა ხალხისა, რომლის სახელმწიფო შუაზეა გაჩეხილი.

მე ვამტკიცებდი, რომ ვერცერთი ხელისუფალი ვერ გააკეთებდა კვიპროსისთვის ისეთ კარგ საქმეს, რაც 1974 წელს თურქებმა გააკეთეს მეთქი. კერძოდ. 400 წელი ბატონობდნენ თურქები აქ. მოხდა აღრევა. ბერძნები დაჩიავდნენ. უცხო თესლმა თავისი გაიტანა. მოისპო დიდი კულტურული ტრადიციები. დარჩა მხოლოდ ნაშთები ძველი დიდებისა.

ახლა რა მოხდა? ერთბაშად დაინმინდა ამოდენა კუნძული თურქებისგან.

გზებზე ვხედავდით კარვებს, რომელშიც ჩრდილოეთიდან (თურქეთის ნაწილი) გამოქცეული ბერძნები ცხოვრობდნენ. ახლა უკვე აღარ არის შერწყმის და გადაჯიშების საფრთხე.

ახლა უკვე იცი, რომ მტერი ერთადაა თავმოყრილი. მთელს ბერძნულ კვიპროსზე ახლა არცერთი თურქი არ ცხოვრობს. გაიზრდება, მოლონიერდება და როცა იქნება გარეკავს თურქს.

თურქები ალბათ ვერც კი ხვდებიან, თუ რა კარგი სამსახური გაუწიეს ბერძნების ეროვნულ გასუფთავებას.

ვერავითარი მშვიდობიანი ფორმით ამ საქმეს ვერ გააკეთებდი.

## 22 დეკემბერი

ლარნაკიდან საათნახევრიანი ფრენის შემდეგ ათენში ვართ.

ელადა!

კლასიკური ხელოვნების აკვანი.

ავტობუსით აეროპორტიდან სასტუმრო „სტადიონამდე“ რაც ვნახე, ასეთი შთაბეჭდილება დამრჩა: თანამედროვე ათენი ვერაფრით გაგაოცებთ (როგორ ვუნოდო „ათინა“?, ალბათ ასე უფრო სწორია), განსაცვიფრებელი აქ ნანგრევებია. ნანგრევები ყოველ ფეხის ნაბიჯზე.

ხელოვნებაში ჩემსავით ოდნავარკვეულ კაცსაც კი არ გაუჭირდება იცნოს აკროპოლისი, პართენონი, ზევსის სასახლის 15 ზღაპრული სვეტი.

არავითარი გიდი აქ არ გვჭირდება მეთქი და მე, ემზარი, ლადო, მედეა, სოფიკო და ოქრო ფეხით დავდიოდით შუალამემდე.

ზევსის ტაძრის სვეტებამდე მისვლა არ შეიძლება. მავთულხლართების ღობეა ირგვლივ.

გავბედე და დავარღვიე ტურისტული ეტიკეტი. გადავხტი ღობეზე, ემზარიც მომყვა. შემაშინა სვეტების გრანდიოზულობამ და სიდიადემ.

ხელი შევახე.

კიდევ კარგი პოლიციელმა არ შეგვნიშნა. ყველანი ვდუმვართ.

ამის შეფასება არ შეიძლება. პართენონის სილამაზეს ვერ მოჰყვები და ვერც დახატავ.

უნდა იგრძნო.

ჩვენ მდუმარედ შევყურებთ ერთმანეთს. რა დაგვაძინებს ამაღამ.

### 23 დეკემბერი

დილით ათენის არქეოლოგიური მუზეუმი დავათვალიერეთ. მე მომხრე არა ვარ რომელიმე ერისადმი განსაკუთრებული მოპყრობისა, მაგრამ კაცობრიობამ ბერძნებს თაყვანი უნდა სცეს.

არავისგან არ არის ისე დავალებული ცივილიზებული მსოფლიო, როგორც ბერძნებისგან.

ქანდაკებანი...

აგამემნონის ნილაბი, პატარა მხედარი, სატირები, აფროდიტა, ზევსის თავი, ზევსის ხელი, სურები უბრწყინვალესი მხატვრობით. რა ფორმებია, რა ჰარმონია, რა ძიებანი.

ხომ არ ამოწურეს ბერძნებმა ადამიანის შესაძლებლობები ქანდაკებაში?

ჩემთვის ახალი იყო იმის გაგება, რომ ოლიმპიურ თამაშობებში ბერძნები დედიშობილა მონაწილეობდნენ.

მერე ავტობუსით მივემგზავრებით საბერძნეთის ბებერ მინაზე.

აპოლონის დაფნის ტაძარი.

აფროდიტას ტაძრის ნანგრევები.

კორინთა.

ჩემს წინაშე ნანგრევებად ქცეული მთელი ქალაქია.

მიკენა.

აგამემნონის სამფლობელო. აგამემნონის ციხე-ქალაქის ნანგრევები. ჭიშკარი გრანდიოზული ორი ლომით. აგამემნონის აკლდამა. გაუგონარი სიდიდის ქვებით. ამ აკლდამაში აღმოჩნდა ბერძენტა ის წარმოუდგენელი სიმდიდრე ახლა არქეოლოგიურ მუზეუმში რომ ინახება.

გიდი ისე ლაპარაკობს აგამემნონზე, აქილევსზე, მენელაოსზე, ოდისევსზე, პენელოპაზე თითქოს მათი კონკრეტული ცხოვრების ისტორია ჰქონდეს ხელთ.

ხომ დამტკიცდა, რომ ტროა მართლა არსებობდა, რომ ჰომეროსის გმირები ნამდვილი ისტორიული ადამიანები არიან. მწერალმა შეალამაზა მხოლოდ მათი თავგადასავალი.

შეიძლება ბერძენტა ღმერთებიც კი კონკრეტული ადამიანები იყვნენ, იმდენად ადამიანურნი არიან ისინი.

ისევ ქანდაკებებთან ვარ...

ბერძნებს თავიანთი უკეთესი ქანდაკებანი სამშობლოში არ აქვთ. რომშია ლაოკონი, ლუვრში დგას ვენერა მილოსელი! როდის დაუბრუნდება თავის სამშობლოს ეს უკვდავი ძეგლები!

სალამოს ქალაქ „ნაკლიონში“ დავბინავდით. ზღვისპირა, კობტა საკურორტო ქალაქი კლდეებზეა გაშენებული, ირგვლივ ციხე-სიმაგრეები. ერთი ციხე შუა ზღვაში დგას. ულამაზესია.

წვიმს.

პირველად წამოგვეჩია წვიმა აქ ყოფნის განმავლობაში.

სალამოს საშინელი ფრანგული ფილმი ვნახეთ სადისტებზე.

### 24 დეკემბერი

ნაპლიონიდან ისევ ათენში უნდა დავბრუნდეთ პელოპონესის გზით. ნაპლიონი არგონავტების ქალაქია. აქ მოიყვანეს მედეა ბერძნებმა. ირგვლივ ყველაფერი მითიური და რომანტიულია.

დილის 7 საათზე ავდექი და ფეხით გავუყევი სანაპიროს. ყოველ ფეხის ნაბიჯზე ისტორიაა.

ნავსადგურში საბჭოთა გემი დგას. მოვედით, კაპიტანი თბილისელი სომეხია. საბერძნეთიდან სსსრ-ში ციტრუსებს ვეზიდებითო. დავემშვიდობეთ და წამოვედით.

ირგვლივ ფორთოხლის ბალები. შემოულობავია, მონყვიტე და ჭამე რამდენიც გინდა.

ეპიდავრის თეატრი პართენონის შემდეგ საბერძნეთის მეორე საოცრებაა. დაკეტილი დაგხვდა. შობის წინ დღე უქმე ყოფილა. ჩვენს გიღს ეს არ სცოდნია. ბევრი ვიდავეთ, ვიჭიჭყინეთ, მაგრამ არაფერი გაგვივიდა.

ცოცხალ-მკვდრები ვსხედვართ ავტობუსში. როდის ჩამოვალთ ანი აქ, როდის ვნახავთ ეპიდავრის თეატრს. პელოპონესის არხი დავათვალიერეთ. ფრანგებს გაუჭრიათ.

დიდებული სანახაობაა. ვინრო არხში რომ გემი გადის. როგორ გაჭრა, რამ ამოაღებინა ადამიანს ამხელა მინა.

სალამოს ისევ ათენში ვართ. სასტუმრო „სტადიონი“, №501. შობის წინა ღამეა. მთელი ქალაქი საზეიმოდაა გაჩახჩახებული. არეოპაგელის ტაძარში წირვას დავესწარით.

## 25 დეკემბერი

დღეს თავისუფალი დღე გვაქვს. „საითაც გინდა იარე“... ჩვენი სასტუმროს წინ მაღალი, ციცაბო მთაა. ზედ თეთრი, კოხტა საყდარი ჩანს. მეტრდოტელი ამბობს, ეს ათენის ყველაზე მაღალი წერტილიაო. ფეხით შეიძლება ასვლა (აგვხედ-დაგვხედა), თუ გაუძელითო.

მე და ლადომ სხვა ვერავინ ავიყოლიეთ და ფეხით გავუყევით. სულ არ გაგვჭირვებია ასვლა დაახლოებით ერთ საათში ზემოდან დავყურებდით ათენს.

ჩვენს წინაშეა თეთრი ქვით ნაშენი ულამაზესი ქალაქი. სამი მხრიდან მთებით შემოზღუდული, მეოთხე მხრიდან ზღვა აკრავს. ულამაზესი ხედია. ზემოდან დავყურებთ პართენონს, ზევსის ტაძარს... მთელი ქალაქი ხელისგულზეა.

სანამ ჩვენი ტურისტის კოლეგები მაღაზიებიდან დაბრუნდებოდნენ, ჩვენ უკვე სასტუმროში ვიყავით უაღრესად კმაყოფილნი.

ქალაქს თუ ზემოდან არ დახედე, ძნელია სრული წარმოდგენა გქონდეს მის ლანდშაფტზე.

გზაში (ეტყობა ხმამაღლა ვლაპარაკობდით) მე და ლადო ერთმა სამოციოდე წლის ბერძენმა გაგვაჩერა. თუ შეიძლება გვითხრათ, რა ენაზე ლაპარაკობთო. ჩვენ ვუპასუხეთ, გაუკვირდა, გაუხარდა. ესო უძველესი ხალხიაო, როგორ არ გამიგონიაო, თქვენ დიდი ისტორია გაქვთო.

## 26 დეკემბერი

დელფოსში მივემგზავრებით. აპოლონის სამშობლოში. შორიდან მოვლით დაფარული პარნასი გვიჩვენეს. მართლაც ღმერთების სამყოფელი ულამაზესი მთაა.

დელფოსამდე წმინდა ლუკას ტაძრისკენ გადავუხვიეთ. მეთერთმეტე საუკუნის მოზაიკა. განსაცვიფრებელია. მე პირველად ფრესკები მეგონა, იმდენად სრულყოფილია.

მერე ვენვიეთ დელფოსს. აპოლონის ტაძარი, მუზეუმი, თეატრი, სტადიონი. მთელი ქალაქი. 5000 ადგილიანი უძველესი თეატრის სცენაზე ქართული სიმღერა დავაგუგუნეთ.

დელფოსთან ახლოს ერთი სოფელია, მთა-გორიანი. მოსავალი არ მოდის და ხალხი აყრას აპირებდა (ურბანიზებულია), სახელმწიფომ დოტაცია მისცა, კერძო წარმოების ნება დართო. ქსოვენ, კერავენ, აგვირისტებენ, მთელი სოფელი ხალხური ნაწარმის კეთებაზე და გაყიდვაზეა გადასული.

იქნებ ამ გზით მაინც შეგვენარჩუნებინა ჩვენი მთიანეთი. როგორ დავლუპეთ ასე ძვირფასი მუზეუმი – საქართველოს მთიანეთი, ფშავ-ხევსურეთი.

დელფოსი გენიალურია.

ჩვენი სულელი გიდი ბერძნული მითოლოგიიდან ზღაპრებს გვიყვება, წარმოდგენა არა აქვს ამ ნანგრევთა არქიტექტურულ ღირებულებაზე, კომპოზიციაზე...



27 დეკემბერი

აკროპოლი.

ასრულდა ჩემი სიყრმის ოცნება – პართენონის ტაძრის ირგვლივ დავაბიჯებ. უკვე აღარც მახსოვს მერამდენეჯერ შემოვუარე.



ათენი. პართენონი

ქარიატიდების კომპლექსი – ულამაზესი ქალები თავებზე რომ შეუდგამთ ტაძრის თალები.

პართენონი ანტიკური კულტურის მწვერვალია. მონითალო მარმარილოს კლდეზე დგას გრანდიოზული თეთრი ტაძარი. პართენონთან ყველაფერი, რაც ვნახეთ, ფერმკრთალდება.

რა შესძლებია ადამიანს.

რაც მიწისძვრამ ვერ დააკლო, თურქებმა მოუთავესო – ჰყვება გიდი.

განა პართენონის დანგრევის დანაშაულს გამოისყიდინ თურქები ოდესმე?



ათენი. პართენონი

2 საათზე ათენიდან რომში გამოვფრინდით. შესანიშნავი ფემენებელური თვითმფრინავი „ბონგი“. საბაჟოში ჩვენს ჩემოდნებს აშუქებენ. ტელეეკრანზე მოჩანს და საბაჟოს მოხელე ზუსტად ხედავს, რა არის ხელჩანთაში ან ჩემოდანში. ჩემოდნის გახსნასთან და შიგ ხელისფათურთან შედარებით უფრო კულტურული მეთოდია.

ორი საათის ფრენის შემდეგ რომში ვართ. იტალია ნვიმით შეგვხვდა. აეროპორტიდან პირდაპირ ფლორენციაში გავემგზავრეთ.

ოთხი საათის დამლელი მგზავრობის შემდეგ, სალამოს რვა საათზე ფლორენციაში ვართ. ძველ, დანჯღრეულ სასტუმროში ცოტა შევნაყრდით და ქუჩებს ვეცით.

ქალაქი – დეკორაცია.

უძველესი, ჭუჭყიანი ქალაქი. ყოველ ფეხის ნაბიჯზე შუასაუკუნური იდუმალეზა.

მიქელანჯელოს დავითი.

შუალამემდე დავებეტებით ქუჩებში – მე, ემზარი, სოფიკო და ოქრო. მედიკომ და ლადომ შეუძლოდ ვართო და დაიძინეს.



რომი. წმიდა პეტრეს ტაძარი.



რომი. კოლიზეუმში

ასე მგონია ირგვლივ დეკორაციებია და რომელიღაც უძველესი ფილმის გადამღებ ჯგუფს ვახლავარ.

### 28 დეკემბერი

მედიჩების სასახლე. პიცის მუზეუმი. აღურაცხელი სიმ-დიდრე. ნაპოლეონი ამ ოთახში ათევდა ღამეს. ამ საწოლზე იწვა.

დაუბრუნდება ოდესმე მსოფლიო იმ თავდადებას, იმ ენერგიას, იმ მოთმინებას?...

უფიცის სამხატვრო გალერეა.

ტიციანი, რაფაელი, მიქელანჯელო, ლეონარდო, ბოტიჩელი, მურილიო. ამ ორიგინალების ნახვა ერთ სიცოცხლედ ღირს.

დავიღალე.

ახლა აღარაფრის ნახვა აღარ სურს. ერთად ამდენი გენიოსი ტვინზე განვება კაცს.

### 29 დეკემბერი

ფლორენციის ორი უმთავრესი ტაძარი (კათედრალური, დიდი ტაძარი) და პანთეონი დავათვალიერეთ. ამ პანთეონშია დაკრძალული თითქმის ყველა სახელოვანი ფლორენციელი: მიქელანჯელო, ლეონარდო და ვინჩი, დანტე ალიგიერი.

ერთ დროს, ერთ ქვეყანაში როგორ ცხოვრობდნენ მიქელანჯელო, ლეონარდო, ტიციანი?

საოცარია. რა ეპოქა იყო.


ვათვალიერებთ კათედრალური ტაძრის განსაცვიფრებელ ჭერს და ჩემს გვერდით რუს-ქართული მომესმა:

- არა, მე მგონია ნავაგე იმ ტუფლებში.
- რატომ?
- სხვაგან უფრო იაფად შეიძება.



მოვიხედვე. ორი ქალი (ჩვენები) თან ისე გულმოდგინედ შესცქერიან ჭერს და თან ისე ოსტატურად ნილბავენ ამ სულელურ საუბარს, რომ კიდევ ერთხელ ვინამე ქალის ჭკუა და მოხერხებულობა.

ერთო რამ კია, პატივცემულო პროფკავშირის მუშაკებო; რამდენ მართლა მწერალს, მხატვარს, არტისტს, მუსიკოსს (ვისაც მართლა სჭირდება და ესმის) სხვადასხვა მიზეზით უარს ეუბნებით ამ უკვდავი ძეგლების ნახვაზე, ამ მოგზაურობის სიამოვნებაზე და მართლა და მართლა სად იპოვეთ, სად აღმოაჩინეთ ამდენი უსაქმური, ენაჭარტალა დედაკაცი, რამდენიც ჩვენს ჯგუფშია.



იტალია. პიზას გადახრილი კოშკი

უკვე მოვასწარი (მემჩანური ბუნების გამო) ჩვენი ჯგუფის 3-4 წევრის სამუდამოდ შეძულება.

აკადემიაში მიქელანჯელოს დავითის ორიგინალი ვნახეთ. ირგვლივ ხალხი ბუზივით ახვევია. დგას თეთრად განათებული ეს ულამაზესი მზეჭაბუკი და სიცოცხლის, სიყვარულის, რწმენას ადამიანისადმი, უკვდავების წამალს არიგებს. ამაზე კარგს რას გაუკეთებ კაცობრიობას.

იქვეა მიქელანჯელოს „მონები“, დაუმთავრებელი, უზარმაზარი სკულპტურები. ამბობენ ეს იქნებოდაო ყველაზე დიდი და მონუმენტური ნამუშევარი მიქელანჯელოსი.

პაპ იულიუს მეორის ძეგლს აკეთებდა მიქელანჯელო, შეადგინა ნახატები, დაიწყო მუშაობა და მოულოდნელად პაპი გარდაიცვალა – პაპის ნათესავებმა კი უარი უთხრეს მიქელანჯელოს დაპირებული თანხის გადახდაზე, მიქელანჯელომ მიატოვა შუამდე გაკეთებული საქმე.

ასე გაჩნდა „მონები“.

ფლორენციიდან 1 საათის სავალზეა პიზას სალოცავი და რაც მთავარია მსოფლიოს ერთ-ერთი საკვირველება – პიზას გადახრილი კოშკი. XI საუკუნის ქმნილება.

ათ წელიწადში 1 მილიმეტრით იხრება განზე. პატარა როდია. ვერაფრით შველიან.

პიზა დიდებულია.

### 30 დეკემბერი

სიენა.

შუასაუკუნეების ქალაქი. როგორც ააშენეს XI საუკუნეში ისევ ისე დგას. ვიწრო ქალაქი. ფართო მოედნები.

რომაული არქიტექტურის მშვენება – სიენას ტაძარი XI საუკუნისა.

აი, შუასაუკუნეების ქალაქი.

სალამოს ექვს საათზე (უკვე ბნელა) რომს მივადექით.

საბჭოთა საელჩოსთან ახლოს სასტუმრო „სივილიაში“ დავბინავდით. მე და თენგიზ მეძმარიაშვილმა ღამით ვენეციის მოედანს მივაკვლიეთ. შემოვუარეთ. მერე კოლიზეუმისაკენ წავედით. რაც ვნახეთ და განვიცადეთ, ენით აღუწერელია. სალამოს მედეა კახიძეს დაბადების დღე გადავუხადეთ.

### 31 დეკემბერი

ერთი მდიდარი კაცის (გასულ საუკუნეში ცხოვრობდა) პირადი გამოფენა დავათვალიერეთ. ნახატების შეგროვების

დიდი მოყვარული ყოფილა. აი, სიმდიდრე. უგროვებია კლასიკოსთა ქმნილებები. ბოტიჩელი, ტიციანი, რაფაელი, ჯოტო, პერუჯინო...

ვატიკანი.

ვატიკანი მარტო მსოფლიოს კათოლიკური ცენტრი კი არ არის, იგი ხელოვნების მექაც ყოფილა. რა არ წამიკითხავს ვატიკანზე, მაგრამ ამ მაღალი კედლების იქეთ თუ ასეთი უმდიდრესი ეროვნული საგანძური ინახებოდა, არ მეგონა.

ოცი დღეა მსოფლიოს უმდიდრეს მუზეუმებსა და გალერეებში დავდივარ, მაგრამ ვატიკანი სულ სხვა აღმოჩნდა. სიდიდით, სიმდიდრით, მასშტაბით – არა მგონია ბევრი მუზეუმი შეედაროს. ფარაონთა მუმიებით დაწყებული, თანამედროვე მსოფლიოს გამოჩენილი მხატვრებით დამთავრებული.

უძველესი ბერძნული ქანდაკებები.

ხომ ასე მიუწვდომელია იტალიის რენესანსი მხატვრობით, მაგრამ ბერძნული ქანდაკებები სხვაა. ქანდაკების მწვერვალი ძველი საბერძნეთია.

ლაოკოონი!

ორი ლაოკოონი დგას ერთმანეთის გვერდით. ერთი ასლი – აღდგენილი ცნობილი იტალიელი მოქანდაკის მიერ. მეორე – ორიგინალი ხელებმოტვრეული ფიგურებით.

მიქელანჯელოს უცდია მკლავი მიება ლაოკოონის ცენტრალური ფიგურისთვის. გენიალურად გაუკეთებია, მაგრამ მერე იმ მკლავის ნაწილიც დაკარგულა.

სიქსტის კაპელა.

რაფაელის გენიალურ დარბაზების შთაბეჭდილების ტყვეობაში ვართ, და აჰა უზარმაზარი ტაძარი, მიქელანჯელოს ფრესკებით დამშვენებული.

შვიდი წელი ხატავდა მიქელანჯელო დაწოლილი, უმძიმეს მდგომარეობაში, საკმაოდ უხერხულ ხარაჩოებზე მდგომი.

სამყაროს შექმნის, ქრისტეს ცხოვრების სიუჟეტები ჭერზე და კედელზე „განკითხვის დღე“ – მიქელანჯელოს ყველაზე

გენიალური ფრესკა. კომპოზიციის შუაში ბართლომეს ხელთ უკავია თავისივე ტყავი და ამ ტყავზე თვით მიქელანჯელოა გამოსახული. გენიალური სიმბოლიკაა.

მიქელანჯელოს სასტიკად დაუსჯია ერთ-ერთი კარდინალი (რომელსაც შიშველი ფიგურების დახატვა დაუშლია მისთვის) მიუხატავს იგი ამ ფრესკის მარჯვენა კუთხეში, ტანზე გველშემოხვეული, ჯოჯოხეთის გზაზე მიმავალი.

## 1 იანვარი

წუხელ ქალაქგარეთ საახალწლო შეხვედრა გვქონდა და გვიან დავიძინეთ. ჩვენს ირგვლივ უცნობები ირეოდნენ. ცოტა უსიამოვნო სიტუაცია იყო. „რუსოს“ გვედახდნენ და მხარზე ხელს გვითათუნებდნენ. „ვოდკა! ვოდკა!“ ეკერათ პირზე.

დღეს რომში ყოფნის ბოლო დღეა. ავტობუსით ქალაქს ვათვალიერებთ. ესპანეთის მოედანი კიბეებით. რესპუბლიკის მოედანი. ჩანჩქერიანი შადრევანი. ვენეციის მოედანი. კოლიზეუმი.

მიქელანჯელოს გენიალური „მოსე“ წმინდა პეტრეს ტაძარში მომაჯადოებელია.

და ბოლოს პეტრეს ტაძარი!

მიქელანჯელოს განუმეორებელი ტალანტი.

პიეტა – ღვთისმშობელი ჯვარცმული ქრისტეთი ხელში.

პეტრეს ტაძარი გატყვევებს, გთრგუნავს, ჭკუიდან შეიძლება შეგშალოს.

მიქელანჯელოს გუმბათი. უზარმაზარი სკულპტურები. ეს გახლავთ მსოფლიოს ხუროთმოძღვრების მწვერვალი. ადამიანის შესაძლებლობების ზღვარი ხომ არა?

სადილის შემდეგ ისევ მივბრუნდით პეტრეს ტაძარში. აქედან გამოსვლა არ გინდა.

თეთრი მტრედით გადმოდგა რომის პაპი პავლე VI სარკ-



მელზე და მრევლს სათნოებისა და სიკეთისაკენ მოუწოდა.

რამოდენა პატივი სცა მიქელანჯელომ კაცობრიობას. პეტრეს ტაძრიდან რომ გამოხვალ, მე მგონი ველარ შეძლებ კაცს თოფი ესროლო.

მთელმა პლანეტამ უნდა ჩაქოლოს პილოტი რომს რომ ბომბით გადაუვლის.



რომი. წმიდა პეტრეს ტაძარი

## ევროპის გარშემო – 1981

17 ნოემბერი

მაშ ასე. 26 დღე გემზე უნდა გავატარო. გავიარო ათასობით კილომეტრი ევროპის გარშემო. თანაც, უნდა გავამხილო გემზე ჯერ არც კი ავსულვარ. მაინც ხომ უნდა ვნახო რა ხილია.

დღეს იწყება ჩვენი მგზავრობა. გავდივართ რიგიდან, დილიდანვე ლექციები წაგვიკითხეს. ახალი ის იყო ჩემთვის, რომ 1975 წლამდე გამოშვებული არცერთი წიგნის გატანა არ შეიძლება საზღვარგარეთ.

კიდევ ერთი რამ, ლექტორმა სხვათაშორის გვიამბო თანამედროვე ევროპაში ამ უკანასკნელ ხანს გაჩენილ მიმდინარეობებზე. მათ შორის ყველაზე ახალიაო შიშველ ქალთა მიმდინარეობა. ეგრეთწოდებული „შიშველი პროტესტი“. ქალები (განსაკუთრებით დანიაში და ჰოლანდიაში) უარს აცხადებენ თავიანთ დამოკიდებულ მდგომარეობაზე მამაკაცისგან. ემანსიპაცია მხოლოდ ჩვენს გასაჩუმებლად გამოიგონეს. სინამდვილეში ჩვენ მამაკაცთა სასიამოვნო დამატებას, მათ ხელში სათამაშო თოჯინას წარმოვადგენთ. ჩვენ გვყიდულობენ ფულით, საჩუქრებით, ძალაუფლებით და შემდეგ მონებად გვაქცევენო. ამიტომაც პროტესტს ვაცხადებთ ამგვარ ბედზე. ვიხსნით მამაკაცთავე მოგონილ სამკაულებს, კაბებს და შიშველი ვივლით მამაკაცებისვე შესარცხვენადო.

გულმა არ მომიტმინა და ვკითხე: თუ შეიძლება, გვითხარით, ღვთის გულისათვის, ჩვენ როგორ უნდა მოვიქცეთ შიშველ ქალს რომ დავინახავთ, ჩვეულებრივ ამბად მივიჩნოთ და ხელი ჩამოვართვათ, თვალი ავარიდოთ თუ პროტესტი უნდა გამოვთქვათ მეთქი. ლექტორი აშკარად დაიბნა. ვერ მიხვდა ჩემს ირონიას, რადგანაც ვცდილობდი რაც შეიძლება, სერიოზული სახე მქონოდა. ბოლოს, როგორც იქნა, დააღწია

თავი უხერხულ სიტუაციას – შიშველი ქალის გარშემო მიტინგის გამართვა, ამჯერად, თქვენი საქმე არ არის, უბრალოდ თვალი აარიდეთ, მორჩა და გათავდაო.

ყველამ გადაიხარხარა და მე შემომაცქერდნენ. ზოგი ეშმაკურად იღიმება, ზოგს ძალიან ყრუ ვილაც ვგონივარ და არაფერს ამბობს.

სანამ გემზე მოვკალათდით, ისე დავილაღე, რომ მუხლები არ მემორჩილება. ბარში ვისხედით ღამის თორმეტ საათამდე და ბარმენს ვკითხე როდის დაიძვრება, თუ იცით, გემი მეთქი. გაეცინა, რახანია გაშლილ ზღვაში ვართ და სრული კურსით მივდივართო. შემრცხვა ჩემი გულუბრყვილობის. გემის გასვლა ნავსადგურიდან როგორ გამომეპარა.

### 18 ნოემბერი

თურმე ჯერ სადა ხართ. ზღვა ჯერ კიდევ გაგრძნობინებს რომ ზღვაა. ღამის 3 საათზე გამომეღვიძა. თითქოს საქანელაზე ვზივარ. გემი საშინლად ირყევა. კარადისა და აბაზანის კარები ერთიმეორეს ჯახანით ეხეთქება. მთელი გემი ისე ქრატუნებს, რომ გეგონება დაიშლებაო. გული მერევა, თავბრუ მესხმის. სანოლზე წამოჯდომა ვცადე, მაგრამ უფრო ცუდად შევიქენი.

ჩვენს გემს „თევდორე შალიაპინი“ ჰქვია. 1955 წელს ინგლისში აგებული გემია. 1973 წელს უყიდიათ ჩვენებს, გაურემონტებიათ და ერთ-ერთ კეთილმოწყობილ გემად ითვლება სსრკ-ში. კაიუტაში ჩემთან ერთად ჩვენი ჯგუფის ხელმძღვანელი ნიკო ხატიაშვილი ცხოვრობს. ექიმი. ბალნეოლოგიური კურორტის დირექტორი. კარგი კაცია. გულლია, გულისხმიერი. ნამდვილი ინტელიგენტი.

ერთი სიტყვით დღეს მთელი დღეა ვწევარ. წერის თავიც არა მაქვს. წამლებით გამჭყიპეს. მეუბნებიან რომ გამივლის, ვნახოთ.

ღელვა 6 ბალიანი არისო, აცხადებს დირექტორი, ჩემამდე ხმამ მოაღწია, რომ ჩემსავით ბევრი წევრი დარეტიანებულა!

ღილით 12 საათზე, რადიოთი ინსტრუქტაჟი ჩაგვიტარეს, თუ როგორ უნდა ჩავიცვათ მაშველი კოსტუმი და რომელ მხარეს უნდა გადავხტეთ, თუ გემმა ჩაძირვა დაიწყო. ილუმინატორი გამოვალე. ავად მოგრუხუნე მრუმე ტალღებს ჩავხედე და გამაჟრჟოლა.

არც გემის კომფორტი მხიბლავს მაინცდამაინც. ნარული სისტემის სანოლები გულისამრევია. ყველაზე ცუდი გემის პირსაბანია.

### 19 ნოემბერი

დღეს 3 საათზე, კოპენჰაგენის ნავსადგურს მივადექით. მაშინვე ჩავუშვით ღუზა, მაგრამ ერთი საათი მაინც გვალოდინეს გემბანზე პოლიციური ფორმალობისთვის. 4 საათზე ჩამოვდგით ფეხი დანიის მიწაზე, მაგრამ უკვე კარგად დაღამებული გახლდათ. გამიკვირდა, ოთხ საათზე უკვე ბნელა.

მილიონნახევრიანი ქალაქი თითქმის ცარიელია. მაღაზიის ვიტრინებია მარტო განათებული, ზედა სართულები ჩაბნელებულია და ფანჯრებჩარაზული. კარგა ხანია გადაიარა ევროპაში ცივილიზაციის ბუმმა. ხალხი ქალაქებიდან სოფლად გარბის.

დავდივართ ღამის კოპენჰაგენში. რა ეცემა თვალში, პირველ რიგში, ჩამოსულ კაცს?

ვიტრინათა ოსტატური, ხელოვნებამდე ამაღლებული გაფორმება. ასორტიმენტის სიუხვე, ევროპას ჩასაცემელ-დასახურავი აღარ უჭირს.

მაღალი საყოფაცხოვრებო კულტურაა, რიგი არაფერზე არ არის. ქუჩაში ხილ-ბოსტნეულის ჯიხურებშიც კი იდეალური სისუფთავეა. საგანგებოდ დარეცხილია კარტოფილიც კი.

ყველაფერი ლამაზადაა შეფუთულ-დახარისხებული. გამახსენდა ჩვენი ხილბოსტნეულის გაუბედურებული მალაზიები.

ზოგი მალაზიის ვიტრინა თეატრონს წააგავს. მარიონეტები ცეკვავენ და მღერიან. ქუჩებში უამრავი სანახაობაა. ტელევიზორებიც კი გამოუდგამთ მუშტრის მისაზიდად.

ადამიანებს აცვიათ სადად, პრაქტიკულად. ერთმანეთს თითქმის ერურჩულებიან.



ბელგია

ქალაქის ცენტრში მანქანების ჭაჭანება არ არის. ილფს და პეტროვს ვიხსენებ. მოქალაქე ისევ დაუბრუნდა ფილაქანს. იგი კედელს აღარ ეკვრის თავის გადასარჩენად.

ტელეფონების ჯიხურებში სატელეფონო ცნობარი დევს. მათ არავინ ხევს და არავინ იპარავს, რატომ უნდა იყოს ჩემთვის, თბილისელი კაცისთვის ეს გასაოცარი?

როგორც ამსტერდამში და ჰააგაში აქაც ბევრია ლამის ბარები. საროსკიპოთა ქუჩები წითელი ფარნებით, სექს-ფილმებითა და ვიტრინებში გამოფენილი მეძავეებით.

ევროპა დაბერდა. სიცოცხლე ჩაკვდა დიდ ქალაქებში. საროსკიპოთა წინ თითო-ოროლა მამაკაცი დგას. ისინიც მე მგონი ტურისტები არიან, ან რეკლამისთვის დაქირავებული ჰომოსექსუალები.

ქუჩაში პოლიციელები აღარ ჩანან (ვერც ქურდები და ბანდიტები შევნიშნე მაინცდამაინც). ხშირად მალაზია ღიაა. უძვირფასესი საქონელი ქუჩაშია გამოფენილი. მალაზიის ერთადერთი გამყიდველი კი თავის ოთახში ჩაკეტილა და ლუდს მიირთმევს.

რალაც სულელური ფილმი ვნახეთ (ოდესის კინოსტუდია) და დავიძინეთ.

## 20 ნოემბერი

დღეს ავტობუსით დავათვალიერეთ კოპენჰაგენი. ქალაქში ოთხ-ხუთსართულიანზე მაღალი სახლი არ არის. ქალაქის მუნიციპალიტეტი ნებას არ იძლევა ცათამბჯენების აშენებისა, რომ ქალაქს თავისი არქიტექტურული იერი არ შეეცვალოს.

ყველა სახლი კრამიტითაა გადახურული. თავისებური, მაღალი გადახურვა, კრამიტი და ყოველ ფეხის ნაბიჯზე ძეგლები, აგრეთვე თეთრი ფანჯრები ქალაქს ულამაზეს ფერწერულ იერს აძლევს.

ვნახეთ გრანდვიგის ეკლესია. ომამდე ააშენა რვა კაცმა. ოცი წელი შენდებოდა. ყველაზე მაღალი შენობაა კოპენჰაგენში.

რა შეუძლია ადამიანს. შიგნითაც და გარეთაც აგურითაა ნაშენი. აგურის გარდა სხვა არავითარი მასალა არ უხმარიათ. გადახურულიც აგურითაა. მაღალმა თაღებმა და არაჩვეუ-



ლებრივმა „სვეტთა შეკონება“ ჩემზე გრანდიოზული შთაბეჭდილება დატოვა.

მერე დავათვალიერეთ ტორვალდსენის მუზეუმი. ტორვალდსენი XIX საუკუნის გამოჩენილი დანიელი მოქანდაკეა. მისი „შილერი“, „პაპი პიუს VIII“, „ბაირონი“, „გრაფინია ბარატიუსკაია“ და სხვა ადრეც მქონდა ნანახი რეპროდუქციებში. ქრისტემ და მისმა მოციქულებმა თავიანთი სიდიდით, მასშტაბურობით და სილამაზით მეტად მომხიბლა. ძირითადად ბიბლიურ და ანტიკურ სიუჟეტებს აქანდაკებს.

კლასიკური ყველაფერი ბავშვურად გენიალურია.

თორმეტ საათზე ისევ გემზე ვართ და ნაპირს ვშორდებით. ინგლისისაკენ მივცურავთ. ნასადილევს კაპიტნის ბრძანება გაისმა. დაკეტეთ ყველა კარი, შეამოწმეთ ილუმინატორთა ხრახნები, რადიოგრამით შეგვატყობინეს, რომ ძლიერი, გრიგალისებული ქარია მოსალოდნელი.

აირინი და არაყი დავლიე და ვწევარ – „მეცხრე ტალღას“ ველოდები. განწყობილება უიმედო – სიამოვნებით დავბრუნდებოდი ახლა თბილისში რომ შემეძლოს.

ჯგუფის ხელმძღვანელი ნიკო ხატიაშვილი გემის კაპიტანმა მალლა, პირველი კლასის კაიუტაში გადაიყვანა, ჩემთან არის გაიოზ დვალი, თბილისელი ინჟინერი ოცდაათიოდე წლის, კარგი, ზრდილი ახალგაზრდა.

## 21 ნოემბერი

მთელი დღე ზღვაში ვართ. ნამების დღე უარესი არ იქნება. ღამის სამ საათზე დაუბერა ქარიშხალმა „მატილდამ“ და ჩვენი გემი ნაფოტივით აატივტივა.

არავის სძინავს. არის ოხვრა-კვნესა და სირბილი. ქალაქის პარკები დიდ გამოყენებაშია.

დილით რადიომ გამოაცხადა რომ ღელვა 10-ბალიანია. ეს

არის ჭერი! თუ კიდევ მოიმატა, გემი „SOS-ის“ მდგომარეობაში გადადის.

დასუსტებულები შევლასლასდით რესტორანში. აბა იქ იყო სანახაობა. კარადებიდან თეფშები ცვიოდა. ოფიციალტ გოგონებს კერძით სავსე თეფშები ხელიდან უვარდებოდათ, იყო წივილ-კივილი.

მთელი დღეა ვწევართ ყველანი.

სალამოს ღელვამ იკლო, 6 ბალზე ჩამოვიდა. სალონში გემის კაპიტანი გამოჩნდა. თვალეზდაბერილი, ადამიანს აღარ ჰგავს. მთელი ღამე პულტთან ვიდექი, თვალი არ მომიხუჭავსო. ათი წელია ვცურავ და ათბალიან ტალღაში (ჰაერში 12 ბალი) ჯერ არ მოვხვედრილვარო.

გადარჩენა მოგვილოცა ყველას.

შიშით სრულებითაც არ მეშინია. ასე მგონია, ზღვა ვერ დამახრჩობს, მაგრამ ცუდად ვარ. ყელში ბურთივით რაღაც მანვება. უსიამოვნო შეგრძნება მაქვს. სულ მინდა ვინვე ერთი სიტყვით ნატიფარივით ვარ მიგდებულნი.

სტიუარდესა გოგონებსაც კი თავი აქვთ შეხვეული. მეზღვაურებიც კი წვანან თურმე თავიანთ კაიუტებში და გვერდით ქალაქის პარკები უდევთ.

ხვალ ლონდონში ვიქნებით, თუ ჩავედით.

## 22 ნოემბერი

ნავსადგური ტილბურნი.

გემიდანვე ავტობუსებში ვჯდებით და ლონდონისკენ მივდივართ. დიდი ბრიტანეთის დედაქალაქამდე ერთი საათის გზაა.

მე, როგორც მძღოლს, პირველად გზატკეცილისაკენ გამიბრბის თვალი. წუნს ვერ დასდებ, ლონდონში ასფალტის დაკერება ჯერ არ იციან.



მწვანე მინდვრები, მდელოები გზის ორივე მხარეს. ამდენი გზა გამოვიარეთ და მოხნული, დამუშავებული მიწა არ ჩანს. გზის არეებსა და ეზოებშიც დეკორატიული ხეები სჭარბობს ხეხილს. გეგონებათ მთელი ინგლისის მიწა გოლფის, ფეხბურთის და ჩოგბურთის სათამაშოდ იყოს გაშვებული. მართლაცდა ინგლისს თავისი პურის ფქვილი და ხეხილი ერთ კვირასაც არ ეყოფაო, ამბობს გიდი. ჩვენ ყველაფერს ვყიდულობთო.

ლამდება. ულამაზესად განათებულ ბენზინ-გასამართ სადგურებს ჩავივლით. რიგი არ არის. გზაზე მანქანებიც ცოტა გვხვდება.

ლონდონის გარეუბანი. ჩვენი გიდი მოხუცი ინგლისელი ქალია. ცოტა ნერვიულიც ჩანს. დაჟინებით გვიმტკიცებს, რომ ეს უბანი ღარიბთა გარეუბანია, რომ ინგლისში 3 მილიონი უმუშევარია და უმუშევრები 600 დოლარამდე დახმარებას იღებენ თვეში. ინგლისელი მუშის საშუალო ხელფასი 900 დოლარს შეადგენს.

ინგლისელები კონსერვატორებია. სიახლეს მაინცდამაინც დიდი ენთუზიაზმით არ იღებენ. ლონდონში ძირითადად 4-5 სართულიან სახლებს აგებენ. ააშენეს რამდენიმე საცხოვრებელი ცათამბჯენი, მაგრამ არავინ იყიდა ბინა და იძულებული გახდნენ შიგ დაწესებულებები გაეხსნათო – ამბობს გიდი და მალალ სახლებს გვიჩვენებს.

რა ვიცი. ალბათ ტრადიციულია ლონდონის არქიტექტურული ორიგინალობაც. აქ ორ ერთნაირ სახლს თითქმის ვერ იპოვით.

სასტუმრო „პლაზაში“ დავბინავდით, ქალაქის ცენტრშია. სასტუმრო დიდი ფეშენებელურობით არ გამოირჩევა.

ტრაფალგარის ულამაზესი მოედანი, ნელსონის ქანდაკება. ყველაფერი ნაცნობია.

ლონდონის ნაცონალური გალერეა. 1824 წელს დაარსებულ გალერეაში 2000 – მდე ნახატია. მათ შორის ლეონარდო

და ვინჩის – „მადონა მლვიმეში“, „მადონა“, რაფაელის, ტიციანის, ველასკესის, გოიას, დიურერის, რემბრანდტის, რუბენსის ნახატები. დიდხანს შევცქეროდი დიურერის „მამის პორტრეტს“. მართლაც რომ განსაცვიფრებელია.

## 23 ნოემბერი

მთელი დღე ლონდონში ვართ. ტაუერის ციხესიმაგრე (1078) ჩვენთვის კარგად არის ცნობილი – ლიტერატურიდან.

ამ კოშკში დახოცა მძვინვარე რიჩარდ მესამემ თავისი ძმისშვილები. იქ დააბიჯებდა გოლიათი მეფე ჰენრი მერვე თავისი ექვსი ცოლით და უაღესად ორიგინალური, სექსუალური ფიქრების აღმძვრელი რკინის მუზარადით.

ბუკინგემის სასახლე. ელიზაბეტ დედოფალი თავის რეზიდენციაში არ იმყოფება. ინგლისის სამეფო დროშა აღმართული არ არის. რაკი მასპინძელი „შინ არ დაგხვდა“ ყარაულის გამოცვლას ვუყურეთ და გამოვბრუნდით.

მადამ ტიუსოს მუზეუმი. სურათები გადავიღე ლენინთან, ბრეჟნევთან, კენედისთან, ინდირა განდისთან, ჩერჩილთან, სოფი ლორენთან ხელგადახვეული. ვნახოთ, რა გამოვა ჩემი ფოტოსაქმიდან.


მერე გავიარეთ პიკადილზე, პიკადილოს მოედანი. ცნობილი „სოჰო“. ღამის ბარების მესვეურნი ეგზოტიკის მოყვარულ ტურისტებსა და „სუსტ“ მამაკაცებზე ნადირობენ.

სექსფილმები და სექსმალაზიები ათასნაირი აღმგზნები აბებითა და ადამიანის სხეულის რეზინისგან გაკეთებული ნაწილებით.

ქუჩაში „შემთხვევით“ სსრკ რადიოსა და ტელევიზიის კორესპოდენტი ინგლისში იური კოპალაძე შეგვხვდა. ახალგაზრდა კარგი ბიჭი. მანქანაში ჩავგვსვა და ღამის ლონდონი გვაჩვენა. უემბლის სტადიონი, თეატრი, სადაც რუსთაველე-



პარიზი. მონმარტრი. მარცხნიდან პირველი რევაზ მიშველაძე



პარიზი. ვენერა მილოსელის ქანდაკებასთან

ლები გამოდიოდნენ. აგურისგან აგებული, გარედან საკმაოდ უშნო და მოუფლელი შენობა ჩანს. შიგ არ შევსულვართ. იური აღტაცებით გვიამბობდა იმაზე, თუ როგორ იყო 9 დღის განმავლობაში თეატრი პირთამდე სავსე და როგორი აღფრთოვანებით შეხვდა ინგლისური მკაცრი თეატრალური პრესა ქართველ მსახიობებს.

ინგლისში მწერალთა საერთო კავშირი არ არსებობს. არის მხოლოდ თანამოაზრე მწერალთა კლუბები.

უმადლეს სასწავლებლებში მისაღები გამოცდები არ არის. ზოგიერთ ინსტიტუტში შეგიძლია საშუალო სკოლის ან კოლეჯის ატესტატის გარეშეც მოინდომო სწავლა, აი, სწორედ მაშინ უნდა ჩააბარო მისაღები გამოცდები.

საკვების პრობლემა ინგლისში არ არსებობს. მილიონიდან ერთი შემთხვევაა, რომ გამყიდველმა ზონა-ნომაში მოგატყუოს ან ოფიციალტმა ზედმეტი გადაგახდევინოს.

## 24 ნოემბერი

ვესტმინსტერის სააბატო – გრანდიოზული ტაძარი. აქ დასაფლავებულია ინგლისის მეფეები და ცნობილი პირები სხვადასხვა სფეროდან. ბაირონი, შელი, დიკენსი...

ჰაიგეთის სასაფლაო – მარქსის საფლავი.

წმინდა პავლეს ტაძარი – მეჩვიდმეტე საუკუნეში აშენებული განსაცვიფრებელი მოზაიკით.

პარლამენტის შენობა ტემზის ნაპირას.

ბრიტანეთის მუზეუმი – სადაც თავმოყრილია ასურეთის, ბაბილონის, ეგვიპტის, ინდოეთის, ჩინეთის, იაპონიის, ირანის და სხვა ქვეყნების უძველეს კულტურათა ნაშთები.

სალამოს 7 : 30 - ზე ჩვენი გემი ტილბურნის ნავსადგურიდან გავიდა და საფრანგეთისკენ აიღო კურსი.



ლუვრი. ლაოკონთან

ჰავრში ჩვენმა ხომალდმა შუადღისას ჩაუშვა ლუზა. ლამანის უწყინარმა სრუტემაც კარგად გვანჯღრია. ჰავრი საფრანგეთის ერთ-ერთი უდიდესი ნავსადგურია.

ავტობუსში ვსხდებით და პარიზისაკენ მივდივართ.

ჩვენი გიდი ახალგაზრდა ქალია, დაიძრა თუ არა მანქანა, მაშინვე იმაზე დაიწყო ლაპარაკი, თუ სად უნდა გადავახურდავოთ დოლარები ფრანკებად და რისი შეძენა შეგვიძლია შეღავათიან ფასებში.

ჩვენ ვაჭრობის მიმართ დიდი ინტერესი რომ არ გამოვიჩინეთ, გაუკვირდა. საქართველოში ნამყოფი ვარო, ანეკდოტით გვიამბო ასეთი შემთხვევა; კახეთის ერთ-ერთ საბჭოთა მეურნეობაში გვიმასპინძლეს. თბილისისკენ რომ წამოვედით, ჩვენი ავტობუსის მძღოლმა ყურადღება მიაქცია საბარგო მანქანას, რომელიც მთელი საათი უკან მოგვსდევდაო, გავაჩერეთ. ვინა ხართ, რაშია საქმე ვეკითხებით, მეო, საბჭოთა მეურნეობის დირექტორმა გამომგზავნა, მანქანაში ერთი კასრი ღვინო ჩამიღო, თუ გზაში სადმე შეჩერდნენ, ამ ღვინით გაუმასპინძლდით.

როგორ არ არის გასოცარი ჩვენი ხელგაშლილობა ევროპის დიდი ქალაქების ფონზე, სადაც წყურვილით რომ კვდებოდე, უფასოდ წყალს არ დაგაღვეინებენ.

დავბინავდით ქალაქის ცენტრში, სასტუმრო „გარნიერში“ სან ლაზარეს მოედანზე, აქედანო გვითხრეს თხუთმეტი წუთის გზაა ელისეის მინდვრებამდე.

ლამის პარიზში გავიარეთ.

პარიზის ცნობილი კაფეები და კაბარეები – „მულენ რუჟი“ (წითელი წისქვილი), „მონპარნასი“, „ბოჰემა“, რესტორანი „მაქსიმა“

იუნესკოს შენობა.

ტელევიზიის შენობა.

პარიზის „გრანდ ოტელი“.



პარიზი. ეიფელის კოშკთან

პერ ლაშეზის სასაფლაო.

კომუნართა კედელი.

ლუვრი – ლეონარდოს ხუთი შედევრით. ჯოკონდა!

ლეონარდოს მუქი ფერები და უზუსტესი ხაზები.

ჯოკონდას რესტავრატორის ყალბი შეხებია და ისეთი მომხიბვლელი ვერ არის. საღებავი დასკდა და რომ არ გვეშველა ჯოკონდა დაილუპებოდაო – გიდმა.

ვენერა მილოსელი!

ქალღმერთი ნიკეა.

განსაცვიფრებელი მხატვარი დავიდი.

ლუვრი გამოფენათა ხელმწიფეა.

ლადო გუდიაშვილის ორი ადრინდელი ნახატი მოკრძალებულად გამოიყურება, მაგრამ რამოდენა სიამაყეა – იგი ლუვრშია გამოფენილი. მსოფლიოს უპირველეს გამოფენაზე. მონმარტის ტაძარი.

მონმარტი – მხატვართა სალონი, კაფე ბოჰემათი.

თეთრი მონმარტრიდან პარიზი ხელისგულივით ჩანს.



## 27 ნოემბერი

ეიფელის კოშკი.

პარიზის ღვთისმშობლის ტაძარი.

გასაოცარი რამ დამემართა, პარიზის ღვთისმშობლის ტაძარი ვესტმინსტერის შემდეგ ღარიბულად მეჩვენა.


სსრკ – საფრანგეთის საზოგადოებამ საღამოს ბანკეტი გაგვიმართა. ბანკეტამდე მე და გოგი რამიშვილმა (ოპერის რესტავრატორი) გრანდ ოპერის დათვალიერებაც მოვასწარიით.

კონკორდის მოედანი.

ტრიუმფალური თაღი.

## 28 ნოემბერი

ვერსალის სასახლე – მეფეთა თეატრი ფანტასტიურია. მეფის სანოლი ოთახი.



პარიზი. ვერსალი. 1972

ინვალიდების სასახლე. ნაპოლეონის აკლდამა. ლათინური კვარტალი – უნივერსიტეტით.

პანთეონი.

ბულონის ტყე.

ალექსანდრეს ხიდი სენაზე. გონებაში ვადარებ ერთმანეთს პარიზს და ლონდონს. ლონდონი უფრო მდიდრულია, უფრო არისტოკრატიული, მოვლილი, სუფთა, დახვეწილი. მკაცრი, თანამედროვე.



პარიზი. ჰიუგოს ძეგლთან



პარიზი საწოლიდან ახლად ამდგარ ლამაზ ქალწულს წააგავს. დაუფარხნელი, დაუდევარი, მოუვლელი. პარიზი უფრო გამლილია და ჰაერიანი. სიძველე პარიზში უფრო თვალშისაცემია და ხაზგასმული. პარიზი მაინც ისეთია, როგორც ჰიუგომ, სტენდალმა და ბალზაკმა დახატეს.

ურბანიზმი პარიზს ძალად ჩამოცმული ქურქივით აქვს. პარიზი მზად არ აღმოჩნდა მეოცე საუკუნის რიტმისათვის.

მიუხედავად იმისა, რომ ქუჩებში ფემინებელური მანქანების მდინარე ბორგავს, და პიგალზე მეძავეები თავზე საყრელად არის, მიუხედავად იმისა, რომ ცენტრში ამერიკული კვარტალიც აღმართულა ცათამბჯენებით და ელისეის მინდვრებზე მოდების დემონსტრაციას მსოფლიო რეზონანსი აქვს, პარიზი მაინც გასული საუკუნის ქალაქის შთაბეჭდილებას ტოვებს.

სალამოს 5-6 საათზე პარიზში გავლა მიზანშეწონილი არ არის. გამონაბოლქვი დაგახრჩობს. სალამოს პარიზელები ქალაქიდან იკრიფებიან.

გიდს ვთხოვე, ეამბა რაიმე პარიზის დღევანდელ კულტურულ ცხოვრებაზე. სიამოვნებითო, გაუხარდა. გვიამბო მხოლოდ ჭორები. ბელმონდო პრეზიდენტის ოჯახთან დაახლოებული კაციაო. ალენ დელონი პარიზელებს ძალიან უყვართ, მიუხედავად იმისა რომ ამასწინათ საძრახისი საქმე შეემთხვაო. მცველი – იუგოსლავი ახალგაზრდა მოუკლესო. სასამართლოზე გაირკვა, რომ ეს ყმანვილი ალენ დელონის სექსუალური ცხოვრების საკმაოდ უხერხულ ფოტოებს აგროვებდა და შანტაჟის გზით მათი პატრონისათვის ფულის დაცინცვლას აპირებდაო. ვერ დაუმტკიცეს, მაგრამ მთელმა პარიზმა იცის, რომ მისი პირადი მცველი ალენ დელონმა თვითონვე მოაკვლევინა. იგი ხომ დიდი ხანია მაფიასთან არის დაკავშირებული და ცნობილ პარიზელ განგსტერებთან ერთად ხშირად ხედავენო.

პარიზი კარგა ხანია უკვე აღარ არის მსოფლიოს კულტურული ცენტრიო. კინოში ინგლისელები და იტალიელები გვჯაბნიან, რაც შეეხება მხატვრობას, პარიზში ახლა არცერთი მსოფლიო სახელის მხატვარი აღარ ცხოვრობსო. ფიუნესი იაფი დონის კომიკოსიაო. ივ მონტანის მოძველებულ სიმღერებზე, ძველებურად დიდი რიგებიაო. ავტობუსიდან დაგვანახა კიდევ ელისეიზე ერთ-ერთ საკონცერტო დარბაზთან გრძელი რიგი ივ მონტანის კონცერტზე დასწრების მსურველთა.

მხატვრული ლიტერატურის საკითხავად დრო აღარ მრჩებაო. ამიტომაც ბოდიშს მოგიხდით, მაგრამ ვერ გეტყვით რა ხდება ახალი და მნიშვნელოვანი ლიტერატურაშიო.

პარიზელი მოქალაქე აღარ კითხულობს. ლიტერატურასაც კი ძირითადად ტელევიზიიდან ვეცნობითო. ჩვენ მწერლობის საკითხებზე კარგი კომენტატორები გვყავს და ხშირად თვით მწერლებიც გამოდიან ეკრანზეო.

პარიზის ერთ-ერთ ცენტრალურ ქუჩაზე პრეზიდენტის სახლს ჩავუარეთ. პრეზიდენტი ხუთსართულიან საერთო სახლში ცხოვრობს და ოთხთახიანი ბინა უჭირავს. მის ფანჯრებთან დღედაღამ მანქანების ღრიალია.

ჩვენთან ცოტა სხვაგვარად არის.

## 29 ნოემბერი

კურსი პორტუგალიისკენ გვიჭირავს.

დღეს და ხვალ გემზე ყოფნა გვინევს.

ისევ სულისშემხუთველი კაიუტა ნარებით, უსიამოვნო რყევა და მონყენილობა.

გემზე ყველაზე ნაღდი ლოზუნგია „ინ ვინო ვერიტას“ – ღვინოშია ჭეშმარიტება.

### 30 ნოემბერი

მთელი დღე გემბანზე გავატარე. ბისკაის ყურე მშვიდად გავიარეთ. არა და ყველაზე მეტად ოკეანე გვაშინებდა. პროგნოზიც ცუდი იყო.

ვიდექი მარტო და გავყურებდი უკიდვანო ზღვას.

მხოლოდ დღეს ვიგრძენი გემზე ყოფნის მთელი სილამაზე. მზეა, თბილა, გემი ნელა მიირწევა და უკან მოთეთრო-მოლურჯო ზოლს ტოვებს.

ზღვას შავ-ლურჯი ფერი აქვს.

ხვალ დილით ლისაბონში ჩავდივართ.

### 1 დეკემბერი

დილით გემიდანვე თვალი მოვკარით ზღვაზე გადებულ მაღალ ხიდს და უზარმაზარ ქანდაკებას.

მერე გაირკვა, მე რომ ზღვად მეჩვენა, ეს იყო უზარმაზარი მდინარე ტეჟუ, ხოლო მის ნაპირას აღმართული ქანდაკება - ქრისტეს 100 მეტრიანი ქანდაკება (78 მ. კვარცხლბეკი, 28 მ. ფიგურა)

ვათვალიერებთ ლისაბონს.

სამხრეთული მზე თავს გვაჩვენებს.

ლისაბონი – პორტუგალიის დედაქალაქი – მსოფლიოს ერთ-ერთი უდიდესი ნავსადგურია. იბერიის ტომის – ლუზიტანთა ქალაქად დაარსდა – ადრე ერქვა ოლისიპო.

გამაოცა კარმელისტთა გოთურმა მონასტერმა აგებულმა მე-14 საუკუნეში. მართლაც რომ ხელოვნების შედევრია. აქ არიან დასაფლავებული ვასკო დე გამა და პოეტი კამოენსი – გამახსენდა მასზე ლადო ალფენიძის მშვენიერი სტრიქონები.

ვნახეთ აგრეთვე მე-16 საუკუნის ძველი სამეფო სასახლე, ტორი დი ბელენის შუქურა, ვაჭრობის ულამაზესი მოედანი, მე-9 საუკუნის არაბული ციხესიმაგრე.

დღეს პორტუგალიელთა ეროვნული დღესასწაულია და არცერთი მუზეუმი ღია არ არისო, გიძმა.

სალამოს გემზე დავბრუნდით. ხვალ დილით ესპანეთს დავლაშქრავთ.

### 2 დეკემბერი

ესპანეთის ერთ-ერთი უძველესი ნავსადგური კადისი, ჩვენს წელთაღრიცხვამდე 500 წელსაა დაარსებული ფინიკიელთა მიერ. კართაგენის უღელქვეშ კარგა ხანს იყო. ახლა კადისში 138 000 მცხოვრებია.

დავათვალიერეთ ქალაქის ცენტრი, სანტა კუევოს ტაძარი, კადისის გალავანი, მურილიოს ნახატები – „წმინდა კატალინას ქორწილი“.

მერე წავიყვანეს სადგურსტაციო დარბაზში. აბა სანახაობა ეს იყო: 450 კაცი ერთდროულად დეგუსტაციას ეწეოდა. რუსები, რასაკვირველია, ბოლომდე დათვრნენ.

კადისის ვინრო ქუჩები.

### 3 დეკემბერი

დილით ავტობუსით გავემგზავრეთ ესპანეთის ერთ-ერთ უდიდეს ქალაქ სევილიაში.

ანდალუზიის ტრამალებში მიჰქროდა მანქანა. ულამაზესი რანჩოები ოაზისებივით, გადამწვარი შიშველი სერები რუხ-ყვითელი ფერისა.

მანანა ქუთათელაძე (აკ. ქუთათელაძის ქალიშვილი) გაოგნებულია, ასეთი ფერები არსად მინახავსო.

ამ კუთხეში ერთი წელია წვიმა არ მოსულა და სოფლის მეურნეობა კატასტროფის წინაშე დგასო, გვითხრა გიძმა.

სევილია – ზღაპრულად ლამაზია. 1520 წელს აგებული

სამეფო სასახლე. უძველესი არაბული სამეფო სასახლე.

სევილიის ტაძარი. მსოფლიოში მესამე ადგილზეა: პავლეს (ინგლისი), პეტრეს (რომი), სევილიის ტაძარი.

აქ კოლუმბია დაკრძალული.

სევილიის ტაძარი მეჩვენა ყველაზე მდიდრული, ჩუქურთ-მოვან და დახვეწილ ტაძრად, რაც ტაძრები მინახავს ჩემს ცხოვრებაში.

#### 4 დეკემბერი

მთელი დღე ზღვაში ვართ.

სალამოს ჩვენი „დღეა“. ქართველ ტურისტთა გამოსვლა. ხელმძღვანელობა მე დამავალეს. ჩემს ცხოვრებაში ამდენი არ მინერვიულია. შევიკრიბეთ სარეპიტიციოდ, სათითაოდ ყველა ამბობს – მე არ ვცეკვავ, მე არ ვმღერი. სხვამ იცეკვოს. გამოუვალი მდგომარეობაა.

საჭირო იყო ეროვნულ ნიადაგზე ხალხის ათამაშება; ნუთუ საქართველო უნდა შევარცხვინოთ მეთქი და ყველა ამოძრავდა.

მოვიფიქრე სახელდახელოდ ეტიუდები „მადამ ტიუსოს მუზეუმი“ და „სცენა პიგალზე“. ყველამ სკეპტიკურად შეხედა, არაფერი გამოვაო. როგორ გინდა დაარწმუნო ყველა, გამოვა თუ არა.

ხელმძღვანელმა ნიკომ მკითხა, რა კავშირი აქვს მადამ ტიუსოს საბჭოთა სინამდვილესთანო. კგბ-მ არ დაგვასმინოს, არ დავიღუპოთო. მწარედ გამეცინა.

ბოლოს ყველაფერი კარგად დამთავრდა. გამოვედით ბრწყინვალედ. მილოცავენ დიდ „რეჟისორობას“. გვიან ღამემდე ვიქეიფეთ ბარში.

#### 5 დეკემბერი

მთელი დღე ზღვაზე.

ლელვა ათბალიანი.

წერის თავი ვისა აქვს.

თვით გემის კაპიტანიც ვერ უნდა იყოს კარგად.

#### 6 დეკემბერი

ჩივიტავეკია – იტალიის ერთი ულამაზესი კურორტი ზღვაზე. რომში აქედან ნახევარი საათის გზაა.

ჩივიტავეკია ეტრუსკების ქალაქია. 108 წელს ჩვ. წ.-აღ.-მდე. იგი მნიშვნელოვან ნავსადგურად იქცა – იმპერატორ ტროიანეს ხელში.

გამოგვიცხადეს რომ იტალიაში ავტობუსების მძღოლების გაფიცვაა და რომში მატარებლით უნდა წავიდეთ. სადგურამდე ფეხით ვიარეთ. 500-მა კაცმა მწკრივად, ჩემოდნებით ხელში, ლტოლვილებივით.

ბნელოდა რომში რომ ჩავედით. სადგურ „ტერმინისთან“ ახლოს მოგვათავსეს სასტუმრო „მილანში“. დაგვირიგეს ქალაქის რუკები, რომელზეც ჩვენი ქუჩა და სასტუმრო არც კია აღნიშნული. ეს იმას ნიშნავს, რომ ცენტრიდან საკმაოდ შორს ვართ.

#### 7 დეკემბერი

ეს იყო კრუიზის ყველაზე ძნელი და ყველაზე დატვირთული, მაგრამ ყველაზე ლამაზი დღე.

ერთ დღეში ელვისისწრაფით დავათვალიერეთ რომი.

კაპიტალიუმის მოედანი. მარკუს ავრელიუსის ძეგლი პოსტდამენტზე აღარ დგას. მე ეს ძეგლი მინახავს 4 წლის



წინათ. გიდი გვიხსნის: ბრონი გაფუჭდა და ძეგლი გასარემონტებლად წაიღესო. საერთოდ გადაწყვეტილი აქვთ : აქ ძეგლის ასლი დადგან, ხოლო ძეგლი კი მუზეუმში მინის ხუფის ქვეშ შეინახონო. ორი ათასი წელი იდგა ეს ძეგლი აქ ცის ქვეშ და არ გაფუჭებულა. რა უქნა მანქანამ ქალაქს, რომ უმაგრეს ბრინჯაოსაც კი ვნებს (ადამიანს რას უზამს).

ფორუმი. კეისართა სასახლეები, სენატის სადარბაზო. იუ-ლიუს კეისრის მკვლელობის ადგილი.

მარკუს ავრელიუსის მაღალი ძეგლი – „ცხოვრების აზრი – მზადება სიკვდილისთვის.“

კოლიზეუმი – გლადიატორთა სისხლის წვეთები წვიმებს ჩაურეცხავთ.

ვენეციის მოედანი – იმპერატორ იმანუელის ძეგლით. გამარჯვების ტრიუმფალური თალი.

ესპანეთის მოედანი.

ლეონარდო და ვინჩის კიბე.

პარლამენტის შენობა.

გიდმა გვიჩვენა სახლი, სადაც სოფი ლორენი ცხოვრობდა. ცხოვრობდა? – ვკითხეთ ჩვენ. დიახ, ისინი წლების განმავლობაში გადასახადს არ იხდიდნენ და იტალიის სასამართლოს გადაწყვეტილებით იტალიაში ცხოვრება აეკრძალათ. ახლა შვეიცარიაში არიან გაქცეულები, რომ ჩამოვიდნენ დააპატიმრებენო. ამას რომ ამბობდა, აივანზე სოფი ლორენი გამოჩნდა, მთელმა ქუჩამ ტაში დასცხო. ავედი აივნის კიბით. სოფის 10 წუთით ვესაუბრე. გამომშვიდობებისას ისე გავთამამდი, ლოყაზე ვაკოცე.

ვატიკანი. ზღაპრული სიქსტის კაპელა.

პეტრეს ტაძარი – ბენინის საკურთხეველი პიეტა. მსოფლიოში უდიდესი ტაძარი და ულამაზესი – XVI საუკუნის. იგი ხელოვნების შედევრია.

უძველესი თეატრი.

ახალი რომი დაშენებულია ძველი რომის ნანგრევებზე, აქ

სახლებს ფუნდამენტი არც კი სჭირდებათ, თითქმის ყველა სახლის ქვევით ძველი სასახლის დულაბია.

ნერონი! – „რა არტისტი ვკვდები.“

ახალს ვერ დაუჩრდილავს ძველი რომის ბრწყინვალება. ახალი ძველს ვერ მორევიან.

ვივანშივე ძველი რომის ტიპიურ სარდაფ-რესტორანში. იტალიური სიმღერების თანხლებით.

პანთეონი!

## 8 დეკემბერი

დილით მატარებლით კვლავ ჩივიტავეკიაში ჩამოგვიყვანეს. შუადღისას დაიძრა გემი და მაშინვე ქარი ამოვარდა.

ექვსბალიანი ღელვა. საოცარია მთელს კრუიზში, თითქმის, არცერთი წყნარი დღე არა გვქონიაო, უკვირთ გემის თანამშრომლებს.

ვწევარ კაიუტაში. თითქოს უკვე შევეჩვიე ღელვას.

არაუშავს. ორ დღეში სტამბოლში ვიქნებით და ჩემი „ეპოპეაც“ დამთავრდება.

დაბეჯითებით ვაცხადებ, რომ უკანასკნელია გემით ჩემი მგზავრობა.

## 9 დეკემბერი

ისევ ზღვა.

ჩვენი მოგზაურობიდან ორ მესამედს ზღვაზე ვატარებთ, ერთ მესამედს ხმელეთზე.

დღეს ვნახეთ ფილმი – „ერთადერთი,“ ზალატუხინი თამაშობს, „მოსფილმის“ ნანარმოები. კარგი ფილმია.

გავიარეთ სიცილიის ვინროებში. გეზი საბერძნეთისკენ გვიჭირავს.

## 10 დეკემბერი

მზიანი, კაშკაშა დღე გათენდა. ზღვა, როგორც იქნა, დაცხრა.

საბერძნეთს ჩავუარეთ.

მაღალი მთები და თეთრი სახლები დაჩნდა.

მთელი საბერძნეთი ხომ თითქმის მარმარილოთია ნაშენები.

ეგეოსი ტკბილად, მშვიდად შეგვხვდა.

## 11 დეკემბერი

ნაშუადღევს ჩამოვედით სტამბულში. ბოსფორის სრუტე. ევრაზიის გამყოფი ვიწროზე ვიწრო ყელი.

მეჩეთების ტყე აღიმართა ჩვენს წინ. სრუტის ორივე მხარეს ამფითეატრით აღმართულან ულამაზესი სახლები.

სტამბოლი მართლაც რომ აღმოსავლეთის მარგალიტია. გავცურეთ სტამბოლის უზარმაზარ ხიდქვეშ. პოლიტიკური ფორმალობანი და უკვე სტამბოლის ნავსადგურში ვართ.

რამდენ ქართველს გაუვლია ამ უძველეს ნავსადგურში. სულხან საბა ევროპიდან მიმავალი. აქედან ყიდდნენ ტყვე ქართველებს მამლუქებად.

პირდაპირ სტამბოლის ბაზარში. განსაცვიფრებელი, ლაბირინთებიანი ბაზარი. ორსაათიანი მომქანცველი ხეტიალი.

სალამოს „ქარავან სარაიში“ აღმოსავლურ ცეკვებს დავესწარიტ. ხუთი ბიჭი ცეკვავდა ქართულ ცეკვებს.

„გურჯი!“ მეთქი, ვიყვირე. გაიცინეს და ხელი დამიქნიეს.

## 12 დეკემბერი

დილის 7 საათიდან ქალაქს ვლაშქრავთ.

ცისფერი მეჩეთი.

„აია სოფიას“ ტაძარი.

მეფის სასახლე „თოლმა ბახჩი“ ზღვის პირას.

ბოსფორის ხიდი.

ახალი ოპერა (რად უნდათ, მომღერალი არა ჰყავთ)

ქალაქის ევროპული და აზიური ნაწილი.

12:30-ზე ხელი დავუქნიეთ სტამბოლს.

წინ ოდესაა.

## პიეტამი – 1982

ვიეტნამში წამოსვლამდე, აი, რა ვიცოდი ამ ქვეყნის შესახებ. ჩემი ცოდნის უმთავრესი წყარო იყო ცნობარები, ენციკლოპედია, თითო ოროლა რუსულად წაკითხული ვიეტნამელი მწერლის ნაწარმოები და ვიეტნამელი ასპირანტი ნგუენ ნგია ჩონგი, რომელმაც ჩემი ხელმძღვანელობით 1981 წელს დაიცვა ჩვენთან დისერტაცია დადებით გმირზე ვიეტნამურ ლიტერატურაში.

ვიეტნამი. 60 მილიონზე მეტი მცხოვრებით. ყველაზე დიდი ქალაქები – ჰანოი, საიგონი, ახლანდელი „ჰო ში მინი“ და ჰაიფონი. მწვერვალი ფანში. მდინარე ჰონგჰა.

უძველესი სახელმწიფო ვანლანგი. გაზეთები „ნიან ზანი“, „ტიენ დონგი“.

ვიცოდი რომ ვიეტნამში სამასამდე დიალექტზე ლაპარაკობენ და ყველა კუთხეს თავისებური, გამორჩეული კულტურა აქვს.

ვიცოდი რომ ვიეტნამური ლიტერატურის ფესვები უძველეს სახელმწიფოს ვანლანგს უკავშირდება.

ვიეტნამელი ხალხის ბელადები და იმპერატორები ლექსებს და ზღაპრებს თხზავდნენ. პოეტები გახლდნენ მე-11 საუკუნის იმპერატორი ლი თო ტო და მთავარსარდალი ლი თიონგ კიე.

ჰო ში მინის ლექსები, მოთხრობები და პუბლიცისტური წერილები დღესაც კლასიკად ითვლება. (შეადარეთ ჩვენი მეფე-ბელადები).

ცნობილი მწერლები: ნგუენ ზი – (XVI საუკუნე) – ნოველები. ნგუენ ჩაი (XIV საუკუნე) – პოეტი – „ლექსები მშობლიურ ენაზე“. ტო ჰიუ (1920) პოეტი. ნგუენ დი თი (პოეტი). ნგუენ ტუანი – ნოველები „სენსაცია“, „Любки деревни Донько“. თხან ტინი – „სასიყვარულო წერილები“. ვუ ხანი

– „სისხლიანი ნაწერები“, საინტერესო მწერალია, სამხრეთ ვიეტნამში, საიგონში ცხოვრობს. დიდხანს არ უბეჭდავდნენ არაფერს. ადგა, მწყერების მოშენება დაიწყო, მწყერის კვერცხები ვიეტნამში ძვირად ფასობს. ფული დააგროვა და საკუთარი გამომცემლობა შეიძინა. ახლაც თავის წიგნებს თვითონ ბეჭდავს.

ვიეტნამის მწერალთა კავშირის მდივნის ტო ჰოაის „მივიწყებული კუნძული“ და „малолетные супруги“ მაქვს წაკითხული. რასაკვირველია, რუსულ თარგმანებში. ამ მწერლის რუსული კრებულის წინასიტყვაობაში წერია, რომ მისი ყველაზე საყვარელი ქალაქებია დელი, თბილისი და ბეირუთი.

ვიცოდი ცოტა რამ ვიეტნამური ფერწერისა და ვიეტნამელ მინიატურების ოსტატთა გასაოცარ ხელებზე.



ვიეტნამი

ვიცოდი აგრეთვე ისიც, რომ საიგონი ახლანდელი „ჰო ში მინი“ ფრანგი კოლოზინატორების ბატონობის დროს და შემდეგაც (გათავისუფლებამდე ე.ი. 1970 წლამდე) გართო-



ბისმოყვარულ ევროპელთა და ამერიკელთა საროსკიპო სახლად იყო ქცეული. ევროპელი აღმზრდელები 13-14 წლის ვიეტნამელ გოგონებს დიდის გულმოდგინებით არჩევდნენ და 6 თვიანი მეცადინეობის შემდეგ საროსკიპო სახლებში ანაწილებდნენ. ახლა დაახლოებით 50 000 ყოფილი მეძავი „საზოგადოებრივ-სასარგებლო“ შრომაში ჩააბა ვიეტნამის ხელისუფლებამ. ცოტა ძნელი კი აღმოჩნდა მათგან დამკვრელი მუშების გაკეთებაო, ხუმრობენ ვიეტნამელები.

აი, ყველაფერი რაც ვიეტნამზე ვიცოდი.

## 7 მაისი

14 საათი უნდა ვიფრინოთო სტიუარდესამ რომ გამოაცხადა, შევშინდი და კარებისკენ გამექცა თვალი, მაგრამ უკვე გვიან არის, კიბე კარგა ხანია მოხსნილია და „ტუ 162“-ის ძრავები მწყობრად გუგუნებენ, საფრენ ბილიკებზე თვითმფრინავის გასვლის წინ.



ბორის რიფტინი და რევაზ მიშველაძე

მე და ჩემი თანამგზავრი ენაწყლიანი პროფესორი, ჩინური ლიტერატურის ცნობილი სპეციალისტი ბორის რიფტინი ერთმანეთს ვეჯიბრებით ილფისა და პეტროვის ცოდნაში. დავინწყებ ფრაზას ბორისი ამთავრებს და პირიქით. რაკი პროფესორს იუმორის გრძნობა აღმოაჩნდა, არაფერი მიჭირს.

ჩემი შეხვედრა ვიეტნამთან ცოტა უცნაურად დაიწყო. თვითმფრინავში უეცრად რკინის ფირფიტა დამეცა თავზე. გაოცება ვერ მოვასწარი, ვიეტნამელი გულზე ორივე ხელის მიდებით ბოდიშს მიხდის: თაროზე პიჯაკის შედება მინდოდა და ფირფიტა შემთხვევით ჩამოვარდაო.

არა უშავს მეტეხი, დავამშვიდე, ჯიბიდან ხუთკაპიკიანი დავაძვრე, და კოპზე დავიდე. მალე ვიეტნამელმა ისევ მომაკითხა, ვარსკვლავ-მალამო გამომიწოდა, შუბლზე წაისვი ტკივილს გაგიყურებსო. არ მტკიოდა, მაგრამ არ გავანბილე, აშკარად ეტყობოდა შენუხებული იყო ჩემი ვიეტნამელი. წამდაუნუმ მაკითხავს, მხარზე მოკრძალებით მეხება და სანწყლად მილიმის – როგორ ხარო, სიმართლე გითხრათ, შემანუხა მისმა გადაჭარბებულმა ყურადღებამ და ბოდიშებმა. დაიძინეთ, მე კარგად ვარ, კოპიც უკვე დამიცხრა მეტეხი. თქვენც არ მომიკვდეთ, „ჩემი ბრალი არ არის, არ გენყინოთ, ვინც ფირფიტა ზევით შემოდო მისი ბრალიაო.“ ვიცოდი მაინც არ დამაძინებდა და გამოველაპარაკე – ვიეტნამის კინემატაგროფისტთა კავშირის მდივანი, ცნობილი კინორეჟისორი ბუი დინ ჰაკი აღმოჩნდა. ავტორი სხვადასხვა კინოფესტივალზე არაერთგზის პრემირებული ფილმებისა: „ნგუნ ვან ჯოი“ და „გზა დედისაკენ მიდის“. ახლა ჰო ში მინის ცხოვრების შესახებ ექვსსაათიან ფილმს ვიღებო.

ხუთ საათნახევარში ყარაჩში ჩავფრინდით (პაკისტანი). თვითმფრინავიდან არ გამოგვიშვეს. პაკისტანის მთავრობა ნებას არ რთავს საბჭოთა მგზავრებს აეროპორტში ნახევარ საათს გაიარ-გამოიარონ. კიდევ კარგი თვითმფრინავში კონდენსირებული ჰაერია.

ორი საათის შემდეგ ბომბეის აეროპორტში დავეშვით. ერთი საათი შევისვენეთ და ჰანოისკენ ავიღეთ გეზი. 5 საათში ჰანოიში უნდა ჩავფრინდეთ, თუ მშვიდობა იქნა. ამ სიტყვებს თვითმფრინავში ვწერ. ჩემი ვიეტნამელი რეჟისორი შუბლზე ხელს მადებს და მეთასხედ მეკითხება, თავს როგორ ვგრძნობ.

## 8 მაისი

ჰანოის აეროპორტი ბომბეის ფემენებელური აეროპორტის შემდეგ ვერაფრით გაგაკვირვებთ. მესტიის აეროპორტს წააგავს.

ის ის იყო, დამხვედრის იმედი გადავინურეთ, და ფეხით ვაპირებდით ჰანოიში წასვლას (აეროპორტიდან ჰანოიმდე 40 კილომეტრია). ტაქსი არ არსებობს საერთოდ ვიეტნამში. ავტობუსებთან კი იმდენი ხალხი ირევა რომ საეჭვოა ჩაჯდომა მოვახერხოთ), რომ ორი ვიეტნამელი მოგვიახლოვდა და ღიმილით დაგვიკრეს თავი – მწერლები ხომ არა ხართო. ალბათ დაგაგვიანდათ მოსვლა მეთქი, ვკითხე მერე რომ გავუშინა ურდი და მანქანაში ვსხდებოდით. არა, დროზე მოვედით, მაგრამ შეკითხვა ვერ გაგიბედეთ, ისეთი სერიოზული სახეებით ჩამოხვედით თვითმფრინავიდანო. შორიახლოს მოგყვებოდით და გათვალისწინებდით. რაკი არავინ დაგხვდათ, ჩვენებად იმიტომაც ჩაგთვალეთო.

ვიეტნამელები უხმაურო, უაღრესად მოკრძალებული და დამჯერი ხალხია. სანამ სასტუმროში მივიდოდით, დიდი ხიდი უნდა გადაგვევლო. ჩვენი „ვოლგა“ შეჩერებულ კოლონას მიუახლოვდა და დადგა. სიცხეში გაჩერებულ მანქანაში ჯდომა რომ აუტანელი რამ არის, მოგეხსენებათ, ერთ საათზე მეტ ხანს ვიდექით. რაშია საქმე? ალბათ რამე მოხდა, ვერაფრით გეტყვითო, მასპინძლებმა. კარგა ხანს

ვიდექით ამის შემდეგაც. ბოლოს გულმა არ მომიტმინა, მანქანის კარი გავაღე და უბოდიშოდ გადავედი, ვნახავ რა ხდება მეთქი. სრულიად არაფერი. ხალხით გაჭედილი ავტობუსი დგას. შოფერი მოწყენილი სახით გზას გაჰყურებს. რატომ არ იძვრი მეთქი, როგორც იქნა გავაგებინე ინგლისურად. რუსების მანქანამ გაიარა და ხელი დამიქნია, გამაჩერაო. ახლა რას აპირებ მეთქი. არ ვიციო. სწრაფად მივიღე გადაწყვეტილება. წადი მეთქი – ნება დავრთე და გასამხნეველად მხარზე შევეხე. თქვენც არ მომიკვდეთ, პასპორტი რომ დავაძვრე და ვუჩვენე ეჭვით ჩახედა. რაკი დარწმუნდა, საბჭოთა კავშირიდან ვიყავი, თეთრი კბილები შემომანათა და მანქანა დაქოქა. ვინ იცის, იქნებ რომელიმე უწყების საბჭოთა წარმომადგენელმა ხელი მისალმების ნიშნად დაუქნია, გულისხმიერმა ვიეტნამელმა კი შეჩერების ნიშნად მიიღო. მანქანაში რომ დავბრუნდი და იქ მყოფთ ვუამბე, მე რომ არა კიდევ დიდხანს მოგიწევდათ აქ ყოფნა მეთქი, არ დამიჯერეს.

ჩვენს სასტუმროს ჰქვია „თონგლოი“ – „გამარჯვება“. ევროპული ტიპის სასტუმროა. ტბაზე დგას. ირგვლივ წყალია. ხილით უნდა მიადგე.

ტბაში ბანაობა საშიშია. ქვეწარმავლებია მომრავლებულიო. სასტუმროს დარაჯები ყოველ ათ მეტრში დგანან და წყალს ჩაჰყურებენ. რას დარაჯობთ მეთქი. წყლიდან გველი რომ არ ამოძვრეს და სასტუმროს აივანზე არ ახობდესო.

ნომერში მაგიდაზე დიდი ასოებით გამაფრთხილებელი წარწერებია: „ონკანის წყალი არ დალიოთ“, „აივნის კარები და ფანჯრები არ გააღოთ“.

მთელი ღამე ოფლში ვინურები, თვალი არ მომიხუჭავს. სიცხე სულისშემხუთველი. სავენტილაციო დანადგარიდანაც რაღაც უსიამოვნოდ თბილად უბერავს.

ოდნავი გაფაჩუნება და წამოვხტები, სინათლეს ავანთებ და სანოლქვემ ხვლიკს (ან უკეთეს შემთხვევაში თაგვს) დავეძებ.

დილით ადრე სასტუმროდან ტბას გავხედე. გინახავთ ჭილოფზე ჩვეულებრივი ვიეტნამური ნახატები? ტბა ლოტოსის ბორცვებით დაფარული. ულამაზესი სანახაობაა. ლურჯ ველზე ჯგუფ-ჯგუფად მიმოფანტული მწვანე ხალიჩები.

მომეჩვენა, რომ გუმინ ამდენი მწვანე ბორცვი არ იყო ტბაზე და ამის შესახებ გაუბედავად მოვახსენე იქვე მდგარ სასტუმროს თანამშრომელს.

მართალი ხართო. ლოტოსის ფარდაგებს მეთევზეები საღამოობით გამოაცურებენ და ქვეშ ანკესებს უგებენო. თევზი ლოტოსის ქვეშ იზუდებს ღამე და ანკესს ადვილად მოჰყვებიანო. მართლაც თითქოს მზეს ამოჰყვინენო გობისოდენა ნავებზე მსხდომი მეთევზეები. ხელში ნიჩბების ნაცვლად ხის ჯამები უჭირავთ და გასაოცრად სწრაფად მიინევენ ლოტოსის ველისკენ. მიახლოებისთანავე იხვივით ჩაყვინთავენ. საეჭვოდ დიდ ხანს არიან წყალში, მერე ლოტოსის ფოთლებს შუა გამორჩდება მეთევზის თავი ნადავლს გობში ჩაყრის, დასხვა ანკესისკენ მიცურავს. მეორე მეთევზე უკან მოჰყვება ნავზე გამობმული ლოტოსის დიდი ველით.

ჰანოის ქუჩებში დავაბიჯებთ მე და ბორის რიფტინი. ჰანოი პატარა ქალაქია ტერიტორიულად. მცხოვრები კი 2 მილიონამდეა.

უაღრესად ეგზოტიკური ქალაქია. ველოსიპედზე ამხედრებული ჰანოი. ვიეტნამელს უქუდოდ ვერ ნახავთ. ქალებს კონუსიანი მრგვალი ჭილოფის ქუდები – ნონი ახურავთ. კაცებს ხეზე გადაკრული მწვანე ქუდები – მუი ჰქვია.

მიუხედავად იმისა, რომ ვიეტნამის თითქმის ყოველი ტაძრის კარებზე წარწერაა „იცოცხლე სანამ ცა და მიწა არსებობს“, ვიეტნამელები მაინც არ გამოირჩევიან ხანდაზმულობით.

მოხუცს იშვიათად ნაანყდებით. ვიეტნამში სიცოცხლის საშუალო ხანგრძლივობა ორმოცი წელია.

ტრადიციულად ვიეტნამის ქალაქებში ცხენიან კაცს არ უშვებდნენ. „ჩამოდი ცხენიდან“ – ახლაც არაერთგან ნახავთ ვიეტნამში დიდი დასახლების ან ქალაქების შესასვლელებში ქვაზე ამოკანრულ იეროგლიფურ წარწერებს. გამახსენდა მანქანების ბოლქვში დამხრჩვალ თბილისი.

აქ ახლა ძირითადი ტრანსპორტი ველოსიპედიანია.

ქუჩაში მანქანებს იშვიათად შეხვდებით იმ უბრალო მიზეზის გამო, რომ ვიეტნამში საკუთარი მანქანები თითქმის არ არსებობს. ტრანსპორტი მხოლოდ დიდ სახელმწიფო დაწესებულებებს ემსახურება.

ვიეტნამში სატელეფონო კავშირიც არ არსებობს კერძო პირებს შორის. ტელეფონები დგას მხოლოდ სახელმწიფო დაწესებულებებში.

ვიეტნამში სასურსათო მალაზიები ძალიან ცოტაა. მიუხედავად საბჭოთა კავშირისა და სოციალისტური ქვეყნების დიდი შემწეობისა, ვიეტნამის მზარდი მოსახლეობის (60 მილიონზე მეტი კაცი) გამოკვება ძალიან ჭირს.

სურსათი მხოლოდ საბარათო სისტემით ნაწილდება – ისიც უაღრესად შეზღუდული რაოდენობით.

ვიეტნამი ჭეშმარიტად საოცრებების ქვეყანაა. ფეხმძიმობის ვადა მსოფლიოს ყველა ხალხისგან განსხვავებით ვიეტნამში რვა თვეა.

მთელი ჩრდილოეთ ვიეტნამი რომ დაიაროთ, სასაფლაოს იშვიათად შეხვდებით. ადრე მიცვალებულს ყველანი თავის ეზოში უმთავრესად ბრინჯის ყანაში მარხავდნენ. ვალდებულია ყველამ იზრუნოს საფლავის მიწისთვის სიცოცხლეში. ქალაქში გარადაცვლილთ ზოგჯერ მშობლიურ საფლავებში მარხავენ ან ნათესავები და ახლობლები უთმობენ თავის ყანას. საფლავის ქვა ერთ წელიწადს ადევს საფლავს. შემდეგ



კი საფლავის ბორცვი სწორდება, ქვას კი ჭირისუფალი თავისი სახლის სარდაფში ინახავს. მიცვალებულს მეორე დღესვე ასაფლავებენ.

დასაფლავების ცერემონიალი დიდი არ არის. შავებსაც არავინ ატარებს.

ვიეტნამელს ბარგი ძირითადად ჯოხზე დაკიდებულ ჭილოფის ქილებში დააქვს. მხარზე სასწორივით გადაკიდებულ ამ ხის ხურჯინს განი ჰქვია.

უნდა ნახოთ რაოდენ თავისებურია განგადაკიდებული ვიეტნამელის სიარული. იგი ყუნცულით, დაახლოებით სპორტული სიარულის მსგავსად, თეძოების რხევით მიდის. ასე ინარჩუნებს წონასწორობასაც და როგორც ამბობენ ტვირთიც უმსუბუქდება.

ვიეტნამში თითქმის არ არის პროფესიონალური თეატრი.

ვიეტნამში არ არის მასობრივი სპორტი.

არ არის სპორტული დარბაზები.

არის ერთადერთი სახე სპორტისა – ახალფეხადგმული ფეხბურთი, მათი კლასი მოგეხსენებათ დაბალზე დაბალია.

ვიეტნამელები უალრესად თავაზიანი ხალხია. თვალს შეავლებ თუ არა მოვალედ თვლის თავს გაგიღიმოს, ხოლო შენც თუ გაუღიმე, მოვა და მადლობის ნიშნად წელში რამდენჯერმე მოიხრება.

იქამდე მიდის ვიეტნამელის თავაზიანობა, რომ ისინი არ იგინებიან. ვიეტნამურ ენაში საგინებელი ფრაზები არ მოიპოვება, მითხრა ვიეტნამის მწერალთა კავშირის მდივანმა.

აბა, სიდედრს როგორ ელაპარაკებიან მეთქი. ხუმრობას ვერ მიმიხვდა. თურმე „მომწყდი თავიდან“ ყველაზე საგინებელ მიმართვად ითვლება.

ვნახეთ ცენტრალური მოედანი „ბა – დინ“ და ჰო ში მინის გრანდიოზული მავზოლეუმი.

„ტიუ მიტ კოტ“ – ერთ ბოძზე მიდგმული ბუდას ტაძარი. ჰანოის სიმბოლო. ბევრ ნახატზე მინახავს.

გასაოცარია ნეფრისტის (ქვის) ბორცვზე გაშენებული საყდარი – რომელიც ორ ნაწილადაა გაყოფილი. ერთ მხარეს კონფუციანელთა სამლოცველოა, მეორეზე ბუდისტების – „დაბრუნებული მახვილის“ ტბაში.

საყდარში მინის ხუფის ქვეშ დაბალზამებული გიგანტური კუ განისვენებს. იგი 1968 წელს გარდაიცვალა, 300-ზე მეტი წლისაა.

აქვეა მონღოლთა წინააღმდეგ ვიეტნამელთა გამორჩენილი ბელადის პოეტ ჩან ჰანგ დაოს (1226-1300) მემორიალი..

„კამან“ – გმადლობთ ყოველ ფეხის ნაბიჯზე ისმის.



ვიეტნამური ბაზარი

გავიარეთ ჩინურ კვარტალში, წვრილი ხელოსნების სამუშაო ადგილებში და ბაზარში.

გასაოცარი სანახაობა. სახალხო ოსტატები ჩვენს თვალწინ ახდენენ ხის, ტყავის, ქვის, ვერცხლის დამუშავების სასწაულს.



ბაზარში ყველაფერია, მაგრამ არავინ ყიდულობს. საკვები წარმოუდგენლად ძვირი ღირს.

სალამოს საბჭოთა საელჩოში ფილმი „ფრონტი ფრონტის მიღმა“ ვნახეთ.

## 10 მაისი

მწერალთა კავშირის პირველი მდივანი ნგუენ ნგოკი კიბზე შეგვეგება და თავის კაბინეტში შეგვიძღვა.

ბანანითა და ჩაით განწყობილ სუფრას ექვსნი შემოვუსხედით. ნგუენ ნგოკი, ვიეტნამის მწერალთა კავშირის პასუხისმგებელი მუშაკი, საბჭოთა საელჩოს თანამშრომელი და ჩვენ.

დელეგაციის სახელით ვიეტნამელ მწერლებს მივესალმე და სათანადო წარწერით „ვეფხისტყაოსანი“ და მცირე სუვენირები ვუსახსოვრე. ნგუენ ნგოკმა ფრიალად გაიხარა. ამ ათიოდე წლის წინათ გახლდით საქართველოში, დიდებული, სტუმართმოყვარე ქვეყანააო. წელში გავიმართე და ბორის რიფტინს ამაყად გადავხედე, მაგრამ რაც მასპინძელმა ამ სიტყვებს მოაყოლა, აღტაცების საბაბს ცოტას მაძლევდა თურმე. რა კარგი სასტუმროები გაქვთ თბილისშიო სევდიანი ღიმილით დააყოლა. რომელ სასტუმროში ცხოვრობდი მეთქი. ჩემმა თავაზიანმა მასპინძლებმა თბილისში ჩამოსვლის დღესვე ყველა სასტუმრო შემომატარეს, მაგრამ თავისუფალი ადგილი არცერთში არ აღმოჩნდა და ბოლოს ერთმა ღვთისმადლიანმა პოეტმა (გვარი არ ახსოვდა) თავის სახლში წამიყვანაო.

კიდევ რამე თავმოსაჭრელი არ გაიხსენოს მეთქი და ლიტერატურაზე გადავიტანე სიტყვა. მოვიქაჩლე თავი და ვიეტნამური მწერლობის ჩემი მწირი ცოდნის მარაგიდან მისხალიც არ დავიტოვე. შევატყვე მასპინძლებს სიამოვნებათ,

რომ მათს შემოქმედებაზე წარმოდგენა მქონდა. ხოლო ნგუენ ნგოკს თავისი ერთი ნოველის (გამოფრენის წინ დღეს წავიკითხე ლიტერატორთა სახლის ბიბლიოთეკაში) შინაარსი რომ ვუამბე, წამოხტა და მადლობის ნიშნად დიდხანს მართმევდა ხელს.

მერე მასპინძლებმა ვიეტნამში ჩვენი მოგზაურობის პროგრამა გაგვაცნეს. ბორის რიფტინს ძველი ვიეტნამური ხელნაწერების გაცნობა და სამხრეთის ორიოდე უძველესი ქალაქის ნახვის სურვილი ჰქონდა, ამიტომაც პროგრამის შედგენაში ენერგიულად ჩაერია, მაგრამ არაფერი გამოუვიდა.

მასპინძლებმა ჩემი თანამგზავრის სურვილები ღიმილით მოისმინეს, თავი არაერთხელ დაუკრეს, მიზანი მოუწონეს და დახმარება აღუთქვეს, მაგრამ იოტისოდენაც კი არაფერი შეუცვლიათ.

მეორე დღეს პროგრამა რომ ჩამოგვირიგეს, ბორისმა ჩახედა და თარჯიმან გოგოს შესჩივლა – ჩემი თხოვნა რატომ არ გაითვალისწინეთო. გოგონამ შუბლზე იტაცა ხელი, ეტყობა გამორჩა მბეჭდავსო. კიბიდან-კიბეზე სირბილს მოჰყვა და ბოლოს გაბრწყინებული სახით ახლადდბეჭდილი პროგრამა ჩამოგვირიგა, რომელიც გაჭრილი ვაშლივით ჰგავდა ძველს.

მწერალთა კავშირის ერთადერთი მანქანა მასპინძლებმა თავაზიანად დაგვითმეს. ვიეტნამის მწერალთა კავშირის ერთადერთი მანქანა „გაზ24“ აქვს, იგი პირველ მდივანს ემსახურება. სხვა მდივნები და რა თქმა უნდა კავშირის სხვა თანამშრომლები სამსახურში ველოსიპედით დადიან. მწერალთა კავშირის პატარა ეზოში ველოსიპედების ტყეა.

სადილის შემდეგ ჰანოის საფუძვლიან დათვალიერებას შევუდექით.

ქალაქის პარკი, კონფუციანელთა ძველი აკადემია. აკა-

დემიის ეზოში პატარა ტბაა შუაში კუნძულით. გამოცდის ჩაბარების დროს მოძღვარი და გამოცდის ჩამბარებელი იმ კუნძულზე მიჰყავდათ, რათა გამოცდის ნორმალურ მსვლელობაში ხელი არავის შეეშალა, ან გამოცდაზე ზემოქმედება არ მოეხდინათ, დასძინეს გიდი.

ჰანოიში თითოეულ მცხოვრებზე ერთი კვადრატული მეტრი საცხოვრებელი ფართი მოდის.

წყალი ვიეტნამელის ეზოა, საცხოვრებელი ბინის ნაწილია. ყოველ ფეხის ნაბიჯზე ტბაა ჰანოიში.

ოჯახი ხანდახან მთელი დღის განმავლობაში წყლიდან არ ამოდის. ბავშვები კი არ თამაშობენ, კი არ ბანაობენ ჩვენი გაგებით, წყალში ცხოვრობენ ამ სიტყვის სრული მნიშვნელობით.

ტბა აძლევს საზრდოს, აგრილებს ზაფხულის პაპანაქებაში (გაგრილებაზე მე სხვა წარმოდგენა მაქვს, რადგანაც ტბის წყლის ტემპერატურა ორმოც გრადუსამდე ადის და მეტი რომ არა ვთქვა, წყალტუბოს აბაზანებზე უფრო თბილია).

ღმერთმა შეარგოთ და მიირთმევენ თითქმის ყველაფერს ტბის მიერ ბოძებულს – თევზს, წყალმცენარის ფესვებს, ლოკოკინებს, ბაყაყს, ანკარას (ეს ორი უკანასკნელი დელიკატესებად ითვლება რესტორანში და ყველაზე ძვირი ღირს).

ვინრო ქუჩაზე ჩავუხვიეთ და დიდხანს ვათვალიერებთ ქალაქში მცხოვრები ვიეტნამელის ყოფა-ცხოვრებას.

ცხოვრობენ უმეტესად ქოხებში. იატაკი მინისაა ან უკეთეს შემთხვევაში ასფალტის. ნამდაუნუმ ასველებენ იატაკს. ქალებს სულ სავარცხელი უჭირავთ ხელში.

შთაბეჭდილება ისეთი გრჩებათ, თითქოს თმის დასავარცხნად ქუჩაში გამოდიან.



ვიეტნამი

მინიატურული სკამი, მინიატურული მაგიდა, მინიატურული სანოლი. ერთ ქოხში – დაახლოებით ექვსმეტრიანში, მთელი ოჯახი ეტევა, მე მგონი, სიდედრ-სიმამრიანად.

ღიმილი ვიეტნამელის თანამგზავრია. შემოგხედავს, გაგიღიმებს და მაშინვე ხელებზე დაგაკვირდება რა უჭირავსო.

უკან ტიტლიკანა ბავშვების ჯარი მოგვდევს. იცინიან, ჟღურტულებენ, საღეჭ რეიზინსა და სიგარეტს გვთხოვენ.

## 11 მაისი

დილიდან საშინლად ცხელა.

ტემპერატურა 7 საათზე უკვე 35 გრადუსია. ხოლო ჰაერის ტენიანობა 100%. ხომ ასე ცხელა, ტენიანი ჰაერის გამო სარეცხი ვიეტნამში 3-4 დღეში თუ გაშრა, დიასახლისი მაღლობელია.

დილით ჰო ში მინის მავზოლეუმს ვესტუმრეთ. ლენინის მავზოლეუმზე გაცილებით უფრო დიდი და მდიდრულია. მუმიაც დიდებულად შენახული. ვიეტნამის ბელადს ცოცხალივით სძინავს. მავზოლეუმში, რაც თურმე ფრიად პატივსაცემი სტუმრებისთვის ხდება მხოლოდ, ურიგოდ შეგვიშვეს.

მერე ჰო ში მინის სახლ-მუზეუმი დაგვათვალისწინებს. ღარიბულად, უბრალოდ ცხოვრობდა ამხელა სახელმწიფოს ხელმძღვანელი. პრეზიდენტობის 15 წლის განმავლობაში მხოლოდ სამი კიტელი გაცივითა, ორ ხელ ტანსაცმელზე მეტი არასდროს არ ჰქონიაო. ხელფასს ორას დონგს (ოც მანეთს) იღებდა თვეში და მთელ სახელმწიფოში ჰო ში მინზე მეტი ხელფასის მიღების უფლება არავის ჰქონდაო – ამბობს გიდი.

ნასადილევს ვენვით ჰანოის მსოფლიო ლიტერატურის ინსტიტუტს. ჩვენ ჩვენი ვუთხარით, იმათ თავისი გვითხრეს და ვიზიტის დროც შემოგვადნა.

დიდხანს ვათვალისწინებდით ჰანოის სამხატვრო და ისტორიულ მუზეუმს (ერთადაა).

გაგაოცებთ მე-10, მე-11 საუკუნის ქანდაკებები. ბუდიზმმა მართლაც რომ დიდი ხელოვნება დაგვიტოვა.

## 12 მაისი

შეხვედრა მომიწყვეს ჰანოის №1 პედაგოგიურ ინსტიტუტში. ვილაპარაკე ჩვენი ქვეყნის საერთო ბედზე ისტორიულად. ჩემი ჩამოსვლის მიზანზე, ჩემს ვიეტნამურ შთაბეჭდილებებზე, ჰო ში მინზე, საქართველოს ისტორიასა და ქართულ მწერლობაზე.

ყურადღებით (და მე მგონი აღტაცებითაც) მისმენდნენ.

მომესალმნენ პრორექტორი, ფილოლოგიის ფაკულტეტის

დეკანი, ჩემი ყოფილი ასპირანტი – ნგუენ ნგიან ჩანგი და რამდენიმე სტუდენტი.

იუმორს დარბაზი მაშინვე იტაცებდა.

მთხოვეს ისევ ჩამოვიდე და ინსტიტუტში რამდენიმე ლექცია წავიკითხო.

დავთანხმდი 1984 წლისათვის.

დავინტერესდი სტუდენტთა ცხოვრებით. სტიპენდიას 10 დონგამდე იღებენ. ეს დაახლოებით ხუთ მანეთია ჩვენს ფულზე. ლექციებისთვის აუდიტორიები არ ჰყოფნით. ხშირად ერთ აუდიტორიაში ერთდროულად ორი ლექცია ტარდება. სტუდენტები უპირატესად იატაკზე სხედან. იქვეა ინსტიტუტის ეზოში ქოხ-საერთო საცხოვრებლები.

ორმეტრამდე სიმაღლის თიხით შელესილი გრძელი „ბარაკები“.

თითო ოთახში ოცამდე სტუდენტი ათევს ღამეს. ორსართულიან „ხის ნარებზე“, საწოლებზე წვანან უშალითოდ, უბალიშოდ, პირდაპირ ქილოფზე.

სწავლის მსურველთა რიცხვი დიდია. ძალაშია „თავისუფალი მსმენელის“ სისტემა, რომელიც ჩვენს უმაღლეს სასწავლებლებში რატომღაც ენერგიულად და კატეგორიულად უარყვეს. რა მიზეზით, ვერ მოგახსენებთ.

აუდიტორიებს რომ ვათვალისწინებდი, უეცრად სიმღერა შემომესმა. რაშია საქმე? ალბათ გუნდის მეცადინეობაა, ვკითხე პრორექტორს. არა, ჩვენთან სიმღერის ანსამბლი არ არსებობს ინსტიტუტში, უბრალოდ ლექციაზე მღერიათ. როგორ, უბრალოდ მეთქი, გაეცინა: თქვენთვის ეს გაუგებარიაო. აი, მაგალითად ლექციაზე სტუდენტმა წამოიწყო სიმღერა, ვალდებულება ყველა აყვესო. ლექტორიც მეთქი? რა თქმა უნდაო. სიმღერას მაშინ იწყებენ, როცა ლექტორი ისეთ საკითხს შეეხება რაც სტუდენტი ახალგაზრდობას აღელვებსო. ახლა იქნებ სოციალიზმის მშენებლობაზე, მარქსიზმზე, დედაზე ან



სიყვარულზე იყო ლაპარაკი და სიმღერაც მას მიუძღვნესო. დიდხანს იმღერებენ მეთქი? სიმღერის ტექსტი ყველამ იცის, ჩამთავრებენ და დაწყნარდებიან, მერე კი ლექტორი თავის საქმეს განაგრძობსო.

### 13 მაისი

ვიეტნამელები, ჩვენი არ იყოს, დიდი პუნქტუალობით არ გამოირჩევიან. შვიდი საათიდან ველოდებით მანქანას მე და ბორისი და 9 საათზე მოვიდა. გიდს მობოდიშება არ დაუნყია, ხომ კარგად გეძინათო – გვკითხა და თეთრი კბილები შემოგვანათა.

ჩვენი გიდი 20-იოდე წლის ვიეტნამელი გოგონა ჰუ იანი გახლავთ. ფეხმძიმედაა, ძლივს დადის სანყალი. ვთხოვეთ მწერალთა კავშირის ხელმძღვანელობას და ჰუ იანის ნაცვლად დღეს ცნობილი ვიეტნამელი პოეტი და მთარგმნელი ბანგ ვიეტი გაგვაყოლეს.

ჰანოიდან ასი კილომეტრი გავიარეთ და მთები დაიწყო. მწვანე ტრამალიდან ერთბაშად ამოიზიდა აქლემების მსგავსი მთები.

ცოტაც და მივაღიქით იმ ადგილებს, სადაც მიმდინარეოს სამხრეთ-აღმოსავლეთ აზიის ყველაზე გრანდიოზული მშენებლობა „ჰოაბინის“ (ვიეტნამურად „მშვიდობა“) ანუ როგორც აქ უწოდებენ შავი მდინარის ჰიდროელექტროსადგურის აგება.

ჰოაბინი თავისი სიმძლავრით მსოფლიოში მეთექვსმეტე იქნება, იგი სრული ამოქმედების შემდეგ 8 ათას მილიარდ კილოვატსაათ ელექტროენერგიას გამოიმუშავებს და ერთბაშად გადაწყვეტს ვიეტნამის ელექტროფიცირების რთულ პრობლემას.

1976 წელს დაიწყო, თებერვალში, მშენებლობა და 1982

წელს მთლიანად დაამთავრებენ. ამჟამად შავი მდინარის გადაკეცივის სამუშაოები დასასრულს უახლოვდება.

ამ გრანდიოზულ ჰესს საბჭოთა კავშირი უშენებს მოძმე ვიეტნამს. ვიეტნამის ეს უდიდესი ელექტროსადგური ქართველმა ინჟინრებმა დააპროექტეს. ამჟამად ჰესზე 560 საბჭოთა სპეციალისტი მუშაობს. ჩვენია მანქანები, ცემენტსაც კი საბჭოთა კავშირიდან ეზიდებიან გემებით, რადანაც ვიეტნამს თავისი ცემენტის ქარხანა არ გააჩნია. მშენებლობის მთავარმა ექსპერტმა პავლე ბოგაჩენკომ „ჰოაბინის“ პროექტის ერთ-ერთ ავტორთან ასლან გოგიბერიძესთან მოკითხვა დამაბარა.

მალე ქართველთა ნრეში აღმოვჩნდი. ვიეტნამის მინაზე შრომობენ გურამ კვარაცხელია, რეზო ეფაძე, ანზორ ჩაფიჩაძე, გოგი კობეშავიძე, ალიკო გოგიშვილი, ამირან ჯაფარიძე და სხვები.

გზად მიონგის ტომის ერთ სოფელში შევიარეთ.



ვიეტნამური სოფელი. რევაზ მიშველაძე და ვიეტნამელი მწერალი ბანგ ვიეტი.

ვიეტნამში უამრავ დიალექტზე ლაპარაკობენ და სრულიად განსხვავებული ეთნიკური თვისებების ხალხი ცხოვრობს. თუ საკუთრივ ვიეტნამელები სოფლად ისლით გადახურულ მინურებში ცხოვრობენ, მიონგის ტომის წარმომადგენლების სახლი წარმოადგენს ხის ბოძებზე შემდგარ ოდას, რომლის ქვეშ საკუჭანაო არის მოწყობილი, ზედა სართულზე კი მიონგი ცხოვრობს.

მიონგის ბინა გადატიხრული არ არის. დაბალჭერიან დარბაზში ყველანი ერთმანეთის გვერდით იძინებენ თავ-თავიანთ ჭილოფზე.

ვიეტნამელები საერთოდ ხის ქოშებით დადიან, სახლში კი სტუმარიც და მასპინძელიც ფეხშიშველა შედის. სოფლად დღე ოთხ საათზე იწყება. ოთხზე გადიან ბრინჯის ყანაში სამუშაოდ და თორმეტზე ბრუნდებიან. თორმეტზე უკვე ძალიან ცხელა და მუშაობა შეუძლებელია.

თორმეტიდან ხუთ საათამდე თითქმის მთელი ვიეტნამი იძინებს, ან უძრავად ზის ჩრდილში.

დღეში ორჯერ იკვებებიან 12 საათზე და 6-ზე. მიირთმევენ ბრინჯს და მწვანილეულს. იშვიათ შემთხვევაში თევზს და უფრო იშვიათად ხორცს.

მიონგს შინაური ცხოველები არა ჰყავს, იმიტომ რომ შენახვა უჭირს. კამეჩი და ძროხა ხშირად რომ თვალს მოჰკრავთ გზის ნაპირებზე კოოპერატივის საკუთრებაა. კამეჩს თითქმის არ წველიან. მხოლოდ გამწვევ ძალად ითვლება.

მალე ერთი ნელი შესრულდება, რაც ვიეტნამში დიდი საკოოპერატივო რეფორმა გატარდა. მიწები გლეხებს დაურიგეს. გლეხები თავიანთი ცოდნის და სურვილის მიხედვით უვლიან ყანებს და მოსავალს. ორ მესამედს უფასოდ აბარებენ სახელმწიფოს, დანარჩენს კი თვითონ იტოვებენ. ამ ღონისძიებამ გამოაცოცხლა სოფელი და წელში გამართაო გლეხი – ამბობს ბანგ ვიეტი.

ვიეტნამელი გლეხის მძიმე შრომაზე არაერთხელ დაწერი-

ლა. მართლაც რომ უაღრესად გამრჯე და მინაზე თავგადაკლულია ეს პატარა, კაფანდარა ვიეტნამელი. ბრინჯის ყანაში, მუხლამდე წყალში, სათითაოდ რგავს ბრინჯის ნერგს, ხოლო მერე ექვსი თვის განმავლობაში წყალს ექაჩება. წყალს ტუმბავენ ათასი საშუალებით: თიხის ჯამებით, მანუფაქტურული, მამაპაპური ხელის ტუმბოებით, თოკზე გამობმული ვედროებით და სხვა გზით. ყველა პროვინციაში თავისებური მეთოდით ხდება წყლის ტუმბვა.

ეზოში აქა-იქ ქათამსაც მოჰკრავთ თვალს. ვიეტნამური ქათამი პატარაა და შეფერილობით ციცარს წააგავს.

მიონგებს ქალებსაც და კაცებსაც თეთრი პერანგები და შავი კაბები აცვიათ.

ქორწინების წესი დღემდე ასეთი აქვთ; სასიძოს და საპარტაძლოს მშობლები ან ნათესავები თვით წყვეტენ ახალი ოჯახის შექმნის საკითხს. აუცილებელი არ არის მომავალში ცოლ-ქმარმა ერთმანეთი ადრე გაიცნონ. მერე სასიძო მიდის სასიძამროს სახლში და ქალიშვილის გამოსასყიდად მიჰყავს ორი ქათამი და მიდის ხელდამშვენებული ორი ბოთლი ბრინჯის არაყით. ქორწილში იწვევენ 30-40 კაცს, ახლო მეზობელ-ნათესავებს.

ქორწილში არ მღერიან, არ ცეკვავენ და მაგარ სასმელებს არ მიირთმევენ. ბრინჯსა და მწვანილეულს შეექცევიან და საუბრობენ იმაზე, თუ ვინ რით შეენევა ახალ ოჯახს. ზოგი ხის ჯამებს უძღვნის, ზოგი სათევზაო ბადეს, ზოგი ბამბუკის მილებს (ბამბუკი ვიეტნამელი კაცისთვის მთავარი საშენი მასალაა, ბამბუკებს ხმარობენ დედაბოძად, სახლის გადასახურად და წყალსადენადაც ბრინჯის ყანებში). ქორწილის სუფრა ვიეტნამელის ჩვეულებრივ სადილზე უფრო ღარიბული უნდა იყოს, რათა ეკონომიკურად არ დააქვეითოს ახალი ოჯახი.

მიცვალებულს ერთ დღეში ასაფლავებენ. ვიეტნამელები მოთქმით არ ტირიან. კაცის ამ ქვეყნიდან წასვლას ბარაბ-

ნებით ამცნობენ სოფელს. მიცვალებულს მაშინვე გააპატიოსნებენ და მზის ჩასვლამდე დამარხავენ თავის ეზოში. კუბოს მიცვალებულის შვილები უკანსვლით მიჰყვებიან ბამბუკის ჯოხით ხელში.

თითქმის ყველა მიონგის ოჯახში შეხვდებით სამ მუსიკალურ ინსტრუმენტს – „დინ მანს“ – ბამბუკისგან გაკეთებულ სიმებიან საკრავს, კამეჩის რქის საყვირს და ბარაბანს.

სოფელს არაჩვეულებრივი ეგზოტიკური იერი აქვს. ხეები, სახლები, წყალი, მგონი ცაც კი მწვანე ფერისაა. ლოტოსის და ბანანის უზარმაზარი ფოთლები აფარია ყველაფერს. თვალს გტაცებთ ანანასის და პაპაიას ბუჩქები და ქოქოსის პალმები, ვაზის, მაგნოლიის და ქურის ხის მაღალი ხეები, მანგუსი, კაუჩუკის ხეები.

გზად გავიარეთ სოფლის ბაზარში.

ბაზარში დახლი არ არის. მიწაზე აწყვია ყველაფერი. გამყიდველები არ სხედან, ჩაცუცქულები არიან სასაცილოდ, მყიდველიც უნდა ჩაცუცქედეს (თუ მყიდველია რა თქმა უნდა).

ყველას უჭირავს ხელში თვითნაკეთი სასწორი. მყიდველიც კი თავისი სასწორით მიდის ხშირად ბაზარში. ასე რომ ბანანი ხშირად ორ სასწორზე იწონება – მყიდველის და გამყიდველის.

ქურდობა ვიეტნამში ადრე არ არსებობდა. ვიეტნამელ იმპერატორთა კანონებში არ იყო მუხლი ქურდობის წინააღმდეგ. ახლა კი ვიეტნამელმა კაცმა ფრანგებისა და ამერიკელებისგან ქურდობაც ისწავლა და ბანდიტობაცო, ამბობს ბანგ ვიეტი და ამჯერად არ იღიმება.

#### 14 მაისი

დღეს მე და ბორის რიფტინი შევხვდით ჰანოის სახელმწიფო უნივერსიტეტის სტუდენტებს და პროფესორ-მასწავლებლებს.

კარგი შეხვედრა იყო. ბევრი შეკითხვა მოგვცეს. ჩვენს კულტურაზე ბუნდოვანი წარმოდგენა აქვთ, რასაკვირელია. სტუდენტმა მკითხა, თქვენი დედაქალაქი ხომ ისევ ალმა-ატააო, ხოლო ჩემს გვერდით მჯდომმა პროფესორმა თავის სიტყვაში ქართველები ისლამური რელიგიის ერთგულ მიმდევრებად გამოგვააცხადა.

პროფესორის ხელფასი 350 დონგს ანუ 35 მანეთს უდრის. ერთი კილოგრამი ხორცი ბაზარზე კი 80 დონგი ღირს. 3.5 კგ. ხორცს ყიდულობს ვიეტნამელი პროფესორი თავისი ერთი თვის ხელფასით.

სამეცნიერო ნაშრომების საქმე როგორ გაქვთ მეთქი. ცუდადო. 10-15 წელიწადში ერთი წიგნი თუ გამოსცა მეცნიერმა ყოჩაღ კაცად ითვლებაო.

სამ საათზე კინოსტუდიაში მიგვინვიეს. დახურულ დარბაზში სპეციალურად გვაჩვენეს თანამედროვე ვიეტნამის კინემატოგრაფიის ორი საუკეთესო ნაწარმოები: რეჟისორ ხარ ნინოს – „მშობლიური მიწა“, 1979 წლის ჩინეთის აგრესიაზე შექმნილი შთამბეჭდავი მხატვრული ფილმი და ჩენ ფიონგის პოპულარული სურათი „უკანასკნელი იმედი“, რომელიც თანამედროვე ვიეტნამის აქტუალურ პრობლემებს ეხება და დიდი კრიტიკული პათოსით გამოირჩევა. ამ უკანასკნელის სიუჟეტი ასეთი გახლავთ: ქარხნის დირექტორი არაპრომითი შემოსავლით ავეჯს შეიძენს. ავეჯი დიდი არაფერია, მაგრამ მისი ჟურნალისტი მეუღლე აღშფოთდება, შენ ამის საშუალება სად გქონდა. როგორც ჩანს სახელმწიფოს მოპარეო. ერთ მშვენიერ დღეს ქარხანას (არ ჩანს რისი ქარხანაა) რევიზორი ეწვევა. დირექტორი და მისი დამქაშები რევიზორს ქრთამს შესთავაზებენ, მაგრამ პრინციპული ახალგაზრდა მავნებლებს ფულს სახეში შეაყრის. დირექტორის ცოლი დიდ დახმარებას უწევს რევიზორს მისი მეუღლის დანაშაულის მხილებაში.



დილის ათ საათზე ჰანოის კინოსტუდიის დირექტორმა ნგუენ ტჰუმ მიმილო. მოწვეული ჰყავდა სტუდიის სარედაქციო საბჭო. მთხოვეს მომეთხრო ქართული კინოს შესახებ და მერე მობოდიშებით შემომაპარეს – გუშინ ნანახ ფილმებზე თქვენი აზრი გაგვიზიარეთო. „ქართულ ფილმზე“ თვით დირექტორს გაეგონა, რომ საბჭოთა კავშირის ერთ-ერთი უძლიერესი სტუდიაა, ენახა „ჯარისკაცის მამა“ და რეზო ჩხეიძის ხელოვნებით მოხიბლული იყო. თქვენ შენიშნეთ ალბათ, რომ ჰანოის კინოთეატრებში დღესდღეისობით არცერთ ვიეტნამურ ფილმს არ უჩვენებენო. რატომ არის ასე მეთქი, ვერ აგისხნითო, უხერხულად გადახედეს ერთმანეთს. ჩვენი მაყურებელი მხოლოდ უცხოურ ფილმებს ეტანებაო, სინანულით დასძინეს.

ვილაპარაკე ქართული ფილმის გუშინდელსა და დღევანდელ დღეზე. ჩემი შეზღუდული ცოდნის პოზიციიდან. მერე, რასაკვირველია, სტუმრის კეთილგანწყობით ჩემი დადებითი აზრი გამოვთქვი ვიეტნამურ ფილმებზე და ორიოდე უმნიშვნელო შენიშვნაც მივაყოლე.

თქვენს კინოსტუდიაში თუ იღებენ ისეთ გაბედულ ფილმებს როგორც თქვენს მიერ გუშინ ნანახი „უკანასკნელი იმედიაო“, გირჩევთ, მოგვბაძოთ ნაკლოვანებათა მხილებაში. მხილება წინსვლის ხელშემწყობიაო. აღვუთქვი, რომ ვიეტნამელ კინემატოგრაფისტთა გამოცდილებას ჩემს თბილისელ მეგობრებს გავუზიარებდი. უაღრესად კმაყოფილნი დარჩნენ. აზრი აღარ ჰქონდა იმის მტკიცებას, რომ ქართული კინო, ისე როგორც ქართული მწერლობა მშვენიერი მაგალითია მთელი საბჭოთა ხელოვნებისათვის ანტიპოდთა მხილებისა და ნაკლოვანებებთან შეურიგებლობაში.

ვიეტნამის კინოსტუდიის არსებობის მთელს მანძილზე ვერ შეიქმნა ვერცერთი კინოკომედიაო, სინანულით თქვა

დირექტორმა და ბრალი მწერლებს დასდო – კინოკომედიის სცენარებს ვერ წერენო.

სალამოს საელჩოს თანამშრომელმა ანდრეი ფედორენკომ და მისმა ცოლმა ჩინურ კერძო რესტორანში მიგვიპატიჟეს. პირველად ჩემს ცხოვრებაში გეახელით კუს ხორცი, ბაყაყის ჩახოხბილი და მგონის გველის მწვადიც კი. გული არ ამრევია.

## 16 მაისი

სამხრეთ ვიეტნამის უმსხვილეს პორტში და-ნანგში ჩამოვფრინდით. სულ შვიდი წელია, რაც ამერიკელები განდევნეს აქედან. დარჩათ ვიეტნამელებს ამერიკული სახლები, ევროპული ვილები, მანქანები, ხიდები, აეროპორტი...



ვიეტნამი

თანამედროვე აზიური ქალაქია. ხალხთა სიმრავლით, ევროპული ოგანიზაციით. შიმშილს ჯერ მთლიანად ვერ მოუცავს და-ნანგი. დახლებს ჯერ კიდევ შემორჩათ ამერიკული საქონელი.

V-XV საუკუნეებში აქ იყო ძლიერი სახელმწიფო ჩამ-პა. ამ სახელმწიფოში მცხოვრებ ხალხ-ტომს არაფერი ჰქონდა საერთო ვიეტნამელებთან. XVI საუკუნიდან ჩინეთის გარე პროვინციებიდან ჩამოსულმა ვიეტნამელებმა დაიპყრეს და გაანადგურეს. ახლა ამ უძველესი ერის უკანასკნელ ნაშიერთ თითო-ოროლასლა ნაანყდებით. სამაგიეროდ არის და-ნანგში დიდი მუზეუმი (მსოფლიოში ერთადერთი) ჩამ-პას კულტურისა. განსაცვიფრებელი ქანდაკებები, დრაკონები, სპილოები, შივეები და ზარათუსტრები.

გვახლავს და-ნანგის მწერალთა განყოფილების ხელმძღვანელი, ცნობილი (როგორც თვითონ ამბობს) პროზაიკოსი ფან ტი, რომლის რომანი „მან და მე“ ბევრ ენაზე გამოცემულა.

დავათვალიერეთ „ხუთი სანყისის“ (ცეცხლი, მინა, ხე, ლითონი, წყალი) მთა. საკუთრივ „წყლის მთა“. უნიკალური ტაძრები გამოქვაბულებში. უზარმაზარი ქანდაკებები შივასი. დამატყვევა ვიეტნამელთა უნარმა გამოქვაბულებში მოეწყოთ ტაძრები და ბუნებისთვის შეეხამებინათ.

ვიბანავეთ წყნარ ოკეანეში.

სალამოს საბჭოთა კავშირისა და ვიეტნამის მეგობრობის საზოგადოებამ ბანკეტი მოგვინყო, რომელმაც „გულთბილ, მეგობრულ ვითარებაში ჩაიარა“.

## 17 მაისი

ქალაქი ჰუე. ვიეტნამის ყოფილი დედაქალაქი. მეფეთა სასახლეებით, პალატებით და მავზოლეუმებით. ამ ქალაქზე

ბევრს მიაბზობს ბორისი. იმედი აქვს, რომ აქ მაინც აღმოაჩენს ძველ ვიეტნამურ ხელნაწერებს.

დაგვხვდნენ ჰუეს მწერალთა განყოფილების თავმჯდომარე ჩენ ჰუანი და მისი მოადგილე სუ ჰუანი.

კბილი ნუხელ ამტკივდა. ბევრი ვითმინე, მაგრამ მოგესვენებათ ჭირი თავსა არ დამალავს და გავუტყდი მასპინძლებს. რაც მე იქ გადამხდა ერთი მოთხრობის თემაა.

მისვლისთანავე ოცამდე ექიმი საავადმყოფოს ეზოშივე შემომეგება. პალატაში რომ შემეყვანეს, გულმა რეჩხი მიყო, რადგანაც კბილი მაინცდამაინც უკვე აღარ მტკიოდა. მოკლე სიტყვით მივესალმე მათ და მათი სახით ვიეტნამის მთელ სამედიცინო პერსონალს, თბილისური სუვენირები დავარიგე და ყველა გულწრფელად დავპატიჟე საქართველოში.

დამსვენეს ავადმყოფის სავარძელში. ათმა კაცმა მაინც ჩამხედა კბილში. პლომბი ამოვარდა და დამატება იყო საჭირო. მცირე დაფაზე დახაზეს ჩემი კბილი და ერთ საათს ბჭობდნენ. ბოლოს, როგორც იქნა დამიპლომბეს და გამომიშვეს. ეტყობა ჩემმა თანამეგზურმა ისეთი რამ უთხრა ჩემზე, რომ შიშით ვერ გამიბედეს კბილის დაბურღვა. ექიმს შონი ერქვა.

მერე მეფეთა მიტოვებული რეზიდენცია და საგვარეულო კოშკები დავათვალიერეთ.

ვენჯიეთ ვიეტნამის განმათავისუფლებელი მოძრაობის ვეტერანს ნგუენ-დი-ჩის. იგი მარტო ცხოვრობს, ხილის დიდებული ბაღით ირჩენს თავს და ანდერძი დაწერილი აქვს იმის შესახებ, რომ თავის მშვენიერ სახლს და ეზო-გარემოს უსასყიდლოდ უტოვებს ჰუეს მწერალთა კავშირს.

სალამოს ჰუეს სამხატვრო საზოგადოების წარმომადგენლებთან შეხვედრა გვქონდა. დიდხანს ვისაუბრეთ. ჩემმა მოთხრობამ კბილის მკურნალობაზე ძალიან აცინა ყველანი. ჩავიწერეთ მათი თხოვნა „მიმართულება მივეცით როგორ იმუშაონ“ მომავალში და დავიშალეთ.

ისევ ჰუეში ვართ.

დავათვალიერეთ მეფეთა საძვალენი, აკლდამები და მავზოლეუმები.

ეგვიპტის ფარაონთა მსგავსად ყოველი მეფე თვით აშენებდა თავის მავზოლეუმს და ცდილობდა, რა თქმა უნდა მისი უკანასკნელი განსასვენებელი სხვისაზე ლამაზი და გრანდიოზული ყოფილიყო.

დიდხანს ვიდექი მეფე ტი-დიკის (1818-1844) სამარხთან. სწორედ მისი მეფობის პერიოდში დაიპყრეს ფრანგებმა ვიეტნამი. შეცდა პოეტი მეფე ტი-დიკი. დაიღალა ომებისგან და ეგონა, თუჟ ფრანგებს შეუთანხმდებოდა, ქვეყანას ფიზიკურად გადაარჩენდა და ცივილიზაციის გზაზე შეაყენებდა. დადო ხმალი და ფრანგებს ქალაქის ბჭენი განუხვნა.

მაღე გაირკვა რომ ევროპის ძლიერი სახელმწიფო ვიეტნამის გასანათლებლად როდი მოსულიყო. ამაში თვით თითქმის ტახტნართმეული, მარიონეტად ქცეული მეფეც დარწმუნდა და აი, იგი სიკვდილის წინ წერს თავის ეპიტაფიას, და იბარებს, რომ იგი შეუცვლელად წაანერონ მისი საფლავის ქვას. ტი-დიკი შენდობას თხოვს ვიეტნამელ ხალხს რომ მან, სწეულებათაგან შენუხებულმა და უსასოომ ვერ შეძლო გამკლავებოდა მოყვრად მოსულ მტერს და ხელყოფისგან დაეცვა ვიეტნამის წმინდა მიწა.

ტი-დიკის საფლავს ჩამპას თეთრ-ყვითელი ყვავილები ამშვენებს.

შუადღისას ძველთაძველი დიდი ნავით გავისეირნეთ ჰუეს შემოგარენში. ქალაქის თითქმის ყველა მცხოვრები წყალში ზის. ბევრი მათგანი უძრავადაა. ზოგი კი თავზე შლამს ისვამს (საპონი ვიეტნამში უსაშველოდ ძვირი ღირს) და იქექება. გიდი გვიჩვენებს ნავ-სახლებს. ცხოვრობენ ნავზე, დღისით და ღამით, სახლი არა აქვთ და მიწა, ნავზე სადი-

ლობენ და ნავზევე იკმაყოფილებენ ყოველგვარ ადამიანურ მოთხოვნილებას.

ნავზე პატარა ვიეტნამური ძაღლები და ქათმებიც კი ჰყავთ. როცა ცხელა ქალები წყალში სხედან და როგორც ჩანს (ამაში ისინი მსოფლიოს ყველა ქალებს ჰგვანან) ჭორაობენ.

ნასადილევს შეხვედრა მომიწყვეს ჰუეს ნოხების ფაბრიკაკოოპერატივში. დიდი დარბაზი გაჭედილი იყო. ულამაზესი ვიეტნამელი გოგონებით. ვრცელი სიტყვა ვთქვი. ოვაციით შემხვდნენ.

წამოსვლიასას ფაბრიკის დირექტორმა ჰუან ჰენ ტაუტმა საიდუმლოდ მითხრა, რომ ექვსი თვეა ნოხებს აღარ ვქსოვთ, მასალა არა გვაქვსო და საბანაო კოსტუმის კერვაზე გადავედითო.

სალამოს ჰუეს საქალაქო საბჭოს თავმჯდომარე და მისი ამხანაგები სასტუმროში გვეწვივნენ და ვახშამი გაგვიმართეს. „დავარიგეთ როგორ იმუშაონ მომავალში, მიმართულება მივეცი, ამოცანები დავუსახეთ.“

მე თვითონ მეცინებოდა ისე ყურადღებით გვისმენდნენ და კურსანტებივით ინერდნენ ჩვენს ყოველ სიტყვას.

ჰუედან და-ნანგისკენ გამოვემგზავრეთ საქალაქო კომიტეტის პირველი მდივნის მანქანით.

მართალია, ამერიკელი კოლონიზატორები „ძალიან ჩაგრავდნენ“ ვიეტნამს, მაგრამ გზები და ხიდები მშვენიერი დაუტოვეს.

გზად ისევ ვიეტნამის სოფლებს გავდივართ. მუხლამდე წყალში მდგომი ადამიანების ფუსფუსს ვათვალიერებთ.

განთავისუფლების შემდეგ ვიეტნამში შიმშილი გამეფდა. ეს ერთი წელია, მთავრობამ თითქოსდა გამოსავალს მიაგნო: გააუქმა სოფლად კოოპერატივები და მიწა გლეხებს უსასყ-



იდლოდ დაურიგა. ახლა ვიეტნამელი კაცი ამუშავებს მინას, შემოსავლის 40 პროცენტს მთავრობას უფასოდ აბარებს, დანარჩენი კი თვითონ რჩება.

ამ ღონისძიებამ შესამჩნევად გამოაცოცხლა სოფელი. გლეხი კმაყოფილია. ლტოლვილნი თავიანთ სოფლებს უბრუნდებიან და ნიჩაბს ჰკიდებენ ხელს.

## 20 მაისი

ჩემი წიგნის მთარგმნელი – ბანგ ვიეტი ათფორმიანი წიგნის თარგმნაში უკეთეს შემთხვევაში მიიღებს 500 დონგს, რითაც შეძლებს, არც მეტი, არც ნაკლები ათი კოლოფი სიგარეტის ყიდვას.

დღეს დავათვალიერეთ და-ნანგის საბრძოლო დიდების მუზეუმი. ამერიკელებზე გამარჯვების მემორიალი გახლავთ, არც წამიკითხავს უფრო დიდი საშინელებანი ვიდრე აქ ფოტოებზეა გამოსახული. რა კაციჭამიური ხერხებით უსწორდებიან ვიეტნამელ პატრიოტებს. საგულისხმოა რომ არცერთი ფოტო არაა ათასზე მეტ ფოტოში, რომ ამერიკელი ხვრეტდეს ან სახრჩოლებასთან იდგეს. თვით ვიეტნამელები საიგონის მარიონეტული ჯარების მებრძოლები სჩადიან საშინელებებს. არის მაგალითად სურათი, როგორ ფატრავენ ნელ-ნელა კაცს მუცელზე. გადაღებულია ათეული რომელსაც თითოს ორ-ორი მოჭრილი თავი უჭირავს ხელებში. ამ მუზეუმმა ცუდ გუნებაზე დამაყენა.

სალამოს და-ნანგის მწერალთა საზოგადოებამ დიდი შეხვედრა გაგვიმართა.

მერე ვახშმად თავის ვილაში მიგვიწვია ვიეტნამის ერთ-ერთმა ყველაზე პოპულარულმა პროზაიკოსმა ფან-ტიმ (ავტორმა რომანისა „მან და მე“ მან ქალის სახელია). თავისუფლად ლაპარაკობდა ჩემგან განსხვავებით ინგლისურ,

ფრანგულ და რუსულ ენებზე.

ხვალ დილით საიგონში (ახლანდელი ჰო ში მინი) მივფრინავთ, თუ ფრენა იქნა.

ვიეტნამისთვის დამახასიათებელი გახლავთ ისიც, რომ აქ უსაქმურს იშვიათად ნააწყდებით. ათასობით კაცი ირევა ქუჩაში და ყველას თავისი საქმე აქვს, ყველა ფუსფუსებს, დიდი თუ პატარა.

## 21 მაისი

საიგონი სამხრეთ-აღმოსავლეთ აზიის მარგალიტი. ევროპელთა და ამერიკელთა დასვენებისა და გართობის ადგილი ჰონკონთან და ბანგკოკთან ერთად. „ახლა თავისუფალი ვიეტნამის“ ყველაზე დიდი ქალაქი 4 მილიონამდე მცხოვრებით.

ევროპული ტიპის ქალაქია. შენობებით და ქუჩებით თუ ვიმსჯელებთ, საკმაოდ მდიდრული. ხალხი მოდაზე ჩაცმული დადის. ქალებიც უფრო კოხტა და ლამაზები არიან. იგრძნობა ურბანიზმის სუნთქვა. სასტუმროდან გაყვავი თავი და მაშინვე დამეხვივნენ ქორ-ვაჭრები: „მსურს თუ არა ნარკოტიკები, ხომ არ გაყიდის ბატონი სიგარეტს, საათს, ფოტოაპარატს.“

მაღაზიები სავსეა.

ველოსიპედი აქაც მეფობს.

შევცქერი ველოსიპედების ზღვას და ვფიქრობ, იქნებ ეს არის დიდი ქალაქების მომავალი? გაიარა მანქანამ და გამონაბოლქვმა ჰაერმა კინალამ დამახრჩო. დაწმენდილმა ფილტვებმა ვერ გაუძლეს სულისშემხუთველ ნაწვავ გაზს. ვიეტნამი ფაქტიურად უმანქანო ქვეყანაა. ველოსიპედი მეფობს ქუჩაზე. იგი აშკარად ავიწროებს მანქანას. იქნებ საერთოდ აიკრძალოს დიდი ქალაქების ცენტრალურ ნაწილში მანქანები და დარჩეს მხოლოდ ველოსიპედი – უხმაურო, უბენზინო, სუფთა ტრანსპორტი?

ველოსიპედის შესახებ ჩემს გულუბრყვილობაზე თვითონვე გამეცინა, როცა წარმოვიდგინე ველოსიპედზე ამხედრებული რამდენიმე ჩვენი ფრიად პატივცემული ნაცნობი – ვთქვათ, მჭავანაძე ან შევარდნაძე.

დავათვალიერეთ საიგონის მსოფლიოში განთქმული უზარმაზარი ბაზარი. ჩიტის რძეს იშოვი, რომ იტყვიან. იაპონური, ამერიკული, ინგლისური ნანარმი, კონტრაბანდისტებს შემოაქვთო ტაივანიდან – აგვისსნა გიღმა. ჩვენი გიდი არის ცნობილი საიგონელი მწერალი ზა – ი.

## 22 მაისი

„დღეები რბიან ვით კამათელი...“

საიგონში ვართ („ჰო ში მინი“).

დილით ზოოპარკი დავათვალიერეთ. სამხრეთული ცხოველებით მდიდარი მუზეუმი. სხვადასხვა ჯიშის სპილოები, სირაქლეები, ჟირაფი, ზებრა, მაიმუნები. დამაინტერესა სახლების აგების წესმა: სედანგის ტომის სახლი მაღალ სვეტებზე დგას, უეს ტომისა მინაზეა დაგებული მაგრამ კედლები აქვს, ხოლო კანოს სახლი მხოლოდ ისლის სახურავია კედლები არა აქვს. 1600 წლის ბუდას ხის ქანდაკება, 3000 წლის ბრინჯაოს ბარაბანი, ჩამპას ქანდაკებები აქაც არის.

დავათვალიერეთ კაუჩუკის პლანტაციები. ვიეტნამში ბენზინი არ იშოვება და მოტოციკლებს ნავთით ამუშავებენ, სულისშემხუთველი კვამლი დგას ირგვლივ. ან ბენზინი უნდა გაახერხონ ან ნავთის ჩასხმა უნდა აკრძალონ მოტოციკლეტში. ეს საშინელებაა.

საღამოს საიგონის მწერალთა ასოციაციამ დიდი შეხვედრა გაგვიმართა, სიტყვა ვთქვი და „ვეფხისტყაოსანი“ ვუსახსოვრე მწერალთა გაერთიანების თავმჯდომარეს, ნიჭიერ პროზაიკოსს ვუ ხანს.



ურთიერთობის გარკვევა სპილოსთან.

საპასუხო სიტყვით მოგვმართა საიგონის მწერალთა გაერთიანების პირველმა მდივანმა ნგუენ ხუნ შონმა.

მერე სპეციალურად ჩვენთვის კონცერტი გამართეს. ჯაზური მუსიკის კონცერტი კარგად ჩატარდა. საიგონის ცნობილი მომღერლები მღეროდნენ.

## 23 მაისი

საიგონიდან ასოცი კილომეტრის დაშორებით არის მწერალთა შემოქმედებითი სახლი. ბანგ ვიეტმა დილიდანვე გვაცნობა; ამ შემოქმედებით სახლში შეხვედრა გვექნებაო.

გავემგზავრეთ.

მაგიდას ჩვენ, საიგონის მწერალთა კავშირის წარმომადგენლები, ვიეტნამის მწერალთა კავშირის მდივანი – ნგუენ ნგოკი და ორმოციოდე ახალგაზრდა შემოვუსხედით.

ახალგაზრდა მწერალთა ორთვიანი შემოქმედებითი ბანა-

კი ერთ კვირაში დაიხურება – დაიწყო ნგუენ ნგოკმა – ამ ორი თვის განმავლობაში ჩვენმა ახალგაზრდებმა ყოჩაღად იმუშავეს. დაიწერა 4 რომანი, 30 მოთხრობა და 600-მდე ლექსი ოცი ახალგაზრდა მწერლის მიერ. ყურებს არ დაფუჯერე და როცა ციფრები კვლავ გამიმეორა, – როგორ აქ კოლექტიური ლიტერატურული მუშაობა მიდის მეთქი? – ვიკითხე.

თითქმის კოლექტიურიო. ყოველ დღე ახალგაზრდა მწერალი წაიკითხავს, თუ რა დაწერა მან წუხელო, მერე მიდის დისკუსია, ვუსწორებთ, ვეხმარებით, ახლებურ გაგრძელებას ვთავაზობთ და ისიც გამხნეებული ბრუნდება თავის ოთახში. რამდენიმე ახალგაზრდა პროზაიკოსმა მიაღწია იმას, რომ დღეში 20 გვერდამდე ადისო! – გვაუწყა მან და „რეკორდსმენი“ ახალგაზრდა მწერლების გვარები დაგვისახელა.

მე ვეცადე ამეხსნა, რომ მწერლობა ინდივიდუალური საქმეა, კოლექტივიზმის პრინციპს მაინცდამაინც არ ემორჩილება. ნურც გვერდების რაოდენობას გამოედევნებით მეთქი, მაგრამ ვინ დაგიჯერა, თავს ყასიდად მიქნევდნენ და ილიმებოდნენ.

აი, თქვენ, მაგალითად, რაზე წერთ მეთქი ვკითხე პოეტ გოგონას: დაიბნა, მიიხედ-მოიხედა და თავანვეით მიპასუხა: ახალ რეჟიმზეო. ძველზე რატომ აღარ წერთ მეთქი. უმწეოდ შეხედა თავის მეგობრებს. ძველზეც წერს, მაგრამ როგორც წყეულ მოგონებაზეო, სიტყვა შეაშველა ვილაცამ.

ასეა საქმე. ასეთი დონეა ახლა ვიეტნამურ მწერლობაში.

სალამოს საიგონის ჩინურ თეატრში წამათრია ბორისმა. ვყოყმანობდი. ჩინური მე არ მესმის და რა გავაკეთო მეთქი, მაგრამ არ მომეშვა: საიგონის მარიონეტული მთავრობის დამხობის მერე, 5 წელიწადს დახურეს ეს თეატრი, ერთი წელია გახსნეს და საინტერესოა რა ხდებაო.

სამი მთარგმნელი მომისვეს გვერდით. სპექტაკლი ძველ ჩინურ ენაზე მიდიოდა. ძველი ჩინურიდან ერთი ახალ ჩინურ ენაზე თარგმნიდა, მეორე ახალი ჩინურიდან ვიეტნამურზე, ხოლო ვიეტნამელი ბანგ ვიეტი რუსულად მითარგმნიდა.

პიესა მე-12 საუკუნის რალაც სისულელე იყო, ვოდევილის და მუსკომედიის ნაჯვარი, დონე სპექტაკლისა ცუდი დრამწრის დონეს არ ცილდებოდა, მაგრამ მთავარი და დამაფიქრებელი ის გახლდათ, რომ თეატრში 1000 კაცი ეტევა, სპექტაკლს კი 2000-ზე მეტი ესწრებოდა. ფანატიზმი? ეროვნული გრძნობა? ახლადგახსნილ თეატრის მხარდაჭერის სურვილი? ალბათ, სამივე ერთად.

დედებს ორი თვის ბავშვები ჰყავდათ წამოყვანილი. ერთი ღრიანცელი იდგა თეატრში. ზოგს ეძინა, ზოგი ბავშვს ძუძუს აწოვებდა, ზოგი ხმამაღლა კამათობდა. სპექტაკლს ალბათ, 5% თუ უსმენდა, მაგრამ მაინც იყვნენ ბოლომდე, როგორც დღესასწაულზე.

ეს უბრალო ამბავი არ გახლავთ.

ჩინურ დრაკონს არ სძინავს.

თუ ეს ენერგია სამშვიდობო წისქვილზე არ მიუშვეს, ქვეყანას ნალეკავს.

უკან წამოსვლისას, დაახლოებით 12 საათი იყო (სპექტაკლი დაიწყო 7:30-ზე და დამთავრდა 12-ზე, 4 საათნახევარი გრძელდებოდა წარმოდგენა) ველოსიპედების წარღვნაში მოვყევით თურმე ქალაქი აქ 11 საათის შემდეგ (ცოტა გრილა) ცოცხლდება. ქალაქში, (საერთოდ ვიეტნამში) თითქმის არ არის შუქნიშანი და მოძრაობა არ წესრიგდება. ველოსიპედების ულვევი ზღვა გზაჯვარედინზე ერთმანეთს ჩაეხვია და ზუსტად ორი საათი ვიდევით. მანქანა კი არა თავი ვერ გაძვრებოდა.



დილით საიგონის ნარკომანთა გადასამზადებელ კოლონიას ვენვიეთ. დირექტორის მოადგილემ თავის კაბინეტში ლამაზად გვიამბო იმის შესახებ, თუ რა დიდი აღმზრდელობითი მუშაობა ტარდება ნარკომანებთან და რა მაღალ დონეზეა მათი სამედიცინო სამსახური.



ვიეტნამი. გიგანტური პალმები

ერთი წლის განმავლობაში მეძავებს, ნარკომანებს და ქურდ-ხულიგნებს შრომის მოწინავეებად ვაქცევთო, ამაყად განგვიცხადა მან. რალაც დიდხანს გაგვიგრძელდა საუბარი, გავიდეთ, ვნახოთ ადგილზე რაც თქვენ გვიამბეთ მეთქი. შეიშმუნა, მე მგონი ადგილზე ნახვა საჭირო არ არისო. თუ რაიმე შეკითხვები გაქვთ, სიტყვიერად გიპასუხებთო. ჩემი რომ არ დავიშაღე, იძულებული გახდა გამომყოლოდა და სამიოდე კამერა ეჩვენებინა ჩემთვის.

სინამდვილეში არავითარი გადასამზადება იქ არ წარმოებს. ეს გახლავთ ქუჩის ქალებისა და ნარკომან-დავრდომილთა ციხე. ორმოცმეტრიან ოთახში იატაკზე იჯდა სამოცამდე ტუსადი. იქვე მათრახით ხელში სამიოდე „აღმზრდელი“ დადიოდა და აიძულებდნენ ნარკომან-აღსაზრდელებს ემღერათ ჰო ში მინზე და თავისუფალ ვიეტნამზე.

გული ამირია აზიურმა ვირ-ემმაკობამ.

ერთ წელიწადში აღზრდის ვინმე ქუჩის ჩათლახს და გამობრძმედილ ნარკომანს?!

საღამოს მწერალთა სასახლეში დიდი შეხვედრა გაგვიმართეს, ტაშით გრიალში, ნაგვიკითხეს საიგონის კომუნისტური პარტიის „ქალაქის კომიტეტისა და საქალაქო საბჭოს“ გადანყვეტილება იმის შესახებ რომ არჩეული ვართ საიგონის საპატიო მოქალაქეებად და დაგვირიგეს სათანადო მედლები. ჩემთვის მოულოდნელი და სასიამოვნო იყო ასეთი პატივი.

საიგონიდან ჰანოიში დავბრუნდით.

წვიმა ტროპიკული. თავსხმაში, ღრუბლები ძალიან დაბლა იყო, გაუჭირდა თვითმფრინავს დაჯდომა. ბოლოს რამდენიმე ცდის შემდეგ დაჯდა. გადავრჩით.

შიშის გრძნობა არა მაქვს. ერთხელ დაბადებული ერთხელ კვდება.

მთელი დღე თავისუფალი გვაქვს.

ჰანოის ქუჩებში ფოტოაპარატით დავხეტილობთ.

ველოსიპედების სახელოსნო აქ ყოველ ნაბიჯზეა. თხუთმეტ წუთში ახალ ველოსიპედს აგინებენ თუშ ძველის პასპორტი გაქვს. გამახსენდა, ილფის და პეტროვის „ყველანაირი კონტრაბანდული საქონელი ოდესაში მზადდება“.

რა სიღარიბე და რა სიძვირეა საიგონთან შედარებით. ბუნებრივიცაა...

დამახვედრეს ვიეტნამის ლიტერატურული გაზეთი, 21 მაისის ნომერში ჩემი მოთხრობა „დავითი“ და სურათი დაუბეჭდავთ.

## 26 მაისი

დიდი შეხვედრა გვქონდა ჰანოის პედაგოგიურ ინსტიტუტში.

რიფტინმა თანამედროვე ჩინურ ლიტერატურაზე და ლიტერატურის ტიპოლოგიაზე ილაპარაკა.

მე – თანამედროვე ქართულ მწერლობაზე და ვიეტნამში ჩემი ჩამოსვლის მიზანზე.

მკითხეს, რა შთაბეჭდილებისა ვარ. დიდი ყურადღებით გვისმენდნენ, ტაშით არაერთხელ შეგვანწყვეტინეს.

სალამოს შვიდ საათზე მწერალთა კავშირმა ბანკეტი მოგვიწყო.

ჩვენი დელეგაციის სახელით მადლობა გადავიხადეთ გულწრფელი, ალალი, კარგი მასპინძლობისთვის!

ხვალ სამ საათზე მოსკოვში მივფრინავთ.

## კეთილი, როგორც ზღაპრის კუ

ამ ერთი კვირის წინათ ვიეტნამიდან ბარათი მივიღე. ცნობილი ვიეტნამელი მწერალი ბანგ ვიეტი მატყობინებს, რომ ჩემი ნოველების თარგმნა დაამთავრა და მთხოვს წინასიტყვაობა გავუგზავნო ვიეტნამური გამოცემისთვის. ასეთი წინათქმა წაფუძღვარე ჩემს ვიეტნამურ წიგნს:

„ძვირფასო ვიეტნამელო მეგობარო, –

ბავშვობისას ჩემს ოთახში ეკიდა ჭილოფზე დახატული ვიეტნამური პეიზაჟი: ლოტოსის ფოთლებით დაფარული ულამაზესი ტბის პირად აღმართული „ყურებიანი“ ხის სახლი. ტბაზე ეული ნავი ჩანდა მზესუმზირასებურქუდიანი ვიეტნამელით.

ამ სურათს შეეზარდა ჩემი ბავშვობა. დედას რომ ვკითხავდი, მიპასუხებდა: არის, შვილო, ცხრა ზღვის გაღმა ასეთი ქვეყანა. იგი სამოთხეს წააგავს. ამ ქვეყანაში მცხოვრებთ თავზე მთვარის მსგავსი ქუდები ახურავთ და ამის გამო სახეზეც მთვარის ნათელი ადგათო.

მერე, როცა გავიზარდე, დიდხანს მესმოდა ხმა საბრძოლო ყიჟინისა, რითაც თავისუფლებისმოსურნე ვიეტნამელი მთელს მსოფლიოს წვდებოდა.

ბოლოს ვიეტნამი თავად მოვიდა ჩემთან. მოვიდა თბილისში სასწავლებლად ჩამოსული ჭაბუკით. მორცხვად გამიღიმა და ჩემი ოთახის კუთხეში მიჯდა.

განსწავლის წლებში იგი ბევრს მიაშობდა თავის მრავალტანჯულ ქვეყანაზე, ვიეტნამელის სევდიან ქოხში აკიაფებულ იმედზე და გასაოცარი გულწრფელობით ჩემთნა მოჰქონდა ვიეტნამელის თბილი გული და ტროპიკების ცხელი სუნთქვა.

ახლახან დავბრუნდი ვიეტნამიდან და, სიმართლე გითხრათ, უბის წიგნაკში ჩემი ნაჩქარევი ჩანაწერები სრულად როდი მიაშობენ იმ გრძნობაზე, რითაც მე სამუდამოდ დავუკავშირდი თქვენს ქვეყანას.

ვიეტნამი ხომ ისე კეთილია ჩემთვის, როგორც ჩაბრუნებული მახვილის ტბის ბებერი კუ, ისე ბრძენი, როგორც ხუთი სანყისის მთის მღვიმის გუდა, უეცრად რომ აღიმართება მნახველის თვალწინ თავისი დიდებულებით, ისე ძველია, როგორც ჩამპას სწორუპოვარი კულტურა, ისე ლამაზია, როგორც ნითლად განათებული ზაის ხე, ისე უშუალო და მიმდობია, როგორც ვიეტნამელი ქალის ალალი ღიმილი.

მე, ვიეტნამიდან შორს მცხოვრებ ქართველ მწერალს, ამ ბოლო დროს ხშირად მალვიძებს ასეთი სიზმარი: ველოსიპედზე ამხედრებული, განით მხრებდამშვენებული ვიეტნამი ჩემკენ მორბის წვრილი ბორბლების სისინით და მხოლოდ ვიეტნამელისთვის დამახასიათებელი მართონული ნაბიჯით, გავრბივარ შესახვედრად. სულმოუთქმელად ვეხვევი ჩემს ყავისფერ ძმებს და მათს შორის ვდგები.

მეღვიძება. ჩემი ფანჯრიდან თბილისის ბებერი მთებილა მოჩანს. ვიეტნამი კი არც ისე შორსაა, როგორც იგი ჩემი ბავშვობის ლამაზ სიზმრებში ჩანდა.

დიდი პატივია ჩემთვის სამოცმილიონიან ვიეტნამელ მკითხველს წარვუდგე ამ წიგნით.

თუ ოდნავ მაინც გაგრძნობინებს იმას, რაც შიგ ავტორს ღელვითა და მოკრძალებით ჩაუდვია, თავს ბედნიერად ჩავთვლი“.

საბჭოთა მწერალთა დელეგაცია, რომელიც 7 მაისს გაფრინდა მოსკოვიდან ვიეტნამს, მხოლოდ ორი კაცისგანაა შემდგარი. ჩემი თანამგზავრია ცნობილი მოსკოველი მწერალი და მთარგმნელი, ჩემგან განსხვავებით ვიეტნამურის, ჩინურის და რამდენიმე ევროპული ენის ჩინებული მცოდნე ბორის რიფტინი. დელეგაციის ხელმძღვანელის პრობლემა (გაუგებრობა რომ არ მომხდარიყო) მოსკოვში, მწერალთა კავშირის სამდივნოშივე გადაგვინყვიტეს; მორიგეობით დაიხურავთ მონომახის ქუდს თავზე, დლეგამოშვებით უნი-

ნამძღვრებთ დელეგაციასო, გვირჩია მწერალთა კავშირის მდივანმა, უცხოეთთან ურთიერთობის განყოფილების ხელმძღვანელმა, ჟურნალ „ინოსტრანაია ლიტერატურას“ რედაქტორმა ნიკოლოზ ფედორენკომ და ამ მეთოდმა ბოლომდე გაამართლა, „ძალაუფლების გაყოფაზე“ ჩხუბი არ მოგვსვლია.

ჩემი შეხვედრა ვიეტნამთან ცოტა უცნაურად დაიწყო. ის იყო თორმეტსაათიანი ფრენის შემდეგ თვითმფრინავმა ბომბიდან ჰანოისაკენ აიღო კურსი და ნუთით ჩამთვლიმა, რომ თავზე პლასტიკის სქელი ფირფიტა დამეცა და ზეზე წამომავლო. გაბრაზება ვერც კი მოვასწარი, თავს დამდგომია შეძრწუნებული ვიეტნამელი და გულთან შეტყუებული ხელის მტევნების მიტანით ბოდიშს მიხდის: თაროზე პიჯაკის შედება მინდოდა და ფირფიტა შემთხვევით ჩამომივარდაო.

არა უშავს-მეთქი, დავამშვიდე, ჯიბიდან ხუთკაპიკიანი დავაძრე და კოპზე დავიდე. მალე ვიეტნამელმა ისევ მომაკითხა, ძლივს ჩათვლემილი ფრთხილად გამაღვიძა და ვარსკვლავ-მალამო გამომიწოდა, შუბლზე წაისვი, ტკივილს გაგიყუჩებსო. აღარ მტკიოდა, მაგრამ არ გავანბილე, ნამდაუნუმ მაკითხავს ჩემი ვიეტნამელი, მხარზე მოკრძალებით მეხება და სანყლად მიღიმის – როგორა ხარო, მეკითხება. ნუ სწუხართ, კარგად ვარ, კოპიც უკვე დამიცხრა-მეთქი, ვუმტკიცებ, მაგრამ, როგორც ჩანს, ვერა და ვერ დავაჯერე. ადგება, თვითმფრინავის სალონში გაივლ-გამოივლის, ხელებს მხრებზე შეციებულივით ისვამს, უეცრად, თითქოს რალაც გაახსენდაო, ჩემკენ გამოიქცევა და ბოდიშს მიხდის. ალბათ, ძალიან გტკივავთ, ეს რა ჩავიდინეო. თქვენ რა შუაში ხართ, ვინც ფირფიტა ზევით შემოდო, მისი ბრალია-მეთქი, ახლა იქეთ დაფუნყე ფერება. ბოლოს, ბოდიშებით ძალიან რომ შემანუხა, გვერდით დავისვი და გულიანი მუსაიფი გავაბით. კინო-რეჟისორი ბუი დინ ჰაკი აღმოჩნდა.



ავტორი არაერთგზის პრემირებული ფილმებისა „ნგუენ ვან ჯოი“ და „გზა დედისაკენ მიდის“. ახლა ხო ში მინის ცხოვრებაზე ექვსსერიან ფილმს იღებს. თვითმფრინავი ჰანოის აეროდრომზე რომ ეშვებოდა, ჩემი თანამგზავრის წყალობით ბევრი რამ ისეთი ვიცოდი თანამედროვე ვიეტნამის კულტურულ ცხოვრებაზე, რასაც ენციკლოპედიებში ვერ წააწყდები და ვერც ტურისტულ ცნობარებში ამოიკითხავ.

ჰანოის აეროპორტი ბომბების ფემენებლური საერთაშორისო აეროპორტის შემდეგ ვერაფრით გაგაკვირვებთ. მესტიის აეროპორტზე ცოტა უკეთესია. კონდეციონერით განებივრებულემა სალონიდან რომ გამოვყავით თავი, უდაბნომ სახეში შემოგვასუნთქა და ორმოცდაოთხგრადაუსიანმა სიცხემ ისე წაგვიჭირა ყელში ხელი, რომ სული ვერ მოვითქვით, კოსტიუმს და ჰალსტუხს მაშინვე გამოვემშვიდობეთ, თეთრი შარვალ-პერანგით შევიმოსეთ და ფეხზე მოსკოვში შექმნილი ვიეტნამური ქოშები რომ მოვირგეთ, საბაჟოს მოხელეებმა საექვოდ აგვხედ-დაგვხედეს. ვიეტნამში ტანსაცმლის მოდა არ არსებობს. ქალიცა და კაციც ერთნაირადაა შემოსილი ფრიალა შარვალი და ზემოდან გადმოშვებული სარაფანა პერანგი აცვიათ. სიცხე თავის მკაცრ კანონს სთავაზობს ადამიანებს და ამ ქვეყანაში ოდითგანვე მოხსნილია უზარმაზარი პრობლემა – მოდურად გეცვას. აქედან გამომდინარე, ვიეტნამელის გონებაში არასოდეს გაკრთება ჩაცმულობით თავის მოწონების, კოპნიაობის, ან მდიდრული ტალავარით კაცის დაფასების მემჩანური პრინციპი.

ჩვენი თანამგზავრები გაუჩინარდნენ, ეკიპაჟმა თავისი გზა მოძებნა, აეროპორტი თითქმის დაცარიელდა. ჩვენი დამხვდურნი კი არადა არ ჩანან. სასონარკვეთილებამ შეგვიპყრო. ვიეტნამში ტაქსი საერთოდ არ არსებობს. ერთადერთ ავტობუსთან კი იმდენი ხალხი ირევა, რომ ჩაჯდომას

უახლოეს ოთხ საათში ვერ მოვახერხებთ. არა და, აეროპორტიდან ქალაქამდე ორმოცი კილომეტრია. ის იყო იმედის დაფი გვინყდებოდა, რომ ორი ვიეტნამელი მოგვიახლოვდა და ღიმილით დაგვიკრეს თავი – მწერლები ხომ არა ხართო. ესენი ამ ერთი საათის წინაც რამდენჯერმე შევნიშნე, მაგრამ კადნიერებად ჩავთვალე მეკითხა – ჩვენ ხომ არ გვხვდებით-მეთქი. მერე, როცა მანქანაში ჩავსხედით და ჰანოისკენ ვქენით პირი, მასპინძელ მწერალს ვკითხე, ორი საათის ჩამოსულები ვართ, ალბათ აეროპორტში მოსვლა დაგავიანდათ-მეთქი. არაო, დროზე მოვედით, მაგრამ თქვენ ისეთი სერიოზული სახეებით ჩამოხვედით ტრაპიდან, რომ შორიახლოს დაგყვებოდით და შეკითხვა ვერ გაგიბედეთო. ბოლოს, ყველამ რომ თავისი სტუმარი დაირიგა და მარტო თქვენ დარჩით ორი ობოლივით, დავასკვნით, რომ მწერლები სწორედ თქვენ უნდა ყოფილიყავითო.

ამის შემდეგ, მე მგონი, აღარც კია საჭირო იმის მტკიცება, რომ ვიეტნამელები უაღრესად ყურადღებიანი და მოკრძალებული ხალხია. ურწმუნო თომასთვის კი კიდევ ერთ მაგალითს გავიხსენებ.

სანამ ქალაქში ჩავიდოდით, ჩვენი მანქანა შეჩერებულ კოლონას მიუახლოვდა და დადგა. სიცხეში გაჩერებულ მანქანაში ჯდომა ღმერთმა ნუ გამოგაცდევინოთ. დიდხანს ველით, მაგრამ კოლონა არ იძვრის, ოფლად ვიღვრებით. მანქანიდან გადაველ და თეთრ ზურგებს მივუახლოვდი, ვნახავ, რა ხდება, ალბათ ავარიაა-მეთქი. თქვენც არ მომიკვდეთ, მგზავრებით გაჭედილი ავტობუსი დგას. მძლოლი კი მოწყენილი სახით გზას გაჰყურებს. რატომ არ იძვრი-მეთქი, როგორც იქნა გავაგებინე ინგლისურად. ამ ერთი საათის წინ რუსების მანქანამ ჩამოიარა, ხელი დამიქნია და გამაჩერაო. ახლა რას აპირებ-მეთქი, არ ვიციო, დაქოქე მანქანა და წადი-მეთქი, რამდენადაც შემეძლო დამაჯერებლად ვთხოვე.

ეჭვით შემომხედა და თავი გააქნია. პასპორტი რომ დავაძვრე და ვუჩვენე, დარწმუნდა, რომ საბჭოთა კავშირიდან ვიყავი, თეთრი კბილები შემომანათა და გასაღებს მისწვდა. ვინ იცის, იქნებ რომელიმე საბჭოთა უწყების წარმომადგენელმა ხელი მისაღმების ნიშნად დაუქნია, გულისხმიერმა ვიეტნამელმა კი შეჩერების ნიშნად მიიღო. მანქანაში რომ დავბრუნდი და იქ მყოფთ ვაცნობე, მე რომ არა, კარგა ხანს მოგიწევდათ აქ ყოფნა-მეთქი, არ დამიჯერეს.

ჩვენს სასტუმროს „თონგლოი“ („გამარჯვება“) ჰქვია. „თონგლოი“ თითქმის წყალში დგას, სამი მხრიდან გზა აკრავს, სანამ დავბინავდებოდით, ყურადღება მივაქციე თოფიან დარაჯებს, ისინი ყოველ ათ მეტრში დგანან და წყალს ჩაჰყურებენ. რას დარაჯობთ-მეთქი, წყლიდან გველი რომ არ ამოძვრეს და სასტუმროს აივანზე არ ახობდესო.

ნომერში, მაგიდაზე, დიდი ასოებით დაბეჭდილი, გამაფრთხილებელი წარწერებია: „ონკანის წყალი არ დალიოთ“, „აივნის კარები და ფანჯრები არ გააღოთ“.

პირველ ღამეს თვალი არ მომიხუჭავს. ოდნავი გაფაჩუნებისთანავე წამოვხტებოდი, სინათლეს ავანთებდი და სანოლქვეშ პრეისტორიულ ცხოველს (ან უკეთეს შემთხვევაში თავს) დავეძებდი.

ყველაფერს ერვევა კაცი. რამდენიმე დღის შემდეგ ისე კარგად მეძინა, რომ ფანჯრის კონდიციონერის უსიამოფართოხუნი ხელს აღარ მიშლიდა და ალიონზე ხელანევით ვესაღმებოდი ჩემი სანოლის თავთან ჭერზე მოსეირნე ხვლიკებს.

ერთ დღით ტბას რომ გავხედე, მომეჩვენა, თითქოს წყალზე გუშინ ამდენი მწვანე ველი არ იყო. თურმე ლოტოსის ფარდაგებს მეთევზეები საღამოობით გამოაცურებენ და ქვეშ ანკესებს უგებენ. თევზი ღამე ლოტოსის ქვეშ იბუდებს და ანკესს ადვილად მოჰყვება. თითქოს მზეს ამოჰყვინო

გობისოდენა ნავებზე მსხდომი მეთევზეები; ხელში ნიჩბების ნაცვლად ხის ჯამები უჭირავთ და გასაოცრად სწრაფად მიინევენ ლოტოსის ველისაკენ. მიახლოებისთანავე იხვივით ჩაყვინთავენ, დიდხანს ფათურობენ წყალში და ნადავლს გობში ჰყრიან.

ვიეტნამის მწერალთა კავშირის პირველმა მდივანმა ნგუენ ნგოკმა ფრიად გაიხარა. როცა ჩემი ქართველობა შეიტყო. ქართველ მწერალს ჩვენს ქვეყანაში პირველად ვხვდებო. ამ ათიოდე წლის წინათ გახლდით საქართველოში. დიდებული, სტუმართმოყვარე ქვეყანააო. წელში გავიმართე და ბორის რიფტინს ამაყად გადავხედე, მაგრამ რაც მასპინძელმა ამ სიტყვებს მოაყოლა, აღტაცების საბაბს ცოტას იძლეოდა. რა კარგი სასტუმროები გაქვთ თბილისშიო, სევდიანი ღიმილით დააყოლა ნგუენ ნგოკმა. რომელ სასტუმროში ცხოვრობდით-მეთქი. ჩემმა თავაზიანმა მასპინძლებმა თბილისში ჩამოსვლის დღესვე ყველა სასტუმრო შემომატარეს, მაგრამ თავისუფალი ადგილი არც ერთში არ აღმოჩნდა და ბოლოს ერთმა ღვთიანმადლიანმა პოეტმა (გვარი არ ახსოვდა) თავის სახლში წამიყვანაო. მოგონებათა საათი შეგნებულად ჩავშალე, ჩვენი დელეგაციის სახელით ვიეტნამელ მწერლებს მივესალმე, სათანადო წარწერით „ვეფხისტყაოსანი“ ვუსახსოვრე და ყველანი გულწრფელად დავპატიჟე საქართველოში.

მერე მასპინძლებმა ვიეტნამში ჩვენი მოგზაურობის პროგრამა გაგვაცნეს. ბორის რიფტონს ძველი ვიეტნამური ხელნაწერების გაცნობა და სამხრეთის ორიოდე უძველესი ქალაქის ნახვა სურდა, ამიტომაც პროგრამაში ცვლილების შეტანა მოითხოვა. მასპინძლებმა ჩემი თანამგზავრის სურვილები ღიმილით მოისმინეს, თავი არაერთხელ დაუკრეს, მიზანი მოუწონეს და დახმარება აღუთქვეს.

ვიეტნამი ჭეშმარიტად საოცრებების ქვეყანაა. მსოფლი-

ოს ორმოცამდე სხვადასხვა ქვეყანაში ვყოფილვარ, მაგრამ არც საბერძნეთს, იტალიას, აშშ-ს, ეგვიპტეს და თვით ინდოეთსაც ასე არ გავუკვირვებია.

ვიეტნამში მოხუცს იშვიათად ნააყდებით.

მიუხედავად იმისა, რომ თითქმის ყოველი ტაძრის კარებზე წარწერაა: „იცოცხლე სანამ ცა და მიწა არსებობს“, ვიეტნამში სიცოცხლის საშუალო ხანგრძლივობა ორმოცი წელია.

ქუჩაში რომ გამოხვალ, თავი ახლაგაზრდობის გრანდიოზულ ფესტივალზე გეგონება. ველოსიპედი და ახალგაზრდობა მეფობს ვიეტნამში.

რაკი ველოსიპედი ვახსენე, ორიოდე სიტყვას ტრანსპორტზე მოგახსენებთ.

ადრეულ საუკუნეებში, ტრადიციულად, ვიეტნამის ქალაქებში მხედარს არ უშვებდნენ. „ჩამოდი ცხენიდან“ ახლაც არაერთგან ნახავთ დიდი დასახლების ან ქალაქის შესასვლელთან ქვაზე ამოკანრულ იეროგლიფურ წარწერას. ახლაც კი მანქანა იშვიათად თუ გაივლის, იმ უბრალო მიზეზის გამო, რომ ვიეტნამში საკუთარი ატომანქანები არ არსებობს. ტრანსპორტი მხოლოდ სახელმწიფო დანესებულებებს ემსახურება (გამახსენდა მანქანების გამონაბოლქვში დამხრჩვალ თბილისი). მწერალთა კავშირს ერთადერთი მსუბუქი მანქანა აქვს. იგი თავმჯდომარის განკარგულებაშია (ჩვენი იქ ყოფნის განმავლობაში კი ჩვენ დაგვითმეს), მწერალთა კავშირის დანარჩენი ოთხი მდივანი და, რასაკვირველია, სხვა თანამშრომლები სამსახურში ველოსიპედით დადიან. მწერალთა კავშირის ეზოში ველოსიპედების ტყე დგას. როცა ხუთმილიონიან საიგონის ქუჩას გავყურებდი და საბოლოოდ დავრწმუნდი, თუ როგორ მოერია ველოსიპედი ყველა სხვა სახის ტრანსპორტს, ასეთმა ფიქრმა გამიელვა: იქნება ეს არის დიდი ქალაქების მომავალი? იქნებ საერთოდ აიკრძალოს დიდი ქალაქების ცენტრალურ ნაწილში ავტომანქანები და დარჩეს

მხოლოდ ველოსიპედი – უხმაურო, უბენზინო, სუფთა ტრანსპორტი? ამ გულუბრყვილო მოსაზრებაზე მწარედ გამეცინა, როცა წარმოვიდგინე ველოსიპედზე ამხედრებული რამდენიმე ჩვენი ფრიად პატივცემული ნაცნობი. ხუმრობა იქით იყოს და ერთმა ვიეტნამელმა ექიმმა დაბეჯითებით მითხრა, სხვა ფაქტორებთან ერთად ველოსიპედიცაა „დამნაშავე“ იმაში, რომ ჩვენი ქალაქების ქუჩებში მსუქან კაცს ვერ იხილავთ და 60 მილიონიან ქვეყანაში იშვიათზე იშვიათია ჰიპერტონია, ინფარქტი და დიაბეტიო.

ქალაქებში კერძო სატელეფონო სამსახურიც არ არსებობს. ტელეფონი დგას მხოლოდ სახელმწიფო დანესებულებებში. ჩემ ნაცნობ ექიმს არ უთქვამს, რომ ეს ვიეტნამელთა ნერვების გადასარჩენად კეთდება. უბრალოდ ვიეტნამი განვითარებადი ქვეყანაა და ცივილიზაციის ყველა სიკეთე ჯერ კიდევ წინ, სოციალიზმის მშენებლობის სხვადასხვა ეტაპზე ელოდება.

ვიეტნამელს ბარგი, ძირითადად, ჯოხზე დაკიდებული ჭილოფის ქილებით მიაქვს. მხარზე განიგან გადაკიდებულ ამ ხურჯინს „განი“ ჰქვია.

უნდა ნახოთ, რაოდენ თავისებურია განგადაკიდებული ვიეტნამელის სიარული. იგი ყუნცულით, დაახლოებით სპორტული სიარულის მსგავსად, თეძოების რხევით მიდის. ასე ინარჩუნებს წონასწორობასაც და, როგორც ამბობს, ტვირთიც უმსუბუქდება.

ვიეტნამელები უაღრესად თავაზიანი ხალხია. თვალს რომ შეავლებ, თავი მოვალედ მიაჩნია, გაგიღიმოს, ხოლო შენც თუ გაულიმე, მოვა და მადლობის ნიშნად წელში რამდენჯერმე მოიხრება. ვიეტნამელის თავაზიანობა იქამდე მიდის, რომ ისინი თითქმის არ იგინებიანო, მითხრეს. „მომწყდი თავიდან“ ვიეტნამელის ლექსიკონში ყველაზე საგინებელ ფრაზად ითვლებაო, სერიოზულად ამიხსნა ბორის რიფტინმა.

ჰანოიში ხო ში მინის მავზოლეუმი და სახლ-მუზეუმი და-



ვათვალისწინებ. ღარიბულად, უბრალოდ ცხოვრობდა თურმე ვიეტნამელი ხალხის ბელადი. პრეზიდენტობის თხუთმეტი წლის განმავლობაში მხოლოდ სამი კიტელი გაცვითაო. ორ ხელ ტანსაცმელზე მეტი არასდროს ჰქონიაო. თვეში ხელფასს იმდენივეს იღებდა, რამდენსაც საშუალო კვალიფიკაციის ვიეტნამელი მუშა – ორას დონგს (ოც მანეთს).

თითქმის ერთი თვე დავყავით ვიეტნამში, დავაბიჯებდით დიდი ქალაქების (ჰანოის, დანანგის, ხო-ში-მინის, ჰუეს) ქუჩებში და მივარდნილ სოფელთა სანახებიც დავლაშქრეთ. ამ ქვეყნის დიდ სახელმწიფო მოხელეთა კაბინეტებშიც მოგვიხდა ყოფნა და უბრალო ვიეტნამელის ქოხშიც გახლდით. სიტყვებითა და მისალმებებით გამოვდიოდით მიკროფონიან მიტინგებზე და მცირე აულის მცხოვრებთაც ვუამბობდით საბჭოთა ლიტერატურაზე, ჩვენს პროფესიაზე, ჩვენს სახვალთა ფიქრებსა და იმედებზე. განსაკუთრებით დამამახსოვრდა შეხვედრები ჰანოის უნივერსიტეტისა და პედაგოგიური ინსტიტუტების სტუდენტებთან, ჰუესა და დანანგის მშრომელებთან, საიგონის ლიტერატურისა და კულტურის ასოციაციის წევრებთან, საიგონის ყოფილ ნარკომანთა და მეძავთა ხელახალი აღზრდის კოლონიაში და სხვ.

ვიეტნამში ამჟამად შენდება მსოფლიოს ერთ-ერთი უდიდესი ელექტროსადგური – „ჰობინი“ („მშვიდობა“). ეს იქნება საბჭოთა კავშირის დიდი საჩუქარი ვიეტნამელი მშრომელებისათვის. ელსადგური თითქმის მთლიანად ჩვენი ძალებითა და სახსრებით შენდება. არა მარტო საბჭოთა სპეციალისტები ფუსფუსებენ მშენებლობაზე – არამედ მანქანებიცა და ცემენტსაც კი საბჭოთა კავშირიდან ეზიდებიან გემებით, რადგანაც ვიეტნამი თავის ცემენტს არ აწარმოებსო, გვითხრა მშენებლობის მთავარმა ექსპერტმა პავლე ბოგაჩენკომ და „ჰობინის“ პროექტის ერთ-ერთ ავტორთან – ასლან გოგობერიძესთან მოკითხვა დამაბარა.

მალე ქართველთა წრეში აღმოვჩნდი. ვიეტნამის მინაზე სასახლოდ შრომობენ გურამ კვარაცხელია, რევაზ ეფაძე, ანზორ ჩაფიჩაძე, გიორგი კობეშავიძე, ალიკო გოგიშვილი, ამირან ჯაფარიძე და სხვები.

ვიეტნამში სამასამდე დიალექტზე ლაპარაკობენ და სრულიად განსხვავებული ეთნიკური თვისებების ხალხი ცხოვრობს.

წარმოდგინეთ ტბებით დასერილი ქვეყანა. მთელი ვიეტნამი მეჩეჩებიანი ერთი დიდი ტბა გეგონებათ.

სოფლად ისლის ქოხებში ცხოვრობენ. ქოხები უპირატესად ტბის ნაპირას დგას. ოჯახის წევრები ერთმანეთის გვერდით იძინებენ ლეიბ-საბნის გარეშე, ჭილოფზე.

საერთოდ, ხის ქოშებით დადიან, ქოხში კი სტუმარიც და მასპინძელიც ფეხშიშველი შედის.

სოფლად დღე ალიონის 4 საათზე იწყება. ათზე უკვე ისე ცხელა, რომ მუშაობა თითქმის შეუძლებელია. თორმეტიდან საღამოს ექვს საათამდე თითქმის მთელი ქვეყანა ისვენებს; ან ქოხშია მოკალათებული და ჩაის შეექცევა, ან ქოხის წინ წყალში ზის.

ტბა ვიეტნამელის ბინის ნაწილია. ოჯახი ხანდახან მთელი დღის განმავლობაში წყლიდან არ ამოდის. ბავშვები კი არ თამაშობენ, კი არ ჭყუმპალაობენ წყალში, წყალში ცხოვრობენ სრული ამ სიტყვის მნიშვნელობით.

ტბა აძლევს საზრდოს, აგრილებს ზაფხულის პაპანაქებაში, თუმცა გაგრილებაზე მე ცოტა სხვაგვარი წარმოდგენა მაქვს, რადგანაც ტბის წყლის ტემპერატურა ზოგჯერ ორმოც გრადუსამდე ადის და მეტი რომ არა ვთქვა, წყალტუბოს აბაზანებზე უფრო თბილია.

ღმერთმა შეარგოთ და მიირთმევენ თითქმის ყველაფერს ტბის მიერ ბოძებულს – თევზს, წყალმცენარის ფესვებს, ლოკოკინას, ბაყაყს, ანკარას (ეს ორი უკანასკნელი დე-

ლიკატესად ითვლება და რესტორანში საკმაოდ ძვირი ღირს).

შედლებული ვიეტნამელის სამზარეულო უაღრესად მრავალფეროვანია. ამ ქვეყნის კულინარია ოთხასამდე სხვადასხვა დასახელების კერძს იცნობს. ზოგი კერძის დასამზადებლად ოცდაათამდე სხვადასხვა ნედლეულია საჭირო.

ძროხა და ხარ-კამეჩი კერძო პირებს ცოტა ჰყავთ. კამეჩს თითქმის არ წველიან, ძირითადად გამწევ ძალად გამოიყენება.

შარშანნინ ვიეტნამში დიდი საკოოპერატივო რეფორმა განხორციელდა. მიწები გლეხებს დაურიგეს. გლეხები თავიანთი ცოდნისა და სურვილის მიხედვით უვლიან ყანებს, მოსავლის ერთ მესამედს სახელმწიფოს უსასყიდლოდ აბარებენ. დანარჩენს კი თავით იტოვებენ. ამ ღონისძიებამ, როგორც ამბობენ, გამოაცოცხლა სოფელი და იმედი გვაქვს, რომ მალე დავაღწევთ თავს აგრარულ სიდუხჭირეს, – ამბობს ჩვენი მეგობარი, პოეტი ბანგ ვიეტი.

აქაური გლეხის მძიმე შრომაზე არაერთხელ დანერვილა. მართლაც რომ უაღრესად გამრჯე და მიწაზე თავგადაკლულია ეს პატარა, კაფანდარა ვიეტნამელი. მუხლამდე წყალში სათითაოდ რგავს ბრინჯის ნერგს, მერე ექვსი თვის განმავლობაში წყალს ექაჩება. წყალს ტუმბავენ ათასი საშუალებებით: თიხის ჯამებით, მანუფაქტურული, მამაპაპური ხელის ტუმბოებით, თოკზე გამობმული ვედროებით, ბამბუკის ონინარებით. ყველა პროვინციაში თავისებური მეთოდით ხდება წყლის ტუმბვა.

ეზოებში აქა-იქ ქათამსაც მოჰკრავთ თვალს, ვიეტნამური ქათამი პატარაა და შეფერილობით ციცარს წააგავს.

სოფელს არაჩვეულებრივი, ეგზოტიკური იერი აქვს. ხეები, სახლები, წყალი და, მგონი, ცაც კი მწვანე ფერისაა. ლოტოსისა და ბანანის უზარმაზარი ფოთლები აფარია ყველაფერს.

თვალს გტაცებთ ანანასისა და პაპაის ბუჩქები, ქოქოსის პალმები, ვააის, აგნოლიის, პურის ხის, მანგუსისა და კაუჩუკის მაღალი ხეები.

ეზოს პირას, ყოველ დიდ დასახლებულ პუნქტთან ბაზარია. ვიეტნამურ ბაზარში დახლი არ არის. საქონელი მიწაზე აწყვია, გამყიდველები კი არ სხედან, ჩაცუცქულები არიან, მყიდველიც უნდა ჩაცუცქედეს (თუ გულით მყიდველია, რა თქმა უნდა), გამყიდველებს, ხშირად მყიდველებსაც ხელთ თვითნაკეთი სასწორი უჭირავთ. ასე რომ, ბრინჯი და ბოსტნეული ხშირად ორ სასწორზე იწონება.

ბევრ ოჯახში შეხვედებით სამ მუსიკალურ ინსტრუმენტს: „დან მანს“ – ბამბუკისაგან გაკეთებულ სიმებიან საკრავს. კამეჩია რძის საყვირს და დოლს.

მიონგის მხარეში საშუალება გვქონდა გვენახა ქორწილი და დაკრძალვა. აქ ქორწინების წესი დღემდე ასეთი აქვთ: უმეტეს შემთხვევაში სასიძოსა და საპატარძლოს მშობლები და ნათესავები წყვეტენ ახალი ოჯახის შექმნის საკითხს. აუცილებელი არ არის მომავალმა ცოლ-ქმარმა ერთმანეთი ქორწინებამდე გაიცნონ. იწვევენ 30-40 კაცს, ძირითადად ახლო ნათესავებს. ქორწილში არ მღერიან, არ ცეკვავენ და მაგარ სასმელებს არ მიირთმევენ. ბრინჯსა და მწვანილს შეექცევიან და საუბრობენ იმაზე, თუ ვინ რითი შეენევა ახალ ოჯახს. ზოგი ხის ჯამებს უძღვნის, ზოგი სათევზაო ბადეს, ზოგი ბამბუკის მილებს (ბამბუკი ვიეტნამელისთვის მთავარი სამშენებლო მასალაა. ბამბუკს ხმარობენ დედაბოძად, სახლის გადასახურავად და წყალსადენადაც ბრინჯის ყანებში). ქორწილის სუფრა ვიეტნამელის ჩვეულებრივ სადილზე უფრო ღარიბული უნდა იყოს, რათა ეკონომიკურად არ დააქვეითოს ახალი ოჯახი.

მიცვალებულს ერთ დღეში ასაფლავებენ. ვიეტნამელები მოთქმით არ ტირიან. კაცის ამ ქვეყნიდან წასვლას დოლე-

ბით ამცნობენ სოფელს. ცხედარს მაშინვე გააპატიოსნებენ და მზის ჩასვლამდე დამარხავენ უმეტესწილად თავის მამა-პაპეულ ეზოში.

მიგვიჩვენებს ჰანოის კინოსტუდიაში და გვიჩვენებს თანამედროვე ვიეტნამის კინემატოგრაფის ორი უკეთესი ნაწარმოები: ხაი-ნინის სურათი „მშობლიური მინა“ – 1979 წლის ჩინეთის აგრესიაზე შექმნილი შთამბეჭდავი მხატვრული ფილმი და ჩენ-ფიონგის „უკანასკნელი იმედი“. „უკანასკნელმა იმედმა“, როგორც იქაური სპეციალისტები ვარაუდობენ, ახალი ერა დაიწყო ვიეტნამის კინემატოგრაფიაში. იგი ქვეყნის აქტუალურ პრობლემებს ეხმაურება და კრიტიკული პათოსით გამოირჩევა. ფილმის სიუჟეტი ასეთი გახლავთ: ქარხნის დირექტორი არაშრომითი შემოსავლით ავეჯს შეიძენს. ავეჯი დიდი არაფერია, მაგრამ დირექტორის ყურნალისტი მეუღლე აღმოფთვდება: შენ ამის საშუალება სად გქონდა, როგორც ჩანს, სახელმწიფოს მოჰპარეო. ერთ მშვენიერ დღეს ქარხანას (არ ჩანს, რისი ქარხანაა) რევიზორი ეწვევა. დირექტორი და მისი დამქაშები, როგორც ეს სხვაგანაც არაერთ ქვეყანაშია თითქმის წესად ქცეული, რევიზორს ქრთამს შესთავაზებენ, მაგრამ პრინციპული ახალგაზრდა მავნებლებს ფულს სახეში შეაყრის. დირექტორის ცოლი დიდ დახმარებას უწევს რევიზორს მისი მეუღლის დანაშაულის მხილებაში.

შეხვედრის დასასრულს ჰანოის კინოსტუდიის დირექტორმა ნგუენ-ტჰუამ გვთხოვა, აზრი გამოგვეთქვა ნანახ ფილმებზე და მოგვეთხრო საბჭოთა კინემატოგრაფიაზე. ვილაპარაკე „ქართული ფილმის“ გუშინდელსა და დღევანდელ დღეზე ჩემი შეზღუდული ცოდნის ფარგლებში. მერე, რასაკვირველია, სტუმრის კეთილგანწყობით დადებითი აზრი გამოვთქვი ვიეტნამურ ფილმებზე და ორიოდ შენიშვნაც მოვაყოლე.

დანანგში იქაურ მწერალთა განყოფილების ხელმძღვანელმა, ცნობილმა მწერალმა ფან-ტიმ თვით გვიმეგზურა ჩამპას მსოფლიოს ერთ-ერთ უნიკალურ მუზეუმში. V-XVI საუკუნეებში აქ იყო ძლიერი სახელმწიფო ჩამპა. ამ სახელმწიფოში მცხოვრებ ხალხს – ტაიმს – არაფერი ჰქონდა საერთო ვიეტნამელებთან. XVI საუკუნეში ვიეტნამელებმა დაიპყრეს და გაანადგურეს ტაიმი. ახლა ამ უძველესი ერის უკანასკნელ ნაშთით თითო-ოროლასლა თუ წააწყდებით, სამაგიეროდ, დანანგში არის ჩამპას კულტურის დიდი მუზეუმი, რომელიც მნახველს აოცებს სწორუპოვარი ქანდაკებებით. ქვაში გამოკვეთილი შივები, სპილოები და დრაკონები დიდი ოსტატობითაა შესრულებული.

ყოფილ სატახტო ქალაქ ჰუეში დავათვალიერეთ მეფეთა საძვალენი, აკლდამები და მავზოლეუმები.

ეგვიპტის ფარაონთა მსგავსად, ვიეტნამის ყველა მეფე სიცოცხლეშივე იშენებდა თავის მავზოლეუმს და, რა თქმა უნდა, ცდილობდა მისი უკანასკნელი განსასვენებელი სხვისაზე ლამაზი და გრანდიოზული ყოფილიყო.

დიდხანს ვიდექით მეფე ტი-დიკის სამარხთან. სწორედ მისი მეფობის პერიოდში დაიპყრეს ფრანგებმა ვიეტნამი. შეცდა პოეტი მეფე ტი-დიკი. დაღალა ომებმა და ეგონა, თუ ფრანგებს შევუთანხმდები, ქვეყანას ფიზიკურად გადავარჩენ და ცივილიზაციის გზაზეც შევაცენებო. დადო ხმალი და ფრანგებს ქალაქის ბჭენი განუხვნა. მალე გაირკვა, რომ ევროპის ძლიერი სახელმწიფო ვიეტნამის გასანათლებლად როდი მოსულიყო. ამაში თვით თითქმის ტახტწართმეული, მარიონეტად ქცეული მეფეც დარწმუნდა და აი, იგი, სიკვდილის წინ თვით წერს თავის ეპიტაფიას, შენდობას სთხოვს ვიეტნამელ ხალხს, რომ მან, სწეულებათაგან შენუხებულმა და უსასოომ ვერ შეძლო გამკლავებოდა მოყვრად მოსულ მტერს და ხელყოფისაგან დაეცვა ვიეტნამის წმინდა მინა.



ტი-დიკის საფლავს ჩამპას თეთრ-ყვითელი ყვავილები ამშვენებს.

საიგონში ერთ საღამოს ჩინური თეატრის მთავარი რეჟისორი გვეახლა და თავის სპექტაკლზე დაგვპატიჟა. სამი მთარგმნელი მომისვენს გვერდით. სპექტაკლი ძველჩინურ ენაზე მიდიოდა. ძველი ჩინურიდან ერთი ახალ ჩინურზე თარგმნიდა, მეორე ახალი ჩინურიდან ვიეტნამურზე, ხოლო ბანგ ვიეტი რუსულად მითარგმნიდა.

პიესა მე-12 საუკუნეში გახლდათ დაწერილი, სპექტაკლიც ძველებურ ყაიდაზე დადგმული – ვოდევილისა და მუსკომედიის ნაჯვარი. ძველი ჩინური სპექტაკლების ერთგულებით ახლაც ქალების როლებს მამაკაცი მსახიობები ასრულებდნენ. დონე სპექტაკლისა რაიონის კულტსახლის დონეს არ აღემატებოდა, მაგრამ მთავარი და დამაფიქრებელი ის გახლდათ, რომ თეატრში 1000 კაცი ეტეოდა, სპექტაკლს კი 2000-ზე მეტი ესწრებოდა. რა იყო ეს? ფანატიზმი? ეროვნული გრძნობა? ახალგახსნილი თეატრის მხარდაჭერის სურვილი? ალბათ, სამივე ერთად.

დედებს ორი თვის ბავშვები ჰყავდათ წამოყვანილი. ერთი ღრიანცელი იდგა თეატრში. ზოგს ეძინა, ზოგი ბავშვს ძუძუს ანოვებდა, ზოგი ხმამაღლა კამათობდა. სპექტაკლს, ალბათ, ხუთი პროცენტი თუ უსმენდა, მაგრამ მაინც ბოლომდე იყვნენ, როგორც დღესასწაულზე.

ეს უბრალო ამბავი არ გახლავთ.

შორეულ ვიეტნამში ჩემი ჩასვლის მიზანი ამ უაღრესად საინტერესო ქვეყნის დათვალიერების ტურისტულ მიზანს ბევრად სცილდებოდა. მე ვცდილობდი შეძლებისდაგვარად გავცნობოდი იმ რთულ სოციალურ ფენომენს – ახალი ქვეყნის მშენებელი ვიეტნამელი რომ ჰქვია.

ვცდილობდი ჩამეხედა მის სულში, გამეცნო ფსიქიკა იმ კაცისა, თავისი ანთროპოლოგიური თავისებურებებით და

ცხოვრების წესით ქართველისაგან ბევრი რამით რომ განსხვავდება, მაგრამ ამავე დროს, საოცრად წააგავს ჩვენებურს თავისი მშვიდობისმოყვარული, უწყინარი ბუნებით და გულღიაობით.

გამომშვიდობებისას ხო ში მინის მწერალთა სასახლეში დიდი შეხვედრა გაგვიმართეს და ტაშის გრიალში წაგვიკითხეს კვ საქალაქო კომიტეტისა და საქალაქო საბჭოს გადანყვეტილება საიოგნის საპატიო მოქალაქეებად არჩევის შესახებ და დაგვირიგეს სათანადო მედლები.

ჩემთვის მოულოდნელი და სასიამოვნო იყო ასეთი პატივი.

27 აპრილი

მატარებლით გადავწყვიტე რუმინეთში წასვლა.  
გზას დავათვალიერებ მეთქი და ცოტას დავისვენებ.  
მშვენიერი ვაგონია.

კონდიციონერი მუშაობს. სასიამოვნოდ გრილა. კუპეში,  
ჩემდა იღბლად მარტო ვარ.

გავიცანი რუმინეთის ენერგეტიკული მრეწველობის სამ-  
მართველოს გენერალური დირექტორი მილიკესკუ გიორგე.  
სამოცსმილნეული, ინტელიგენტური შესახედაობის, ენაწყლი-  
ანი კაცი.

ხელში წიგნი უჭირავს. დმიტრუ პოპესკის ახალ რომანს  
„მუშტი და ხელისგულს“ ვკითხულობო. რომანი სტალინის  
პერიოდის პარტიულ მუშაკთა ცხოვრებას შეეხებაო. რა ჩინის  
პარტიული მუშაკებისას მეთქი, ვკითხე, უმაღლესი რანგის –  
ცეკას მდივნებისასო. ესე იგი დოკუმენტურია მეთქი? ნახ-  
ევრადო. სტალინი თუა გამოყვანილი მოქმედ პირად მეთქი.  
კიო. ეპიზოდებშიო. როგორ უცქერის მეთქი რომანის ავტო-  
რი სტალინის პიროვნებას? ფრიად არასიმპათიურადო.

ვისაუბრეთ პოლიტიკაზე, ეკონომიკაზე, ლიტერატურაზე...  
გიორგი ამბობს, რომ რუმინეთის მთავრობა პოლიტიკა-  
ში ენერგიულად ეძებს ახალ გზებსა და საშუალებებს. ახალ  
ურთიერთობებს სახელმწიფოებთან. გაზეთებში უკვე აღარ  
არისო რადიკალური, მყვირალა, ზოგადი საუბრები. სისტე-  
მათა დაპირისპირება და მსოფლიოსგან გამოყოფის ცდები.  
ხალხი კი თვლის, რომ სოციალისტური ბანაკი სხვა გზით  
წავიდა და თუ დროზე არ გამოვფხიზლდით, შეიძლება ჩიხში  
მოვექცეთო.

რაც შეეხება ეკონომიკას, გიორგი ამბობს, რომ რუმინეთს  
ამ ბოლო ხუთი წლის მანძილზე საგრძნობლად გაუჭირდა  
სოფლის მეურნეობაში პროდუქტების საკითხში. ბევრ ვალს  
ვიღებთ ყოველწლიურად დასავლეთიდან და არ ვიცით, რო-  
გორ გადავიხდითო. ვცდილობთ ვაჭრობა გავაფართოვოთ და  
ფაბრიკა-ქარხნების ნაწარმი მსოფლიო სტანდარტებს დავუ-  
კავშიროთო. ბევრი მოძველებული ნაწარმი ჩაგვიწვა. უგეგ-  
მობა და ხალხის მოთხოვნილების გაუთვალისწინებლობაა  
ჩვენი წარმოების მთავარი ნაკლიო.

რუმინეთს ბევრი ნავთობის საბადო აქვს, მაგრამ ნავთს  
ახლა საბჭოთა კავშირიდან ვყიდულობთ, საკუთარ საბადოე-  
ბს კი აკონსერვებ ჩვენი ხელმძღვანელობაო.

ჩაუშესკუ კეთილი კაცია. დაჭერებს და რეპრესიებს არ  
მიმართავსო, მატყუებს დიპლომატიურად.

დავუსახელე ნაცნობი მწერლები და ისინიც, ვინც თბილის-  
ში გამოვეცით (ათიოდე წიგნი თან მიმაქვს), არცერთი მათ-  
განი არ გამიგონიაო. სამაგიეროდ აქეთ „გამანათლა“, დღეს  
რუმინეთში ყველაზე კარგი პოეტებია: ნიკიდა სტანესკუ და  
ანდრიან პაუნესკუო, ხოლო პროზაიკოსები: ევჯენ ბარბუ და  
ფრაჩის მუნტიანუო.

მატარებელი კი მიქრის ტრამალებზე...

რუსული ულამაზესი „ხატები“.

არყის ტყეები...

აყვავებული ვაშლის ხეები და კოპნია ეზოები.

გავიარეთ კიევი, ვინიცა, კიშინიოვი. მოლდავეთი მშვენი-  
ერი ქვეყანაა. ახლადაბიბინებული ჯეჯილი მწვანე ხავერდში  
ახვევს ყველაფერს.

ხვალ დილით რუმინეთში ვიქნებით.

რუმინეთში სვამენ ხილის არაყს. ცუიკა ჰქვია მსხლის,  
ბლის არაყს. ქლიავისას – „სლივოვიცა“, უყვართ ღვინოც.

უნგრეთის სოფლის მეურნეობა – ძირითადად კოოპერი-

რების ხარჯზე – ჩამოურიგეს ღორები, აძლევენ საკვებს. ნლის ბოლოს ერთს უფასოდ აბარებენ.

რუმინეთში არის მანქანა „ტაჩია“ ფრანგული „რუნოს“ ფირმა.

ბენზინი დიდი პრობლემაა. მთელი კვირაობით ელოდებიან.

რუმინელები პირველ მაისს პარადს არ აწყობენ. ისინი თვლიან, რომ ამ დღეს ხალხმა უნდა დაისვენოს. ზეიმობენ წინ დღით, აწყობენ მიტინგებს დანესებულებებში. პარადზე კი დროს და სახსრებს არ ხარჯავენ.

მწერლობა პოპულარულია, მაგრამ არ კითხულობენ პროპაგანდისტულ დემაგოგიურ ლიტერატურას.

მოლდავეთის შესახებ გიორგი ამბობს, – ასეთი რესპუბლიკა გამოგონილიაო, მოლდავეთი რუმინეთის ნაწილია. არავითარი განსხვავება რუმინულსა და მოლდავურს შორის არ არსებობს და მაინც „მოლდავურ ენას“ ეძახიანო. ჰიტლერი რომ მოვიდა, მოლდავეთი დაგვიბრუნა და ტრანსილვანია წაგვართვა, სტალინმა ტრანსილვანია დაგვიბრუნა და მოლდავეთი წაგვართვაო.

რუმინეთი სამი ნაწილისგან შედგება – მოლდავეთი, მონტენია და ტრანსილვანია.

## 28 აპრილი

8-ის ნახევარზე ბუქარესტის დროით, თბილისის დროით კი 10-ის ნახევარზე, ბუქარესტის ძველთაძველ ვაგზალზე შემორიხინდა ჩვენი მატარებელი.

სადგურზე მარტო დარჩენილს ვიღაც ღრმად მოხუცი ქალი მომიახლოვდა და სახეში ჩამაცქერდა. სიღუსა და ბათა ქექიას სცენა რომ გავითამაშეთ, მკითხა: თქვენ მწერალთა კავშირის სტუმარი ხომ არა ბრძანდებითო. თავი რომ და-

ვუქნიე, საზარლად გამიღიმა და, ჩემდა სასიხარულოდ მაუწყა: მე თქვენი გიდი-თარჯიმანი გახლავართ, ალა პეტრუსკუ. აგაშენათ ღმერთმა!

ტაქსით გავემართეთ სასტუმროსაკენ. ბუქარესტი ძალიან ლამაზი ქალაქი ჩანს – არეულია ერთმანეთში ბაროკოს სტილი, გვიანდელი გოთური სტილი და ევროპულ-ამერიკული სტილის სახლები. ძალიან ლამაზი შენობაა ცენტრში – „მეფის სასახლე“ ფრანგული სტილი – ვერსალის ტიპის შენობა. ლამაზია ფილარმონიის შენობა. ჩემი სასტუმრო ცენტრშია – „კაპიტოლი“ ჰქვია.

ჩემმა უკბილო გიდმა სასტუმროში მომანყო და სადღაც გაიქცა.

საშინლად ცხელა.

დავურეკე ზაირა სამხარაძეს. ძალიან გაეხარდა ჩემი ხმის გაგონება. 5 საათზე სასტუმროში დამხვდი მოგაკითხავთ და ბინაზე გვესტუმრეთო, თავაზიანად დამპატიჟა.

მწერალთა კავშირში უცხოეთის განყოფილების რეფერენტმა მიმიღო. ჩანს, „სლივოვიცას“ დასაღევად და მალაზიებში სანაწინალოდ ჩამოსული ვეგონე, მოლდუშული მელაპარაკება – სად უნდა ვისადილო იაფად, მაგარი სასმელი რომ არ უნდა მოვითხოვო და ხელსაყრელ ფასებში რომელ მალაზიებში უნდა ვივაჭრო.

სიტყვა გავანყვეტინე. ჩემი ხუთიოდე წიგნი გავუშალე მაგიდაზე და განვუცხადე, რომ მე პროფესიონალი მწერალი ვარ, ჩამოვედი, რათა უკეთ გავერკვიო რუმინელი კაცის ფსიქიკაში, მათი თანამედროვე სახე შევისწავლო, შევხვდე მწერლებს, მკითხველებს, ვენვიო გამომცემლობებს და ა.შ. შეცბა, ასეთ შეპასუხებას არ ელოდა; მწერალთა კავშირის თავმჯდომარე დმიტრუ პოპესკუ აქ არ ბრძანდება, მე კი უიმისოდ ვერაფერს გეტყვით, პროგრამა მას უნდა შევუთანხმოთო. ცოტა ხნით სადღაც გაუჩინარდა, რომ დაბრუნდა, სულ სხვა კაცი იყო. გამოცვლილი, დამტკბარი. იღიმება,

ბოდიშებს მიხდის, არ ვიცოდით, თუ ასეთ დიდ მწერალთან გვეკონდა საქმეო. სახელდახელოდ შემიდგინა გრაფიკი ჩემი რუმინეთში მოგზაურობის. მწერალთა კავშირის რესტორანში ვისადილეთ და სასტუმროში დავბრუნდი დასასვენებლად.



ბუქარესტი

ხუთ საათზე სასტუმრო ჰოლში ჩავედი. ვიღაც მაღალი, ლამაზი, ახალგაზრდა კაცი მომიახლოვდა და ქართულად მეკითხება: ბატონი მიშველადე ბრძანდებით? – გამარჯობა ანდი, – როგორ მიხვდით რომ ანდი ვარ? მე ხომ სხვას არავის ველოდი, თქვენ როგორღა მიხვდით რომ მე ვარ? – კითხვა შევუბრუნე. – ქართველს მილიონ კაცში გამოვარჩევ – ღიმილით მხვევს მხარზე ხელს და ქუჩაში გამოვდივართ. ანდი ზაირას ქმარია.

ბუქარესტში ტაქსის დაჭერა პრობლემაა, ბენზინი არ იშოვება და საშუალოდ სამ საათში ერთი ტაქსილა თუ გაიქროლებს ქუჩაში! კალჩუ სამხარაძეების ბინა. კარს ზაირა გვიღებს. სიმპათიური ქართველი ქალი. იმერულად უქცევს. მის საუბრის ტონსა და გამოხედვაში რაღაც მაგიური იგრძნობა, მომნუსხველი, მხოლოდ ქართველი ქალისთვის დამახასიათებელი. მთელი ოჯახი ქართულად აულაპარაკებია. თარგმნის ქართულ ნიგნებს, წერს ლექსებსა და ზღაპრებს. მიჩვენა დაბეჭდილები. სადად, ღარიბულად ცხოვრობენ. ყველაფერში ეტყობათ, რომ პატიოსანი, გულწრფელი და ალალი ხალხია. ჩემთვის სპეციალურად მოუწვევიათ ორიოდე მწერალი და ერთი იასელი რედაქტორი ქალი, ელენე. მშვენიერი სადამო იყო. ბევრი ვილაპარაკეთ. ვიცინეთ. მე და ზაირამ ვიმღერეთ გიტარაზეც და ფანდურზეც. სამხარაძის ქალი მშვენივრად უკრავს და მღერის. სევდა მაინც ეტყობა თვალებში. ანდი ნამდაუნუმ თავზე ხელს უსვამს და ეფერება. სუფრაზე გვემსახურებოდა ანდის მამა – 70 წლის მოხუცი კაცი. მან შეწვა ხორცი, თეფშებს გვიცვლიდა, დანა-ჩანგალს გვირიგებდა, ჩემთვის ეს დიდი სიახლე იყო. ანდი და ზაირა ნამდვილი მწიგნობარი ხალხია. ანდომ თითქმის ყველა ენა იცის (მათ შორის ჩინურიც) ნამდვილი პოლიგლოტია. არც ზაირა ჩამორჩება. უკვე დიდებულად ფლობს ესპანურს (კუბის საელჩოში მუშაობს) ფრანგულს, რუმინული ხომ მშობლიურივით იცის. უვლის ანთიმოზ ივერიელისა და ბესიკის საფლავებს. ბესიკისა მხოლოდ



საფლავის ქვაა შემორჩენილი, საფლავი დაკარგულიაო ზაირამ, ქვასაც ამასწინათ სადღაც სარდაფში ძლივს მივაგენიო. იქნებ დასვათ საკითხი და ეს ქვა საქართველოში წაიღოთო.

შუალამისას სასტუმრომდე მიმაცილეს ცოლ-ქმარმა.

ზაირამ მიაბზო, რომ თბილისში ახლა რუმინული იცის მხოლოდ ფანი ჯინჯინაშვილმა – უცხო ენათა ინსტიტუტის თანამშრომელმა ქალმა. ასევე მაცნობა, რომ უკვე სტამბაშია და საცაა გამოვა ქართული პროზის ანთოლოგია რუმინულ ენაზე. ასე რომ რუმინელი მწერლები დიდ ყურადღებას აქცევენ ჩვენს ლიტერატურას, ჩვენ კი ვალში ხომ არ ვართ. მარტო ჩვენი სქელი ტომეულების გამოცემას ხომ არ გადავყევით?

## 29 აპრილი

სასტუმროში საუზმისას, შემთხვევით გავიცანი მოლდაველი პროზაიკოსი სტატი ვასილი ნიკოლაევიჩი. ისიც მწერალთა კავშირის სტუმარია. მოსკოვიდან ოთხი დღის წინათ ჩამოსულა. დაემეგობრდით. ჩემი „ახალი ნოველები“ ვაჩუქე და იმ დღესვე წაიკითხა. მეორე დღეს თავიდან ბოლომდე მიაბზო. შემომჩვილა რუმინელ მწერლებს არ გვაცნობენო. ჩვენსას არაფერს ბეჭდავენო. რატომ არსებობს მოლდავეთის რესპუბლიკა, ამ აზრს დღემდე ვერ შერიგებთანო.

შეხვედრა მქონდა რუმინეთის ლიტერატურული გაზეთის „რომანა ლიტერარას“ რედაქციაში. ვილაპარაკე თანამედროვე ქართული ლიტერატურის შესახებ. მკითხეს, რა პრობლემები აწუხებს დღეს ქართველ მწერლებს. გულთბილად მიმიღეს. თავის მხრივ მიაბზეს გაზეთის მუშაობაზე, როგორ ახერხებს იგი ასახოს რუმინეთის დიდი ლიტერატურული ცხოვრება.

ნაშუადღევს დავათვალიერეთ ბუქარესტის ხელოვნების

საკოლექციო მუზეუმი. ეს გახლავთ კერძო პირთა მიერ წლების განმავლობაში დაგროვილი კოლექციებისგან შექმნილი მუზეუმი. ძალიან საინტერესოა. რა არ უშოვიათ კოლექციონერებს ეგვიპტური და ბერძნული სკულპტურებით დაწყებული იმპრესიონისტების – მონეს და რენუარის ნახატებით დამთავრებული. ბევრმა მათგანმა ანდერძად დაუტოვა ეს განძი სახელმწიფოს, რითაც თავისი სახელიც უკვდავყო (ყოველი ექსპოზიციის კუთხეში დგას მისი შემომწირველის სურათი და ბიოგრაფიული ცნობებია) და ქვეყანასაც აუნონავი სიმდიდრე შესძინა.

რატომ არ შეიძლება ჩვენთან საკოლექციო მუზეუმის შექმნა?

საღამოს ზაირამ და მისმა მეგობრებმა დამპატიყეს ბუქარესტის ნაციონალურ დრამატულ თეატრში. ვნახეთ იტალიელი დრამატურგის ედუარდო დე ფილიპოს პიესა „ფილომენა მარტურანო“. ჩვეულებრივი მელოდრამა. ფინალში ზედმეტად დაშაქრული, დატკბილებული. არც დადგმა მომეწონა მაინცდამაინც. ჩვენ უკეთესი თეატრები გვაქვს.

## 30 აპრილი

დილიდანვე ზაირა სამხარაძის და მისი მეგობრების „ტყვეობაში“ ვარ. ანდი ავად არის, მაგრამ ზაირამ მთელი დღე ჩვენთან გაატარა. ძალიან ყურადღებიანი და გემოვნებიანი ქალია. მეგობრებიც მონუსხული ჰყავს. ქართული ხმის გაგონებით ვცოცხლდებით.

ვენჯიეთ ცნობილ რუმინელ მხატვარს ვასილეს გრიგორეს სახელოსნოში. საშუალო ტანის სიმპათიური კაცია. ძირითადად ყვავილებს ხატავს, ძალიან მომეწონა. ფერთა თავისებური ჰარმონია და ფონი. ცოტა პიკასოს გავლენის ქვეშაა,

მაგრამ ორიგინალურია იმით რომ დაუმთავრებელი ნახატები მიაქვს გამოფენაზე. – ვერცერთ ნახატზე ვერ ვიტყვი, რომ დავამთავრე, ზოგჯერ 5 წლის წინათ დახატულს ვუბრუნდები და თავიდან ვხატავო. როგორ მოხვდით ამ მხატვართან? ზაირას ერთმა მეგობარმა მწერალმა ჩაილაპარაკა, ერთი თვის წინათ „დამპატიჟა“ თავის სახელოსნოში ვასილე გრიგორემ, თუ ჩვენს სტუმარს საწინააღმდეგო არაფერი აქვს, იქნებ ვენვიოთო.



ცენტრში მთარგმნელი ზაირა სამხარაძე

ძალიან მომეწონა დაპატიჟების ეს ფორმა. მხატვრები ხშირად სთხოვენ მწერლებს მოდით, დაათვალიერეთ ჩვენი ნამუშევრები. რატომ უნდა ვუცადოთ გამოფენას (რაც ასე იშვიათად ხერხდება მხატვრის ცხოვრებაში) ან ალბომის გამოსვლას? დავფიქრდი და ჩემთვის კობა გურულისა და

ტიტე შეყილაძის გარდა არცერთ მხატვარს არ უთხოვია სახელოსნოში მენვიეო. მშვენიერი სალონი გაიმართა დღეს ვასილე გრიგორეს სახელოსნოში. ზოგმა თავისი ცოლის გამომცხვარი ბლინები გამოაყოლა ხელს, ზოგმა ერთი ბოთლი ლუდი. მე ქართული კონიაკი ამოვიღლიავე, მასპინძელი თავის ნახატებზე, თავის შემოქმედებაზე გვიამბობდა, ჩვენ ჩვენსას ვეუბნებოდით და ასე გავიდა ოთხიოდე საათი. ჩვენთან „საცივი“ და „სუკი“ თუ ვერ გაახერხე კაცს როგორ გაუბედავ დაპატიჟებას. გეგონება ამ შემთხვევაში სუფრა იყოს მთავარი და არა აზრთა გაცვლა-გამოცვლა. ვასილე ხატავს არლეკინებსაც. მწუხარე კლოუნებს. ნახატებს სახელებს არ არქმევს ერთი ნახატი მე მოვუწონე – ჩიტი. ზირამ ბევრი რამ მიაბო, რუმინელ მწერალთა და მხატვართა შესახებ.

სალამოს ბუქარესტის სახელგანთქმულ მცირე თეატრში დავესწარი სპექტაკლს. დიდებული წარმოდგენა ვნახე: სარტრის „ეშმაკი და უფალი ღმერთი“, ეგზისტენციალიზმის ტიპიური ნიმუში. ადამიანის შინაგანი თავისუფლების პრობლემა. დადგმულია მშვენივრად. თითოეული სცენა კომპოზიციურად უაღრესად დახვეწილია. ურთულეს პიესას რეჟისორმა სწორი გახსნა და ორიგინალური გადანყევტა მოუძებნა, ფრიად კმაყოფილი დავბრუნდი სასტუმროში. სპექტაკლი 4 საათიანია. 6:30-ზე იწყება და 10:30-ზე მთავრდება.

### 1 მაისი

ჩემმა მთარგნელმა და მისმა მეუღლემ ქალაქგარეთ გასეირნება შემომთავაზეს.

ბუქარესტიდან გავედით თუ არა ულამაზესი ტყეები დაიწყო.

მთელი ქალაქი ტყეებს შესევია. ოჯახებით წამოსულან. ფარდაგებზე წამონოლილან. სანოვაგე წამოულიათ და ქეიფობენ. ზუსტად ისე, როგორც 2 მაისს იცოდნენ ხოლმე ქუთაისში ჩემს სიყმაწვილეში. გზად შევჩერდით ტირგოვიშტეში რუმინეთის ძველ დედაქალაქში, მე-15 საუკუნიდან მე-18 საუკუნემდე ეს იყო რუმინეთის სავოევოდის ცენტრი. მე-18 საუკუნიდან ბუქარესტი. „ბუქარის ადგილს“ ნიშნავს. ბუქარი ლეგენდის მიხედვით ამ ქალაქის შემქნელი მწყემსია. რუმინელები მე-19 საუკუნის ბოლომდე სლავური ანბანით (კირილიცა) წერდნენ, ახლა რომაულით (ლათინურად). გახსენებაც კი არ სურთ თავიანთი სლავური წარსულისა. ჩვენ უშუალოდ რომაელების შთამომავლები ვართო.



რუმინეთი. ძველი სახლი

რუმინელებს მე-15-16 საუკუნეზე ადრინდელი ისტორიული ძეგლი არა აქვთ. იქნებ მართლაც რომაელების შთამო-

მავლები არიან? ყოველ შემთხვევაში რომაული და იტალიური ენები ჩემი შეზღუდული ცოდნის პოზიციებიდანაც კი ძალიან ჰგავს ერთმანეთს.

რა მიაჩნებოდა ცოლ-ქმარმა გზაში?

ბოლო ორი წლის მანძილზე რუმინეთში ყველაფერი უკუღმა დატრიალდა. არ არის ბენზინი. ტაქსს ვერ იშოვით უბენზინობის გამო ტაქსების პარკები დაიკეტა. მთლიანად ბუქარესტს 60-მდე ტაქსილა ემსახურება.

წყვეტაა ტრამვაიში და ტროლეიბუსში ასვლაზე. ბარათებით არიგებენ ხორცს და კარაქს. იმოდენა რიგებია, რომ თუ მარჯვედ არ იქენი „ბარათები“ ხელში დაგრჩება.

რესტორნების უმეტესობა ცარიელია.

თუ ნაცნობი არ გყავს, ან წინასწარ შეკვეთა არ მიეცი, ვერაფერს შემოგთავაზებენ.

ცნობარებში და ენციკლოპედიებში რაც წერია, ის უკეთეს შემთხვევაში ათი წლის ამბავია. დღევანდელი რუმინეთი კი ასე არ ცხოვრობს.

დევის ნაბიჯებით იზრდება მექრთამეობა. ფულმა ფასი დაკარგა.

უმადლეს სასწავლებლებში უსაშველო კონკურსია. სამხატვრო აკადემიაში, თეატრის ინსტიტუტსა და კონსერვატორიაში აქ აბარებენ მხოლოდ სპეციალობას.

უბედურება ის არის რომ ჩვენი ინფორმაციის საშუალებები არაფერს ამბობენ ამ პრობლემებზე, ვის სჭირდება თავის მოტყუება ვერ ვხვდებით.

ფასები ყოველთვიურად იზრდება.

ორი საათის შემდეგ ჩავედით სინარაში. სინარა ბაკურიანის მსგავსი ქალაქია. იტალიელებს აუღიათ იჯარით, გაუკეთებიათ ბრწყინვალე საბაგრო გზები, ხელშეკრულების ვადის გასვლის შემდეგ ეს საათივით აწყობილი კურორტი დაუტოვებიათ და წასულან.

თვალი რას ნახავს უკეთესს.



„სინარა“ ჰქვია სინას მონასტრის გამო. სინას მთიდან (პალესტინა) წამოსულ ბერებს აქ აუშენებიათ მონასტერი „სინა“ და ადგილსაც სინარა დაერქვა.

საბაგირო ვნახე და ვერ ვშორდებოდი, ავტეხე ჩემი მასპინძლები და „შევსვი ჯორზე“. პირველ სადგურზე არც ისე სციოდა, მეორეზე კი აშკარად გავიყინეთ. ჩვენ კვართებით, ირგვლივ კი თოვლია (ღრუბლიანია) და ქარიც უბერავს. მოხუცმა ალამ ტირილი დაიწყო. კინალამ გადახტა. ჩამოსვლისას ყველას გვაცემინებდა. 2400 მეტრზე ადის საბაგირო 400 მეტრიდან. ტრასა 3.5 კილომეტრია. ბაკურიანის „კედელზე“ არანაკლები ადგილებია.

გვიან სალამოს დავბრუნდით.

ამალამ მატარებლით იასაში მივდივარ.

## 2 მაისი

იასაში დილის 7 საათზე ჩამოვედით. ერთი საათი ამოდ ველოდეთ ტაქსს. ბოლოს ტრამვაიში შევეტენეთ და, როგორც იქნა, მივალწიეთ სასტუმრომდე.

დავბინავდით სასტუმრო „ტროანში“.

ვისაუზმეთ და ქალაქში გავლა გადავწყვიტეთ. დღეს მუზეუმები და დანესებულებები არ მუშაობს.

იასა ძველი ქალაქია. ოდესღაც რუმინეთის კულტურული ცენტრი. მოლდავეთის სავოევოდის დედაქალაქი.

ჩემს გიდს საღერდელი აქვს აშლილი და გაუთავებლად ლაპარაკობს. ჯერ იყო და მისი ქალიშვილის ლანძღვაგინებით ამიკლო. არ მიჯერებს, არ მოვწონვარო. მე მგონი შურს კიდევ ჩემი, რომ ასე კარგად ვხატავო. გუშინ დილით მითხრა, შარვალში სასაცილოდ გამოიყურებო. ღმერთო, შეგცოდე, მართალი უთქვამს მეთქი გავიფიქრე. მართლაც არ უხდება 70 წლის ქალს შარვალი. სახეზე იმდენი ფერ-

უმარილი აქვს წასმული რომ ნილაბი მგონია. ჩემი ქალიშვილი მე-12 კლასშიაო. ამ ორი კვირის წინ მისმა კლასელმა ბიჭმა „შემიცდინა“, ახლა რომ ჩავალ, შინ უნდა მივუვარდე, როგორმე ცოლად შეირთოსო. ქალიშვილის „დახასიათებას“ რომ მორჩა ახლა მთელი საათია მისაბუთებს, ჩვენ სლავებთან საერთო არაფერი გვაქვსო.



რუმინეთი



დავითვალისწიანთ ორიოდე ტაძარი. ისე მომაბეზრა გიღმა თავი, რომ როცა ლაპარაკს იწყებს, დავადებ თავს და ათიოდე ნაბიჯზე მოვშორდები. მომსდევს და ქაქანებს.

ვეძებთ ბესიკის საფლავს. არავინ იცის ვისაც ვკითხვით. შევედით მიტროპოლიტის რეზიდენციაში. კათალიკოსის თანაშემწე ნარიბ ანტონი თბილისში ნამყოფი აღმოჩნდა. გულთბილად მიგვიღო. ჩარეკ-ჩამორეკა, მაგრამ ვერაფერს გახდა. ბესიკის საფლავი არავინ იცის.

სალამოს შვიდ საათზე ვესტუმრეთ იასას მწერალთა ასოციაციის თავმჯდომარეს მირჩა რადუკ იაკობანუს. შესანიშნავი პიროვნება ჩანს. მწერალთა კავშირის თავმჯდომარეცაა და თეატრის დირექტორიც. საქართველოში სამჯერაა ნამყოფი. დიდი სიყვარულით იგონებს ყველას.

გვიან სალამომდე გვიმასპინძლა. რაც რუმინეთში ქართული წიგნი გამოვიდა (ბესიკი, მორის ფოცხიშვილი, ლეონიძე, ჭაბუა, ახლა ნოდარი გამოდის) ყველა ჩემი გამოცემულიაო. მეც ზრდილობისთვის შევთავაზე თქვენს წიგნს გამოვცემთ მეთქი (მე რომელი გამოცემელი ვარ) გაუხარდა, მაშინვე დააძრო თავისი ახალი წიგნი და ხელში შემომჩეჩა. სხვა გზა არ არის, უნდა ველრიჯო მორისს და ფანჯიკიძეს გამოვცემა. ღირსეული კაცია და ჩვენც პატივი უნდა ვცეთ. ფანი ჯინჯინაშვილი თარგმნისო, თვითონვე შემომთავაზა.

ბესიკის საფლავიც და საფლავის ქვაც დაკარგულია.

### 3 მაისი

გამომცემლობა „უფნიმის“ სტუმარი ვარ.

დირექტორმა, დრამატურგმა ანდი ანდრიეშმა ვრცლად ილაპარაკა გამომცემლობის საქმიანობაზე. დიდის ამბით მომესალმა. საქართველოთი აღფრთოვანებული ვარო. კვლავაც გავაგრძელებ ტრადიციას და ქართულ წიგნებს გამოვცემო.

საპასუხო სიტყვა ვთქვი. დაახლოებით 40 წუთი ვილაპარაკე. ჩამოვთვალე, რა გამოვეცით ჩვენც და რას ვაპირებთ. ძალიან გაეხარდათ. აქამდე საქართველოსთან ცალხმრივი კავშირი გვექონდაო. მერე ჩემი წიგნები მომთხოვა და აღმიტყვა 1985 წელს გამოცემა. თარგმნა იქვე დაავალა ქართველების დიდ მეგობარს, დოქტორს, მთარგმნელს, გამომცემლობის განყოფილების გამგეს დონა ფლორეას.

დიდხანს ვისაუბრეთ.

გამომცემლობის თანამშრომლები შეკითხვებს-შეკითხვებზე მაძლევდნენ. რა განწყობილებაა მწერლობაში, რას ამბობენ მწერლები ეკონომიკურ კრიზისზე.

მერე ბანკეტი გაიმართა. მე და დირექტორმა ძალიან ვაცინეთ. სუფრის წევრები. სამი საათის შემდეგ დავშორდით ერთმანეთს. ანდი ანდრიეშმა მთხოვა: ა) ნოდარ დუმბაძის „თეთრი ბაირაღების“ თარგმნის თანხმობა ჩამოიტანოს ფანი ჯინჯინაშვილმა. ბ) მოვიკითხო რომან მიმინოშვილი, ნოდარ დუმბაძე, ჭაბუა, მორისი.

დავითვალისწიანთ იასას ლიტერატურული მუზეუმი. ეს გახლავთ დიდი დაწესებულება, სადაც არა მარტო კლასიკოსთა ნივთებს კრებენ და მათ შესახებ აგროვებენ ცნობებს, არამედ თანამედროვეთა შესახებაც. და, რაც მთავარია, აქ ყოველ პარასკევს იმართება ლიტერატურული დისკუსიები და სალამოები.

ვენჯიე რუმინეთის XX საუკუნის მიხაი სადოვიანეს სახლ-მუზეუმს. ეს გახლდათ შესანიშნავი ისტორიული რომანების ავტორი. ახლოს იცნობდა და მეგობრობდა გიორგი ლეონიძესთან.

სალამო გავატარე დონას და მისი მეუღლის – მშენებელი ინჟინრის ალექსანდრეს ბინაში. ოქრო ხალხი ყოფილან. რაც ზაირაა ბუქარესტში, ისაა დონა აისაში. გაგიჟებულნი საქართველოზე, სწორედ დონა აწყობს ქართული წიგნების

გამოცემის ორგანიზებას. ცოლ-ქმარმა ძალიან კარგად იციან ჩვენი ქვეყნის ფასი. სალად, სწორად აზროვნებენ. ორივენი დოქტორები არიან. ერთ ოთახში ქართული კუთხე აქვთ მოწყობილი. მორისის წიგნები და ნახატები, ჭაბუას ფოტოები, სვანური ქუდი, ქართული ფიალები, კერამიკა. ველაფერი სათუთად შეუნახავთ, რაც კი საქართველოს აგონებთ.



რუმინეთი

დიდხანს ვისაუბრეთ. შევეცადა ზოგი რამ ახალი მეთქვა ჩვენს ხალხზე, ჩვენს თვითმყოფად კულტურაზე.

ლამის 12 საათზე, თავსხმა წვიმაში ცოლ-ქმარმა მე და ჩემი თარჯიმანი-საფრთხოებელა სადგურზე გამოგვაცილეს და სანამ მატარებელი თვალს არ მიეფარა, ადგილიდან არ დაძრულან, ხელს გვიქნევდნენ და კოცნას გვიგზავნიდნენ.

#### 4 მაისი

რუმინეთის მწერალთა კავშირის პირველმა მდივანმა იიონ ხობანამ გვიმასპინძლა.

როგორ მიდის თქვენი ვიზიტო, დაინტერესდა. ნამგზავრი, დაღლილი იქნებითო, რუმინეთში ცუდი მატარებლები გვაქვსო.

ვუამბე, რა დიდებულად მიმიღეს იასაში.

ვესაუბრე რუმინულ-ქართულ გამოცემებზე.

საქართველოს მწერალთა კავშირის სახელით „ვეფხისტყაოსანი“ (რუსულ და ინგლისურ ენებზე) ვაჩუქე რუმინეთის მწერალთა კავშირის ბიბლიოთეკას.

მშრალი, სიტყვაძუნწი კაცი ჩანს. ასატანზე მეტად ოფიციალური. მეც დიპლომატიის ნიღაბი ავიფარე.

სალამოს ზაირამ მარჩელი და დანა პეტრიშორების სახლში წამიყვანა.

გველოდნენ.

მომხიბვლელმა დანამ „ქართული“ სუფრა გაგვიშალა.

მარჩელი პეტრიშორი. ლეგენდად დადის მისი სახელი რუმინეთში.

ყოველგვარი სიყალბისა და პომპეზურობისადმი მისი შეურიგებლობა ზოგჯერ რისხვად იქცევა ხოლმე.

წერს რომანებს და წერილებს.

აღმერთებს საქართველოს.

მან თარგმნა ჭაბუას რომანი. ლადო მრელაშვილის, გურამ Aშარაძის, მორისის და ჭაბუას მეგობარია.

ნათელა მომიკითხა.

ლადოს რომანს ჩემი ცოლი თარგმნის, მაგრამ 1984 წლის გეგმიდან ამოიღესო.

დიდხანს ვისაუბრეთ. საქართველოში რვაჯერაა ნამყოფი.

უაღრესად განათლებული კაცია. ფრანგულის სპეციალისტი. პროფესორი. ერთ-ერთ ლიცეუმში ფრანგულს ასწავლის.

ყველაზე მეტად ის მიხარია, რომ საქართველოში მწერალს დიდ პატივს სცემსო ხალხი. ჩვენთან აღარც ვამბობთ რომ მწერლები ვართ. უბრალო რუმინელისთვის ეს არაფერს ნიშნავსო. მართლაც ვისაც დავუსახალე. ჩემი ნაცნობი მწერლების გვარი, არავინ იცის.

ეს იქნებ იმის ბრალია, რომ თქვენ ქართველი მწერლები ხალხს სიმართლეს არ უმაღავთ, ჩვენთან კი დიდი ხანია, ამოდ ელის მკითხველი სიმართლესო.

მწერალი სხვა პროფესიაში ხელმოცარული კაცის სინონიმიაო.

საქართველო მენატრება, იქნებ ნოდარ დუმბაძემ მოწვევა გამომიგზავნოსო.

სასტუმროში მიმაცილა. დიდებული კაცი ჩანს.

### 5 მაისი

უნივერსიტეტის ფილოლოგიის ფაკულტეტს ვენვით.

ორ სპეციალობას სწავლობენ. დიპლომში ორი სპეციალობა იწერება, ვთქვათ, ინგლისური და რუსული და ა.შ.

სტიპენდიით ყველა არაა უზრუნველყოფილი. ლექციას ძველებურად კითხულობენ.

არავითარი თვალსაჩინოება, მაგრამ საუბრის ფორმას მაინც მიმართავენ.

სტუდენტებს სწავლა არ უნდათ. დაუსწრებელი და საღამო საერთოდ არ არის. კონკურსი დიდია.

რუმინეთში 12 წლიანი სწავლებაა.


XI და XII კლასში მხოლოდ იმ საგნებში წვრიანი, რა სპეციალობის მიღებასაც აპირებს.

ვესაუბრე თანამედროვე მწერლობაზე. მომცეს შეკითხვები.

იქნებ გაცვლის წესით მეგობრობა დავამყაროთ ერთმანეთთანო, კარგი, ვეტყვი ჩვენს რექტორს მეტეი, დავპირდი.

უნივერსიტეტი გასამხედროებულია, საერთოდ რუმინეთში ვერცერთ დანესებულებაში ვერ შეხვალ, რომ არ შეეჩეხო დაცვის მუშაკს. არასაუნყებო დაცვა აქ დიდ პატივშია.

დღის მეორე ნახევარში ისტორიული მუზეუმი დავათვალიერე.



რუმინეთი

ბრწყინვალე მუზეუმი. მაგრამ რუმინეთის წარმომავლობამ კიდევ უფრო დამაფიქრა. აქ ყველაფერი ნასხვისარია. მათ შორის რომაული.

დამავინყდა მეტეკვა: დღეს აქაურმა მთავარმა ლიტერატურულმა გაზეთმა „რომანია ლიტერატურამ“ დაბეჭდა ჩემი სურათი და მოთხრობა „გვანჯი“ ზაირას თარგმანით.



მწერალთა კავშირში გამეცნო მთარგმნელი იონ კოვაჩი. თუ შეიძლება თქვენი მოთხრობები მსურს ვთარგმნო, დღევანდელ გაზეთში გამოქვეყნებული მოთხრობა ძალიან მომეწონაო. გაურკვეველი პასუხი გავეცი. ჯერ ერთი ჩემი წიგნი აღარ დამრჩა, მეორეც მე რომ ამ რუმინელ მთარგმნელს დავუკავშირდე, ზაირას ენცილება ალბათ. არა და ვგრძნობ კოვაჩი უფრო გაახერხებს საერთო ენის გამონახვას რუმინელ გამომცემლებთან. თუმცა... მთავარი ხომ სინდის-ნამუსია.

## 6 მაისი

ბუქარესტიდან ოციოდე კილომეტრზე არის სოფელი „ჟილავა“. ამ სოფლის სტუმრები ვართ. კოოპერატივის თავმჯდომარემ თბილად მიმიღო.

– რა პრინციპით ხდება მიწის დამუშავება და განაწილება? – ვკითხე – ყველა ოჯახს თითო ჰექტარი აქვს გაპიროვნებული. რასაც მოიწევს სახელმწიფოს უნდა მიჰყიდოს, გეგმის ზევით, რასაც მოიწევს მისი 50% უფასოდ რჩება.

– რატომ გაძვირდა ხორცი? – ვეკითხები. – იმიტომ რომ არ არის.

– რატომ არ არის?

– რთული საკითხია. არ არის უპირველეს ყოვლისა, უყარათო მუშაობის გამო, ვერ იანგარიშეს მოთხოვნილების ტემპი და საქონლის გამრავლების მასშტაბები.

– ახლა?

– ახლა ამ საქმეს დიდი ხნის მეცადინეობა დასჭირდება რომ გამოსწორდეს.

– რა ხერხს მიმართავთ რუმინეთის სოფლის მესვეურები?

– ხერხები ჯერჯერობით დიდად ქმედითი არ ჩანს: ამ ბოლო ორი წლის მანძილზე რუმინეთში კერძო პირებს საქონლის დაკვლა საერთოდ აეკრძალათ.

– ეს როგორ?

– ელემენტარულად. ყველა კერძო ძროხა კონტროლის ქვეშაა. გარდა ამისა, კერძო მეურნეს ეკრძალება ბაზარში ხორცის გაყიდვა.

– ?

– შეუძლია მხოლოდ ცოცხლად გაყიდოს.

– ესეიგი ერთი კილო ხორცის ყიდვა თუ მინდა მე, ბუქარესტის მოქალაქეს, მთელი ღორი ვიყიდო?

– სადაა, თორემ კი იყიდი.

– გამაგებინე, ძროხა თქვენში აბა, მხოლოდ სიბერითი კვდება და მერე მუსიკით ასაფლავებთ?! გაეცინა.



რუმინეთში ქარის წისქვილებს დროუამის გარდა აღარავინ ებრძვის

- რომ დაბერდება და დასაკლავია. მოვა, გამოაცხადებს გლეხი და სახელმწიფოს მიჰყიდის მტკიცე ფასებში.
- სახელმწიფო რამდენს უხდის კილოგრამ ხორცში?
- თხუთმეტ ლეის.
- ბაზარში რა ღირს?
- ხომ გითხარით, ჩვენს ბაზარში ორი წელია ხორცი აღარ გაჭაჭანებულა. სახელმწიფო იმ ხორცს საზოგადოებრივ კვებობით ობიექტებს აბარებს, იშვიათად კი მაღაზიებში ჰყიდის კილოგრამს 40 ლეიდ.



ჭა

- თქვენ, როგორც სოფლის კოოპერატივის თავმჯდომარე, გამოსავალს ვერ ხედავთ?
- ყველანი ხედავენ მაგრამ ჯერ გაბედულ ნაბიჯს ვერავენ დგამს. პნკენა-პნკენით კი პატარძალი მარტო ანდაზაში ორსულდება. საჭიროა მინა მიწის მუშას დავურიგოთ და ვუთხრათ, დაამუშავეთ, 2/3 სახელმწიფოს ჩააბარე, ერთი

მესამედი შენი იყოს უფასოდ. მკაცრად დავავალოთ 5-ზე ნაკლები ძროხა არ იყოლიოს. რაც მთავარია ბევრი უფროსი დაგვიგროვდა. ზოგს თეთრი ხელთათმანები უნდა ნავაძროთ და ნამგალი მივცეთ ხელში. თუ საქმით შველა გვინდა ეს არის. თუ არა და ვატყუოთ ერთმანეთი და ეს იქნება. თუ ასე დარჩა ყველაფერი, ქვეყანა კიდევ უფრო დაიმშვევა.

სხვაც ბევრი საგულისხმო და საინტერესო მითხრეს სოფელ ჟილავას კოოპერატივის თავმჯდომარემ ვიოკუ ვასილემ და სასოფლო საბჭოს თავმჯდომარემ ვიშუ ილანამ.

შემომატარეს სოფელი ყანები ბალ-ბოსტნები. რამდენიმე გლეხის ოჯახშიც შევიარე. საკარმოდამო ნაკვეთით და საცხოვრებელი სახლით დავინტერესდი. საკარმოდამო ისე როგორც ჩვენთან, მოვლილ-ჩანნიკნიკებული აქეთ. 0,30 ჰექტარზე საკარმოდამოში ორჯერ უფრო მეტი მოსავალი მოგვდის „რატომლაც“ ვიდრე კოოპერატივის ერთ ჰექტარზეო, მითხრეს. ნუთუ იმ „რატომლაცს“ იმდენ ხანს ვერავენ ჩაუფიქრდა?

2 საათზე შეხვედრა მქონდა გამომცემლობა „უნივერსის“ კოლექტივთან. ჩვეულებრივი მისალმებანი, უკვე ისე გავინაფე, რომ ელჩი ვერ მაჯობებს დიპლომატიური ეტიკეტის დაცვაში. დამაყარეს კითხვები: რა ხდება საინტერესო საბჭოთა ლიტერატურაში საერთოდ და ქართულში კერძოდ. ძლიერდება თუ არა კრიტიკული პათოსი ლიტერატურაში.

სოციალისტური ქვეყნების რედაქციის გამგე აურელ ბაუიჩკი და მისი მოადგილე იონესკუ ნიკალაი, ჩანს ცდას არ აკლებენ, რათა საბჭოთა ლიტერატურა თავისი საუკეთესო ნაწარმოებებით იყოს წარმოდგენილი. უკანასკნელ წლებში გამოუციათ შუკშინის, რასპუტინის, ასტაფიევის, ჩინგიზ აიტმატოვის, აბრამოვის, ახმადულინას, ევტუშენკოს, როჟდესტვენსკის, ოკუჯავას, მაფკოსიანის და სხვათა წიგნები. – განსაკუთრებით დაინტერესებული ვართ ქართული მწერლობით, ვიცით, რომ ფრიად საინტერესო ლიტერატურული ცხოვრებით ცხოვრობთ, მაგრამ სამწუხაროდ თქვენი მიღწ-

ევების სწორი ობიექტური ინფორმაცია ჩვენამდე არ აღწევსო. სამჯერ მივწერეთ მწერალთა კავშირს შეედგინათ ქართული პროზის მცირე ანთოლოგიაში შესატან თანამედროვე მწერალთა სია. ჩვენი მიმართვა უპასუხოდ დარჩა. მერე მარლელ პეტრიშორმა თავის ქართველ მეგობრებთან კერძო მოთათბირებით ეს „ანთოლოგია“ შემოგვთავაზა. ნახეთ ალბათ ბევრი კარგი მწერალია გამორჩენილიო. ანთოლოგია ტექნიკურად მშვენივრადაა გამოცემული, მაგრამ სარჩევს რომ ჩავხედე, ელდა მეცა. შეიძლება ქართული თანამედროვე პროზის ანთოლოგია შეადგინო რევაზ ჯაფარიძის, გრიგოლ აბაშიძის, გურამ რჩეულიშვილის, არჩილ სულაკაურის, ოტია იოსელიანის, გურამ ფანჯიკიძის, ოთარ ჭილაძის, გურამ დოჩანაშვილის, გურამ გეგეშიძის და კიდევ ერთი-ორი კაცის გარეშე? ეს თუ პრინციპად ცოცხლების შეტანას გავიხდით, ან თუ ნიკო ლორთქიფანიძე შეგვყავს, კონსტანტინე გამსახურდიამ ან მიხეილ ჯავახიშვილმა რა დაგვიშავა? რატომ უნდა დავინყებოდა მარლელ პეტრიშორის ქართველ კონსულტანტს გამსახურდიას და ჯავახიშვილის სახელები? როცა თავის საეჭვო ლიტერატურულ შემოქმედებას „განაჩვენებდა“, რუმინელ სტუმარს ყურები არ გაუნითლდა უფრო ღირსეულ მწერალთა მიმართ აუხსნელი გულმავინყოფის გამო? ეს ფიქრით ვიფიქრე, მაგრამ უდანაშაულო მასპინძლებს ხომ არ ვაგრძობინებდი რომ ანთოლოგიამ ვერ დამაკმაყოფილა? მადლობა მოვახსენე წიგნის გამოცემისათვის და საერთოდ ქართველი მწერლების მიმართ ესოდენი ყურადღებისათვის.

სალამოს შევხვდი ცნობილ რუმინელ კრიტიკოსს მიხაი უნგიანუს, რომელიც რუმინეთში ერთ-ერთ პრინციპულ და ობიექტურ კრიტიკოსადაა ცნობილი. ხშირად წერს განმარტებულ წერილებს, იმაზე, რაც არ მოეწონება.

პირველი რაც ვკითხე, ეს იყო გიჭირს, თუ არა კრიტიკული (ამ სიტყვის პირდაპირი მნიშვნელობით) წერილების გამოქვეყნება მეთქი.

სრულიადაც არაო, რასაც ვწერ მაშინვე იბეჭდება და თქვენ წარმოიდგინეთ მძაფრ კრიტიკულ სტატიას უფრო ჩქარა ბეჭდავენო. რით ხსნით ამ ამბავს მეთქი.

მე მგონი იმის გამო ხდება, რომ ჩვენთან რედაქტორები და გამომცემლობათა დირექტორები უმეტესობა მწერლები არ არიან. ჩვენს ლიტერატურულ ავტორიტეტს ენდობიან და ლიტერატურული ცხოვრების „მონესრიგებაში“ ხელს არ ურევენ, იმ უბრალო მიზეზის გამო, რომ პირადი ურთიერთობებით გადალლილნი არ არიან და არც პატივმოყვარული ინტერესები ამოძრავებთო. ასეთ რედაქტორთან თანამშრომლობა უფრო ადვილიაო. სერიოზულმა მწერალმა თვით უნდა თქვას უარი რედაქტორობაზე, იმიტომ რომ დელიკატური მოსაზრებით თვითონვე „მკვდარი ავტორი“ ხდება თავისი გამომცემლობის ან ჟურნალისო. ვერც თავის წიგნს გამოსცემს „თავის“ გამომცემლობაში და ვერც თავის თავზე დაბეჭდავს სტატიას „თავის“ ჟურნალშიო.

პოემაზე ამის წინანდელი კამათი გამახსენდა და ვკითხე: როგორ არის მეთქი თანამედროვე რუმინულ პოეზიაში სიუჟეტიანი პოემის საქმე! – მთელი პასუხისმგებლობით მოგახსენებთ, რომ კლასიკური გაგებით სიუჟეტიანი პოემა ჩვენში უკვე კარგა ხანია აღარ იწერება. შესანიშნავმა პოეტმა იინ გეორგემ 1958 წელს დაწერა სიუჟეტიანი, თხრობითი პოემა „მარილი და წყალი“, მაგრამ კრიტიკამ ამ პოემის მხატვრული დონე უსუსურად მიიჩნია და დღეს იინ გეორგეს შემოქმედებაზე საუბრისას „მარილს და წყალს“ დუმილით უვლიანო გვერდს.

ბოლოს მიხაი უნგიანუს ვთხოვე შეედგინა თანამედროვე რუმინელ საუკეთესო პროზაიკოსთა და პოეტთა მისეული ხუთეულები. რუმინეთის ერთ-ერთი გამოჩენილი კრიტიკოსის რჩეულ ავტორთა სია ასეთი გახლავთ: პროზაიკოსები – მარინ პრედა, ფანუშნი აგუ, ევჯენ ბარბუ, პაულ ანგელი, ოინ ლენკრეჟანი; პოეტები – ნიკიტა სტანესკუ, იონ გეორგე, იოან ალექსანდრუ, ანდრიან ბაუნესკუ, გიორგ პიტუცი.



თითქმის მთელი დღე ანთიმოზ ივერიელის სავანეში გავატარე. რუმინეთის მეფეს მე-17 საუკუნის წლებში კონსტანტიპოლიდან თან ჩამოჰყვა ოცდაათი წლის ფერგადაღებული ბერი, რომელმაც იცოდა ხატვა, ქარგვა, გალობა, წერდა საეკლესიო პოემებს და განაფული იყო ხუროთმოძღვრებაში. უბრალო ბერიდან მიტროპოლიტობას მიაღწია ანთიმოზ ივერიელმა. იგი ითვლება რუმინეთის სალიტერატურო ენის, რუმინული ეროვნული საეკლესიო ფერწერისა და სტამბის ფუძემდებელ-დამაარსებლად.

თავისი მონაფე საქართველოში გამოგზავნა – იმტვანოვიჩი და პირველი სტამბა გაამართვინა, სადაც 1709 წელს „ვეფხისტყაოსანი“ დაბეჭდა.


ანთიმოზ ივერიელს დაწერილი აქვს უამრავი საეკლესიო და საერო ნაწარმოები. რუმინეთში რამდენჯერმე სქელი ტომები გამოიცა მისი ნაწერების და გამოსვლების.



ანთიმოზ ივერიელის ტაძარი

სამწუხაროდ, თარგმანის ბუმის ამ საუკუნეში დღემდე ვერ მოხერხდა ანთიმოზ ივერიელის ნაშრომების თარგმნამის მშობლიურ ენაზე.

ზაირამ მითხრა ახლა ანთიმოზ ივერიელის ანდერძს ვთარგმნი და ხშირად ცრემლი მომდისო. ვნახე ანთიმოზ ივერიელის დახატული ფრესკები და ხატები – ქართული სახეებია აშკარად.



ანთიმოზ ივერიელის ხელით გამოჩუქურთმებული ეკლესიის კარის დეტალი

მერე ისევ ანდისა და ზაირას სტუმარი გახლდით. დიდხანს ვისაუბრეთ მე და რუმინელმა სიძემ, ბრწყინვალე ნიჭის კაცია. ნამდვილი პოლიგლოტი. გამოსცა რუმინულ-ესპანური ლექსიკონი და ახლა ესპანურ-რუმინულზე მუშაობს. ეს არის უდიდესი შრომა რომელსაც 30 წელია ეწევა ანდი. თანაც ნაყოფიერი მთარგმნელია. პირველმა მან თარგმნა იმ დროს ფართო მკითხველისთვის ჯერ კიდევ უცნობი მარკესის წიგნი – „პოლკოვნიკს არავინ წერს“ რუმინულად.

საღამოს სააღდგომო წირვას დავესწარი.

ამ საღამოს 8:20-ზე (ბუქარესტის დროით) გადის მატარებელი.

მოსკოვში ვბრუნდები.

გამომაცილეს ზაირამ, მისმა მეუღლე – ანდომ, ფლორენტიანამ (ზაირას მეგობარი) და ალა პეტრესკუმ.

დამავიწყდა. სადილად ალა პეტრესკუმ და მისმა მეუღლემ შინ მიმინვიეს. სააღდგომო სუფრა ჰქონდათ გაშლილი. ღარიბული, მაგრამ გულაღალი.

ღარიბულ სახლში რომ შევდივარ მასპინძლებისადმი მონინებით ვიმსჭვალე.

ღარიბია? ესე იგი პატიოსანია.

## 7 დეკემბერი

ვისაც ცხრა საათი მიწაზე დაუშვებლად არ უფრენია, ვერ წარმოიდგენს რას ნიშნავს ცხრა საათის განმავლობაში პოეტის სიტყვებით რომ ვთქვათ „როგორც ბუზი ფანჯარასთან“ მიმწყვდეული იყო ცასთან“ და რეაქტიული ძრავების გულისგამანვრილებელი სისინი ტვინს გიბურღავდეს.

„აეროფლოტი“ ვმოგზაურობთ. ჩვენმა თვითმფრინავმა უნდა გადასეროს თითქმის ნახევარი დედამიწა მოსკოვი-ტოკიო. არც ისე დიდი ხანია ეს პირდაპირი მარშრუტი დაინიშნა.

სხვა არა იყოს რა, ეს ფრენა საკუთარი თავის და ნერვების დიდი გამოცდაა. მე რომ ერთხელ კიდევ დამარწმუნა ურბანიზმის კაცი რომ არ ვარ და პროვინციის მთვარით გაზრდილს დიახაც რომ მიჭირს თურმე ეპოქის თავბრუდამხვევ რიტმს ავუნყო ფეხი, თუმცა საზღვარგარეთ მოგზაურობაში არც ისე ხამი გახლავართ. ამ ხუმრობა-ხუმრობაში ლამის მსოფლიოს ყველა დიდი ქვეყანა მომივლია.

იაპონიის მწერალთა ასოციაციის მიწვევით მივემგზავრებით ცნობილი რუსი მწერალი, სახელმწიფო პრემიის ლაურეატი ვიქტორ ასტაფიევი და მე. თარჯიმნად გვახლავს მწერალთა კავშირის უცხოეთის განყოფილების რეფერენტი, იაპონურიდან რუსულად მხატვრული ლიტერატურის ცნობილი მთარგმნელი ელენა რედინა.

ბავშვობაში ჩემს ქუჩაზე მინახავს მოხუცი დედაკაცები ჭიშკართან ჩამოსხდებოდნენ, თავთავიანთი კველებითა და საქსოვ-საკემსავით ხელში მივიდოდნენ, დაიწყებდნენ მუსაიფს, და მზის ჩასვლისთანავე დაიშლებოდნენ. მე შენ გეტყვი სათქმელი შემოელოდათ ან სიტყვა გაუმრუდდებოდათ. ნეტავი მათ.

რაზე არ ვისაუბრეთ ვიქტორმა და მე. რა მთა და ბარი არ გავასწორეთ, მაგრამ ვერ იქნა და ვერ მოვკალით დრო.

„მეფე-თევზის“ და „ბერმუხას“ ავტორი მიაბობს რომ ცამეტი წლისამ სწავლას თავი დაანება და შრომითი ცხოვრება დაიწყო. კრასნოიარსკის ხე-ტყის კანტორის მტვირთავ მუშას ომმა მოუსწრო. ომიდან სამჭრილობიანი, კონტუზირებული დაბრუნებულა. ფიზიკური შრომის უნარსმოკლებულს რძის კომბინატში ლამის დარაჯად დაუწყია მუშაობა და სწორედ მაშინ ზამთრის გრძელი ღამეების შემყურე შედგომია წერას.

რედაქციაში მიტანას არ ვაპირებდი, მეგობრებმა შემაგულიანესო. 1951 წელს გამოუქვეყნებია პირველი მოთხრობა. ახლა ორასამდე წიგნის ავტორია. მსოფლიოს თითქმის ყველა ენაზეა თარგმნილი მისი რომანები და მოთხრობები.

ბარემ, არ დამავიწყდეს, აქვე მოგახსენებთ რომ ტოკიოში ჩასვლისთანავე მიაღრთვეს იაპონურად ბრწყინვალედ გამოცემული მისი ორტომეული და კონვერტში ჩადებული ჰონორარი.

„ილ 62“ მოგეხსენებათ, გამძლე თვითმფრინავია, მაგრამ ისე ახლოსაა სავარძლები რომ გაყინული თევზებივით ვართ მიწყობილი ერთმანეთზე. რაც უფრო აძნელებს მგზავრობას.

არა და არ თავდება დრო. წუთისოფელივით გაინელა ეს ცხრა საათი.

თვითმფრინავს სამი სალონი აქვს. მესამე სალონში ხალხმრავლობაა. პირველი და მეორე სალონი აბსოლუტურად ცარიელია. ტანი მიგრძნობდა რომ უარს მეტყოდნენ მაგრამ გავიწყვიტე შუბლის ძარღვი და დაველრიჯე ქერათმიან სტიუარდესას, „თუ შეიძლება რომელიმე ცარიელ სალონში ჩამოვჯდები ცოტა ხანს მეთქი.“ არ შეიძლებაო, ეგ პირველი კლასია და მაღალი სახელმწიფო-ადმინისტრაციული მოხელეებისთვის არის განკუთვნილიო. მერე? შე კაი ქალო, მაღალი რანგის მოხელე ხომ არავინ მიფრინავს, და არც არავითარი იმედი არსებობს რომ გზაში დაგვანევენ ვინმეს, რაკი თვითმფრინავი ტოკიომდე დაუშვებლად მიფრინავს მეთქი, რა

იქნება დაბალი რანგის მოხელეები რიგიანად მოგვასვენოთ მეთქი. ვის დაეკარგე. კითხვა-პასუხის სამი წუთი დამთავრებულად ჩათვალა. არ შეიძლება, მორჩა და გათავდაო, დამამშვიდა და ლამაზი ზურგი შემაქცია.

როგორ არ შემეხარბოს, ახლა გრძელ-რეისმიწვეული იაპონელის, ჩემს უკან რომ მოკალათებულა და ისე მშვიდადაა თითქოსდა ცხრა კილომეტრის სიმაღლეზე კი არა დედის თბილ კალთაში ედოს თავი.

ძრავები ხმაურობენ? ყური იაპონური რეზინის საცობებით დაიცო. მოსწყინდა სიჩუმე, საცობები გამოიძრო და საყურე-მაგნიტოფონი გაიკეთა. უსმენს მუსიკას და არის თავისთვის. რა მშვიდი სახე აქვს, ღმერთო ჩემო. ბოლოს ჯიბიდან შავი ხავერდის საგუგეები დააძრო (ამას მაინც შევაკერინებ ჩემს ცოლს) თვალზე დაიფარა და კეფასთან ზონარი შეიკრა. საზურგეს მიანვა, მკერდზე შალის ზენარი აიფარა და უდრტვინელ, მშვიდ ძილს მისცა თავი.

მე და ასტაფიევმა ორი ბოთლი კონიაკი გამოვწრუპეთ, მაგრამ არა და არ მოდის ძილი.

მაპატიე მკითხველო, მრავალსიტყვაობა. ვის რაში აინტერესებს ამ დროში მე და ასტაფიევი დავიძინებთ თუ არა.

როგორც იქნა გაილია ტაიგა, ლურჯ-თეთრად დახაზული ზღვა და პირველი რაც იაპონიის მიწაზე დავინახეთ ეს იყო ცისკენ ატყორცნილი თეთრი ფუძიამა. ფუძიამა თანდათან გაიზარდა, განათდა და ტოკიოს საერთაშორისო აეროპორტ ნარიტას ბეტონის ბილიკზე რომ დავეშვივით, სადღაც მარცხნივ, ზეცაში დარჩა.

აეროპორტის გზაზე იქეთ, აქეთ, გაუმჭვირვალე მინის ხუთმეტრიანი კედლებია აღმართული. ვიკითხე ქარსანინააღმდეგო, ხმაურსანინააღმდეგო საშუალებააო. არ ვიცი ხმაურს რას უშვება, მაგრამ აეროპორტიდან ტოკიომდე 70 მილის უდიდესი ნაწილი კედლების მოსაწყენ დერეფანში რომ გავიარეთ ფაქტია.





იაპონია. ტოკიო

ერთბაშად აღიმართა ჩვენს წინ მზით გაჩახჩეხული ტოკიო. თანამედროვე მსოფლიოს ყველაზე კომფორტული ქალაქი. ტოკიო ყველაზე მეტად მოერგო მეოცე საუკუნის რიტმს. ამ ქალაქ-საოცრებას სწორედ ის ნიშნები ახასიათებს, ურომლისოდაც ურბანიზმის მძიმე ნაბიჯებქვეშ ასე დაჩაგრულად გამოიყურებიან პარიზი და ლონდონი, რომი და ვენა, სადღაც ნაკითხული გამახსენდა.

თვალში გეცემათ სამ-ოთხსართულიანი ესტაკადები და ულამაზესი სახლები. აღმოსავლურ-ევროპული სინთეზი რომ ამკარად ეტყობა.

ირგვლივ ყველაფერი დახატულივით კოხტა და ლამაზია. გაზონებიდან დაწყებული პატარა ვილების სახურავებითა და კარ-ფანჯრებით დამთავრებული.

ქუჩებში ჯგუფ-ჯგუფად მოსეირნე გოგონები. იაპონურ თოჯინებს ჰგვანან.

ქალაქის ცენტრში სასტუმრო „მიცუი ურბანში“ მოგვათავსეს.

კარგა მოსაღამოვებული იყო ძილს რომ წავართვით თავი და ლამის ტოკიოს მივაშურეთ.

რეკლამების ზღაპრული ფეირვერკი.

ტოკიოს ერთ-ერთი მთავარი ქუჩა – გინზა ბროდვეის მაგონებს, მაგრამ უფრო ლამაზია და დახვეწილი.

## 9 დეკემბერი

იაპონელთა საყოფაცხოვრებო მომსახურების მაღალი დონე დედამიწის ზურგზე ცნობილია, მაგრამ ბევრი რამ ჩემთვისაც მოულოდნელი აღმოჩნდა.

სასტუმროში შესვლისთანავე ყოველგვარ საშუალებას გიქმნიან რომ შინაურულად იგრძნო თავი.

სტუმარმა რომ ჩემოდანს მოჰკიდოს ხელი და ნომერში თავისი ხელით აიტანოს, სასტუმროს მენეჯერი ლოყას ჩამოიხოკავს, ალბათ გამწყრალია ჩვენზე, რაღაც არ მოეწონაო.

გათვალისწინებულია ყველაზე გულმავინყი სტუმრის მდგომარეობაც კი, ამიტომაც ნომერში შესვლისას ყველაფერი გხვდება განკრიალებულ-სტერილიზირებული და ცელოფანის პარკებში ჩალუქული საპონი, კბილის ჯაგრისი, თმისსაშრო-

ბი, ღამის საცვალი, ხალათი დ ღამის ისეთი საშუალებებიც კი მხოლოდ უკიდურეს შემთხვევაში რომ მიმართავენ ხოლმე და თავმოყვარე კაცი დანახვისას განზე რომ მიიხედავ.

ნომერში ტელევიზორის ერთ არხზე სასტუმროს ტელეინფორმაცია მიდის. რომელ რაიონში იმყოფები, სად არის შენი სასტუმრო, რომელ სართულზეა რა და რა ღირს. იქამდეა საქმე მისული, რომ ტელევიზორში სასტუმროს მოსამსახურე ქალთაგან მომხიბვლელ ფოტომენატურეთ და მასაჟისტებსაც გიჩვენებენ.

ტელევიზორის ცხრავე პროგრამა დილის შვიდი საათიდან ღამის პირველ (ზოგი სამ) საათამდე მუშაობს.

დილით ვილაცამ დამიკაკუნა კიმანოში გამონყოფილი (კიმა-ნოს თეთრეულთან ერთად გვანჯდიან და მონინებით გეტხოვენ ჩავიცვათ) ვიქტორ ასტაფიევი, მონყენილი სახით მიცქერის. ნუხელის ხუთი ასიენიანი ჩავაგდე ტელევიზორში ეტყობა ფული ეცოტავათ და გამომირთეს, ახლა აღარ ირთვებაო.



იაპონია. ტოკიო

გავყევი. ტექნიკისა არც მე გამეგება ბევრი რამ, მაგრამ ოთახში მაგიდის გასწვრივ განლაგებული დაახლოებით ოცამდე ლილაკიდან ყველას შევეხე და ერთ-ერთმა გაამართლა. ტელევიზორი ამუშავდა.

შენ აგაშენა ღმერთმა, სირცხვილს გადამარჩინე არა და მთელი გვერდი დავწერე გაგულისებულმა კაპიტალისტური ცხოვრების წესზე სადაც ტელეგადაცემაშიც კი ფულს გლღეტენო.

ფულის ყულაბა ტელევიზორში მართლაც გახლავთ ჩამონტაჟებული. მონეტა უნდა ჩააგდო მხოლოდ იმ შემთხვევაში თუ გაგინყრა ღმერთი და უმსგავსო (ხუმრობით პორნოგრაფიულ ფილმს რომ ეძახიან) ფილმის ნახვა მოისურვე.

კვირა დღეა. ჩემი ხალხის შვილს ზრდილობა როგორ გამიკვირდება, მაგრამ მთელი იაპონია ღიმილის ქვეყნად ქცეულა, ყველა ერთმანეთს უღიმის და ტკბილად ეჩურჩულება, ქუჩაშიც ღამის უძიროებით დადიან, ფეხის ხმით ერთმანეთი რომ არ შეაწუხონ.

ყოველ ფეხის ნაბიჯზე გულზე ხელის მიდება და თაყვანისცემა ხვდება თვალს, ხოლო თუ ყურს გაამახვილებ, მხოლოდამხოლოდ „არიგატო“ – „გმადლობთ“, „ჰაო დო ზო“ – „გეთაყვა“, „მოსი მოსი“ – „გისმენთ“, „საიონარა“ – „მშვიდობით“, გაისმის.

მოლუშული, გამწყრალი კაცის ნახვა მოგენატრება.

რესტორანთან ან მაღაზიასთან თუ შეჩერდები, სამი კაცი მაინც გაგეგება ფიანდაზად. „მობრძანდით“, „ინებეთ“, „გვიმსახურეთ“.

რესტორან „სუხიროში“ ვისადილეთ. ჩვენს გაოცებას საზღვარი არ ჰქონდა, ოფიციატმა ქალმა სპირტის ქურა რომ შემოდგა მაგიდაზე. სხვადასხვა ზომის ქვაბები და დიდი გობით ნედლეული (უმი ხორცი, მწვანილეული) რომ შემოიტანა.

„ხომ არ ინებებენ ბატონები, თავისი ხელით გაიკეთონ სადილი?“

ჩვენს შორის მსურველი რომ არ აღმოჩნდა, თვითონვე, ელვისისწრაფით, ჩვენს თვალწინ დაამზადა ხუთნაირი კერძი და დაგვაპურა.

რესტორნის ადმინისტრატორმა (თანამდებობას დაახლოებით ვამბობ) ქუჩამდე გამოგვაცილა და ბედნიერი სახით გვეჩურჩულედა „შემქმნელ-მშობლებს“ გაფიცვებთ თუჯ ხვალაც ჩემთან არ ისადილოთო.

ხალხი გინახზე შუა ქუჩაში თავისუფლად დადის. ჩვენში პარადზე რომ მინახავს ისეთი ხალხმრავლობაა, შუა ქუჩაში მოაბიჯებენ.

რამე დღესასწაული ხომ არ არის მეთქი, ვიკითხე. თურმე კვირაობით ტოკიოს რამდენიმე მთავარ ქუჩაზე მანქანების მოძრაობა აკრძალულია. ნუთუ დიდ სისულელედ ჩაგვეთვლება კვირაობით რუსთაველზე და პლებანოვზე მანქანები არ გავაჭაჭანოთ და ფეხით მოსიარულებმა ერთ დღეს მაინც „იმეფონ“. ქალაქის, როგორც ჟურნალისტებს უყვართ თქმა, „მთავარ არტერიებზე“?

იაპონელების საყვარელი სასმელი „საკეა“ – ბრინჯის არაყი. იგი მოტკბო გემოსი გახლავთ, არც არაყივით მაგარია, მაგრამ ღვინოზე მეტად ალკოჰოლიანია. 14-15 გრადუსიანი გახლავთ.

დამავინყდა მეთქვა, რომ ტოკიოს რესტორნების ერთ ნაწილში ფეხზე უნდა გაიხადო და ისე შეაბიჯო ხალიჩებიან იატაკზე.

ისევ ტოკიოს ქუჩები და ისევ მილიონი ღიმილი.

რამდენიმე პირაკრული მოქალაქე დავლანდე. ბინტის პირსაბურით (ამ სიტყვის ლოკალური მნიშვნელობით) დადიან, ქირურგებს ჰგვანან. რა დააშავეს ამათ მეთქი, ალბათ სურდო სჭირთ და ბაცილა სხვას რომ არ გადაედოს, თავის ნებით იკრავენ პირსო, მიპასუხეს.

იაპონიის დიდი გამომცემლობის „გუძოსის“ ორი თანამშრომელი მთელი დღე არ მოგვცვილებია.

მალიმალ გვეკითხებიან, ხომ არ დავიღალეთ, თავი ხომ არ მოგვანყინეს ლაპარაკით? იქნებ სადილის მერე დასვენება გერჩინათ ქალაქის დათვალიერებასო.

გამახსენდა, მთელი დღე რომ დავატარებდი სამ იაპონელ მწერალს ამასწინათ, ფუნუკულიორი, მუზეუმები, მცხეთა, მსურდა ყველაფერი მეჩვენებინა (ისედაც ცოტა დრო ჰქონდათ) აღარც კი მახსოვს, ვკითხე თუ არა, ხომ არ დაიღალეთ მეთქი. სალამოს მცხეთიდან რომ მომყავდა და ქართული ენის სილბოზე, გატაცებით რომ ვესაუბრებოდი, საეჭვო სიჩუმემ დამაფიქრა, მივიხედე დალლილ-განამებულებს ერთმანეთის მხრებზე ჩამოედოთ თავები და ჩასძინებოდათ.

ჩვენს ნებას ვახვევთ სტუმარს ხანდახან თავზე და არც კი ვეკითხებით, შეუძლია? სურს?

აღარას ვამბობ მაღაზიების სიმდიდრეზე და მორთულობაზე.

ვინც საზღვარგარეთ დამმგზავრებია, ალბათ, დამეთანხმება რომ იქაურ მაღაზიებში თითქმის არ შევდივარ, მძულს ათასი მიზეზის გამო სავაჭრო ცენტრებში ღოღიალი.

ძაღლების ტანსაცმლის მაღაზიაში კი სიამოვნებით შევედით მე და ასტაფიევი და კარგა ხანს ლაზათიანადაც ვიცინოდით.

დავათვალიერეთ მლოცველებით პირთამდე სავსე ბუდისტური ტაძარი „ასაქუსა“.

სალამოს კი ჩემმა ნაცნობმა მწერლებმა იაპონიის მწერალთა ასოციაციის ხელმძღვანელებმა: ნაკანიმ (თავმჯდომარე), ნაცაბურმა (მოადგილე) და იდემ (წევრი) ჩინურ რესტორანში მიგვიწვიეს.

ვანხამმა, როგორც ასეთ შემთხვევაში იტყვიან, ხოლმე გულთბილ, მეგობრულ ვითარებაში ჩაირა. ორივე მხარის წარმომადგენლებმა სადღეგრძელოები წარმოვთქვით.



## 10 დეკემბერი

ტოკიოს სატელევიზიო კომპიდან მთელ ტოკიოს გადაყურებთ.

ასტაფიევს სიმალლის ავადმყოფობა სჭირს, თავბრუ დაეხვა და გვთხოვა ჩავიდეთო.

სახურავები საოცრადაა გამოყენებული. ზოგან ვარდების ბაღია, ზოგან ტენისის კორტი და უფრო ხშირად საბანაო აუზი, მზის აბაზანების სავარძლებით.



იაპონია

დავათვალერეთ ტოკიოს სანთელის ფიგურების მუზეუმი. მადამ ტუსოს ხელოვნება მსოფლიოში გავრცელდა, აქ ერთმანეთის გვერდით დგანან: კენედი, ჩერჩილი, ჩან-კაი-ში და სხვანი, მაგრამ ყველანი რატომღაც იაპონელებს ჰგვანან.

რეიგანის ელევანტური ფიგურა სანთლისგან გაკეთებული ცალკე დგას საგანგებოდ განათებულ ადგილას. როგორც ჩანს, აქ რეიგანი დიდ პატივშია. გვიჩვენეს ნანყვეტები მისი სამი ჰოლივუდური ფილმიდან, სადაც მთავარ როლებში რეიგანია გადაღებული – მგონი ფილმების სათაურებიც ჩავინერე: „ტროპიკული ზონა“, „კანონი და ბრძანება“ და „მკვლელები“.

შუადღისას ტოკიოს ერთ-ერთ თვალსაჩინო კინოთეატრში ვნახე ანდრეი ტარკოვსკის ახალი ფილმი „ნოსტალგია“. ფილმი თითქმის ავტობიოგრაფიულია. გვიამბობს რუსეთიდან იტალიაში გაქცეულ პოეტზე, რომელიც ნოსტალგიისგან იტანჯება (ანდრეი ტარკოვსკიც ხომ იტალიაში გადასახლდა ბევრისთვის სრულიად აუხსნელი მიზეზების გამო).

ფილმი ბრწყინვალე როდია, ჩემი ფიქრით, „ანდრეი რუბლიოვის“, „ივანეს ბავშვობის“ და „სარკის“ ავტორისთვის დიდად წინ ნადგმულ ნაბიჯს როდი წარმოადენს, მაგრამ მაინც საინტერესოა. ერთგან ფილმის მთავარი პერსონაჟი (მოსკოვის თეატრ „კომკავშირელის“ მსახიობი ოლეგ იანკოვსკი ასრულებს) ყვება ასეთ ანეკდოტს. „კაცმა კაცი ქაობიდან ამოიყვანა და გადარჩენილმა ჩხუბი დაუნყო, ვინ გკითხავდა რომ ამომიყვანე, მე იქ ვცხოვრობო.“

მე მოჯარულ ჟურნალისტებს განვუცხადა – ფილმი მომეწონა მეთქი, რაც სალამოს ტელევიზიით გადასცეს.

სალამოს შინ მიგვიწვია ცნობილმა მთარგმნელმა ხარა სანმა.

დიდებული ოჯახის და დიდებული ბიბლიოთეკის პატრო-

ნია. რა ლექსიკონი არ შეუდგენიათ იაპონელებს, ცალკე აქვთ „რუსული ქურდული ტერმინოლოგიის“ და „რუსული გინეზების“ ლექსიკონიც კი.

მთელს იაპონიაში კი ერთი ქართულის მცოდნეც არ მოიძევება იაპონელებს შორის, რომ თარგმნოს ჩვენი ლიტერატურის საუკეთესო ნიმუშები, რისი გამოცემის სურვილიც იაპონელებს, დიახაც, აქვთ.

მაგრამ, დღემდე, იაპონიაში მარტო რუსთაველია გამოცემული.

ვიკითხე სწავლების სისტემაზე. 6 წლიდან იწყებენ. 6 კლასი დაწყებითია, მერე 3 კლასი ზოგადსაგანმანათლებლო, მერე 3 წელი მისწრაფებათა მიხედვით და ბოლოს უნივერსიტეტში ეწყობიან.

უმაღლესი განათლება არის კერძო ინსტიტუტებშიც და სახელმწიფო ინსტიტუტებშიც. კერძო უფრო ძვირი ღირს.

თუ განიცადა მეთქი თქვენმა ენამ ცვლილება? 1546 წლამდე იაპონური ძველ ჩინურს ძალიან წააგავდა, 1546 წლიდან კი ენის სახელმწიფო რეფორმა გატარდა და ენა საგრძნობლად გამარტივდაო.

მეტროს სადგურები მაღაზიებში გადის.

ტოკიოში ოცამდე უნივერსიტეტია.

11 დეკემბერს დილით საბჭოთა საელჩოში დაგვიბარეს.

ასტაფიევი და გიდი შეშინდნენ, ალბათ იმიტომ გვიბარებენ, შენ რომ „გამყიდველ“ ტარკოვსკის ფილმი შეაქეო. რა იციან მეთქი, როგორ არ იციან წუხელ ტელევიზიამ ხუთჯერ უჩვენაო.

მივედით. უნდა გენახათ სამივეს გაცემა, როცა საელჩოს I მდივანმა საელჩოს სახელით მაღლობა გადამიხადა ფილმის ობიექტური შეფასებისთვის.

## 11 დეკემბერი

გამომცემლობა „გუძისის“ დირექტორი ასაკავა სანი ტოკიოს „ვასედას“ უნივერსიტეტში გაგვიძღვა.

გულთბილად შეგვხვდნენ.

დაგვაყარეს შეკითხვები.

ასტაფიევისა სტუდენტებს ყველაფერი ნაკითხული ჰქონდათ, ჩემი, რასაკვირველია, არაფერი.

უნივერსიტეტის ფილოლოგიის ფაკულტეტს უმდიდრესი ბიბლიოთეკა აქვს მსოფლიო ლიტერატურისა.

მთელი რუსული მწერლობაა წარმოდგენილი (რასაკვირველია ასტაფიევის ოთხტომეულის ჩათვლით).



ვიქტორ ასტაფიევი და რევაზ მიშველაძე იაპონელ მწერლებთან.

ტოკიო, 1984 წ.

ბევრი ვეძებე ქართველ მწერალთა წიგნები, მაგრამ ვერსად ვერაფერი აღმოვაჩინე. დიდი ძეხვის შემდეგ მომანოდეს ცნობა, რომ იაპონურად დღემდე თარგმნილია მხოლოდ შ. რუსთაველის „ვეფხისტყაოსანი“, ნ. დუმბაძის „კუკარაჩა“ (საბჭოთა აღმანახშია დაბეჭდილი) და გურამ პეტრიაშვილის ზღაპრები.

ჩვენმა მასპინძელმა უნივერსიტეტში, პროფესორმა იასუტირენომ დარბაზს წარგვადგინა და ჩემს გვარზე დიდხანს იმტვრევდა ენას.

ასტაფიევმა მიმზიდველად ილაპარაკა. წერის ნიჭი რომ მქონდა იმაზე შევატყვე ჩემს თავს, რომ ომის დროს ჯარისკაცები თავიანთ გოგონებთან სასიყვარულო წერილებს სულ მე მანერინებდნენო. ჩემი პირველი ლიტერატურული გაკვეთილები ეს გახლდათო. სკოლაში როგორ სწავლობდიო, ჰკითხეს. შეიძლება ითქვას რომ გამართული „ოროსანი“ გახლდით და VI კლასიდან დამითხოვეს როგორც უიმედო მონაფეო. იაპონელმა სტუდენტებმა ამაზეც ბევრი იცინეს.

როცა ჩემი რიგი დადგა, ამოვილაგე ჩანთიდან ჩვენში გამოცემული იაპონური ლიტერატურის ნიმუშები და დარბაზს გადავეცი, სანამ ჩემს მოსაწყენ სიტყვას დავამთავრებ, ეს წიგნები დაათვალიერეთ მეთქი.

ხელიდან ხელში გადადიოდა: კობო აბე, აკუტაგავა, ისუკავა ტაკუბუკუ და სხვა: უკვირდათ, განსაკუთრებით ქართული ასოების მოხაზულობა მოეწონათ.

როცა დავიწყე მე ამა და ამ ქვეყნიდან ვარ, ქართველი ერი უძველესი კულტურული ერია, ჩვენ რომანი V საუკუნეში გვქონდა, ხოლო რვაასი წლის შოთა რუსთაველი მსოფლიოს უპირველეს პოეტთა შორის მოიხსენიება მეთქი, გოცებისგან პირი დააღეს.

მერე თანამედროვე ქართული ლიტერატურის პრობლემებზე ვისაუბრე და შეკითხვებს გავეცი პასუხი.

საგულისხმო ის იყო, რომ მარტო უნივერსიტეტი კი არ

ინერდა ჩვენს გამოსვლებს მაგნიტოფონზე, დარბაზში ბევრი სტუდენტიც მაგნიტოფონით მოსულიყო. ვინ და რისთვის ინერდენ ღმერთმა იცის, მაგრამ როცა რუსული ლიტერატურის კათედრაზე სხვადასხვა დროს ანალოგიური შეხვედრების ჩანაწერი მოგვასმენინეს ჩინგის აიტმატოვის, რასულ გაზმათოვის, მეჟელაიტისის, ფედორენკოს და სხვა მწერალთა მონაწილეობით, მივხვდით, რა პატარა ყურადღებით რა დიდი საქმე კეთდება. მე ვინ ვარ, მაგრამ ასტაფიევი დღეს თუ არა ხვალ მაინც ისეთი ფიგურა იქნება, რომილს გამოსვლის ჩანაწერებსაც ძეხნას დაუნყებენ.

რამდენი დიდი კაცი გვყავდა უნივერსიტეტში, ვინ ჩაინერა მათი სიტყვა? არავინ.

მსოფლიო ძალიან დაპატარავდა. ერთმა სათვალთანმა სტუდენტმა საჯაროდ მკითხა თბილისში გაზის აფეთქება რომ მოხდა, რამ გამოიწვიაო. ვიცრუე, ამ დროს, როგორც ჩანს უკვე მოსკოვს გახლდით და იაპონიაში წამოსასვლელად ვემზადებოდი, ამიტომ ვერას მოგახსენებთ მეთქი. საიდან სადაო, ჩვენი კომუნალური მომსახურების სიკეთე იაპონიაში დამხვდა, მაშინ როცა რამდენიმე დღე თბილისშიც ქორად ვიცოდით ეს ამბავი.

ერთ ქალაქში პათოლოგის მიერ ჩადენილ დანაშაულზე მიტინგი მოვანყვეთ და ტელეგადაცემა „მივუძღვენიო“, მცირეწლივანთა მიმართ მსგავსი დანაშაული რომ არ განმეორებულყო. თუმცა ვერავინ დამარწმუნებს იმაში რომ ავადმყოფი გარენრის მიერ ჩადენილი ფაქტი ასეთი განზოგადების და „უკვდავების“ ღირსი იყო. სწორედ გაზის საქმე უნდა ქცეულიყო სატელევიზიოდ. სწორედ იმაზე უნდა აგტეხოთ განგაში რომ ამ მწარე გაკვეთილის შემდეგაც კი ხდება: ვრეკავთ სახლმმართველობაში, მილი გასკდა, წყალი იღვრება, მოგვეშველეთ, ჩვენს ბინას ვინ დაეძებს, მეზობლებს ვაზარალებთო და ცივისსხლიანი სანტექნიკი მესამე დღეს გამოგვეცხადება.



ნიგნი ძალიან ძვირი ღირს დაახლოებით 5000 იენი საშუალოდ.

ნიგნის გამოცემის ოპერატიულობა განსაცვიფრებელია.

ასაკავამ ჩემი მოსკოვში გამოცემული კრებული გამომართვა.

მესამე დღეს რედაქტორის რეცენზია მიჩვენა, მეოთხე დღეს იაპონური გამოცემის მაკეტი მომიტანა, რამდენიმე დღის შემდეგ ხუთიოდე ნოველის თარგმანი ხელთ ჰქონდა (სხვსდასხვა მთარგნელს მისცა), გამოფრენის დღეს მითხრა მოსკოვიდან გამოცემის ნებართვას რომ არ დაგვიანებოდა, აქ ყოფნის ორ კვირაში თქვენს ნიგნს ჩაგაბარებდითო.

ორ კვირაში ნიგნი! რალა კომენტარი სჭირდება.

უნივერსიტეტში სწავლა ძალიან ძვირი ღირს.

ქურდობა თითქმის აღარ არის.

მთვრალ კაცს სანთლით რომ ეძებოთ ტოკიოს ქუჩაში იშვიათზე იშვიათად იპოვით.

ტოკიოში ყვავილების კულტია ყოველ ფეხის ნაბიჯზე ყვავილების მაღაზიაა. თითქმის ტიპიური სურათია, იაპონელს ყვავილები უჭირავს ხელში და გაბადრული სახით მიტანტალებს, თავის იაპონურ საქმეებზე.

უნივერსიტეტში დავაყენე საკითხი: რაკი არც თქვენ გყავთ ქართულის სპეციალისტი და არც ჩვენ იაპონურისა, იქნებ გავცვალოთ სამ წელიწადში ერთხელ მაინც თითო სტუდენტი უნივერსიტეტებმა როგორც ამას სხვა ქვეყნები აკეთებენ მეთქი.

ტაშისკვრით მიიღეს ეს წინადადება.

ვწერ ახლა ამ სტრიქონებს და მეცინება.

ნაიკითხავს სამინისტროს რომელიმე უმცროსი რეფერენტი და ჩაეცინება, ვინ გკითხავს შენ, პატივცემულო, რევაზ მიშველაძე სტუდენტების გაცვლა-გამოცვლის საკითხის მოგვარებას.

ამ საკითხს იოლად ნუ უყურებ. შენი საქმე იყო გეთქვა,

ჩვენ კი აქ იმიტომ დაგვსვეს, რომ თუ მეტი არა, ათი წელი მაინც შევაფერხოთ შენს მიერ მოფიქრებული წინადადებაო.

კვირაში ტოკიოს უნივერსიტეტის პროფესორს უფლება არა აქვს 4 საათზე მეტი წაიკითხოს. მის ჯანმრთელობას სახელმწიფო უფრო ხილდება და ვინ იცის, სწორადაც იქცევა.

## 12 დეკემბერი

დილით პატარა გოგონამ აიაკომ ტოკიოს თოჯინების ნაციონალური თეატრისკენ წაგვიყვანა.

აიაკო წინ მიცუნცულებს, ჩვენ უკან მივძუნძულებთ. აიაკო შეჩერდება და ღიმილით ხელს დაგვიქნევს.

სანამ ტაქსთან მიგვიყვანდა ორჯერ დაიბნა. სასონარკვეთილი შეჩერდება და პოლიციელისკენ გარბის. ტოკიოში მოქალაქე რომ შეაჩერო და რაიმე ჰკითხო, სირცხვილად ითვლება.

პოლიციელი სანამ რაიმეს ეტყოდეს აიაკო, ჯერ გულიანად ახითხითდება და მერე ყურადღებით უსმენს. აიაკოს კი შეშფოთებული სახე აქვს. პოლიციელი ისევ ახითხითდება, მერე სწრაფად დასერიოზულდება და გზას ასწავლის, რაშია საქმე, ვერ გავიგე.

ტოკიოს თოჯინების თეატრი 300 წლისაა.

რალაც სულელური სპექტაკლი გვიჩვენეს ძველ იაპონურ ენაზე. ახალ იაპონურზე რომ ყოფილიყო, რა შეღავათია ჩემთვის.

ჩემს მიერ ნანახი სხვა თოჯინების თეატრისგან იმით განსხვავდება, რომ მსახიობები სცენაზე დადიან თავიანთი თოჯინებით ხელში (?).

გაგიკვირდებათ ლამის 12 მილიონიან ტოკიოში სამოცამდე თეატრი არსებობს, მაგრამ მუდმივი შენობა მხოლოდ თოჯინების ნაციონალურ თეატრს გააჩნია.

თანამოაზრე რეჟისორ-მსახიობებისგან შემდგარი დასები რეპეტიციებს თავიანთ კლუბებსა და სალონებში ატარებენ.

თუ, სხვათაშორის, კარგ სპექტაკლს შექმნიან (რაც იშვიათად ხდება) დაიქირავენ თეატრის შენობას. სპექტაკლის სიავეკარგეს იაპონიის კულტურის მეცენატთა 100 კაციანი ბრიგადა ფარული ხმის მიცემით აფასებს. ეს ერთგვარი სამხატვრო საბჭო (ძირითადად თეატრმცოდნეებისგან შემდგარი) წყვეტს ამა თუ იმ თეატრის შენობაში სპექტაკლის დადგმის საკითხს. დასს დაქირავებული აქვს შენობა მანამდე, სანამ შემოსავალი ხელს აძლევთ. მსახიობები მერე ისევ თავიანთ კლუბებს უბრუნდებიან. ასე რომ მაყურებლები მხოლოდ რადიო-ტელევიზიის და აფიშა-პრესის საშუალებით იგებენ რომელ სცენაზე გამოდის მათი საყვარელი თეატრი. შეიძლება რამდენიმე წელი ისე გავიდეს, რომ თეატრი მაყურებლის წინაშე არც კი წარდგეს. ამიტომ თეატრებს შორის დიდი კონკურენციაა, სცენა იმას ეკუთვნის, ვისაც კარგი სპექტაკლი გამოუვა.

ოთხ საათზე სადგურისკენ მივდივართ.

ტაქსის მძღოლებს თეთრი ხელთათმანები უკეთიათ. ტაქსში იდეალური სისუფთავეა. მანქანის ჩიხოლები, თეთრი, ქათქათა ქსოვილისაა.

მატარებელმა 400 კილომეტრი ტოკიოდან ნაგოიამდე სამ საათში დაფარა. მატარებლის ბორბლების ხმა არც კი გამიგია. იაპონური ლუდის ჭიქები მე და ჩემს გვერდით მჯდომ გამომცემლობის დირექტორს ასაკავას ფანჯრის რაფაზე გვეწყო, არა თუ არ გადმოვარდნილა, არც კი გატოკებულა.

სამი საათის განმავლობაში ფანჯრიდან ხედი თითქმის არ შეცვლილა. მეგონა შუა ქალაქში მივდიოდით, იაპონიაში ქალაქსა და სოფელს შორის ზღვარი თითქმის წაშლილია. კარგია, ეს თუ ცუდი, ღმერთმა იცის.

ნაგოია სამრეწველო ქალაქიაო გვეუბნებიან. მრეწველობაზე გამახსენდა, ბევრი წამიკითხავს იაპონიის დიდ ქალაქებ-

ში ჰაერის გაჭუჭყიანების პრობლემაზე; მე ასეთი რამ არ მიგრძენია. ყველა სანარმო მბოლავ მილზე ფილტრი დგას, გაუმართავი მანქანით გამოსვლისთვის მძღოლს დიდი თანხით აჯარიმებენ. არ დამიჯერებთ და იაპონიაში ჩემი ყოფნის განმავლობაში ჭუჭყიანი მანქანაც არ შემინიშნავს. იქნებოდა, როგორ არ იქნებოდა, მაგრამ მე არ შემინიშნავს.



ვიქტორ ასტაფიევი, რევაზ მიშველაძე

კიდევ ერთი რამ.

გადასასვლელზე შუქნიშნები დგას მაგრამ ავტომატური შუქნიშნები იშვიათად გვხვდება. არა მგონია იაპონელებს შუქფარების დადგმა გაჭირვებოდათ. საქმე შემდეგშია, როცა ხუთზე მეტი მგზავრი შეგროვდება, ერთი მოქალაქე დააჭერს ლილაკს ხელს და წითელი შუქი აინთება, მოძრაობა შეჩერდება. მოქალაქენი მშვიდად გადადიან. მერე ბოლო გადასვლელი მიაჭერს ლილაკს და მოძრაობა ისევ განახლდება. არ უნდა იყოს ეს მთლად ცუდი საქმე, ზოგ ადგილას მაინც. მე დიდად

დისციპლინირებული მძღოლი არ გახლავართ (იციან ჩემმა მეგობარმა ავტონისპექტორებმა) მაგრამ გულდანყვევით და ბრაზით შევცქერი ზოგჯერ ავტომატურ შუქნიშანს, ჯიუტად აკიაფებულ წითელ ნათურას გზაზე, მაშინაც კი როცა არცერთი გადამსვლელი არ არის.

### 13 დეკემბერი

დილით ნაგოიას სასტუმრო „ინტერნაციონალში“ მიღება მთხოვა ახალგაზრდა იაპონელმა. იგი აღმოჩნდა ჩიუკიოს უნივერსიტეტის პროფესორი კემურა.

ქართულს ვსწავლობ, ლექსიკონების და თვითმასწავლებლების დახმარებით და, თუ შეიძლება, ქართულად მსურს საუბარი თქვენთან. სადაც შემეშლება გამისწორეთ და ამასთან ერთად, თუ არ შენუხდებით, მაგნიტოფონი ჩაინერს თქვენს მიერ წაკითხულ ნაწყვეტს „ვეფხისტყაოსნიდან“ და ნ. ბარათაშვილის ლექსებს (წიგნები თან ჰქონდა) რომ გამოთქმაზე და ინტონაციაზე ვივარჯიშო.

უარს როგორ ვეტყოდი. ჩაწერას რომ მოვრჩით, ვკითხე, რა მიზნით სწავლობ ქართულს მეთქი, სადოქტორო დისერტაციას ვწერ ლერმონტოვზე და მინდა ლერმონტოვის ადგილებზე სწორი წარმოდგენა მქონდესო. თარგმნას ხომ არ აპირებ მეთქი ქართულიდან იაპონურად. განა ისეთი რა ლიტერატურა აქვს საქართველოს სათარგმნელად რომ ღირდესო, თქვენი მწერლობა ხომ მცირე გამონაკლისების გარდა ფაქტიურად ოქტომბრის რევოლუციის შემდეგ შეიქმნაო. ვუამბე, რაც საჭირო იყო, ვინ იცის დამიჯერა?

მერე ნაგოიას ქუჩებში გავისეირნეთ. ნაგოიაში არის მინისქვეშა ქალაქი თავისი მაღაზიებით, რესტორნებით და სხვა დაწესებულებებით. თქვენ წარმოიდგინეთ, მინისქვეშა ქალაქს სამოციოდე ჰექტარი ტერიტორია უჭირავს.

დავავალიერეთ „ითოს კანონ“ ნაგოიას ბუდისტური ტაძარი.

გზად ვესაუბრე ასაკავას, რომელიც ძალიან დამიმეგობრდა. სანამ იაპონურად მთარგმნელი არ გვეყოლება მანამ ვერ გამოვცემთ ქართულ წიგნებსო. თარგმნილიდან თარგმნა (ე.ი. რუსულიდან) ხომ ფაქტიურად თავის მოტყუებააო. ჩამოვანერინე უკეთესი ნიმუშები თანამედროვე ქართული მწერლობისა, გამოსცემს?

მკითხველი მეთქი? იაპონიაში ჭეშმარიტი ლიტერატურის მკითხველთა რიცხვი დღითიდღე მცირდება. ჯერ კიდევ ჰყავს. ფანტასტიკურ-დეტექტივებს და სექსუალურ ლიტერატურას მკითხველი მაგრამ ისიც შემცირდა. „ტელევიზიამ შეჭამა ლიტერატურა“ ხშირად გაიგონებთ იაპონიაში, ლექსებს კი თითქმის აღარ კითხულობენ და „ტანკას“ უკვდავ ტრადიციას გაგრძელება აღარ უწერიაო.

მთავრობა პატივს აღარ სცემს, შეიძლება ითქვას არავითარ ანგარიშს არ უწევს მწერლებს, იმიტომ რომ პატიოსანი იაპონელი მწერლების 100% მთავრობის პოლიტიკის წინააღმდეგ ილაშქრებსო.

შუადღისას ნაგოიას უნივერსიტეტის პროფესორმა უმემურამ მიგვიღო და დაახლოებით სამ საათს გვესაუბრა. „ჩიუკიო“ კერძო უნივერსიტეტია ნაგოიაში. სწავლის იდეალური პირობებია. რექტორმა, 76 წლის მოხუცმა, თავისი ფეხით დაგვატარა ბიბლიოთეკა და რამდენიმე აუდიტორიაშიც შეგვიყვანა.

უნივერსიტეტი მთელი ქალაქია. აქვს თავისი სასტუმრო, რესტორანი, სხვადასხვა წარმოება და საბავშვო ბაღიც კი. ყოველივე ამას რექტორი ხელმძღვანელობს. კინალამ წამომცდა 20 წელია უნივერსიტეტში ვმუშაობ და რექტორის კაბინეტში არასოდეს ვყოფილვარო. საღამოს და დაუსწრებელი სწავლება არ არის.

პროფესორის გადარჩევა არ ხდება. ერთხელ რომ აირჩევენ გათავდა.



პროფესორი დაახლოებით 500 000 იენს იღებს თვიურად. მანქანა „ტოიოტა“ მილიონი იენი ღირს. ე.ი. პროფესორის ორი თვის ხელფასი.

მანქანების საზოგადოებრივი სადგომი დავათვალთვინებ, გარაჟი ათსართულიანია. შეაყენებ მანქანას და მას მაშინვე წაიღებს კონვეიერი. როცა გამოყვანა დაგჭირდება შენს ნომერს დააჭერ თითს, ღილაკს. კონვეიერი ამუშავდება და მანქანას ერთ წუთში ფეხებთან მოგაწვდის.

სიდედრის და ტელევიზორის პროგლემა როგორ არის მეთქი იაპონიაში კემურას ვკითხე. სიდედრს იაპონელი თავის სახლში იშვიათად ღებულობს, ხოლო ოჯახში იმდენი ტელევიზორია, რამდენიც წევრია, ასე რომ „მე ამის ნახვა მინდაზე“ ჩხუბი გამორიცხულია.

ნაგოია ორმილიონიანი ქალაქია. ძირითადად იმითაა ცნობილი, რომ ნაგოიაშია მსუბუქ ავტომანქანათა მსოფლიოში ერთ-ერთი უდიდესი ქარხანა „ტოიოტა“.

სალამოს კემურამ სტრიპტიზის ლამის ბარში წაგვიყვანა. სადაგლობა იყო, რაც იქ ვნახეთ. „წარმოდგენის“ ბოლომდე არ დავრჩენილვართ. გული ამირია ამ სანახაობამ. სცენაზე ნატურალურ სექსს როგორ უნდა უყურო ნორმალურმა.

#### 14 დეკემბერი

ნაგოიადან ხიროსიმაში მივემგზავრებით.

ჩქარი მატარებლის ფანჯრიდან ულამაზესი ხედები ჩანს.

უმკაცრესადაა დაცული ეროვნული არქიტექტურა. განსხვავებული ფორმისა და ზომის სახლებია, მაგრამ თითქმის ყველას ერთნაირი ფორმის სახურავი აქვს. ბოლოში ოდნავ აწეული. გადახურულია ყველა რუხი იაპონური კრამიტით.

„სოფლის შუკებს“ ვაკვირდები. უასფალტო გზა იაპონიაში თითქმის არ შემხვედრია. ძირითადად ორი ფერის ასფალტი

გვხვდება: თეთრი და შავი. შავით გზებია მოკირწყლული, თეთრით ტროტუარი და გზამგამყოლი ხაზები, რაც ქუჩას არაჩვეულებრივ სილამაზეს და შეფერილობას აძლევს.

ხიროსიმაში ვართ. ტიპიური იაპონური ქალაქია. მილიონზე მეტი მცხოვრებით, სასტუმრო „გრანდ ჰოტელში“ მოგვათავსეს.

ჩვენი გიდია კავამოტო, იგი ავადსახსენებელ 1945 წელს ხიროსიმაში იყო. სამ კილომეტრზე ცხოვრობდა ბომბის გავარდნის ადგილიდან. რადიაციითაა დაავადებული, პირველი კატეგორიის ინვალიდია.

ვნახეთ სახლის ნანგრევები რომელთანაც სულ 50 მეტრში დაეცა ბომბა. მხოლოდ რკინის ჩონჩხია გადარჩენილი. ვნახეთ წეროების მკეთებელი იაპონელი გოგონას ძეგლი. ყოველივე ამან დიდი შთაბეჭდილება მოახდინა ჩემზე, ასევე დალუპულთა მემორიალზე წარწერამ „იძინეთ მშვიდად, ეს აღარ განმეორდება“, მუზეუმმა კი ნამდვილად შემადრწუნა:

ბომბი გავარდა დილით. 8:15ზე. არსებობს ფოტოები ქალაქისა ბომბამდე 1 საათით ადრე და ბომბის გავარდნიდან 1 საათის შემდეგ. ორი კილომეტრის რადიუსზე მინასთანაა ყველაფერი გასწორებული. ბომბი მინაზე არ დაცემულა, ცაში გასკდა 600 მეტრზე. პირველ წუთებში დაიღუპა 100 000 კაცი, მერე კიდევ 100 000. აქედან 65 000 ბავშვი.

გამოფენილია დამწვარი ძვლები, ტანსაცმელი, საკაცეები, ბომბის გავარდნიდან რამდენიმე საათის შემდეგ შავი წვიმა წამოვიდა. ფერფლმა დაფარა მთელი ქალაქი. წყალი მოინამლა. მძორისგან საშინელი სუნი დადგა. დამსაფლავებელი არავინ იყო. მედიკამენტები არ ჰქონდათ.

ასტაფიევს გული შეუწუხდა, მე ხელები გამიცვივდა, მაგრამ არ ვთქვი, მიბაძვაში არ ჩამომართვან მეთქი.

მერე აღარაფრის ნახვა არ გვსურს. ომი ომია, მაგრამ ბავშვები?

სურათებია, როგორ იტანჯებიან, იკლაკნებიან მომაკვდავი ჩვილები და მშველელი არავინაა.

სასტუმროში უქეიფოდ დავბრუნდით. უგემურად ვივახშმეთ. ფანჯარასთან ვდგავარ. წვიმს.

აღბათ იმ დღესაც ასე წვიმდა.

ტელევიზორი ჩავრთე, ხიროსიმელ იაპონელებს დიდი ცეკვა-თამაში გაუმართავთ.

ასეა, ადამიანები სიცოცხლისთვის, მხიარულებისთვის არიან გაჩენილნი და ნელ-ნელა აღბათ ყველაფერი ივინყებენ.

ივინყებენ კი?

## 15 დეკემბერი

ხიროსიმა.

დილიდანვე ქალაქის გარეუბანში, მიაჯიმას კუნძულზე მივდივართ.

ნუხელ ცუდად მეძინა და უქეიფოდ ვარ.

ახალი გაზეთები ტრამვაიში ხელჩასაჭიდ რგოლებთან ერთად ჰკიდია. თუ წაკითხვა ვერ მოასწარი, შეიძლება ჩამოხსნა და წაიღო. რა გაზეთიც გინდა.

საზოგადოებრივი ტრანსპორტი იაპონიაში საკმაოდ ძვირი ღირს.

კუნძულზე კატერით გავემგზავრეთ.

მიაჯიმა სავსეა ირმებით.

ადამიანს სრულებით არ ეპუებიან. ხელს გაუწვდენ, მოვლენ და დაგყნოსავენ ხელისგულზე.

დავათვილიერეთ სინტოს საკულტო ტაძარი იცუკუჯიმა. გრანდიოზული სანახავია.

ტაძარი წყალში დგას.

ხიდი უნდა მიხვიდე.

რამდენიმე ოჯახში მოგვიხდა ყოფნა იაპონიაში. მივიხედ-

მოვიხედე, მაგრამ სანოლი არსად შემინიშნავს. თუ ძალიან გაევრობელებული არ არის იაპონელი ჭილოფზე იძინებს იატაკზე, უბალიშოდ. მართალია იაპონელი დიდი ელეგანტურობით არ გამოირჩევა, დაბალფეხებაა და მომცრო ტანისა გახლავთ, მაგრამ წელში ყველა გამართულია, იქნებ იატაკზე წოლის გამოც.

შუადღისას იაპონია-საბჭოთა კავშირის მეგობრობის საზოგადოების ხიროსიმას განყოფილებაში შეხვედრა გვექონდა. განყოფილების თავმჯდომარემ მიცურუ ფუკურიმ და მსმენელებმა გულთბილად მიგვიღეს.

სალამოს ქალაქ კიოტოსაკენ გამოვემგზავრეთ.

კიოტო იაპონიის ერთ-ერთი უძველესი ქალაქია.

გზაზე ასტაფიევმა ბევრი რამ მიაჩნო. თურმე მასაც ძალიან უჭირს ბეჭდვა. ახალ რომანს რომ დავამთავრებ, საზღვარგარეთის გამომცემლობები ნადირობენ მასზე, ჩვენები კი სამჯერ მაინც გადამაკეთებინებენო.

ჩემი რომანების მხოლოდ 2/3-ია დაბეჭდილი, 1/3 კი ამოღებული ადგილებით შინ მიდევსო.

მიაჩნო თავის გაუხარებელ ბავშვობაზე. ვქურდობდი და ბავშვთა კოლონიაში მოვხვდი 13 წლისაო.

ყოველდღიურად უამრავ წერილს ვღებულობ მკითხველთაგან. ზოგი სიუჟეტს მანვდის, ზოგი თავის შთაბეჭდილებას მიაჩნობს, ზოგი ღვთისმადლიანი წერილს ასე ამთავრებს; ვიცი ძალიან დაკავებული ბრძანდებით და თუ შეიძლება, ნუ შენუხდებით, პასუხს ნუ მომწერთო.

სალამოს კიოტოში ჩამოვედით.

კიოტოს ინტერნაციონალური სასტუმრო.

სალამოს რესტორან „კიევი“ დიდი ბანკეტი გაგვიმართეს.

ისევ რუსისტების წრეში ვართ, ისევ შეკითხვები, რა ენაზე წერთ? იყიდება თუ არა თქვენი წიგნები საქართველოს გარდა? ნებაყოფლობით მოხდა თუ არა საქართველოს და რუსეთის შეერთება? და ა.შ.

## 16 დეკემბერი

კიოტო იაპონიის ყოფილი დედაქალაქი. იგი 1868 წლამდე იაპონიის დედაქალაქი იყო.

დილას დავათვალისწინებულ ბუდისტური ტაძარი კიომიძუ. იგი მერვე საუკუნისა გახლავთ. მთელი კომპლექსია ხის ტაძრების, ძალიან ლამაზია.

მერე დავათვალისწინებულ იაპონიის იმპერატორის ყოფილი რეზიდენცია „ნიჯიჯო“. 1603 წელს დამთავრდა მისი მშენებლობა. ზღაპრული ბაღი აქვს. ტბა. ფერადი თევზები ხელიდან გართმევენ პურის ნატეხს. ზღვის გოჭებიც არიან წყალში.



იაპონელ მწერლებთან  
ვიქტორ ასტაფიევი, რევაზ მიშველაძე

მერე დავათვალისწინებულ ბუდისტური ტაძარი ჰონენ ინი და მწერლის საფლავი. მწერლის სახელია ჯუნაჩერი ტანაძაკი. კარგა ხნის გარდაცვლილია გვითხრეს.

წვიმს.

ახლა ბაჩულია ტელევიზორს უყურებს. სვეტა სადილს ამზადებს და მალე დაიწყება ჩხუბი, „ეს არ მიყვარს, ეს რა გაგიკეთებია!“

მე ქვეყნის მეორე მხარეს ვარ. ძალიან შორს.

ტაძრის ეზოში ვდგავარ და წვიმას გავცქერო.

რაც დრო გადის მით უფრო მიზიდავს ეს ჩუმი, წყნარი ღვთის სახლები. აქ ვმშვიდდები, დიდი ქალაქი, დაკეტილი ფანჯარა, ხმაური, ტელევიზორი,... ხანდახან ისე მანვება გულზე, რომ ყვირილი მინდა.

აქ კი საათობით შემოდის ვიჯდე. ჩემი სვეტიცხოვლის ეზოში.

ღრმად მორწმუნე არასოდეს ვყოფილვარ და ვერც ვერასოდეს ვიქნები, მაგრამ რაც დრო გადის, უფრო და უფრო მიმიწევს გული მონასტრებისკენ.

სალამოს უნივერსიტეტის პროფესორის მასაძი ვატანაბეს და მისი მეუღლის იუკო ასუის სტუმრები გახლდით.

ულამაზეს პატარა რესტორანში მიგვიღეს. დიდხანს ვისაუბრეთ. ორივენი რუსული ლიტერატურის სპეციალისტები არიან. მასაძი წერს წიგნს დოსტოევსკიზე, მისი ცოლი ახმატოვაზე. ორივეს მოსკოვის უნივერსიტეტი აქვს დამთავრებული.

იუკო იასუი ამბობს, სტუდენტობისას ოთარ ჭილაძე გავიცანი, ჩემზე კარგი შთაბეჭდილება დატოვა, მოკითხვა გადაეცო.

ასტაფიევა გვიამბო ახმატოვასთან შეხვედრებზე.

მე ვთამაობდი.

## 17 დეკემბერი

დღის თორმეტ საათზე შეხვედრა გვაქვს დოვოშიმას უნივერსიტეტში. ეს უნივერსიტეტი იაპონიაში შედარებით ახალგაზრდა უნივერსიტეტია რიცხვს მიეკუთვნება. მხოლოდ 250 წლისაა.



აუდიტორიის წინაშე წარგვადგინა პოეტმა და მთარგმნელმა მასაძი ვატანაბემ.

რასაკვირველია, ასტაფიევმა დაიწყო. სახელოვან მწერალს გამოსვლაში არავითარი ზომა არ გააჩნია. ჩაერთვება და თუ არ დაქაჩე, სამ საათს ილაპარაკებს. რა თქმა უნდა მომენტი შევურჩიე და, რაკი სწავლას მოგაცდინეთ, მე და ასტაფიევი დღეს მოკლედ ვილაპარაკებთ მეთქი დავიყვირე, მაშინ როცა ასტაფიევს სიტყვა, მეტი რომ არა ვთქვა, ერთი საათის დაწყებული ჰქონდა.

შეკითხვები დაგვაყარეს.

შეხვედრა ამჯერად დიალოგის ფორმით ჩავატარეთ, ბევრი რამ ხომ ჩვენც გვინტერესებდა.

გაირკვა რომ, იაპონიაში უშუალო კონტაქტი მწერალსა და მკითხველს შორის თითქმის არ არსებობს.

სრულებით არ ტარდება, საიუბილეო საღამოები ცოცხალი მწერლების. შეხვედრები მწერლებთან, ლიტერატურული დისპუტები.

პირველი შემთხვევაა, რომ ჩვენს უნივერსიტეტში მწერლები მოვიდნენო, განაცხადა ერთმა ასპირანტმა.

იქნებ ამის გამოცაა, რომ იაპონიაში მწერალი პოპულარული კაცი არ გახლავთ.

იშვიათად იბეჭდება პრესაში ლიტერატურულ-კრიტიკული სტატიები, უფრო მოდაშია ლიტერატურული ჟურნალისტიკა, ინფორმაციები წიგნებისა და მწერლების შესახებ. ნაწარმოების გარჩევას იაპონელები ძველმოდურ, პროვინციულ ამბად თვლიანო, გვითხრა ვატანაბემ.

შეხვედრის შემდეგ ფილოლოგიის ფაკულტეტის კაბინეტ-ლაბორატორიები დაგვათვალთვალებინეს.

კათედრის ყოველ პროფესორს თავისი კაბინეტი აქვს, უმდიდრესი ბიბლიოთეკით განწყობილი.

ამ უნივერსიტეტში პროფესორი, უმეტეს შემთხვევაში სემინარს ატარებს და ასპირანტურას ხელმძღვანელობს. ლექციას იშვიათად კითხულობს.

სემინარზე ბევრი-ბევრი 10-12 სტუდენტი ესწრება.

სემინარზე ჩვეულებრივ ამბად ითვლება ყავის სმა და კოლეგიალური, პროფესიული დიალოგი პროფესორსა და სტუდენტებს შორის.

ასტაფიევს უჩვენეს ჟენევაში გამოცემული კრებული „არსებობს თუ არა ორი რუსული ლიტერატურა“ იგი რუსულ ენაზეა გამოცემული. გადამალა ვიქტორმა და მის შემოქმედებაზე დაბეჭდილ წერილს წააწყდა. ჟენევის უნივერსიტეტის პროფესორის ჟორჟ ნივას სტატიას ჰქვია: „ქვეტექსტები ვ. ასტაფიევის რომანისა „ოქროს თევზი“. ამ კრებულშივე ვინმე აბიამ ტურცის გამოკვლევაა დაბეჭდილი უკანასკნელ ხანს რუსეთში გავრცელებულ პოლიტიკურ ანეკდოტებზე.

ლექციას რომ გააცდენს პროფესორი რა დამსჯელობითი ღონისძიებები ხორციელდება მეთქი მის წინააღმდეგ, ვკითხე ფილოლოგიის ფაკულტეტის დეკანს.

როგორ შეიძლება მეცნიერის დასჯაო, გაუკვირდა, ჩვენ უაღრესად მადლობელი დავრჩებით თუ იგი დაგვირეკავს და შეგვატყობინებსო.

აუდიტორიების უმეტესობა ტელეფიცირებულია. შეიძლება გაერთიანებული ლექცია რამდენიმე აუდიტორიის წინაშე პირდაპირ ტელევიზიით წაიკითხოს ლექტორმა. ასეთ შემთხვევაში სტუდენტები ფანჯრებს არ ამტვრევენ და „გრძელ ვირს“ არ თამაშობენ. სხედან ჩუმად და ტელევიზორს შესცქერიან.

საერთოდ ლექციების უმეტესობას სტუდენტები მაგნიტაფონზე იწერენ. უმეტესობა მათგანისა პატარა მაგნიტაფონით ხელში დადის.

ხშირად შეხვედრებით უნივერსიტეტის ბაღში მიმჯდარ სტუდენტს მაგნიტოფონ-საყურეებით. იგი მეცადინეობს.

ლექციებზე დასწრება თავისუფალია, მაგრამ იშვიათად აცდენენ. საკმაოდ დიდი ფული გვაქვს სწავლისთვის გადახდილი, რომ გავაცდინოთო, ჩვენვე დაგვაკლდებაო სტუდენტებმა.

ყველა მისაღებ გამოცდას წერით აბარებენ. პროტექცია თითქმის გამორიცხულია. რადგანაც ინდივიდუალური ტესტებია დამუშავებული და წინასწარ დამპარგალკება ან „პაროლი“ გამორიცხულიაო. დეკანის ამ ნათქვამის სისწორეზე თავს ვერ დავდებთ.

ხუთ საათზე ტოკიოსაკენ გამოვემგზავრეთ.

სადგურზე ყოველ 20 მეტრში დგას ნიშანი წარწერით, რა ნომერი ვაგონი ჩერდება. ამიტომ არავინ გარბის დაოთხილი ცხენივით მატარებლის ჩამოდგომის შემდეგ.

მატარებელი „ტოკიო-ხიროსიმა“ ყოველ თხუთმეტ წუთში დადის. საათში 250კმ. სიჩქარით.

საღამოს 8 საათზე ტოკიოში ვართ და კვლავ სასტუმრო „მიცუი ურბალში“ ჩამოვხტით.

ტელევიზორი ჩავრთე, ერთ-ერთ არხზე ხმა არ აქვს გამოსახულებას. სამაგიეროდ ხელით რაღაც ნიშნებს აკეთებენ. ის იყო გადავწყვიტე, გაფუჭებული ტელევიზორი შემხვდა მეთქი, რომ ელენამ დამირეკა, VI არხზე ყრუ-მუნჯებისთვის სპეციალური გადაცემაა და თუ გაინტერესებთ, ნახეთო.

მატარებლის სალონში მორთმეული ცივი და გემრიელი ლუდი ურიგო როდი გახლავთ, მაგრამ არც ის გაცემა დამავინწყდება, ერთი იაპონელი მოქალაქის სახეზე რომ შევნიშნე, როცა ასტაფიევმა განაცხადა, ამ ორი კვირის წინათ ოროთახიანი ბინა მივიღეო.

ბინა? მწერალს? უფასოდ?

ხომ არ ხუმრობს ბატონი ასტაფიევი?

ასტაფიევი არ ხუმრობდა. იაპონიაში კი უფასოდ ბინის ან მინის ნაკვეთის მიღება, არც მეტი არც ნაკლები, წარმოუდგენელი ამბავია.

ტელევიზიამ მკითხველი შეჭამა, გვეუბნებიან იაპონელი მწერლები.

მოდამია კასეტებზე ჩანერილი წიგნები და ნახატი. წიგნები, ჟურნალი, რაც გადავშალე, ყველგან მხოლოდ ნახატებია და პორნოგრაფია.

რა პრობლემები აწუხებთ ე.წ. სერიოზული ლიტერატურის წარმომადგენლებს იაპონიაში?

უპირველეს ყოვლისა ეს გახლავთ, ნაციონალური პრობლემა:

თურმე ნუ იტყვით, იაპონიას ნაციონალური სახის დაკარგვის საფრთხე ემუქრება. მწერლები დარდობენ, რომ ქალაქი გავეროპელდა, აშენებენ თანამედროვე მრავალსართულიან ამერიკული ტიპის სახლებს.

იაპონელი კიმანოში იშვიათია ქუჩაში და ა.შ.

მეორე პრობლემა რაც იაპონელ მწერლებს აწუხებთ, ეს არის ისევ ურბანიზმთან დაკავშირებული ტექნიზაციის პრობლემა. მანქანამ შეჭამა პიროვნება. ყველგან ავტომატი და ტელემექანიკა. კაცი დაიკარგა იაპონიაში. სამსახურში რომ კაცი ეწყობა, კომპიუტერულ გამოცდას გადის...

მესამე პრობლემა ეს არის მშვიდობის პრობლემა. ხალხი რომელმაც ხიროსამა გამოსცადა, აღარ იომებს, გაისმის პროგრესულ იაპონელ მწერალთა ნაწერებში.

## 18 დეკემბერი

დილით იაპონიის ერთ-ერთ უძველეს ქალაქში – კამაკურაში გავემგზავრეთ. კამაკურა იაპონიის დედაქალაქი იყო 1180-1333 წლებში. ზღვისპირა, საკურორტო ქალაქია. უძველესი მონასტრებითა და უმდიდრესი საზღვაო ვილებით.

გვიჩვენეს სახლი, რომელშიც მოხუცმა ისიკავა ტაკუბოკუმ თავი მოიკლა.

დავავალიერეთ ბუდის უდიდესი ქანდაკება XIV საუკუნეში დადგმული.

თავის რეზიდენციაში მიგვიღო ცნობილმა მწერალმა აზია-აფრიკის მწერალთა ასოციაციის გენერალურმა მდივანმა უიკო კურიჰარამ.

დიდხანს ვისაუბრეთ ლიტერატურაზე.

კურიჰარამ ხაზი გაუსვა ქვეყნად კეთილი ნების დასამკვიდრებლად მწერალთა ერთობლივი მეცადინეობის დიდ მნიშვნელობას.

თქვა რომ მიუხედავად კომუნიკაციის საშუალებათა გაზრდისა, ადამიანები მაინც მარტონი არიან. დიდ სახელმწიფოებს ურთიერთგაგება არ გააჩნიათ დედამიწის სასიცოცხლო საკითხებზე. არა და წლები გადის, დედამიწაზე ყოველდღიურად შიმშილით ათასობით ბავშვი იხოცებაო.

სხვათაშორის კურიჰარამ გვაჩვენა მის მიერ შედგენილი მსოფლიო პროლეტარული ლიტერატურის 5 ტომი.

ილაპარაკა იმაზე რომ ადამიანსა და ბუნებას შორის ჰარმონია დაირღვა. თუ აქამდე ადამიანი და ბუნება ორგანულ მთლიანობას წარმოადგენდნენ, ახლა ცალ-ცალკე არიან და ერთმანეთისა ხშირად არ ესმით.

კურიჰარამაც სინანულით ილაპარაკა იმაზე, რომ იაპონელები ლექსებს თითქმის აღარ კითხულობენ, პოეზია მოდიდან გავიდა. პროზისადმი ინტერესი კი, განსაკუთრებით ამერიკული, ფრანგული და რუსული ლიტერატურისადმი თანდათანობით ძლიერდება.

ასტაფიევა და მე ვილაპარაკეთ ჩვენს დამოკიდებულებაზე იაპონიასთან, ჩვენს ქვეყნებში მწერლობის მდგომარეობაზე და ა.შ.

სალამოს ტოკიოში დავბრუნდით.

## 19 დეკემბერი

დილიდანვე „თავისუფალი“ ვართ. ტოკიოს ქუჩებში დავდივართ სამივენი და ვათვალიერებთ.

ცენტრში განსაკუთრებით საგრძნობია ტოკიოს ორსართულიანობა.

ყურადღება მივაქციე იმ ფაქტს, რომ ქუჩებში (ტოკი-

ოშიც და სხვაგანაც) იშვიათზე იშვიათად გვხვდებიან სხვა ეროვნების წარმომადგენლები. ორიოდ ევროპელს და ამერიკელს თუ მოვკარი თვალი. ამიტომაც ყველა უცხოელი თუ გენეტიკურ-ანთროპოლოგიურად სხვა კონტინენტი იაპონელისგან მაშინვე გამოირჩევა.

ეს აზრი რედინას გაეუზიარე. ელენა ამბობს, რომ იაპონია მსოფლიოს იმ თითოთჩამოსათვლელ ქვეყნებს შორისაა, რომელიც უცხოელს თავშესაფარს არ აძლევს. შეაღწიო იაპონელის სულში ძალიან ძნელია თურმე. ისინი რასაკვირველია, ერთი შეხედვით, ხელს რომ არ გკრავენ მაგრამ ნელა, ღიმილ-ღიმილით პირობებს შეგიქმნიან ისეთს რომ შენ თვითონვე აიბარგო აქედანო. ამიტომაც იაპონელი შედარებით სხვებთან, დღემდე ინარჩუნებს შეურევლობას და სისხლის სინმინდესო.

სალამოს ექვს საათზე „რებანტეს“ შენობაში მოეწყო დიდი შეხვედრა იაპონიის მწერალთა ასოციაციის წევრებთან. შეხვედრას ესწრებოდნენ მწერლები, გამომცემლები, მთარგმნელები და ჟურნალისტები.

მოგვიხდა ვრცელი სიტყვებით გამოსვლა და პასუხის გაცემა უამრავ შეკითხვაზე, რომელთაგან ერთი ნაწილი ფრიად დელიკატურ-ქვეტექსტურ ხასიათს ატარებდა, ხოლო მეორე ნაწილი საზღვარგარეთ გაქცეულ (თუ განდევნილ) რუს მწერლებს ეხებოდა. შეხვედრა სინქრონულად ითარგმნებოდა და ინერებოდა რადიო-ტელევიზიით, ამიტომაც რასაკვირველია პასუხების გაცემისას სათანადო „სიფრთხილე“ იყო საჭირო.

შეხვედრას წარმართავდა ცნობილი იაპონელი მწერალი ნაკამოტო.

სხვათაშორის საინტერესო სიტყვა წარმოთქვა იაპონიის ერთ-ერთი ყველაზე დიდი გამომცემლობის დირექტორმა იურიო ივანამიმ. ქართველი მწერლის პატივსაცემად უნდა ვთქვათ, აღნიშნა მან, რომ მე მქონდა ბედნიერება იაპონურ ენაზე გამომეცა ქართული მწერლობის გვირგვინი „ვეფხისტყაასიანი“. მე კარგად ვიცი რომ საქართველოში ამჟამად



დიდი ლიტერატურა იქმნება და ყოველმხრივ ვეცდები გავაცნო იგი იაპონელ მკითხველსო.

ილაპარაკა ქართული კინოს მაღალ დონეზე, ახსენა რევაზ ჩხეიძე, ელდარ და გიორგი შენგელაიები, ლანა ლოლობერიძე, თენგიზ აბულაძე.

ჩემის მხრივო, დასძინა მან, სასიამოვნო სიახლე იყო ბატონი მიშველაძის ინფორმაცია იმის შესახებ რომ საქართველოში ითარგმნება და წიგნად გამოდის იაპონელ მწერალთა ნაწარები. ასე რომ ვალში არც ჩვენ უნდა დავრჩეთო.

ამ დროს მოვიდა გამომცემელი კომიამა და იაპონურად გამოცემული ჩემი ორი ნოველა მომიტანა, პატარა, კოხტა წიგნაკია ჩემი სურათით ყდაზე.


## 20 დეკემბერი

ორ საათზე შევხვდით ცნობილ იაპონელ მწერალს, თანამედროვე იაპონური ლიტერატურის კლასიკოსად აღიარებულ ინოუე იასუსის. ოთხმოცწელსმიღწეულმა პროზაიკოსმა და დრამატურგმა ბევრი გვიამბო თავის თავზე და იაპონურ ლიტერატურაზე. მართლია, ახლა „ცივილიზებული“ მსოფლიო თვლის რომ ტექნიკის საუკუნეა, მაგრამ მე ვფიქრობ რომ უკან უნდა მივბრუნდეთ კლასიკოსებისაკენ, მათ დავუგდოთ ყური, თორემ კაცობრიობა დაიღუპებაო.

ჩემს წიგნებს რომ შევხედავ ხან მეჩვენება, ბევრი რამ შევძელი და მართლაც ურიგო მწერალი როდი ვარ, ხან კი ვფიქრობ, რომ ეს ყველაფერი სისულელეა, ბავშვური თამაშია იმასთან შედარებით, რაც კლასიკოსებმა შექმნესო.

სალამოს „გუნდიისის“ დირექტორმა ასაკავამ და ლევ ტოლსტოის მთარგმნელმა მინოურამ დაგვპატიჟეს რუსულ რესტორან „ჩაიფაში“, რესტორანის მერე კი ბარში, რომელიც ასევე რუსული გახლდათ „ნა დნე“ ერქვა. უკრავდნენ რუსულ გარმონს. წიგნებით ხელში ისხდნენ იაპონელები და მღეროდ-

ნენ რუსულ სიმღერებს. მიკროფონი რომ მომაჩერეს, რა ვიმღერო მეთქი და ისევ „სულიკომ“ მიხსნა, სხვათაშორის ასტაფიევა მომადახა „სულიკო“ იმღერეო. მთელი დარბაზი ამყვა. „სულიკო“ იაპონელებმაც იცინა.



ბუდას ქანდაკებასთან

რუსულ ბარში გვიანობამდე ვისხედით. ვსვამდით მოსკოვის არაყს. არაყზე გამახსენდა იაპონურ მაღაზიაში ორგან ვნახე „ნინანდალი“, მოსკოვის ჩამოსხმა, საკმაოდ ძვირი 1500 იენი ღირს ერთი ბოთლი (0.75).

მსუბუქი ავტომანქანის მომსახურება იაპონიაში ასე ხდება: დარეკავ ტელეფონით, მოვა ავტომომსახურების ფირმის წარმომადგენელი (ვისთანაც შენ დადებული გაქვს ხელშეკრულება), დაგიტოვებს თავის მანქანას და შენს მანქანას წაიყვანს. სამ საათში მოიყვანს გამზადებულ მანქანას.

მაღაზიებში სიცარიელეა. ტელეფონით დარეკავ, ჩამოთვლი რაც გინდა, რამდენიმე წუთში კარზე მოგაყენებენ, ფულს გადაიხდი.

სალამოს მუავანაძის ბიჭმა საშუამ (ცურვის დროს დავძმაკაცდით თბილისში) ქალაქში გამასეირნა თავისი მანქანით. საელჩოს ეკონომატაშეა.

## 21 დეკემბერი

ყველაზე ძნელი დღე იყო.

მასპინძლებმა თავაზიანად შემოგვთავაზეს მაღაზიებში გავლა, იქნებ რაიმე მოგეწონოთ იაპონური და შეიძინოთო.

სანამ რედინა და ასტაფიევი ზევით-ქვევით დარჭიანობდნენ. მივადექი ერთ პატარა მაღაზიას და სწრაფად დავიცალე ხელი ფულისაგან. ვიყიდე სუვენირები და რალაც სისულელეები.

ფული აღარ მაქვს, შვებით ამოვისუნთქე.

ქუჩაში შემთხვევით გაცნობილმა იაპონელმა გოგონამ მიცურიმ (რომელიც ფრიად ნიჭიერი მხატვარი აღმოჩნდა) თავისი დახატული ფუძიამა მომიტანა, ჩემგან სახსოვრად, თუ შეიძლება, თქვენს ოთახში ეკიდოსო.

სალამოს კანაკო-სანმა და მისმა კომპანიამ დიდი ბანკეტი გაგვიმართეს.

გვიან ღამით დავიძინეთ.

დამავინწყდა, ვიყავით საელჩოში. იქ ვილაც ქართველმა მიგვილო კენაძე იური პეტროვიჩი. მე მგონი ფსევდონიმია. ასეთი გვარი ჩვენში არ გამიგია.

## 22 დეკემბერი

დილის ათი საათია.

აეროპორტისკენ მივემგზავრებით.

ტოკიოში დილით, 9:30-ზე როცა საელჩოს მანქანას ველოდებოდი, მოვიდა, ასე 35-40 წლის იაპონელი და მითხრა, ხომ არ დარჩებოდით კიდევ რამდენიმე დღის განმავლობაში იაპონიაშიო. ეს ნიშნავდა მუდმივად დარჩენას რასაკვირველია. გამეცინა. ჯერ ერთი, ვუთხარი, ერთი სული მაქვს, სანამ საქართველოს და ჩემიანებს ვნახავდე და მეორეც, რამ გაფიქრებინა ჩემთან ამ საკითხზე მოსვლა, წუთუ ისეთი სახე მაქვს მეთქი.

ბოდიში მომიხადა და წავიდა.

თვითმფრინავი – „ილ-62“ სადაცაა დაიძვრება.

ამ სტრიქონებს თვითმფრინავში ვწერ.

ზაურ ბოლქვაძე მახსენდება „უსაქართველოდ ვერ ვიცოცხლებდი, ვერც მოვკვდებოდი უსაქართველოდ“.

კიდევ ერთხელ გამოჩნდა ფუძიამა, თანდათან დაპატარავდა.

კარგად ვიფრინეთ, სრულებით არ დავღლილვარ. ეტყობა, ხანგრძლივ ფრენებს მიჩვევა უნდა.

მოსკოვში მოხდა ერთი კაზუსი:

კონვეიერმა ბარგი ჩამოიტანა, ჩემი ჩემოდანი არ ჩანს.

ვიცინი, ვიცი მალე ამოვა.

გაჩერდა კონვეიერი, ჩემი ჩემოდანი მაინც არ ჩანს.

ასტაფიევმა შიში გამოთქვა, ჩვენი თვითმფრინავი ხომ ლონდონში მიფრინავს, ალბათ არ ჩამოუტანიაო.

როგორ ფიქრობთ, რა მოხდა? თურმე აფრენაგამოცხადებული ტრაპმოსხნილი თვითმფრინავიდან ჩამოსხნეს ჩემი ჩემოდანი. მატყუებს აეროპორტის კგბ, სინამდვილეში ალბათ ჩემს ჩემოდანს საგანგებოდ ჩხრეკდნენ. ეს მხოლოდ მოსკოვში შეიძლება მოხდეს. ბოლოს, როგორც იქნა, მაღირსეს ჩემი ჩემოდანი.

საიონარა („მშვიდობით“) იაპონია.

9 მარტი

რაც შეეძლო, მოვემზადე მონღოლეთში გასამგზავრებლად. ნავიკითხე ენციკლოპედიაში „მონღოლეთი“. გავიგე, რომ მონღოლეთში 1.7 მილიონი მცხოვრებია და მოსახლეობის 20 პროცენტზე მეტს საკუთრივ მონღოლები შეადგენენ. რაზე დასულა ერთ დროს (XIII–XIV) საუკუნეში მსოფლიოს გამამწარებელი მონღოლეთი? რა უმოწყალოა ისტორია? 20% - ეს ხომ იმას ნიშნავს, რომ მონღოლები თითქმის აღარ არსებობენ. გავიგე ისიც, რომ „ხალხი“ მონღოლური სიტყვაა და სახელმწიფოს ნიშნავს.

ორნი მივემგზავრებით. ალექსანდრ ალექსიჩ რუდენკო და მე. მონღოლ და საბჭოთა ლიტერატურათმცოდნეთა შეხვედრაში უნდა მივიღოთ მონაწილეობა. მე კრიტიკის მეთოდოლოგიაზე უნდა ვისაუბრო, რუდენომ – საბჭოთა კრიტიკის განვითარების გზებზე. რუდენკო ჟურნალ „დრუჟბა ნაროდოვის“ რედაქტორის მოადგილეა, საქართველოზეა შეყვარებული. ხშირად დადის. ჭაბუას და ნოდარ დუმბაძის მეგობართანია. ახლახანს ნოდარ დუმბაძეზე წიგნი გამოსცა.

მოსკოვიდან სალამოს ცხრა საათზე გავფრინდით. 4 საათის შემდეგ ომსკში დავეშვით. ომსკში ორ საათს ვიყურყუტეთ. მერე გავფრინდით და ირკუტსკში დავეშვით სამ საათში. ახლა ირკუტსკის აეროპორტში ვთვლიმეთ ოთხ საათს და პატარა, დანჯღრეული „იაკით“ გავფრინდით მონღოლეთისკენ. თვითმფრინავს ქარი ფოთოლივით აქანავებდა..

ილუმინატორიდან დავცქეროდი მონღოლეთს. ასობით კილომეტრზე ერთი ქოხიც არ შეგხვდება. ტრამალები და თოვლი. გაყინული ტბები, გაძარცვული ხეები და თოვლი. უზარმაზარ ტერიტორიაზე 1.7 მილიონი კაცი ცხოვრობს და



აქედან, დახეთ ბედის ირონიას, 20% პროცენტი მონლოლია, დანარჩენები ჩინელები და ტიბეტელები არიან.

დალლილები, უძილობით განამებულნი ვეშვებით ულან-ბატორის პატარა აეროდრომზე.

ჩემი ძველი ნაცნობი, მონლოლეთის მწერალთა კავშირის მდივანი – ხასბატორი შორიდან ხელს მიქნევს.

ულან-ბატორისკენ მივდივართ. პატარა, გორისხელა ქალაქია. უზარმაზარი, საპარადო მოედნითა და მავზოლეუმით. ლენინის მავზოლეუმის ასლები ვიეტნამშიც და აქაც არის.

სალამოს მე და რუდენკომ გავისეირნეთ და მერე ჩვენ-ჩვენს სასთუმალს მივაშურეთ. ახლა ძილია მთავარი!

## 11 მარტი

გამომეღვიძა. გარეთ ბნელა. ჩემს საათზე ორი საათია. რაკი მონლოლეთია დრო მოსკოვს ხუთი საათით უსწრებს ე.ი. აქ შვიდი საათია, მაგრამ ჩემი საათი ხომ თბილისის დროით მუშაობს, ე.ი. ერთი საათი უნდა გამოვაკლო. ექვსი გამოდის. ვცადე ელექტროსაათის გადაყვანა ულან-ბატორის დროზე, მაგრამ არაფერი გამომივიდა და მოვეშვი.

დილით ხასბატორის ვაჟმა – მერგენმა მოგვაკითხა და ჯერ ქალაქი დაგვათვალეირებინა, შემდეგ მწერალთა კავშირში გაგვიძღვა. მიგვიღო მონლოლეთის მწერალთა კავშირის თავმჯდომარე ცუდევემა. მონლოლეთი დიდი ლიტერატურის ტრადიციებით არ გამოირჩევა. მონლოლური ლიტერატურის ფუძემდებელი ნაცადორჟი ორმოციან წლებში გარდაიცვალა. ხოლო მონლოლური თეატრისა და მხატვრობის ფუძემდებლები დღესაც ცოცხალნი არიან. მანამდე მომთაბარე მონლოლები ფოლკლორულ ნაწარმოებებს ჰქმნიდნენ. ცნობილია შუასაუკუნეების თქმულებები გესერიადა და ჯანქარი. დიდ პატივშია ერდენის ნოველები თანამედროვე მონლოლეთზე

და გარტავის პოემები – განსაკუთრებით, „ლენინი ჩვენთანაა“ და „ფრიდრიხ ენგელსი“.

მწერალთა კავშირი 1929 წელს დაარსდა. 200-მდე წევრია. მწერალთა კავშირის დაქვემდებარებაშია ქალაქის ყველა მუზეუმი და ფოლკლორული ანსამბლი.

ამაყობენ იმით, რომ პეტრე I-მა რუსებს სპეციფიური „უკაზით“ მიმართა, შეისწავლეთ მონლოლურიო.

მონლოლურად „ვეფხისტყაოსნის“ გარდა თარგმნილია ალ. გომიაშვილის, ნ. დუმბაძის, ო.იოსელიანის და გურამ ფანჯიკიძის ნაწარმოებები.

მონლოლეთის ნაციონალური გმირის რევოლუციონერ სუხაბატოსის მავზოლეუმში გვინდოდა შესვლა, მაგრამ დაკეტილი დაგვხვდა.

მონლოლური ლექსი ტრადიციულად ურითმოა. გართიმულია ზოგჯერ მხოლოდ სტროფის პირველი სიტყვები. ბოლო დროს ურითმო ლექსის ნაცვლად ახალგაზრდებმა რითმიანი ლექსის წერა დაიწყეს. ჩვეულებრივად სტრიქონის ბოლო სიტყვებს რითმავენ. მონლოლები აღშფოთებით ლაპარაკობენ, რომ ეს არ არის ორგანული მონლოლური ლიტერატურისთვის.

მონლოლებს თავიანთი ანბანი ჰქონდათ. ტამდინ სუსენმა ორმოციან წლებში დამწერლობის რეფორმა მოახდინა. მონლოლებს თავიანთ ანბანზე უარი ათქმევინა და კირილიცაზე გადაიყვანა. ამჟამად მონლოლები კირილიცათი წერენ.

გირ – სახლს, ანუ იურტას ჰქვია.

მიღების შემდეგ წავედით უძველეს ქალაქ ცუმატში.

პატარა პროვინციული ქალაქია. ამათი მცხეთა.

ცუმატში გვითხრეს რომ მონლოლეთში ძირითადად ერთი რელიგია იყო გაბატონებული – ბუდიზმი, რეფორმაციის შემდეგ 700 ბუდისტური ტაძრიდან თითქმის ყველა დაანგრის. ეს „თითქმის“ იმას ნიშნავს, რომ მხოლოდ ერთი დატოვეს ულან-ბატორში.

დავითავალიერეთ ცუმატის დანგრეული ეკლესიის ნაშთები და თვითნასწავლი ხელოვნის ჩაგდარ სურენის ნამუშევრები. ფრინველთა ფრთისაგან და პეპლებისგან ბრწყინვალე „ნახატებს“ ჰქმნის.

გზად შევიარეთ მწყემსის იურტაში. ნაციონალურ ტანსაცმელში გამოწყობილ ქალ-ბავშვთან სურათი გადავიღე. გირ – მონღოლური სახლი ანუ კარავი მრგვალია და ზემოდან ქსოვილითაა დახურული. ირგვლივ ტყავები ან ქსოვილი აქვს. ფაქტიურად კარავია – მომთაბარე ცხოვრებით ნაკარნახევი. არა უშავს, სუფთად არიან.

რძეგარეულ ჩაის სვამენ.

ხორცი (ცხვრის ქონი) მათი საყვარელი საჭმელია.

ნაციონალური კაბა – დერ, დღესაც ბევრს აცვია.

მონღოლი „სამბინოს“ – გამარჯობას მხოლოდ ნაცნობს ეტყვის, ჩემს მიერ ნანახ სხვა აზიელებთან შეარებით უფრო თავდაჭერილი ხალხია. კბილებს უბრალოდ არ გიჩვენებენ.

ცივა.

მონღოლური პეიზაჟი. ტრამალები. მზე. ყინვა. თოვლი. გაშლილი სტეპი.

ცხვრის ხორცის ყაურმა და ხინკალი ვჭამეთ. ჩვენ ერთადერთი ნაციონალური კერძი გვაქვს, ეს არის „ხინკალიო“ მითხრეს სადილობისას და მართლაც ჩვენებური ხინკლის მსგავსი ხინკლით გამიმასპინძლდნენ. კამათი არ დამიწყია. იქნებ, მართლაც ასეა.

მონღოლურში არ არის ასოები ფ და ქ.

მონღოლეთში მხოლოდ ორი გამომცემლობაა, სახელმწიფო გამომცემლობა და სახალხო განათლების გამომცემლობა.

ირგვლივ, ბრწყინვალე თოვლიანი სერებია, მაგრამ სათხილამურო სპორტი ქვეყანაში სრულებით არ ვითარდება. მონღოლებს თხილამურით სრიალის ტრადიცია არ აქვთ.

თავისებურია მონღოლური ცხენი. დაბალი და ღონიერი. ცხვარი პატარაა და ძროხა ცხვარზე ცოტა დიდი.

მერგენმა ჩემი ნოველის „ყვავების“ (რომელსაც გაზეთი პარასკევის ნომერში ბეჭდავს) ჰონორარი – 200 ტიგრიკი მომიტანა, ვიუარე მაგრამ არ მომეშვა.

რუდენკო მოიღუშა. საერთოდ ურიგო კაცი არ ჩანს, მაგრამ გონებაშეზღუდულია. კონსტანტინე გამსახურდიას რომანებზე მალლა გრიგოლ აბაშიძის „ცოტნეს“ აყენებს. ვეკამათე და გამოტყდა – ეს მარტო ჩემი აზრი არ არისო. ისტორიულ რომანშიო, ამტკიცებს ისტორიული პირები, სიუჟეტი და გამოკვეთილი ხასიათები აუცილებელი აღარ არისო, „მსჯელობებია“ მთავარი და ფილოსოფიური წიაღსვლებიო. ამ მხრივ მარკესის და ოთარ ჭილაძის პროზა სამაგალითოდ მიაჩნია. შევეცადე გადამერწმუნებინა. ნანარმოებში კაცი თუ არ არის დახატული, შთამბეჭდავი გმირი თუ არ შეგხვდა, ლაილაი ვის რად უნდა მეთქი. ძნელად, ძალიან ძნელად, ზრდილობისთვის მეთანხმება.

მონღოლეთს თავისი სატელივიზიო არხი გააჩნია. მონღოლეთის ტელევიზია კვირაში ოთხჯერ გადის ეთერში. დანარჩენ დროს მონღოლი ხალხის მოთხოვნით, მოსკოვის სატელივიზიო გადაცემები იკავებს.

## 12 მარტი

დილით მერგენმა მოგვაკითხა და ორი, უაღრესად საინტერესო რამ გვიჩვენა. ერთი – 700-დან სასწაულებრივად გადარჩენილი ბუდისტური ტაძარი – მოქმედი. მაგიური სანახაობაა, თავგადაპარსული მონღოლი მღვდლები ფეხმორთხმით სხედან და ხმამაღლა გალობ-ლოცულობენ, ყვავების ხმას გამოსცემენ. მერე დავათვალიერეთ საეკლესიო მუზეუმი. ბუდას ათასნაირი ქანდაკება. მათ შორის ბევრი შუსაუკუნური ბუდას ქანდაკება ოქროსგანაა ჩამოსხმული.

მერგენი საუბარში მონღოლებთან ხშირად ხმარობს სიტყ-

ვას „ჭიჭიკო“, რაც თურმე მონღოლურად პატარას ნიშნავს.

11 საათზე მწერალთა კავშირში ვართ. დაიწყო ჩვენი გამოსვლები. პირველი მოხსენება რუდენკოსი, მეორე - ჩემი.

რუდენკოს თემაა – საბჭოთა ლიტერატურის ახალი მოვლენები. რუდენკო ამბობს 60-იან წლებში ჩვენს ლიტერატურაში პირველად გაჩნდა პატარა, ჩვეულებრივი ადამიანი. იგი იური ტრიფონოვმა შემოიყვანაო. 70-იან წლებში ჩვენს მკითხველს ისევ დასჭირდა ამალღებულ გმირი და იგი დათა თუთაშხიას სახით გაჩნდაო.

მერე ასახელებს ყაზახურ ისტორიულ რომანს და ომის თემას, ვასილი ბიკოვის შემოქმედებაში.

ახლაო, გვიამბობს რუდენკო, ჩვენში ლიტერატურა დოკუმენტური ხდებაო. ლენინგრადადელმა დანიელ გრანინმა და ბელორუსმა ალეს ადამოვიჩმა მაგნიტოფონზე ჩაინერეს ომის მონაწილეთა მოგონებები და მშვენიერი წიგნები გამოვიდაო.

ფართო, მონღოლური სახეები. მწერლები მთელი სერიოზულობით იწერენ რუდენკოს ნაბოღვარს.

შესვენებაზე ხასბატორის ოჯახში ვისადილეთ. მისი მეუღლე – ცერემხანი დიდი სიყვარულით შეგვხვდა.

მერე საელჩოში მივედი. საელჩოს კულტურულმა ატაშემ გვითხრა ამ ბოლო 5 წელიწადში 27 რომანიდან – 20 ისტორიულია. მონღოლი მწერლები თანამედროვეობაზე არ წერენო. წარსულის ნოსტალგია სჭირთო. რატომ არ ჩანან სსრკ-ში ნიჭიერი ახალგაზრდა მწერლებიო, გვკითხა საელჩოს კაცმა. სოციალური მოთხოვნა არ არისო კარგ მწერლებზე – წაიფილოსოფოსა რუდენკომ.

მოვიკითხე რუსთაველის მთარგმნელი კომბოჯავი. მითხრეს 10 წლის წინ გარდაიცვალაო.

4 საათზე ჩემი მოხსენებაა. შევეცადე საუბარი იუმორით შემელემაზებინა. მოხსენება გვერდზე გადავდე და ზეპირად ვილაპარაკე – კრიტიკის მეთოდოლოგიაზე. ხასბატორი თარგმნის. მე მგონი ურიგოდ არ გამომივიდა გამოსვლა.

მოხსენების შემდეგ კითხვები დამაყარეს. ყველაფერს მეკითხებიან: რატომ არ ასწავლიან სსრკ-ში ვრცლად ნაციონალურ ლიტერატურებს და რატომ ასწავლიან მხოლოდ რუსულ ლიტერატურას, რატომაა სკოლის სახელმძღვანელო სსრკ-ს ისტორია მხოლოდ რუსეთის ისტორია. სწორია თუ არა დადგენილება ალკოჰოლზე, რა ფუნქციები აქვს თანამედროვე კრიტიკოსს, რატომ არსებობს აკრძალული თემები ლიტერატურაში, რატომ არ შუქდება 37 წლის ამბები?

ვუპასუხე, რაც შეიძლებოდა, ტაქტიანად. ვიცი, რომ ყველაფრის თქმა არ შეიძლება. რა ვიცი, რა კაცია რუდენკო. იქნებ დამასმინოს მოსკოვში?

სალამოს დავესწარი მწერალთა კავშირის ფოლკლორული ანსამბლის კონცერტს, რომელიც სპეციალურად ჩვენთვის ჩაატარეს. ძირითადად უაკომპანიმენტოდ მღერიან. სიმღერები ერთხმია.

მონღოლები გუნდურად თითქმის არ მღერიან. თითო კაცი მღერის. მტერმა მოისმინა – ეს არის უგემოვნო, სტეპის ლილინი, მგლის ყმუილს წააგავს.

### 13 მარტი

დილით დავათვალიერეთ მონღოლეთის სამხატვრო გალერეა. მონღოლური სტილი იყო გაბატონებული სახვით ხელოვნებაში, შუქ-ჩრდილისა და პერსპექტივის გარეშე ხატავდნენ – ერთ სიბრტყეზე. ძალიან საინტერესოა, ძველი ნახატები. მერე ვერცხლის ნაკეთობათა გალერეა ვნახეთ. უნდა აღინიშნოს, რომ ვერცხლის ქამარ-ხანჯლები და უნაგირები, აგრეთვე ვერცხლის სურები საოცარ დონეზე აქვთ გაკეთებული. იქ, მართლაც დიდი ოსტატობა იგრძნობა.

11 საათიდან ისევ მწერალთა ფორუმზე ვართ. ისევ მომინა გამოსვლამ. ვიცი, რომ საქართველოში ყველაზე მაღა-



ლი დონის ლიტერატურა და ცოტა რამ გვიამბეთო. ვუპასუხე უამრავ შეკითხვას.

4 საათზე გავემგზავრეთ ულან-ბატორიდან 30 კილომეტრში მდებარე აგარაკზე. ბაკურიანის მსგავსი ადგილია. თოვს. ჩვეულებრივი დისკოტეკა და ცეკვა. ჩვენც გავერით. ახალგაზრდობა ყველგან ახალგაზრდობაა.

ყინვა 35 გრადუსს აღწევს გარეთ. თოვა შეწყვეტილა. ცა მოსარკულა.

#### 14 მარტი

12 საათზე დავბრუნდით აგარაკიდან და პირდაპირ წაგვიყვანეს მონღოლეთის საოცრების – ბოგდახანის მუზეუმის სანახავად.

ბოგდახანი მონღოლეთის მმართველი იყო და 1924 წელს გარდაიცვალა. გეგონებათ, XIII ჰა, XIV საუკუნის იმპერატორი. საოცარი სიმდიდრე მოუხვეჭია. თვალი აგიპარპალდება მილიონი ალმასით მოოჭვილ მის ტანსაცმელს რომ ნახავ. აგერ, გუშინწინდელ ხანს, ხელით დაატარებდნენ – ოქროს ჩარდახში იჯდა.

რა ქვეყნის იმპერატორის საჩუქრები არ მიუღია. მათ შორის ნიკოლოზ მეორის ნაჩუქარი ბრწყინვალე ჩექმები. ცოლი რომ მოუკვდა, 56 წლისამ 18 წლის გოგო შეირთო და 6 თვეში თვითონაც გარდაიცვალა.

მერე ვნახეთ ბალშინენის გახმაურებული ფილმი „მე შენ მიყვარხარ“, არაუშავს, ახალგაზრდების ცხოვრებაზე შექმნილი, არცთუ ურიგო, ფილმია.

სალამოს ცედევა, ხასბატორმა და მწერალთა კავშირის სხვა ხელმძღვანელებმა გამოსათხოვარი ბანკეტი გაგვიმართეს. ერთმანეთს თბილი სიტყვებით მივმართეთ.

იქ გავიგე, რომ მწერალთა კავშირში ახალი წევრის მიღების

საკითხს მწერალთა კავშირის სამდივნო წყვეტს. არავითარი ფარული კენჭისყრა და ამისთანები. წიგნების ტირაჟი დაახლოებით ჩვენნაირია. წიგნები ნაკლებად სალდება.

სალამოს მე და რუდენკომ სტალინზე ვიკამათეთ. ვერ შევთანხმდით. სტალინი სძულს. მე კი სტალინის სიდიდეს და ნიჭს პატივს ვცემ.

სალამოს საელჩოს თანამშრომელმა იურიმ შემოგვიარა და მონღოლეთზე ბევრი საინტერესო რამ გვიამბო. 1956-57 წლებში აქ ელჩად იყო ვ. მოლოტოვი, ერთი თვის წინ შევარდნაძეს შემოუვლია, 3 საათიანი ლექცია ჩავგიტარა, ცოლი ნანული რაჟდენოვნა ახლდაო. რუსულად ძალიან საინტერესოდ, ზეპირად გვესაუბრაო. ძალიან მოგვეწონაო. გვითხრა, ახლახან გრომიკოს მეგობარი, დიპლომატიური ინსტიტუტის რექტორი მოხსნეს და პარტიიდან გარიცხეს მექრთამეობისათვისო. რა საოცარი ამბები ხდება. როგორ მოიშალა სახსრებში ეს „საათივით აწყობილი“ სახელმწიფო. რა „ახალი ადამიანი“ აღგვიზრდია? მე ადრეც ვიცოდი, რომ მარქსიზმი უტოპიაა. სსრკ მალე დაინგრევა.

დღეს მონღოლეთის ცენტრალურმა ლიტერატურულმა გაზეთმა „უტგა ზოხიოლ ურლაგმა“ ჩემი ნოველა „ყვავები“ გამოაქვეყნა. ხ. მერგენმა თარგმნა. აქაური მწერლები ქათინაურს მეუბნებიან, ძალიან მოგვეწონა, ალეგორიული და ფილოსოფიურიო.

#### 15 მარტი

სანოლშივე მოგონებებით გამომელვიძა. შთაბეჭდილება გუშინდელი მოგდახანის მუზეუმის. თვალწინ მიდგას ბოგდახანის იურტა.

საერთოდ ყველაფერი მონღოლს მომთაბარეობისთვის აქვს მოწყობილი. მისი იურტა ვეფხვის ტყავით იყო გადახუ-

რული. ბოგდახანის ცოლის კაბა – ფარშევანგის ტყავისგან შეკერილი.

დავათვალაიერეთ ბიბლიოთეკა (საეკლესიო) ორი ათასამდე უძველესი ხელნაწერი. ტიბეტურ ენაზეა ძირითადად. ახლანდელი მონღოლები ვერ კითხულობენ.

კიდევ ერთხელ შევედით ბუდისტურ სალოცავში. ლოცვა ბარაბნების თანხლებითაა.

ჩვენს გასაცვილებლად მოვიდნენ სასტუმროში შემთხვევით გაცნობილი გოგონები – ჩიმგე, ოტგონი, განჩომეგი... მე რომ ოთახში სასაუბროდ ერთი გოგონა შემოვიპატიყუე და ცხრამეტი გოგონა და შვიდი ვაჟი მესტუმრნენ.

მე არ მჯერა სულელური ენათმეცნიერული ძიებანი, მაგრამ რაღაც საერთო გვაქვს. „მუხა“ – მონღოლურად მუდმივს ნიშნავს.

აეროპორტში ხასბატორმა, ცერემხანმა და მერგენმა გამოგვაცილეს.

ერთ დროს „ოქროს ურდოში“ სტუმრობა ქართველ მამულიშვილებს კარგს არას უქადდა. დრონი იცვალნენ.

მე სამშვიდობო მისიით გახლდით მონღოლეთში და რაკი ამ სტრიქონებს ვწერ, ე.ი. მშვიდად ვბრუნდები.

რაშია საიდუმლო იმისა, რომ მონღოლი არ მიიღო XX საუკუნემ.

მონღოლს გამოკვეთილი ატრიბუტები აქვს. მონღოლურ ძროხას ახსენებს ქვეყანა, მონღოლური ცხვარი, მონღოლური ცხენი, მონღოლური ლექსი არსებობს, მონღოლური ნაციონალური ხარი, ავადმყოფობაც საკუთარი აქვთ – მონღოლიზმი, იურტა ხომ განუმეორებელია, მონღოლური კარავი. მაშ ღმერთმა ნუ ქნას ეს ყველაფერი უმონღოლოდ დარჩეს.

## გერმანიის ფედერაციული რესპუბლიკა – 1987

### 6 ივნისი

სამსაათიანი ფრენის შემდეგ „ილ 86-ით“ ჩამოვფრინდით მაინის ფრანკფურტში. ლამაზი ქალაქია. ყველა მტკაველი გამოყენებულია, გერმანული რაციონალიზმი და სიმდიდრე იგრძნობა.

ყოველ ფეხის ნაბიჯზე ბარები და კაფეებია. ხალხი ზის ლუდს და ყავას შეექცევა და ერთობა. სასტუმრო „მონტანაში“ დავბინავდით. მერე ბრწყინვალე, ფეშენებელური ავტობუსით ქალაქი დაგვათვალაიერებინეს.

გერმანელებს როგორღაც უპოვიათ ურბანიზმიდან გამოსავალი. გერმანული ქალაქები აღარ იზრდება, ჯერ ერთი შობადაბა (თვით გერმანელებისთვის) თურმე მსოფლიოში ყველაზე დაბალია და მერე ფრანკფურტში და დიდ ქალაქებში ჩანერა პრაქტიკულად შეუძლებელია.

ფრგ უცხოელს მოქალაქეობას ძნელად აძლევს. ქალაქში სკვერები და მანქანებიც წარმოიდგინეთ, ცოტაა. მე ველოდი მანქანების ნიაღვარს. უმეტესობა ფეხით დადის და ცენტრში ჰაერიც შედარებით, სუფთაა. მხოლოდ მდინარე მაინია საშინლად ჭუჭყიან-ქიმიკატიანი.

კოპნია გერმანული სახლები. ჭიშკრებს და გარაჟებს რკინის კარები აქვთ. დავაკვირდი სასტუმროს წინ. მოვიდა კაცი მანქანით, ამოიღო ჯიბიდან, მანქანიდან გადმოუსესვლად ტელევიზორის პულტის მსგავსი ღილაკიანი ფირფიტა, მიუმვირა ჭიშკარს, აინია მალლა ჭიშკარმა, შევიდა კაცი მანქანით და ჭიშკარი ნელ-ნელა დაეშვა.

ვიყავით გოეთეს სახლ-მუზეუმში. აქ, ფრანკფურტშია დაბადებული. თავის დროზე უმდიდრესი ოჯახი ყოფილა.

პირველი წყალსაქაჩი ტუმბო მათ ჰქონიათ ოჯახში, ხუთსართულიანი სახლი აქვს. მშვენივრად მონყობილი დიდი ბიბლიოთეკა. სანამ ვაიმარში გადავიდოდა, აქ ცხოვრობდა.

სალამოს ვივახმემთ ბერძნულ რესტორანში. შვედური პრინციპის მაგიდა. რა გინდა სულო და გულო. სოკო. ზეთისხილი.

გერმანელი მოქალაქე, რომელიც დაჯდა კრემლის წინ, აქ გმირად ითვლება, ჩვენთან დამნაშავედ. არადა გმირია.

ჩვენ ვეუბნებით, დაიტოვეთ მხოლოდ საშუალო რადიუსის რაკეტები, შორსმროლელი მოხსენით. არ გვეთანხმებიან, საშუალოთი მერე ჩვენ გერმანელებმა ერთმანეთს ვესროლოთო?

ფრგ-ს კანონებით, გდრ-ს მოქალაქე და ფრგ-მოქალაქე ერთი სახელმწიფოს მოქალაქედ ითვლება, და ყველგან პრივილეგიით სარგებლობს. თუ მოახერხა კაცმა გდრ-დან გადმოსვლა, იგი მაშინვე ყურადღების ცენტრშია და ყოველგვარ პირობებს უქმნიან.

## 7 ივნისი

დილიდანვე ტრირში გავემგზავრეთ. დიდებული გზა. ჩვენი მშვენიერი გიდი – ქრისტიანა გვიამბობს გზაში ფრგ-ზე, ეკონომიკაზე, კულტურაზე, სოციალურ ყოფაზე.

სკოლა სამი ნაწილისგან შედგება. დაწყებითი, საშუალო და გიმნაზია. დაწყებითია 4 კლასი, საშუალო 3 და გიმნაზია 4. ასე რომ უნივერსიტეტამდე ისინი ჩვიდმეტ წელიწადს სწავლობენ. უმაღლესში ჩარიცხვა გიმნაზიის ატესტატის მიხედვითაა. ლექცია 1 საათია. მხოლოდ დიალოგის ფორმით ტარდება.

არ არის კურსიდან კურსზე გადასასვლელი გამოცდები. განსაზღვრული რაოდენობის გამოცდა უნდა ჩააბარო 4 ან

5 წელიწადში. სტიპენდიას მხოლოდ განსაკუთრებით ნიჭიერებს აძლევენ. განაწილება არ არის.

გერმანიაში 2.5 მილიონი უმუშევარია. უმუშევრებს სახელმწიფო ხელფასს აძლევენ. ასევე მაღალია პენსია. პენსიაზე გადაიან – ქალი (55), კაცი (60 წლის).

პროფესორი თვეში იღებს 7 000 მარკას.

ყველაზე იაფი მანქანა „ლადა“ ღირს 11 000, ხოლო მერსედესი 26 000.

ქალაქები ცარიელდება. ყველანი სოფელში გარბიან.

მონამღვლია მთელი ქვეყანა ქიმიკატებით.

შემოვიდა წესი „30-50 მეტრიანი ზონა“ არ შეიძლება ცხოვრება და ხილის მოყვანა გზისპირებზე. გამონაბოლქვის გამო ხილი მავნებელი ხდება.

„მწვანე პარტია“ იბრძვის ეკოლოგიის დასაცავად და წარმოიდგინეთ, ატომის მშვიდობიანი გამოყენების წინააღმდეგაც.

მაინც რა ვუყავით ბუნებას. რაინი და მაინი ულამაზესი მდინარეებია (საერთოდ ზღაპრული ბუნებაა) მაგრამ არც თევზია და არც ბანაობა შეიძლება.

შიდსზე ვიკითხეთ. ჯერ 50 კაცი მოკვდა იმუნოსინდრომით. 5-10 წელია ინკუბაციის პერიოდი. ბოლოს ყველა შიდსით კვდება მეთქი, ეგ გამოგონილი ავადმყოფობაა მეთქი, გაეცინა ყველას.

ქუჩებში სულ ზეიმია.

უზარმაზარი ზვრები, ვენახს არ ნამლავენ, მავნეაო.

ტრირში მარქსის მშობლიური სახლი ვნახეთ.

გაზეთში წერია, იმ კაცზე ვინც თვითმფრინავი დასვა კრემლის მოედანზე, აქებენ. სურათებია გადაღებული მშობლებთან ერთად. შეშფოთებულია ხალხი მისი ბედი, 19 წლის ბიჭმა მიაღწია იმას, რომ ერთ დღეს უცებ მოახსენებინა სსრკ-ს თავდაცვის მინისტრი, ავიაციის მინისტრი და სხვა უამრავი ქვედა საფეხურებზე მდგომი ხალხი.



გაზეთი შემოგვანოდეს, რომელშიც ეწერა: „კრემლზე, წითელ მოედანზე დაშვება ხომ ყოველი გერმანელი მფრინავის ოცნებააო“.

ღვინის უზარმაზარი რაიონი დავათვალიერეთ, ფერდობებზე შეფენილი ზვრებით. ამდენი ვენახი არსად მინახავს.

სალამოს რესტორანში ბევრი გერმანული ღვინო დავლიეთ. მშვენიერი ღვინოა.

გერმანიაში მოღრუბლული ამინდებია.

„მოზელ“ ჰქვია მევენახეობის მხარეს.

მონამლულია მდინარეები, მონამლულია გზისპირა ბალახი.

მთავარია ფრინველები არ განყდნენ.

სალამოს ფრანკფურტში ქუჩაში მკვდარი მტრედი ვნახეთ. ისე დამწყდა გული თითქოს ახლობელი დამეკარგოს.

## 8 ივნისი

ბონს ვესტუმრეთ, ფრგ-ს დედაქალაქს.

პატარა, პროვინციული ქალაქია.

სახელგანთქმული ჯერჯერობით იმით არის, რომ იქ ბეთჰოვენი დაიბადა.

მიგვიყვანეს ბუნდესტაგის შენობაში, ბუნდესტაგის სხდომას დაგვასწრეს, უბრალო ამბავია? არა მგონია, პოლიტიკურს სხდომაზე უბრალო ტურისტებს (გნებავთ დელეგატებს) ასწრებდნენ.

ყველა საკითხს უმალლესი დემოკრატიის ვითარებაში განიხილავენო, გიღმა.

ხმის მიცემა ასე ხდება: საკითხს რომ დააყენებენ, განიხილავენ, ხმის მიცემამდე განხილვა ხდება. მერე შესვენება ცხადდება. გადიან გარეთ და შემოდინ სამი კარებიდან. ერთს აწერია: „თანახმა ვარ“, მეორეს „წინააღმდეგი ვარ“, მესამეს „თავს ვიკავებ“.

ფრთაგამლილი არწივი – ერთიანი გერმანიის სიმბოლო ბუნდესტაგის სხდომათა დარბაზში, ცენტრში აღმართულა.

ბუკლეტებზე, რომელიც გვაჩუქეს, ჰიტლერის სურათიცაა.

ისევ გზაში ვართ.

მთელი გერმანია მწვანეშია ჩაფლული. გერმანელებმა იმდენი ფული იშოვეს, რომ მიწისქვეშა გარაჟები გააკეთეს, ამიტომ ბევრი მანქანა არ ჩანს.

ძირითადად თურქები, ესპანელები, იუგოსლავები და იტალიელები მუშაობენ საყოფაცხოვრებო მომსახურების სფეროში.

ქარხნების დემონტაჟს აკეთებენ. ამიტომ ჰაერი შედარებით სუფთაა. ფული აქვთ და ყველაფერს ყიდულობენ.

სოფლის მეურნეობაში ყველაფერი მექანიზებულია. „მუზელში“ ფერმერმა გვითხრა: 100 ჰექტარ ვენახს მე და ჩემი შვილი ორნი ვამუშავებთო. მარტო კრეფაში გვეხმარებიანო ნათესავები.

ნაშუადღევს კიოლნში ჩამოვედით და სასტუმრო „ბრისტოლში“ დავბინავდით.

წვიმს.

დავათვალიერეთ ქალაქი და გერმანიის მშვენება კიოლნის ტაძარი – რომელიც 800 წლისაა.

მსოფლიოს ერთი ყველაზე დიდი გოთური სტილის კათოლიკური ტაძარია.

გერმანელები თავისუფლად და ცოტა უნმანურად მოლაპარაკე ხალხია. ერთ ღვინოს „თეთრი ტრაკი“ ჰქვია და ეტიკეტზეც „ტრაკია“ დახატული.

სალამოს კიოლნი ლამაზია. იგი ფრგ-ს მესამე თუ მეოთხე ქალაქია მიუნხენის, ფრანკფურტის, ბერლინის შემდეგ.

ფეთქავს ღამის ცხოვრება. სექსფილმები და საროსკიპოები. თუმცა შიდსის შიშის ქარი იგრძნობა. ზოგმა მიატოვა

ეს ბიზნესი, „სექსშოპები“ და „სექსბარები“ შემოსავალს აღარ იძლევაო, გიდმა.

## 9 ივნისი

საუზმის შემდეგ ქალაქში ვიხეტიალეთ.

რა უყო სოციალიზმმა ადამიანს! უნდა გავიმეორო ეს სიტყვები ბევრჯერ. დავდივართ ერთად ცხვრებივით (მე ვცდილობ ცოტა განზე ვიყო). დილით საუზმეზე რიგი გაკეთდა, ჩვენ ხომ რიგის გარეშე არ შეგვიძლია. ერთმანეთის გვეშინია საუბრის დროს. მთელს ევროპაში ჰალსტუხი არავის უკეთია ჩვენი დელეგაციის წევრების გარდა (მე ვარ გამონაკლისი. „ფიდელ კასტროს“ ფორმით დავდივარ და უკვირთ. თმებიც სხვანაირად აქვთ ჩვენებს შეკრეჭილი. ირონიულ ღიმილს გვაყოლებენ, როცა ქუჩაში მივდივართ. ყველა ხვდება რომ სსრკ-დან ვართ.

გაირკვა, რომ ჩვენი 142 მარკით მხოლოდ ორი პერანგის ყიდვა შეგვიძლია.

დღის მეორე ნახევარში ვესტუმრეთ ფრგ-ს „ცოდნას“.

აქ ლექციები ისე არ ტარდება, როგორც ჩვენთან, ჩამოდიან ერთი კვირა მსმენელები და იძენენ ცოდნას. აქვე წვებიან, ათევენ ღამეს. ჩამოდიან მანქანებით. ეს არის რაღაც საშუალო კურსები სახალხო უნივერსიტეტსა და ინსტიტუტის ფაკულტეტს შორის. დიდებული შენობა აქვს კიოლნში „ცოდნას“.

მიგვიღეს მაღალ დონეზე. ბანანი, ქოქოსი, ვაშლი, ანანასი..

სიტყვა ვთქვი. კარგია რომ ცოდნის ლექციები წარმოებისგან მონყვევით ტარდება თქვენთან. ჩვენთან ყველაფერი უფასოა და ამიტომ უხარისხო მეთქი. არ მოეწონა ჩვენს ხელმძღვანელს ვლადიმერ სერგეევიჩს. შენიშვნა მომცა და

კბილები დაუუკრაჭუნე; შენ ჭკუა შენს შვილებს დაარიგე მეთქი.

სალამოს სასტუროში ორი გადაცემა ვნახეთ ტელევიზორში. 1) კრემლის მფრინავზე, 2) ტეტერზე (ამ უკანასკნელზე, დიდი, ერთსაათიანი გადაცემა იყო.)

გვიჩვენეს ყველაფერი. როგორი ხასიათი აქვს, რა კაპრიზები ახასიათებს, რა ოჯახი ჰყავს. როგორი იყო ახალგაზრდობაში. რა კაბებს იცვამს უფრო ხშირად, როგორ საქმიანობს ოჯახში.

## 10 ივნისი

ისევ კიოლნში ვართ.

ბენზინგასამართ სადგურთან მივედი დილით. ზოგი ბენზინი ძვირია, ზოგი შედარებით იაფი. მითხრეს იაფია ის ბენზინია, რომელსაც გამონაბოლქვი ნაკლები აქვს (ახალშენარევიანი ბენზინი გამოუგონიათ), რომ, შოფრებმა ჰაერი არ გააჭუჭყიანონ თავიანთი მანქანებითო.

საოცარი მოდა შემოვიდა. ფართხუნა ბლუზა-ფუფაიკებით და თეთრი სანმერთულებით დადის ხალხი. განსაკუთრებით გოგონები, თითქოს სანოლიდან ესესაა გადმოსულანო, მოკლე, შარვლისმაგვარი ნაჭრებით დადიან. თითქოს არც მორგებული აქვს ტანზე (რაღაც სხვა სიტყვა კინალამ წამომცდა) და რა საოცარია მოდა, თითქოს ეს მოშვებულობა, ეს მოურგებლობაა სწორედ ღამაზი. ასე რომ ყოველგვარი მოდა ღამაზია.

კიდევ ერთხელ, მარტო მივედი კიოლნის ტაძართან დილით. „გასაყეყეებელიაო“ შალვა დადიანი რომ იტყოდა, სწორედ ეგ არის. ექვსი საუკუნე აშენეს და კინალამ ერთ წუთში დაანგრის. ბომბი იქვე, ოცდაათ მეტრში აფეთქდა და მარჯვენა მხარი ჩამოამტვრია ტაძარს, შეიძლება უფრო მეტი სიგიჟე? ეს იცის ომმა.

მარტო რატომ დადიხართო, ჩემს გასაგონად ვილაცას უთხრა ხელმძღვანელმა. ჩემს ცხოვრებაში აღარ წამოვალ ტურისტად. დამამცირებელია ჩემი წონის კაცი ამ ჯგუფში არავინაა. თავსაც არ უნდა ვუყადრებდე ამ ჭინჭებზე მონადირე ვაჭრუკანებს.

ფრგ-ში 35 საათიანი სამუშაო კვირაა კაცებისთვის, ქალებისთვის კი 24 საათიანი.

ვენვიეთ მოსამზადაბელი კურსის მსგავს დაწესებულებას. იხდიან ფულს და ემზადებიან რაშიც უნდათ: გერმანული ენიდან დაწყებული, კომპიუტერით დამთავრებული.

სად გინდა მეცადინეობა? ოფიციალურ შენობაში თუ შინ? ვინ გინდა მასწავლებლად კაცი თუ ქალი? არჩევანი დიდია.

სადილის შემდეგ შეხვედრა მოგვინყვეს კიოლნის უნივერსიტეტში.

600 წლისაა, 48 ათასი სტუდენტი სწავლობს. ფაკულტეტები: ეკონომიკური, სამეცნიერო-საზოგადოებრივი, იურიდიული, სამედიცინო, ფილოლოგიური, პედაგოგიური, ფილოსოფიური, მათემატიკური.

სტუდენტებს თავიანთი პარლამენტი აქვთ. ისინი ირჩევენ საგნებს, რა ჩააბარონ. შეუძლიათ ლექტორის კი არა, დეკანის და რექტორის შეცვლაც.

უნივერსიტეტი სახელმწიფოს არ ემორჩილება. რექტორს ირჩევენ და მერე უსიტყვოდ ემორჩილებიან.

ახალგაზრდები აქაც ცოტას კითხულობენ. ყველაფერი ვინრო სპეციალობას ემორჩილება. სტუდენტებს ვკითხე, თომას მანი და ჰაინრიხ მანი არ გაუგონიათ. ამერიკულ წიგნებს კითხულობენ.

სალამოს შეხვედრა მოგვინყვეს პროფკავშირებში. პროფკავშირი აწყობს დემონსტრაციებს, გაფიცვებს, ექომაგება მუშებს, განაგებს შრომით მონყობას.

გორბაჩოვი სიმპათიით მოიხსენიეს.

ლამის კიოლნი ნარკომანებით, ხულიგნებით და ბოზებითაა სავსე.

## 11 ივნისი

კიოლნიდან ჰამბურგში მივემგზავრებით, ექვსსაათიანი გზა. დალლა არც კი გვიგრძნია.

გზაზე ქრისტიანამ გვიამბო, როგორ სწავლობდა თვითონ სლავისტიკის ფაკულტეტზე ჰამბურგის უნივერსიტეტში.

მისაღებს, როგორც ვიცი, არ აბარებენ. გიმნაზიის ნიშნებით ეწყობიან. ზოგ უნივერსიტეტში გასაუბრებაა. არსებობს აუცილებელი საგნები და საგნები რომელსაც შენ თვითონ ირჩევ, როცა დეკანს ხელშეკრულებას დაუდებ, გაძლევნ საგნების სიას რაც უნდა ჩააბარო 4 წელიწადში. სულ ერთია, როდის რას ჩააბარებ. ჩვენთან ერთი ჩათვლისთვის, ვრიცხავთ. რა შენი საქმეა, როდის მოვამზადებ!

ბოლოს აბარებს სახელმწიფო გამოცდების კომისიას, შეუძლია წელიწადში ორჯერ გავიდეს სახელმწიფოზე, თუნდაც 10 წლის განმავლობაში.

პროფესორი ძირითადად მხოლოდ სემინარს ატარებს და სტუდენტთა სამეცნიერო-რეფერატულ მუშაობას ხელმძღვანელობს.

სტუდენტები თვითონ ენერებიან სემინარზე, ვიდეო მაგნიტოფონს ჩართავს ხანდახან პროფესორი და სტუდენტები იქვე უსმენენ. ზოგჯერ ლექტორი პროფესორის მოცემული თემის მიხედვით თვით სტუდენტს აბარებს.

ჩამოვედით ჰამბურგში. ძველი დიდი ქალაქია. ყოველ ქუჩას აქვს ველოსიპედით სასიარულო ტროტუარი.

ხილის მაღაზიებმა გამაოცა. მყიდველი არ ჩანს. რას უშვებიან ნეტა ამძალებულ ხილს. არა და გამოფენილია ლამაზად, რომელი ქვეყნის, რა ხილი გინდა, სულო და



გულო, ანანას-ბანანით დაწყებული ნესვითა და საზამთრო-თი გათავებული.

ჩვენი სასტუმრო არც ისე ცენტრშია.

სალამოს შეხვედრა მოგვინყვეს ჰამბურგის მარქსიზმის სკოლაში. მსმენელები ფულს იხდიან და მარქსიზმს სწავლობენ. „რაც დრო გადისო, ფრგ-ში მარქსიზმისადმი ინტერესი ნელდებაო, სსრკ თუ არ დამეხმარა ფინანსურად, შეიძლება დავხურო სკოლაო.“ სკოლის ხელმძღვანელმა.

## 12 ივნისი

ჰამბურგის ცნობილი ნავსადგური.

ქრისტიანა ამბობს, ევროპის უდიდესი ნავსადგურიაო. მართლაც მთელი ქალაქია ზღვაზე. ათასგვარი გემები, ნავეები, ხომალდები, კრეისერები, სავაჭრო და თევზსაჭერი კატერები, მოცურავე რესტორნები, მოცურავე „ბორდელები“ კი.

აქ ამუშავებენ ნედლეულს. აქვეა ქარხნები, აქვე ხდება დაკონსერვება, თევზის გაყინვა და ა.შ.

ორი გრანდიოზული რამ გვიჩვენეს. ერთი დაკიდებული ხიდი 55 მეტრი სიმაღლისა და რვაასი მეტრი სიგრძის. მეორე ელბის ფსკერზე გამავალი 2 კილომეტრიანი სამანქანო გვირაბი.

სადილის შემდეგ შეხვედრა გვექონდა ქალაქის მუნიციპალიტეტში. მდიდრულ დარბაზში მიგვიღო მუნიციპალიტეტის თავმჯდომარის მოადგილემ.

დიდხანს გვესაუბრა. გვკითხა, რას ნიშნავს „პერესტროიკა“ და იმედით უცქერით თუ არაო. ყველამ მე შემომხედა, მენ გვიხსენიო.

ვილაპარაკე, რა მეტი გზა მქონდა.

ჯერ მთლად არ გარდავმქნილვართ, მაგრამ როგორც იქნა სწორ გზაზე გავედით მეთქი. კონკრეტული მაგალითები

მოვიყვანე. პირადად, რასაკვირველია, ჭეშმარიტად ვემხრობი გორბაჩოვს თუ ანი არ აურია მეთქი.

ჩვენო, მუნიციპალიტეტის ხელმძღვანელმა (სოციალ-დემოკრატიული პარტიის წევრია) ამომრჩევლებს თვალე-ში შევცქერითო. იმ დღესვე დავკარგავთ ხმებს, რამე რომ შეგვეშლება, გარდა ამისა, ყოველ მოქალაქეს შეუძლია ჩვენი განვევის საკითხის დაყენებაო.

სალამოს ჰამბურგის ქუჩებში გავისეირნეთ. მეძავები გვექაჩებიან ღამის ბარებში და საროსკიპოებში. ვუძალიანდებთ და გავრბივართ; ჩვენ ხომ „საბჭოთა ადამიანები“ ვართ.

## 13 ივნისი

ცივა. ღრუბლიანი დღეა.

ლუბეკი ძველთაძველი ისტორიული ქალაქია. ჰამბურგიდან 70 კმ-ზე. მე-12 და მე-13 საუკუნის ტაძრებით და საცხოვრებელი სახლებით.

რესტავრაციის და ისტორიულ ძეგლთა დაცვის უმაღლესი კულტურა იგრძნობა. გიდი გვიყვება, რამდენი კაცი გაასამართლეს ძეგლის ხელყოფისა ან არასწორის რესტავრაციის გამო. უვლიან თვალისჩინივით.

უეცრად ქუჩაში ღრიალი და დაფდაფების ხმა გაისმა. რა მოხდა? ჩაიარა უზარმაზარმა დემონსტრაციამ. თმამოშვებული, ეგზალტირებული ქალები და კაცები (უმეტესწილად ახალგაზრდა). დაფ-ნალარით აღვიძებს მთელ გერმანიას და პატრიოტული სიმღერა-ლოზუნგებით არემარეს აყრუებს. რა სისხლის ყივილია ეს? ნოსტალიგა ხომ არა წარსული ომებისა გერმანიისთვის ცხვირში ძმრის დენით რომ დამთავრდა?

რალაცნაირი სისხლამღვრეული ქვეყნის შთაბეჭდილებას ტოვებს გერმანია. ჰამბურგშიც ასე იყო. სიჩუმეა ქუჩაში, მო-

ქალაქენი წყნარად დადიან ან გზისპირას ბარებში სხედან, ამ დროს ვილაც დამთხვეული წამოიყვირებს, წამოხტება, შემალღებულ ადგილს მოძებნის და ხმის ჩახლენამდე გაჰყვირის გერმანელთა უპირატესობაზე სხვა ერებთან შედარებით, იმაზე რომ ორი გერმანული სახელმწიფოს არსებობა უსამართლობაა.

დგანან და უსმენენ მრავლისმეტყველი დუმილით. ვერ გაუგებ, ეთანხმებიან თუ არა. ტაშს არ უკრავენ, მაგრამ უსმენენ კი.

ეს მხარე დაბომბესო სასტიკად ამერიკელებმა და ინგლისელებმა, წუხს გიდი. გვიჩვენებს რა ბარბაროსულად დაუბომბავთ ფრანკფურტი, კიოლნი, ჰამბურგი. სხვათაშორის ყველგან წააწყდებით სურათს: როგორ გამოიყურებოდა დაბომბილი ქალაქები. აღშფოთებას გამოთქვამენ, ასე ბარბაროსულად დაბომბვა როგორ შეიძლებოდაო. მართალია, მაგრამ თვითონ რა დღე აყარეს სხვებს (ლენინგრადს, სტალინგრადს, კიევს) დაავინყდათ?

სალამოს „ლუნა პარკში“ რალაც საშინელი, უგემოვნოდ მოწყობილი, ვითომდა ტექნიკურ, სექსუალურ საშუალებათა გამოფენა-ატრაქციონი ვნახეთ.

რითი ერთობა ხალხი. გულისამრევი ტექნიკო-პორნოგრაფია. არა, არა სულ სხვა ერი ვართ ქართველები. სერიოზული, ნიჭიერი, მაღალგემოვნებიანი.

მანანნალების შთაბეჭდილებას ტოვებენ ეს რუსები (ჩემი დელეგაციის წევრებზე ვამბობ) და შემინებულსახეებიანი შუაზიელები. ვინ არიან, რა ხალხია, ვინ დააბრალათ პროფესორობა.

ჩემს თანამეოთახეს, სამოცდაშვიდი წლის გროზნოელ პროფესორს, ზახულ ანატოლი პავლოვიჩს ეს ათი დღეა დუშის მიღებას თავი დავანებოთ, ფეხები არ დაუბანია და წინდები არ გამოუცვლია. კბილის ჯაგრისი და საპონი წამოდებული არა აქვს!

## 14 ივნისი

ჰამბურგიდან გამოვემგზავრეთ.

მაგბურგი – უძველესი საუნივერსიტეტო ქალაქი. აქ სწავლობდნენ ლომონოსოვი და პასტერნაკი. პუშკინის ლენსკიც აქ სწავლობდა („ევგენი ონეგინიდან“). დავათვალიერეთ XIII – XIV საუკუნის საყდრები. ვისადილეთ XVI საუკუნეში აშენებულ რესტორანში.

ქრისტიანა გვიამბობს ფრგ-ს სოფლის მეურნეობაზე. სოფლის მეურნეობის მაჩვენებელი ძალიან მაღალია, ძირითადად ქიმიური სასუქების ხარჯზე. ეს ქიმია ადამიანის ორგანიზმში იჭრება სასოფლო პროდუქტებიდან და ახლა წყალში გააღწია. თანაც გერმანიის მინას სრული გამოფიტვის საშიშროება ემუქრებაო.

სალამოს ბერძნულ რესტორანში ვიბანკეტეთ. ხვალ დილით მოსკოვში მივფრინავთ.

## ბულგარეთი – 1987

15 მაისი

ოთხი მწერალი მიგვიწვიეს გაბროვოს სატირისა და იუმორის მსოფლიო ფესტივალზე:

გრიგორი გორინი ისრაელის-ძე.

ჟვანეცკი მიხეილ მიხეილის-ძე.

ბელოუსი დიმიტრი გრიგორის-ძე.

მიშველაძე რევაზ აქესენტის-ძე.

სიმართლე გითხრათ ცოტა გამიკვირდა ჩემი მიწვევა. მე ჩემი თავი სატირიკოსად არ მიმაჩნია. სატირული ლიტერატურა ზოგისთვის უგემოვნობის სინონიმია.

წლების განმავლობაში ჩაკლეს ქეშმარიტი სატირულ-იუმორული აზროვნება სულხან-საბას, დ. კლდიაშვილის, ილია ჭავჭავაძის, გ. ერისთავის, ჩეხოვის და გოგოლის მიერ დაწყებული.

დილით ადრე 7 საათსა და 50 წუთზე გამოვფრინდით მოსკოვიდან. ეს 4 საათსა 30 წუთზე ადგომას ნიშნავს. კარგად ვიფრინეთ, მაგრამ მაინც არ მიყვარს ფრენა. სოფიაში სულ ერთი საათი გაგვაჩერეს მწერალთა კავშირში და ისევ თვითმფრინავი. მერე ერთი საათი ავტობუსი და მთიან, ძველებურ, ლამაზ გაბროვოში ამოვყავით თავი. მასპინძლები ყოველი ლონისძიებით ცდილობენ პატივი გვცენ, მაგრამ ყველა ფეხის ნაბიჯზე იგრძნობა სოციალისტური სიღარიბე.

ხვალ ფესტივალის გახსნაა. რა გვაცინებს, საინტერესოა, ჩვენი მდგომარეობის გადამკიდეს.

ქალაქი საზეიმოდაა მორთული. დაგვირიგეს მონანლის მედალიონი და კარგად იუმორის ჩართვით გაფორმებული ბუკლეტები, ჟურნალები, წიგნები. მათ შორის გაბროვოული

ანეგდოტები. გვიან ღამემდე სიამოვნებით ვიკითხე და ვიხითხითე. მართალია, ზოგი გულუბრყვილოა, მაგრამ ხალხური ყველაფერი მიყვარს.

16 მაისი

დილით მარტო გამოვედი გაბროვის სასტუმრო „ბალკანიდან“. პატარა ქალაქია, სუფთა. მთელ ქალაქს ეტყობა პროვინციალიზმი, მაგრამ ევროპული და ეს უკვე რაღაცას ნიშნავს.

ხალხი სადად, უფრო ღარიბულად ჩაცმულია. რიგებია პურზე. ხორცი საერთოდ არ ჩანს. ბაზარში ხილი არ იყიდება. ერთ კაცს ჰქონდა ჩვენი პანტა ვაშლის მსგავსი - ნვრილი ვაშლი. ვიყიდე. უვაშლოდ არ ვვარგევარ.

5 საათზე საზეიმოდ გაიხსნა ფესტივალი. მთელი მსოფლიოდან არიან მოწვეულნი. ევროპაში ახლა ამხელა მასშტაბის ღონისძიება არ ტარდება, როგორც ამ ღარიბ გაბროვოშია. მთელი ბულგარეთი ამით ცხოვრობს. მე-8 ფესტივალია. გაბროვო გახდა მსოფლიოში ცნობილი ქალაქი. იუმორი დიდი აქვს თუ არა, ამას უკვე აღარა აქვს მნიშვნელობა. ჩვენ ალბათ ამის ორგანიზებას ვერ შევძლებდით. ბეჭდავენ ბუკლეტებს, უშვებენ ჟურნალს. ინვევენ მსოფლიოს ცნობილ იუმორისტებს კინოს, მწერლობის, მხატვრობის, მუსიკის დარგში. მერე გამოცხადდა წინა ფესტივალის ლაურეატების გვარები. დიდი ტაში იყო. გორინს და ჟვანეცკის ეხვევიან ებრაელი ჟურნალისტები, ტელევიზია, რადიო, გაზეთი. შენ ვის დაეკარგე, ვინ გეძებს. საოცარია. რა დიდი მასშტაბები აქვთ ებრაელებს.

ჩემთანაც მოვიდნენ რადიოს და ბულგარეთის „სოფლის ცხოვრების“ კორესპოდენტები, რაკი დარწმუნდნენ, რომ საკმაოდ იუმორით ვპასუხობდი, მოეწონათ და სხვა ჟურნალი-



სტებსაც უხმეს. უხალისოდ დავთანხმდი, რა ჩემი საქმეა. მე ჩემი ქვეყნის ჯავრი მანუხებს.

### 17 მაისი

დილის 10 საათიდან იუმორის გაბროვის მსოფლიო ცენტრში გაიმართა მრგვალი მაგიდა მსოფლიო იუმორის პრობლემებზე. თავმჯდომარემ გამოაცხადა: აქ ვინც ბრძანდებით, ყველანი ცნობილი პიროვნებები ხართ, ჩვენ წინასწარ სია არ ჩამოვწერეთ გამომსვლელების და გთხოვთ ვისაც სურს, გამოვიდესო. სიჩუმე ჩამოვარდა. არც ვიცე, არც ვაცხელე და პირველი სიტყვა მე ავიღე. ჯერ მადლობა გადავუხადე მასპინძლებს, მერე საქმეზე გადავედი. იუმორის დიდ მნიშვნელობაზე ვილაპარაკე, ქართული ლიტერატურის ტრადიციებზე ამ მხრივ და შემდეგ სსრკ-ში გარდაქმნის პერიოდში მის როლზე. გამოვთქვი სურვილები, ჯერ ერთი ვინც გაიმარჯვა ფესტივალზე, რატომ არ არიან ყველანი მოწვეულნი მეთქი. მეორეც, აქ ჩვენ მოწმეებივით ვზივართ, ზეიმით გვხვდებიან, მაგრამ ჩვენს უნარს არ ვამყდავენბთ მეთქი. რატომ არ შეიძლება ბლიცკონკურსები აქვე მოცემულ თემაზე წერა, პასუხები ანკეტაზე, ან კონკურსები კარიკატურის ხატვაში მეთქი.

მერე როდესაც „მრგვალი მაგიდა“ დამთავრდა, დაგვათვალისწინებინეს გაბროვის სატირისა და იუმორის სახლი. ეს იყო ბრწყინვალე სანახაობა. მსოფლიოს ცნობილი სატირიკოსების წიგნები და ხელნაწერები, კარიკატურისტ და სატირიკოს-სკულპტორთა ნამუშევრები, სატირულ-იუმორისტული ფოტოგამოფენა. ჭეშმარიტად მაღალი კულტურით შერჩეული და ბოლოს, რაც ჩემთვის სრულიად ახალი იყო, უგემოვნობის გამოფენა, რაც უგემოვნო იქმნება თანამედროვე ბულგარეთში ის იყო გამოფენილი. ბევრი ვიცინე.

2 საათზე დაიწყო ბულგარეთის მწერალთა კავშირის სიმპოზიუმი და პრეს-კონფერენცია თემაზე „იუმორი თანამედროვე მხატვრულ ლიტერატურასა და კრიტიკაში“. მე, გრ. გორინი და მიხეილ ჟვანეცკი გამოვედით. ძალიან მოეწონათ ჩემი გამოსვლა ჟვანეცკის და გორინს, მე კიდევ მათი გამოსვლა მომეწონა. სიმართლე უნდა ითქვას მაგარი ურიები არიან. ვერაფერს იტყვი.

კარელ ჩაპეკის ანდაზით დავიწყე, კრიტიკულად განწყობილი გომბეშო რომ ამბობს, გველი ასე გრძელი რატომ უნდა იყოსო. მერე ვთქვი იმაზე, რომ ჩვენი სატირული არსენალი დაიშტამპა. ახალი ტიპები, ახალი სახეები, ახალი თემები უნდა აღმოვაჩინოთ მეთქი. მოვყევი გვერდით რომ ტაშის დამკვრელი მეჯდა და ერთი სიტყვა არ გაუგონია.

დღეს დიდი მუშაობა, ორჯერ გამოსვლა მომინია. მაინც ძნელია ჩემნაირი მორუსულე კაცისთვის. იწერება თხუთმეტნაირად (ტელევიზია, რადიო), ითარგმნება 5 ენაზე. ისმენენ მსოფლიო ყველაზე დიდი ირონისტები. ჩემს შემდეგ ფრანგი, ამერიკელი, პოლონელი, შვედი, იაპონელი და ჩეხი მწერლები გამოვიდნენ.

საღამოს გაბროვის მახლობლად (15 კმ) ერთი დიდებული, მოქმედი მონასტრის სიახლოვეს ბანკეტი გაგვიმართეს.

### 18 მაისი

დილით ფესტივალის პროგრამით გათვალისწინებული ფილმი ვნახეთ. „ჩაპლინის პარადი“ ჰქვია. ჩაპლინის პირველი ფილმები. შვიდი ფილმი ვნახეთ. რა საოცრებაა. თითქოსდა დღევანდელი მკითხველისთვისაა გათვალისწინებული. ყველა ეპოქაში რომ ეყოლება მაყურებელი მის გულუბრყვილო, საოცრად მოქნილ და საზრიან კაცუნას. რა ნილაბი შექმნა, როგორ დაიტოვა თავი სამუდამოდ ამ გენიოსმა ურიამ.

შუადღისას ბულგარეთის უძველესს დედაქალაქს თერნოვოს ვენვიეთ. ბუნებრივ კლდეზე აშენებული განსაცვიფრებელი ციხე-სიმაგრე ვნახეთ. პართენონზე ლამაზი მდებარეობა აქვს. საერთოდ ზღაპრული სილამაზის ადგილია. არ მეგონა თუ ბულგარელებს მე-12 საუკუნეში აშენებული ციხე მონასტრები ექნებოდათ. ავტობუსში ჩემს გვერდით შემთხვევით აღმოჩნდა პოლონელი მწერალი ზიგმუნდ ფლიზი. გულითადად ვისაუბრეთ. სოლიდარობის შესახებ მიაბო. ალალი, სუფთა კაცი ჩანს. ვილაპარაკეთ ყველაფერზე, მათ შორის ჩვენი ქვეყნების ბედზე და გარდაქმნაზეც. ახლა ისევ იმათ უნდათ გარდაქმნის მაგალითი მოგვცენ, ვინც ყველა ბოთლს ერგებოდა მეთქი. ქუთაისში იტყოდნენ, ლამარია ჩათლახს ყველა ქორწილზე პატარძლობა უნდაო. სწორიაო, მიპასუხა, გარდაქმნას ახალი, თავისი მოქალაქეები სჭირდებაო. არ შეიძლება ნახევრად დაორსულებაო, თუ გარდავიქმნებით, მთლიანად უნდა გარდავიქმნათო. სხვაც ბევრი რამ ვუამბეთ ერთმანეთს.

საღამოს გაბროვოს მონასტერში გამოვიარეთ და მონასტრის წინამძღოლ ილუმენ ივანეს ვესაუბრე დიდხანს. ძალიან ვიღლებიო, მონასტერში იმიტომ მივიტანე თავი რომ ნერვების დანყნარება მინდოდა და აქ კიდევ უფრო მეშლებო. შენ წარმოიდგინე უამრავი მიმსვლელ-მომსვლელი, მოსანათლავ-შესანდობარი და ძროხა – ღორ-ქათამი, მერე საღამოს სასტუმროს (52 კაციანი) მოვლა-პატრონობაო. მთვარე გვადგა თავზე. ბაჩკოვოს სული ტრიალებდა ბულგარეთის თბილ მიწაზე.

### 19 მაისი

დილით შეხვედრა გვქონდა გაბროვოს ყველაზე დიდ საწარმოში ცილინდრ-ტუმბოების ქარხანაში.

თბილად შეგვხვდნენ. დირექტორი გვესაუბრა იმაზე თუ წლების განმავლობაში სისტემატური მეცნიერული თავდადებით როგორ გამოიგონეს ახალი ცილინდრული ავტომატი. არც ვაცეი, არც ვაცხელე, კკითხე მსგავსი ავტომატი ამერიკელებს ან იაპონელებს თუ აქვთ მეთქი. აქვთო. აბა, რად გინდოდათ ველოსიპედის ხელახლა გამოგონება მეთქი. ერთმანეთს გადახედეს. ჩვენო, იმ არსებულის სახესხვაობა გავაკეთეთო.

მერე მოგვინია გამოსვლამ. ჯერ გვკითხეს, ჩვენ რომ წუნს გამოვუშვებთ, გადავყრით ან ხელახლა გადავამუშავებთ, თქვენ რას უშვრებით წუნსო. ვუპასუხე, ჩვენი წუნი უბედურება არ არის, ან წაიკითხავენ ან არა. თქვენი წუნი კი ჩერნობილია მეთქი. ცოტა არ იყოს შეჩქვიფდნენ.

ჟვანეცკიმ, გორინმა, იახონცუმმა და მე წავიკითხეთ ჩვენი წანარმოებები. განსაკუთრებით ბევრი იცინეს ჩემს ნოველ-აზე „ავი კვამლი“. სამ საათზე დავბრუნდი სასტუმროში და თავი არ გამომიყვია გარეთ. გავცივდი თუ ალერგია მაქვს ჩემი ცხვირის გადამკიდეს. ოთხი ჟურნალისტი მივიღე. ინტერვიუები გაუთავებლად. რისთვის უნდათ, სად აქვეყნებენ, ჯერ ვერ გამირკვევია.

### 20 მაისი

დილის 10 საათზე ჟვანეცკი, გორინი, ბელოუსი და მე გაბროვოს მსოფლიო ფესტივალის ლაურეატებად გამოგვაცხადეს. მოგვცეს მედლები და დიპლომები. მერე ვნახეთ 11 საათზე ამერიკული ფილმი – კომედია. თორმეტი კაცი კვდება. რატომაა კომედია, ვერ მივხვდი.

იქ, სატირისა და იუმორის პრესცენტრში დაგვირიგეს სახელდახელოდ გამოცემული ჟურნალი, რომელშიც ჩემი დიდი ინტერვიუ და ავტობიოგრაფიაა ბულგარულ და ინგლისურ ენებზე. ყოჩაღ, გუშინ ჩამორთმეული ინტერვიუ დღეს უკვე

ჟურნალშია დაბეჭდილი. ეს პატარა საქმე არ არის ბულგარეთის სტამბისათვის.

სალამოს მწერალთა კავშირმა ბანკეტი გაგვიმართა. ვთქვი ვრცელი სიტყვა-სადღეგრძელო.

ინტერვიუ ვათარგმნინე ჩემს კუ - გიდს. კარგად მიუციათ. ვლაპარაკობ საერთოდ სატირული ლიტერატურის როლზე, ქართულ ხასიათზე, ამგვარი ფესტივალის უკეთეს ორგანიზაციაზე.

ადრე უნდა დავიძინო, ხვალ დილით 4 საათზე სოფიაში მივფრინავთ.

## 21 მაისი

ჩამოვფრინდით სოფიაში. გავჩერდით სასტუმრო „რილაში“. ცუდად ვარ. მაკანკალებს, დავწექი.

დამირეკა ჩემმა მთარგნელმა კუზმან სავოვმა. უთარგმნია ჩემი წიგნი და სტამბაშიაო, თუ არ მატყუებს. სალამოს რესტორანში წამიყვანა. ავად ვიყავი, უარი ვერ ვუთხარი.

## 22 მაისი

დილიდან სოფიას ვათვალიერებთ. 10 საათზე მიგვიღო მწერალთა კავშირის პირველმა მდივანმა.

რადიოში სიტყვა მათქმევინეს და ჰონორარი მომცეს. რად მინდოდა? ფულს საერთოდ ვერ ვხარჯავ.

სალამოს 6 საათზე შეხვედრა მოგვიწყვეს მეცნიერების და კულტურის სასახლეში. გავსებულია დარბაზი. ფეხზე დგანან. უკვე მივეჩვიე რუსულ აუდიტორიას. დიდი ტაში მქონდა. ყვანეცკი ძალიან მაგარია. გორინიც. ერთი სიტყვით დიდი ეფექტი მოვახდინეთ. მერე ბანკეტი გაგვიმართეს.

ყველაფერი კარგად. მიდის უკეთ ვარ.

## 23 მაისი

დღეს შედარებით თავისუფალი დღე გვექონდა. გიდმა დამირეკა, მაგრამ მის სამსახურზე უარი ვთქვი. არ მიყვარს გიდის გვერდით სირბილი და მისი დამადლებული საუბარი: ეს როდი მევალება, მაგრამ თქვენი გულისთვის ვაკეთებო.

მარტო, ნელა, ჩემთვის ვიარე ქალაქში. სოფიას თურმე 2500 წლის ისტორია აქვს. მართალია, ეს ისტორია ყოველთვის ბულგარელებთან როდია დაკავშირებული, მაგრამ მაინც ქალაქის ისტორიაა. ბერძნებს დაუარსებიათ. სოფია ბრძენს ნიშნავს. ვნახე ჩვ. წ-მდე 4 საუკუნეში აშენებული როტონდა (ტაძარი – სასახლე), სოფიას ტაძარი, ალექსანდრე ნეველის ტაძარი. ეს გრანდიოზული ნაგებობა მადლიერმა ბულგარელებმა თურქეთისგან განმათავისუფლებელ (1878 წ.) რუსებს აუშენეს. საერთოდ აქ რუსები ძალიან უყვართ.

გავიგე ბრწყინვალე საქციელი ტ. ჟივკოვის. 1985 წელს 2 მილიონი თურქი ერთბაშად ჩანერეს ბულგარელებად. გამოუცხადეს, რომ თქვენ ხართ თურქების მიერ გათურქებული ბულგარელებიო. ამას მოჰყვა ერთი თვის განმავლობაში დიდი ჯაჯგური, მაგრამ მერე ყველაფერი დაწყნარდა. ბულგარელები ვერ მრავლდებიან, თურქები სწრაფად. ახლა ისტორია ბულგარეთის სასარგებლოდ იმუშავებს. „ღმერთო, ღმერთო ეს ხმა ტკბილი...“

ვიყავი სოფიოს ისტორიულ მუზეუმში. ძველბერძნული, რომაული, ბიზანტიური რელიქვიები ძირითადად. საერთოდ ბულგარელები ვისი შთამომავლები არიან, თვითონაც არ იციან კარგად. ეს კია ბულგარული, როგორც უკრაინულ-ბელორუსული რუსულს ძალიან წააგავს.

ხვალ კირილე - მეთოდეს სახალხო ზეიმი. პარადის მისაღებად ვართ მიწვეული ჟივკოვის მიერ.

სალამოს კუზმან სავოვმა და მისმა მეუღლემ, მარგარიტამ შინ დამპატიჟეს. 4 შვილი ჰყოლიათ. ღარიბი, მაგრამ პატიოსანი ხალხია.

მონაწილეობა მივიღეთ კირილე და მეთოდეს სახალხო დღესასწაულში. პარადი მივიღეთ. ჟიეკოვისგან ოც მეტრში (ცოტა ქვემოთ) ვიდექით საპატიო სტუმრები დიმიტროვის მავზოლეუმის ტრიბუნაზე. ხელს ვუქნევდით, ვესალმებოდით დემონსტრანტებს.

მერე თავისუფალი დრო გვქონდა. მარტო ბევრი ვიარე ქალაქში. ჩანს, აქაც ბევრი ნარკომანია.

შიდსის შიშით, ადმინისტრატორმა მითხრა, საერთოდ აკრძალული გვაქვს სასტუმროში სტუმრების შეშვება – სტუმრების „სტუმრებზეა“ ლაპარაკი.

ნომერში ნოველას ვწერდი გვიანობამდე.

დღეს მოსკოვში მოვფრინავთ.

## მაღაზასკარი – მაპრიკია – საიხელის კუნძულები – 1988

ჯერ, ჩვეულებისამებრ, ლექციების ციკლი, მოსკოვში მეგობრობის საზოგადოებაში.

ახალგაზრდა ლექტორი სერიოზული სახით ელემენტარულ წესებს გვასწავლის. დაახლოებით ისეთს – პაპუასი რომ ინგლისში დიპლომატად დანიშნონ და ჭკუა უნდა დაარიგონ, ვინმეს შემთხვევით ყური არ მოაჭამოს.

ოცდაერთსაათიანი ფრენა. სალამოს რვა საათიდან მეორე დღის ოთხ საათამდე.

მარშრუტი – მოსკოვი – სიმფეროპოლი – კაირო – ადანი (იემენის დედაქალაქი, ძალიან ცხელოდა) – ნაიობი (კენიის დედაქალაქი) და ბოლოს – ანტანანარივუ (მადაგასკარის დედაქალაქი).

ჩამოსვლისთანავე დაგვხვდნენ მასპინძლები და პრესის წარმომადგენლები. დელეგაციის ხელმძღვანელმა ვალერი ასათიანმა მისთვის ჩვეული სიდინჯით საინტერესოდ ისაუბრა. გააცნო დამხვდურთ ჩვენი ჩამოსვლის მიზანი.

სალამოს საელჩოში მიგვიღეს.

მადაგასკარელები დემოკრატიული განვითარების გზას ადგანან. ფამილიარობა არ უყვართ. ქვეყანა ღარიბია. 10 მილიონამდე მცხოვრებია. საფრანგეთის ვალი აქვთ. პრეზიდენტი რატირაკი მიუმხრობლობას თამაშობს. ბევრი სწავლობს სსრკში. ბრუდებიან და სამუშაოს ვერ შოულობენ. ის სპეციალობები, ჩვენთან რომ ასწავლიან, აქ არ არის.

სამი დღის წინ სამხედრო მოსამსახურეები, მათ შორის მინისტრი თვითმფრინავში დალუპულა.

სალამოს გვავახშმეს სასტუმრო „ჰილტონის“ ფეშენებელურ რესტორანში. კიდევ ერთხელ დავრწმუნდი, რომ შვედურ მაგიდასთან ჩვენი მიშვება არ შეიძლება.



სასტუმრო კოლბერტში ვცხოვრობთ.  
დალლილებს მაშინვე ჩაგვეძინა.

### 30 მაისი

დილით ანტანანარივუს ხელით ნაკეთობათა გამოფენა –  
ბაზრობას ვენწვიეთ.

საოცარი ბაზარია. მილიონი მენწვილმანე ერთად.

ქურდობა თუ ასეთ მაღალ დონეზე იყო, არ მჯეროდა,  
სანამ ჩემს თავზე არ გამოვცადე.

საერთოდ ღიმილიანი ხალხია, ტანად მომცრო, პატარა  
თავიანი.



მადაგასკარი. ვალერი ასათიანი და რევაზ მიშველაძე მენწვილმანესთან

განსაკუთრებული წესი აქვთ მკვდართან ურთიერთობის.  
მკვდარს აკლდამაში ასაფლავებენ. ყველას თავის საგვარეუ-  
ლო აკლდამა აქვს. მიცვალებული ჯვალოს ქსოვილშია გახ-  
ვეული და დაბალზამებულია.

ყოველ წელიწადს მკვდრის დღეს – ცხედარს სახლში მი-

ასვენებენ, „აცეკვებენ“, ახალ სუდარაში შეფუთავენ და ისევ  
უკან წაასვენებენ.

ვისადილეთ რესტორან „მაცმეზონში“.

დედაქალაქი 1610 წელს დაარსდა. „ათასთა ქალაქს“ ნიშ-  
ნავს ანტანანარივუ.

ხორცი უამრავი აქვთ. მხოლოდ ახალ ხორცს ხმარობენ.  
მეორე დღის ხორცი ამათი ტრადიციით არ ვარგა.

ბუზები არ არის საერთოდ. თორემ ხალხი დაიხოცებოდა.  
იმით ხსნიან რომ მზის რადიაციას მომატებული და ბუზები  
იხოცებიანო.

საერთოდ მთელს მადაგასკარზე ღია ნითელი მიწაა.

უმუშევრობა საკმაოდ მაღალ დონეზეა.

სალამოს შეხვედრა მეგობრობის საზოგადოების წარმო-  
მადგენლებთან გახსნა ვალერი ასათიანმა.

სიტყვის თქმა მეც მომიწია.

ზემოთ ვთქვი, რომ პრეზიდენტი რატირაკია – რითმა კი  
უხერხული ერთიმეზა და თვითონაც ახალგაზრდაა.

კონცერტზე მადაგასკარელებმა „ციცინათელა“ იმღერეს.

### 31 მაისი

დილიდან მეფეთა საზაფხულო რეზიდენციისკენ გავემურეთ.  
მეფეები აქაც ისე ცხოვრობდნენ, როგორც მეფეებმა უნდა  
იცხოვრონ საერთოდ.

წასადილევს დავათვალიერეთ ზოოპარკი. მადაგასკარის-  
თვის დამახასიათებელი ცხოველები. ძირითადად ღია ზოო-  
პარკია. „ლიმური“ – მადაგასკარის ულამაზესი მაიმუნი. აქაუ-  
რები ხუმრობენ – ადამიანი საერთოდ მაიმუნიგან წარმოიშვა,  
ჩვენ კი ლიმურისგან გავჩნდითო.

მერე საუნივერსიტეტო ცენტრი დავათვალიერეთ. თანამე-  
დროვე აუდიტორიები. სპორტული მოედნები. უმაღლეს სას-

წავლებლებში კონკურსი დიდი. საშუალო სკოლები ძირითადად ფასიანია. უმაღლესი უფასო. განაწილება არ არის. პროფესურა ძირითადად ჩამოსულია.

### 1 ივნისი

დილით ანცირაბეში წავედით ავტობუსით და მანქანებით. საელჩოს თანამშრომელთა ორი „ტოიოტა“ გვახლავს. სიამოვნებით დავთანხმდი პრესცენტრის უფროსის არსენ განიევის შემოთავაზებაზე და ანცირაბემდე (170კმ.) საჭეს ვუჯექი. „ტოიოტა“ ბრწყინვალე მანქანაა.

პატარა პროვინციული ქალაქი. ანცირაბეში სასტუმრო „ტერმში“ ჩამოვხტი. ფრანგების მიერაა აშენებული. სასახლესავით სასტუმროა.

შეხვედრა ქალაქის მერთან. ვალერი აქაც ბრწყინვალე სიტყვას ამბობს. მერე ბანკეტზე მიგვიწვიეს.

მასპინძლებს ვესაუბრებით ყველაფერზე, რაც აინტერესებთ. ჩვენს ლიტერატურაზე, რა თქმა უნდა წარმოდგენა არა აქვთ.

სალამოს შეხვედრა ქალაქის წარმომადგენლობასთან.

ყველა ილიმება. მღერინ მშვენივრად და ცეკვავენ. შეხვედრას ანცირაბეს ტექნიკური საცდელი სახელოსნოს თანამშრომელი რუსებიც ესწრებიან მეუღლეებითურთ.

### 2 ივნისი

ვულკანური ტბები – ანდრაიბიბა და ტრიტურა ვნახეთ.

გზადაგზა ვინტერესდები მადაგასკარის კულტურით და გიდს შეკითხვებით გული გაფუნყალე.

აქაური მწერლები ძირითადად ფრანგულ ენაზე წერენ. განსაკუთრებით უყვართ პოეზია. პროზას მაინცდამაინც არ

ეტანებიან მკითხველები. რაცო, ფრანგებისგან თავი გავინთავისუფლეთ, ვცდილობთ ჩვენს მშობლიურ ენას და ვუბრუნდეთ, მაგრამ ჯერჯერობით ვერ ვახერხებთ. მოსახლეობა, რატომღაც ფრანგულ სკოლებს არჩევს.

უკან ვბრუნდებით სალამოს.

გზაზე მანქანა გავაჩერე და გლეხის საცხოვრებელში შევიხედე.



მადაგასკარელი გოგონა

სილარიბე. სიბინძურე. ავადმყოფები. მაღარის კოლო ყველაზე დიდი მხეცია ამათვის.

მადაგასკარელთა სიცოცხლის საშუალო ხანგრძლივობა 50 წელია.

გზაზე ბრინჯის ყანები. დამუშავების წესი პრიმიტიული. სალამოს არსენმა შინ მიგვიპატიჟა. ვალერი, მე და საელჩოს მდივანი გერმან პავლოვიჩი წავედით. სასიამოვნო ატმოსფერო სუფევდა. ბევრი ვისაუბრეთ და მათ შორის სტალინზეც. გერმანს სტალინის პიროვნებაზე სწორი წარმოდგენა აქვს.

### 3 ივნისი

დილის ათ საათზე პრესკონფერენცია ჟურნალისტებისთვის. ვალერი ასათიანმა დიდხანს ისაუბრა მეგობრული კონტაქტების მნიშვნელობაზე, სსრკ-ს საგარეო პოლიტიკის არსზე, კულტურის საკითხებზე. მერე მე გამოვედი მწერლის მოვალეობაზე მსოფლიოში და თანამედროვე ლიტერატურის

მიღწევებზე. ვუპასუხეთ უამრავ შეკითხვას: დანერთ თუ არა რაიმეს მადაგასკარზე, რას ფიქრობთ ჩერნობილზე, რა განსხვავებაა ამერიკელ მწერალს და სსრკ-ს მწერალს შორის?

პირველ საათზე მიგვიღო ქალაქის მერმა. ანდრიანტინა რაკუტუვაემ. მერე გამოსათხოვარი ბანკეტი გაგვიმართა.

გამოგვაცილეს მინისტრებმა და საელჩოს თანამშრომლებმა.

აეროპორტის მოსაცდელში ვალერიმ და მე დიდხანს ვესაუბრეთ საელჩოს თანამშრომელს გერმან პავლოვიჩს. ლიტერატურასა და ხელოვნებაზე მუშტის მეთოდებით ლაპარაკობს.

6 საათზე გამოვფრინდით.

საათსა და ორმოც წუთში მავრიკიაში დავეშვით.

შეგხვდა საელჩოს თანამშრომელი ვალოდია.

მავრიკიაში მილიონამდე კაცი ცხოვრობს. ძირითადად ინდოელები და მავრიკიელები. გენერალ-გუბერნატორი მავრიკიელია. ცხოვრების დონე მაღალია. ქურდობა მაინცდამაინც არ არის. მაგრამ გავრცელებულია ნარკომანია, ამას წინათ ორი დიპლომატი დაიჭირეს ნარკოტიკების მოხმარებისთვის.

ხელმძღვანელობა ფიქრობს ნარკოტიკებით მოვაჭრეთა მიმართ დახვრეტის კანონი შემოიღოს.

დავბინავდით ოკეანის არხის ბრწყინვალე სასტუმროში.

#### 4 ივნისი

დილით ოკეანეში ვიბანავე. წყალი თბილია. განწყობილება ჩინებული.

ჩვენს საელჩოს ვესტუმრეთ.

მავრიკიის პეიზაჟი. წითელყვავილოვანი ზღაპრული ხეები. თვალისმომჭრელი მზის შუქი. მწვანე ჰორიზონტზე უეცრად აღიმართება შენს წინ შავი კლდე-მთა. ბალახის ნასახიც კი არ ჩანს. დავათვალიერეთ ჩამქრალი ვულკანის კრატერიც.

XVI საუკუნის დასაწყისში პორტუგალიელებმა აღმოაჩინეს

ეს კუნძული, მაშინ დაუსახლებელი იყო. მერე ჰოლანდიელებმა დაიპყრეს და ბოლოს ინგლისელებს ჩაუვარდათ ხელში.

მცხოვრები ერთი მილიონია, ნეიტრალური ქვეყანაა. 70% ინდუსია, 20% კრეოლი, დანარჩენი ფრანგები, ინგლისელები და ჩინელები, და ე.წ. მავრიკიელნი. დედაქალაქია პორტ დუისი 180 000 მცხოვრებით.

წყალი არ არის მთელს კუნძულზე. სვამენ მხოლოდ წვიმის წყალს.

რკინიგზა არ არის.

საინტერესოა მარილის მოპოვების წესი. აქ ოკეანე ძალიან მარილიანია, ამიტომ წყალს ოკეანიდან ტუმბავენ და რეზერვუარებში აგროვებენ. რამდენიმე დღეში წყალს გაუშვებენ და ძირს ქვიშასავით დარჩენილ მარილს ნიჩბებით ხვეტენ.

მავრიკიის მხოლოდ ერთი გემი ჰყავს და სამი თვითმფრინავი.

ნავსადგურში ყოველდღე უამრავი გემი შემოდის.

ცხოვრების დონე მაღალია.

პარლამენტარული წყობა. კუნძულს თავისი გენერალ-გუბერნატორი ჰყავს – რომელიც ამავე დროს არის პრემიერ მინისტრი და შინაგან საქმეთა, სამხედრო, საგარეო საქმეთა, უშიშროების, ინფორმაციის, კულტურისა და მეურნეობის მინისტრი.

სწავლა ფრანგულ, ინგლისურ და ჰინდის ენაზეა სკოლებში.

კრეოლი ნიშნავს ზანგისა და ევროპელის შეჯვარებით მიღებულ ერს. კრეოლი ლაპარაკობს დამახინჯებული ფრანგულით. ფული არის რუპია.


უმთავრესად შაქრის ლერწამი მოჰყავთ. ყველგან შაქრის ტყეებია.

მეორე მთავარი შემოსავალი ტურიზმია, აქვთ ჩაიც.

უნივერსიტეტი 1865 წელს დაარსდა, სწორედ იმ დღეს გახდა მავრიკია დამოუკიდებელი ქვეყანა.

პრემიერ მინისტრს 5 წლის ვადით ირჩევენ. მეორედ არჩევენებში, თავის კანდიდატურას ვერ წამოაყენებს 5 წლის განმავლობაში მაინც.





მავრიკია

არის მახათმა განდის ინსტიტუტიც.

მავრიკიას ჯარი არა ჰყავს, არის მხოლოდ პოლიცია.

წელიწადში 1000-მდე სხვადასხვა გემი შემოდის.

ყველაფერში მოვწონვართ, მხოლოდ ავღანეთის და კამ-პუჩიის საკითხებში არ გვეთანხმებიან.

ამჟამად სსრკ-ში 300-ზე მეტი მავრიკიელი სწავლობს, თბილისშიც არიანო.

გარდაცვლილთაგან 50% გულით კვდება.

როცა პორტუგალიელები გამოჩნდნენ, კუნძული დაუსახ-ლებელი იყო.

თეატრები არ არის.

უყურებენ ძირითადად ინდურ ფილმებს და ძალიან მოს-წონთ. ინდოეთი თურმე 700 ფილმს იღებს წელიწადში.

პორნოგრაფიული ფილმები აკრძალულია.

გავიცანით:

მწერალი ბიხარი – დანერა წიგნი სსრკ-ში მოგზაურობაზე.  
შეკუნდალა – პოეტი ქალი.

ბრინჯს მთლიანად ყიდულობენ.

ენერჯის ძირითადი წყარო თბოელექტროსადგურებია.  
მაზუთი გემით შემოდის.

უარს ამბობენ ყოველგვარ მასშტაბურ მრეწველობაზე,  
მეტალურჯის განვითარებაზე და განსაკუთრებით ატომურ  
ელექტროსადგურებზე.

ცხოვრობენ ტურიზმით. ყველაფერს აკეთებენ რომ ზღვა  
არ გაჭუჭყიანდეს.

ყველას მასპინძლის იერი აქვს. თვალებში გიყურებენ.  
გილიმიან.

## 5 ივნისი

დილიდან დედაქალაქ პორტ ლუიში ექსკურსიაზე წაგვი-ყვანეს.

გიორგი თოიძის მიერ გაკეთებული ლენინის ძეგლი  
ყვავილებით შევამკეთ.

ზოოპარკი. თავისებურია. აღიქვამ ყველა ცხოველს,  
თითქოს მათთან ერთად დადიოდე ჯუნგლებში. არა აქვთ  
რკინის გალიები. ყველა სახეობას ირგვლივ წყალი უვლის. იმ  
წყალზე ფრინველების მეტი ვერაფერი გადმოდის.

ბოტანიკური ბაღი – საოცარი ხეები ბაობაბები და გიგან-  
ტური მიმოზები, საქოიები და კაუჩუკის ხეები.

აკვარიუმი!

მავრიკიაში სანატორიუმები და დასასვენებელი სახლები  
არ არის საერთოდ. არის ზღვისპირა სასტუმროები ყოველ  
ფეხის ნაბიჯზე. ჩვენთან მაინდამაინც საგზური რომ უნდა  
შეუფარდო შენს ცხოვრებას და თუ დაგაგვიანდა შენს ადგი-  
ლას რომ სხვას მიიღებენ და შენ უბოდიშოდ გამოგისტუმრე-  
ბენ – ასე არ არის აქ.



საკუთარი აგარაკიც არავის არა აქვს. აგარაკის შენახვა ძვირი ჯდება, ამიტომაც მომგებიანი არ არის. როცა გვინდა და რამდენი დღითაც სასტუმროს დავიქირავებთო, სასტუმრო კოტეჯებიც არის, როცა ყოველგვარ პირობებს გიქმნიან და მოსამსახურე ინდუსები თვალეში შეგყურებენ.

სალამოს მე და ვალერი ვახშმად მიგვიწვია მავრიკიის მთავარმა ქირურგმა ინდოელმა რამდოვარმა, რომელსაც განათლება მოსკოვში მიუღია და საბჭოთა კავშირ-მავრიკიის მეგობრულ ურთიერთობათა საზოგადოების აქტიური წევრია.

სალამოს ფეხბურთი ვნახეთ – საფრანგეთ – სსრკ-ს შეხვედრა 1-1

კინალამ მოგვიგეს ფრანგებმა. ჩივაძე არ თამაშობდა.

## 6 ივნისი

დილით ნავეებში ჩაგვსვეს და ოკეანეში გაგვიყვანეს სათევზაოდ – საბანაოდ.

გიდები ძალიან გაუნათლებლები არიან, რაც უნდა ჰკითხო, უარყოფითად გპასუხობენ.

12 საათზე საბჭოთა და მავრიკიელი მწერლების შეხვედრაა. პირველი სიტყვა მე მომცეს.

მავრიკიელი მწერლები:

საკუნდალა პავალდარი – ქალი. ინდოელი.

ლიან ბერტელო – კრეოლი.

ლომე ანფარალი – კრეოლი.

პროსპერა – კრიტიკოსი, აზია-აფრიკის ქვეყნების II შეხვედრის მონაწილე.

სამსარანი.

რანფანდიტი.

აზის ასგალი – კრეოლი, პიესებს წერს.

თითო მწერალი 3-4 ენაზე წერს.

ვუპასუხე შეკითხვებს.

მერე ვიქტორ კარამაზოვი გამოვიდა, მერე ლატვიელი ვიტაუტას მარცინკიავიჩუსი.

დრამატურგები არიან, მაგრამ თეატრი არა აქვთ. მათი პიესები საზღვარგარეთ იდგმება.


ჩვენს ქვეყანაში დამსვენებლებად ჩამოდიან და ეროვნული თეატრი, რომელიც ადრე არსებობდა ნელნელა მოკვდაო. კრეოლი თეატრში მხოლოდ მაშინ მიდის თუ უფასო სანახაობააო.

ერთმა თქვა, მე ვწერ პიესებს და თვითონვე ვდგამ მოყვარულთა ძალებით, მაგრამ ძალიან ძნელია მავრიკიელი ტელევიზორს მოგლიჯო, ამიტომ მაყურებელი არა გვყავსო.

რა სიახლეებია სსსრკ-ს ლიტერატურაში?

რას კითხულობენ უპირატესად?

მწერალი მავრიკიაში უყვართ, მაგრამ არ კითხულობენ. წიგნები არ იყიდება.



მადაგასკარი. 300 წლის კუ.

ისე მწერალიაო, რომ გაიგონებენ, მონინებით შესცქერიან. შეხვედრა დიდხანს გაგრძელდა და საკმაოდ საინტერესო იყო. სალამოს გამოვიარეთ ატელიე-მაღაზიაში.

იქვე აგიღებენ ზომას, გამზადებული რაღაცეები აქვთ და რასაც გინდა, ნახევარ საათში ჩაგაბარებენ.

სალამოს ტელევიზიით უჩვენეს ვალერი ასათიანის საუბარი ადგილობრივი ტელევიზიის დიქტორთან, ლაპარაკობდა თავისუფლად, საინტერესოდ, იუმორიც ჩაურთო. სსრკ-ს ნაკრებში ერთი ქართველი ფეხბურთელი ჩივაძე თამაშობს და როცა გუნდს ძალიან გაუჭირდება, მაშინ გამოიყვანენო.

ვისხედით სასტუმროს ბაღში ჩუმად და უეცრად დაფდაფების ხმა გაისმა. თითქოს მიწიდან ამოიზარდნენო. სიმღერით და როკვით შემოვიდნენ ზანგები. ზოგს ხელში ჩვენი დაირის მსგავსი რამ ეჭირა, ზოგს უბრალო რკინის ნაჭერი და მეორე რკინას ურტყამდა. ეს იყო დიდებული სანახაობა. სიცოცხლის ძარღვი ფეთქავდა მათს რიტმში.

გვიან ღამემდე ვცეკვავდით დისკო-კლუბში. დისკოს რიტმზე როკვა არავის უხდება როგორც ზანგს. იგი მთელი სხეულით, რომ იტყვიან, თითის წვერებითაც კი ცეკვავს.

## 7 ივნისი

დილიდან დიდ ზოოპარკში ვართ. ვეფხვები, ლომები, აფრიკული ზებრები და ჟირაფები...

მერე ნიანგოსაშენში მიგვიყვანეს. უამრავი ნიანგი სხვადასხვა ასაკის. ნიანგი კვერცხისმდებელი ყოფილა. ჩემდა სამარცხვინოდ არ ვიცოდი. ინდაურისაზე ოდნავ დიდი კვერცხი აქვს.

ნიანგი ადამიანს არ ერჩის. მისი ნადირობის ძირითადი ფორმაა გაქვავება. მსხვერპლს თავი მკვდრად უნდა მოაჩვენოს. მშვენიერი კერძი კეთდებაო მისი ხორცისგან.

ღამავინყდა, ზოოპარკში 250 წლის აფრიკული კუ ვნახეთ. კუს მოძრაობა მოგეხსენებათ საერთოდ და ეს თითქმის არ ინძრევა. ორ კვირაში ერთხელ ჭამს, სხვა დროს დაყუდებულია.

ლია, ზურგზე რამე რომ დაადო ასი წელი ისე ატარებს არც კი დაფიქრდება. თავისი ბაკანი არასოდეს დაუნახავს. თავს არ გაგიყადრებს. არ მინდა, ძმაო, არც ასეთი 250 წლის სიცოცხლე მინდა.

მერე ფულის დახარჯვის მტანჯველი წუთები და ბოლოს 7 საათზე მიღება მეგობრობის საზოგადოებაში. ელჩი პანკოვი ესწრება.

ბანკეტმა გულთბილ, მეგობრულ ვითარებაში ჩაიარა ვალერიმ კარგი სიტყვა თქვა.

მერე ოთხივემ ქართული და ინდური სიმღერები ვიმღერეთ, როგორც შევძელით. მავრიკიაში 7 რუსის ქალი იყო მიღებაზე. ნოსტალგიამ შეგვიპყრო, ქალებმა.

ქმარს თუ ლალატობთ მეთქი. არაო. ქართველები და რუსები აქ არ არიან და ერთ შავს მეორე შავზე ხომ არ გავცვლითო.

## 8 ივნისი

დილიდან წვიმს.

სალამოს სეიშელის კუნძულებზე მივფრინავთ.

## 9 ივნისი

სეიშელზე ვართ.

საბჭოთა ტურისტს ჯერ აქ ფეხი არ დაუდგამს.

ცხოვრობენ კრეოლები. პატარ-პატარა კუნძულებია. უზარმაზარი ჩვენი ბოინგი ძლივს დაჯდა.

პირველყოფილი ბუნება. ტყეში შეჭრილი სასტუმრო ისლის ქოხებისგან შედგება. ერთ ქოხში მე და ვალერი ვცხოვრობთ.

სასტუმროებში ეგზოტიკის მოყვარული ევროპელები და ამერიკელები ისვენებენ. ძვირი ღირს ადგილები. ჯავშნიან ტელეფონით. სასტუმროში კვება სამჯერადი. ფინური მაგილით, შედის ნომრის ღირებულებაში.



აფრიკა. სეიშელის კუნძულები

ყოველ საღამოს კრეოლების ხალხურ საკრავთა ორკესტრი. უკრავს. ბრწყინვალე სანახაობაა.

მოვიარეთ ერთი კუნძული. ათასნაირი ხე. ერთი ხე დანით რომ გაჭრი, სისხლივით წითელ წყალს უშვებს. ყოველ ფეხის ნაბიჯზე ქოქოსის ტყეებია. მე და ვალერიმ სასტუმროში ერთი ქოქოსის კაკალი მოვიტანეთ, მაგრამ ძლივს გავტყუებთ.

ყოველ ნაბიჯზე შეიძლება სეიშელის ჯუნგლებში (უკეთეს შემთხვევას მოგახსენებთ) ზურგზე დაგახტეს მაიმუნი. არ უნდა შეიმჩნიო, თორემ დაგპოტავს. ვერ შემჩნევა არც ისე ადვილია, როცა მაიმუნი ცხვირში გილიტინებს.

სეიშელზე დაბადებულ ბავშვთა 75% უკანონოა. ე. წ. უკანონო შვილის გაჩენა სასურველად როდი ითვლება. შვილიანი გოგონები უფრო თხოვდებიან. სამ შვილს გააჩენს და მერე უფრო ადვილად თხოვდება. განსაკუთრებით, თუ ერთი მაინც თეთრი გამოეჩინაო, გიდმა.

სულ სხვა ბალახი და სულ სხვა მცენარეებია. ასეც უნდა

იყოს. საქართველო და სეიშელი ქვეყნის სხვადასხვა კიდეა, მაგრამ გაგიკვირდება კაცს, ნაცნობ მცენარეს რომ დაინახავ. საიდან გაჩნდა, რატომაა ლამის ერთნაირი მცენარეებით დაფარული დედამიწის სხვადასხვა კუნძული?

## 10 ივნისი

მთელი დღე ინდოეთის ოკეანეში ვჭყყუმპალაობთ. ძალიან დავინწვი.

ჩვენს გარდა არავინ ცურავს ზღვაში. რამდენიმე კაცი აუზში ჭყუმპალაობს. ძალიან დავინწვი. დანარჩენები წვანან და მზენვას იღებენ.

რაშია მეთქი საქმე. აქ ბანაობა არ შეიძლება, ზღვის ზღარბები და მორენებით (წვრილი გველები) სავსეაო ზღვა. არ დავიჯერეთ, სანამ ჩვენს თავზე არ გამოვცადეთ.

სტეპან ივანიჩს „უკბინა“ ზღარბმა. ძლივს ამოვათრიე. ფეხისგულზე ასამდე ნემსი ერჭო.

აქაურებს წამალი სცოდნიათ. გაფცქვნილი პაპაი წაუსვეს და მოუნვეს ფეხისგული. ძლივს გადარჩა. ახლა წევს და ოხრავს.

მორენები უარესია, თურმე მაშინვე კლავს ადამიანს.

## 11 ივნისი

სეიშელის განთქმულ პლაჟზე ვართ.

მოდაში შემოსულა; ქალები წელსზემოთ შიშვლები. ბანაობენ და მზეს ეფიცხებიან.

მეთევზეებს მივებმარეთ ბაგირის გადაქაჩვაში (ბადის ამოთრევა), ბევრი ვერაფერი დაიჭირეს.

საღამოს მიღება გვექონდა კულტურის მინისტრთან ჯეიმს მიშელთან, რომელიც სახელმწიფოში მეორე კაცია (სხვა ბევრი რამის მინისტრიც არის).

გვესაუბრა სეიშელზე, პოლიტიკაზე. სსრკ-სთან ურთიერ-



თობაზე. ტერიტორიულად მოსახერხებელ ადგილზე ვართ და ჩვენზე ბევრი ნადირობსო.

სალამოს ცნობილ გიტარისტს მოვუსმინეთ. ბრწყინვალედ მღეროდა.

დისკოტეკა – გვიან ღამემდე.

## 12 ივნისი

დილიდან ზღვაზე.

სადილის შემდეგ ახალგაზრდობის ასოციაციაში მიღებაზე.

ასოციაციის თავმჯდომარემ თქვა, ახალგაზრდების აღზრდაში დიდი პრობლემები გვაქვსო. მოგეხსენებათ სეიშელი ტურისტული ქვეყანაა, ტურისტებს კი ათასი მამაძღლობა (ნარკომანია, სექსუალური მოდა, აზარტული თამაშები, და სხვა) ჩამოაქვთო. მოდის მიმართ სულსწრაფი კრეოლები და ზანგები ამას ყოველივეს სწრაფად ითვისებენ და იოლ ცხოვრებას დახარბებულნი ფულისთვის ათას მაიმუნობაზე თანხმდებიანო. ბიჭები იაფად უცვივიან ალფონსებად ხელში ხნიერ პარიზელ და ლონდონელ “არისტოკრატებს”, ხოლო გოგონები სექსუალურ ეროტიკას დახარბებულ მანიაკებსო.

მართლაც, ყოველ მოსახვევში დგანან ნახევარზე უფრო მეტად შიშველი გოგონები და მანქანებს ხელს უქნევენ, ან თეთრ კბილებს უელვებენ.

## 13 ივნისი

სახლში წასვლამდე სამი დღე დარჩა.

რას აკეთებენ, ნეტა, ახლა ნათელა და ბაჩულია?

მეც და ვალერისაც ყელში ამოგვივიდა აქაურობა. მოგვენატრა საქართველო. ჩვენი საქმე და ცოლ-შვილი.



მადაგასკარელ ბავშვებთან

ახალი ქვეყნების ნახვის საოცარი ჟინი მაქვს, მაგრამ დასვენებას ვერ ვეგუები.

წარმოიდგინე მწვანე კუნძულები ერთმანეთს 100-150 მეტრით დაშორებული და ირგვლივ ლურჯი ზღვა – ესაა სეიშელი.

ტანსაცმელი ჩვენი წარმოდგენით აქ არ არსებობს. ადგილობრივ მცხოვრებთა უმეტესებას მხოლოდ პერანგის ანხანაგები აცვია. წელსზევით ტიტველია და ფეხშიშველი.

ქალებს სიფრიფანა მაიკები აცვიათ და შორტები.

ოკეანე ძალიან მკაცრი რამ არის. ჩვენთან შავ ზღვაში სადაც გინდა რომ ჩახტები, აქ ისე არ არის. თუ სპეციალურად განმენდილ პლაჟზე არ იცურავე, სიცოცხლეს საფრთხეში იგდებ. შეიძლება მორენამ დაგმხამოს. ზღარბს დაადგა ფეხი ან ეკლიან ნიჟარებზე მუცელი გაიფატრო. სეიშელს ირგვლივ გრანიტის უზარმაზარი ქვები აქვს შემონწყობილი. ამოდენა ქვები ჩემს ცხოვრებაში არ მინახავს. ზოგი მათგანი არც მეტი არც ნაკლები ოდისხელაა.



## 14 ივნისი

მთელი დღე ზღვაზე გავატარეთ.

ვესაუბრე ინგლისელ გოგონას. ქვიშაზე სფინქსის სახეს აქანდაკებდა.

მეო, ლონდონის ტელევიზიის მსახიობი ვარო. თვრამეტი-ცხრამეტი წლისა ძლივს იქნება. თვისი ტრაგედია აქვს. ცოლიანი კაცი მიყვარსო და კამერუნში სანადიროდ წავყვეო. ორი თვე დავყავი მასთან, მერე ძალიან გამიჭირდა მიტოვება, იმიტომ რომ ოჯახს დაუბრუნდაო.



მადაგასკარი. ღარიბი გლეხის სახლი.

სალამოს დავესწარიტ ცნობილი ფრანგი პიანისტის ბრიჯიტ ანჟევერის კონცერტს. ეს იყო კლასიკური მუსიკის პირველი კონცერტი სეიშელზე საერთოდ. ბრწყინვალე შემსრულებელია. მაღალი, დახვეწილი კულტურით. შესახედავადაც, რა მნიშვნელობა აქვს, მაგრამ მომხიბლველი ქალია. კონცერტის დასასრულს ვალერი და მე გასახდელში მიგვიღო. მოსკოვში

უსწავლია კონსერვატორიაში. თბილისის მუსიკოსთა სკოლას იცნობს და პატივს სცემს. ახსენა ელისო ვირსალაძისა და მარინა მდივნის სახელები. მეო, ხალხისთვის მინდოდა დამეკრა, ამათ კი ბილეთს 100 რუპია დაანერესო, რაც ძვირიაო (ოცი დოლარი). კონცერტს ჩინეთის, საფრანგეთის, ინგლისის ელჩები ესწრებოდნენ.

## 15 ივნისი

წყნარი, მშვიდი დილაა.

ინდოეთის ოკეანე მშვიდი ფაჩუნით თითქოს ოთახში შემოდის.

დღეს 3 საათზე მოსკოვში მივფრინავთ. დრო მაქვს და ჩემს დღიურში ვწერ: სეიშელზე 65 ათასი კაცი ცხოვრობს. 1976 წლიდან დამოუკიდებლობა მიიღო. საფრანგეთის კოლონია იყო, მერე ინგლისის.

უნიკალურია სეიშელის გრანიტი. იგი 600 მილიონი წლისაა. სეიშელზე სულ 101 კუნძულია. ირგვლივ გრანიტის გრანდიოზული ქვებითაა შემორაგვული. დედაქალაქი ვიქტორია. ვასკო და გამამ აღმოაჩინა.

სეიშელის პალმა, ანუ ორმაგი პალმა, როგორც აქ უწოდებენ მსოფლიოში უნიკალურია და საიდუმლოებებით მოცული.

ინდიელებს ზღვის პალმა უწოდეს, რადგანაც ზღვაში პოულობდნენ უზარმაზარ ორმაგ ნაყოფს, რომელიც ადამიანის ნაწილებს წააგავს.

კუნძულ პრასლენზე ხარობს.

ეს პალმა 500 წელი ცოცხლობს. ნაყოფი ექვს-რვა წელიწადს იზრდება.

გიგანტური კუ არის სეიშელის მეორე საოცრება. მეცნიერები ამტკიცებენ, რომ იგი არ შეცვლილა ნახევარი მილიარდი წლის განმავლობაში. თითქმის გაანადგურეს და შეტანილია წითელ წიგნში.

XVIII საუკუნემდე სეიშელზე მუდმივი მცხოვრებნი არ იყვნენ.

გრანტის ქვებზე რალაც ნიშნებია, ადგილობრივი მცხოვრებნი ამბობენ, რომ ეს არის პირატების (ყაჩაღი მეკობრეები) მიერ დამალული განძის საიდუმლო სიტყვა. მე-XVIII საუკუნიდან ბევრი გაითხარა, მაგრამ ჯერჯერობით ვერ მიაკვლიეს.

სეიშელი ტურიზმის გამო მალე გადავიდა პალმის ფოთლებით დახურული ქოხებიდან ფეშენებელურ ევროპულ ვილებზე.

„სიყვარულის არქიპელაგს“ უწოდებენ ახლაც სეიშელს. იგრძნობა მონური ფსიქოლოგია, რაც ფრანგმა და ინგლისელმა პლანტატორებმა შემოიტანეს. ბოლო დრომდე საერთოდ არ იყო ქორწინება. შვილები დედებს ეკუთვნოდა.



მადაგასკარი. პანანინა ქურდბაცაცები.

ძალიან ლამაზები არიან გოგონები. ბრინჯაოსავით ჩამოსხმული ტანი და მოქნილობა.

მშვიერი არავინ დარჩება იმდენი ქოქოსი და ბანანია ირგვლივ. ამიტომ მუშაობა მაინდამაინც არ უყვართ. თევზჭერა და ქოქოსია მთავარი მეურნეობაში.

აქ არის მფრინავი მელიებიც კი.

და პალმის წვენი „პალმის ღვინო“ – ტოდი. ერთი პალმიდან დღეში შეიძლება ათ ლიტრამდე წვენი მიიღო.

დიდ პატივს სცემენ სახალხო მედიცინას. როცა სტეპან მალიშევმა ზღარბს ფეხი დააბიჯა და ძლივს ამოვართიე ნაპირზე. ვერც ჩვენმა ექიმმა და ვერც ადგილობრივმა ეკლები ვერ ამოაცალა. მზარეულს შევჩივლე კაცს ასე დაემართა მეთქი. წამოვიდა და ეკლები ამოაცალა პაპაის ნაყენით და ცეცხლით.

ზვიგენზე ნადირობენ.

ტელევიზია არ არის. რადიო არ მუშაობს. კინო არ არის სპეციალურად. არის ზღვის პარაშუტი.

აქირაგებენ ტურისტებისათვის პატარა ინგლისურ მანქანებს.

მანქანა მოვიდა. აეროპორტში წაგვიყვანს. იძულებული ვარ დღიურის წერა შევწყვიტო.

## „ციცინათელა“ ეკვატორის მიღმა

ხომ ასე დაპატარავდა ჩვენი პლანეტა, ინფორმაციისა და გადაადგილების სასწაულებრივმა საშუალებებმა ხომ სამუგუზლო მეზობლებად გვიქცია შორეული ქვეყნები, მაინც ცოტა რამ ვიცით ერთმანეთის შესახებ. საენციკლოპედიო სტატიებსა და დიპლომატიურ ცირკულარებში უმთავრესად ციფრებზეა ლაპარაკი, ადამიანთა სულიერი წონასწორობა, ცხოვრების წესი, ინტერესთა ცვალებადი კალეიდოსკოპი კი, რატომღაც, საყოველთაო ინფორმაციის მიღმა რჩება. ამას მკითხველთა და მსმენელთა ფართო ფენების შესახებ მოგახსენებთ. თქვენ წარმოიდგინეთ, ცივილიზაციისგან არც თუ შორს მდგომ ქვეყნებშიც კი მიწვედა პასუხის გაცემა ამგვარ შეკითხვებზე:

„მართალია თუ არა, რომ თქვენს ქვეყანაში განქორწინება აკრძალულია და ცოლის ღალატისთვის ქმარს ციხეში სვამენ?“

„მართალია თუ არა, რომ თქვენთან ერთი ქალაქიდან მეორეში წასასვლელად მილიციის ნებართვაა საჭირო?“

„მართალია თუ არა, რომ საბჭოთა კავშირის ტელევიზია მხოლოდ ჰიმნს და შრომის მხიარულ სიმღერებს გადასცემს?“

უბრალო მოქალაქისგან რა გამიკვირდება, როცა ერთგან ისეთმა მაღალინფორმირებულმა პიროვნებამ, როგორც მწერალი გახლავთ, სერიოზულად მკითხა:

„მითხარი ერთი თუ კაცი ხარ, თქვენთან მართლა მხოლოდ იმ წიგნებს ბეჭდავენ, რომლებშიც მთავრობის წევრთა საქმიანობაა შექებული?“

მადაგასკარზე, ანტანანარივუში სასტუმრო „კოლბერის“ წინ მდგარს, მეტი რომ არა ვთქვა – შავტუხა მაღაგასიელი მომიახლოვდა, თეთრი კბილები გამიელვა და დაღწილი ინგლისურით მკითხა:

„ყური მოგვარი ჩერნობილის ავარიის დროს რამდენიმე კაცმა უარი თქვა საშიში ზონიდან გასახლებაზე, რათა სახელმწიფოსთვის ევაკუაციის ხარჯები დაეზოგაო, მართალია?“

ავუსენი, რომ, მართალია, საბჭოთა კავშირში მომჭირნე

და გაბედული ადამიანები ცხოვრობენ, მაგრამ არც ისე მომჭირნე და გაბედული გახლავან, რომ ეკონომიური მოსაზრებით ასეთი სულელური გადაწყვეტილება მიეღოთ-მეთქი.

ბუნებრივია, ამგვარი შეკითხვების მოსმენის შემდეგ არავითარ პრეტენზიას არ ვაცხადებდით იმაზე, რომ აფრიკის შორეული ქვეყნის და ინდოეთის ოკეანეში მიმოფანტული კუნძულების მცხოვრებთ „ვეფხისტყაოსანი“ ნაკითხული ჰქონოდათ ან დავით გურამიშვილზე რაიმე სმენოდათ. ქვეყნებს, რომლებზეც ქვემოთ მოგახსენებთ, დელიკატური მოსაზრებით განვითარებად ქვეყნებს უწოდებენ. ვინც ამ მოფერებით სახელს არქმევს, მან მშვენივრად იცის, რომ განვითარება და სრულყოფა შეიძლება რამდენიმე საუკუნეს გაგრძელდეს, მით უმეტეს, თუ იმასაც გავითვალისწინებთ, რა ტემპით და საით მიდის ეს განვითარება.

ჯერ საქმეზე მოგახსენებთ, რომ ამ დღიურის ავტორი ვასკო დე გამას კვალზე შემდგარ მოხალისე გეოგრაფად, ან უარესი – მარტოხელა გეოლოგ-დეტექტივად არავინ ჩამთვალოს:

ამასწინათ საბჭოთა კავშირიდან გაფრინდა საზღვარგარეთის ქვეყნებთან მეგობრობისა და კულტურული ურთიერთობის საზოგადოების თხუთმეტკაციანი დელეგაცია საქართველოს კულტურის მინისტრის ვალერი ასათიანის მეთაურობით. დელეგაციამ შემოიარა სამი სახელმწიფო – მადაგასკარი, მავრიკია, სეიშელის კუნძულები და ჩვენი და უცხოური ოფიციალური პრესის დასტურით აღვნიშნავ, რომ გააკეთა მნიშვნელოვანი ინტერნაციონალურ-კულტურული საქმეები. ამ სახელმწიფოთა მეთაურებისა და კულტურის მინისტრის ხელმოწერით გაფორმდა მეგობრობისა და კულტურული ურთიერთობის მრავალწლიანი ხელშეკრულებები. ჩატარდა საინტერესო შეხვედრები, პრესკონფერენციები. გაზეთებში დაიბეჭდა და ტელევიზიით გადაიკა ინტერვიუები ჩვენი ქვეყნის ცხოვრების სხვადასხვა პრობლემის შემცველი ფართი ინფორმაციით. ერთი სიტყვით, დელეგაციას, ამ



ბოლო დროს მოდაში შემოსული გამოთქმა რომ ვიხმარო – აფრიკაში სადაგი დღეები ედგა. ყოველდღიურად ორი-სამი ღონისძიების გამართვა მაინც გვინევდა. ვისაც ჩემი ორი-ოდე სტრიქონი მაინც წაუკითხავს, ალბათ, პირმოთნეობაში არ ჩამომართმევს, თუ ხაზგასმით აღვნიშნავ დელეგაციის თავის – ვალერი ასათიანის განსაკუთრებულ დამსახურებას – ყველა რანგის შეხედრებსა თუ დისკუსიებზე გამოსვლების მაღალ კულტურას და პოლიტიკურ სიტუაციებში ორიენტირების შესაშურ უნარს. ზოგან ისეთ ქვეყანასა თუ ქალაქში გალხდით (განსაკუთრებით სეიშელის კუნძულებზე), სადაც კულტურული მისიის საბჭოთა დელეგაციას მანამდე ფეხი არ დაედგა და საერთოდაც საბჭოთა მოქალაქეს პირველად ხედავდნენ, ამიტომაც თავს არ ვზოგავდით, რათა დაინტერესებულ დამხვდურთათვის წარმოდგენა შეგვექმნა ჩვენი ცხოვრების წესზე, კულტურული ცხოვრების სიახლეებზე, მწერლობის პათოსსა და იმ ჰუმანისტურ ტენდენციებზე ჩვენი ლიტერატორის საბრძოლო პროგრამას რომ შეადგენს. იქ ყოფნის მთელი კვირების განმავლობაში პრესა ფართოდ აშუქებდა საბჭოთა დელეგაციის საქმიანობას და ბოლოს ისე გავეჩვიეთ, უხალისოდ გადავდებდით ხოლმე გაზეთს, თუ მასში დელეგაციის ხელმძღვანელის, ან რომელიმე რიგითი წევრის ფოტოსურათი მაინც არ იყო დაბეჭდილი.

მაღაგასკარი, მავრიკია და სეიშელის კუნძულები რომ შორზე შორს „ქვეყნის დასალიერში“ მდებარეობენ, იმასაც კი მოეხსენება, ვინც საშუალო სკოლაში გეოგრაფიას სამადლო სამიანზე ძლივს სწავლობდა. კუნძულების ეგზოტიკაზე, მოქმედ ვულკან ცარატანინაზე, გიგანტურ კუზე, ქამელეონზე, ულამაზეს მაიმუნებზე – ლემურებზე (თუ კი შეიძლება მაიმუნზე საერთოდ „ლამაზი“ ითქვას) და მახრჩობელა გველეზზე მე არას მოგახსენებთ, ეს საკითხები მოგზაურთა კლუბის ტელეგადაცემების მესვეურთათვის დამითმია. საგაზეთო სტატიის მოცულობით შეზღუდული, მოკლედ გავიხსენებ იმას, რაც განსაკუთრებით დამამახსოვრდა.

მთელს მადაგასკარზე ღია წითელი მიწაა, ამიტომაც მას მოგზაურები „წითელ კუნძულსაც“ უწოდებდნენ. მოსახლეობის უმეტესობას მაღაგასიელები, ინდოელები, არაბები და ზანგები შეადგენენ. მეცხრამეტე საუკუნის დასაწყისში მადაგასკარზე ფრანგები გადმოსხდნენ და მომცრო ტანის, ადვილადმიმდობ და სტუმართმოყვარე მაღაგასიელებს „გაიძვერა მოყვრის“ პოლიტიკით ევროპულ ცივილიზაციასთან ზიარება დაუწყეს. ხოლო 1885 წელს კი იმერინის მონარქების ლამის მარიონეტული ხელისუფლებაც გააუქმეს და მადაგასკარი საფრანგეთის კოლონიად გამოაცხადეს. „განსწავლის“ არასრული საუკუნე საკმარისი აღმოჩნდა იმისათვის, რომ მაღაგასიელს თავისი ენა, ეთნიკური სახე დაეკარგა და გადაგვარების ოკეანეში ღრმად შეცურებულიყო. 1960 წლიდან მადაგასკარი დამოუკიდებელი რესპუბლიკაა და ენერგიულად ცდილობს თავისი ეროვნული სახე დაიბრუნოს. მაგრამ კოსმოპოლიტური გაქანების ცივილიზებული დინების ეროვნულ ღარზე მიშვება ძალიან უჭირს. მწერლების ოთხმოცდაათი პროცენტი წიგნებს ფრანგულად წერს, მაღაგასიურ ენაზე მოქმედი სკოლები ძლივს ფეთქავენ, რადგანაც ევროპულ კულტურაში ფეხმედგმული მშობლები ამჯობინებენ შვილები ფრანგულ სკოლაში მიაბარონ. ტელევიზია უმეტესწილად ფრანგულ გადაცემებს გვთავაზობს, მუსიკალური მაღაგასიელი თავიანთ მშობლიურ ენაზე მხოლოდ მღერიან და ცეკვავენ უძველეს მაღაგასიურ ცეკვებს. ამათაც მხოლოდ ეროვნულ ანსამბლთა წევრებიღა ახერხებენ. დისკოტეკათა შუქ-ჩრდილებში ლამის მთელ მსოფლიოში ერთი და იგივე ჰანგები ისმის და ნიველირების სულისშემძვრელი ბარაბნის ხმა ზედ გულის კოვზზე უბრაგუნებს როკვის ექსტაზში შესულ ჩვენს დაბნეულ თანამედროვეს.

მაგადასკარზე ცხოვრების დონე, ეკონომიკური და ინტელექტუალური განზომილებით თუ ვიმსჯელებთ, დაბალია, სამაგიეროდ ქურდობა და ბანდიტიზმი მაღალ დონეზე დგას. ანტანანარივუს ცნობილ გამოფენა-ბაზრობაზე წამდაუნუმ



გეჩხირებათ თვალში „პოლიცია! პოლიცია!“ ძახილით ყელ-გამშრალი მოქალაქე, რომელსაც ესესაა ჯიბეები დაუსუფთავეს. „რომ შეგხვდეს, სახეზე თუ იცნობო“ ეკითხებოდა პოლიციელი გაქურდულ აყლაყუდა ფინელ ტურისტს. ირგვლივ მყოფნი სიცილით იჭაჭებოდნენ, ხოლო ფინელი დაბნეული შესცქეროდა თავის მხსნელს“, რომელიც ქურდის აღმოჩენის ისეთ საექვო გზას სთავაზობდა, როგორც გახლავთ ასიათასიან ბაზარში კაცის ამოცნობა, მით უმეტეს, თუ იმასაც გავითვალისწინებთ, რომ ზანგები ერთმანეთს ბიძაშვილ-მამიდაშვილებივით ჰგვანან.

გამოვუტყდები მკითხველს, რომ მე, საქართველოს პატრონს, მთები და მათი მწვანე სამოსელი აღარ მაოცებს. საზღვარგარეთ უფრო ადამიანთა ყოფა-ცხოვრების, მათი სულიერი წყობის გაცნობის წყურვილი მაქვს, და, მგონი, ეს სრულიად ბუნებრივი უნდა იყოს ჩემი პროფესიის კაცისათვის. უცხოეთში კი ლამის ყველაგან ერთნაირად ხდება: შენს ირგვლივ მოფუსფუსე გიდეები და სხვა სამსახურის წარმომადგენლები სიამოვნებით გიჩვენებენ ბუნების საოცრებებს – ვულკანურ ტბებს და ჩანჩქერებს, სასაფლაოს აკლდამებს და მუზეუმთა გაქვავებულ ექსპონატებს, მაგრამ როგორც კი თანამედროვე კაცის სახლში, ან სულში შეხედვის სურვილს გაამყლავნებ, მაშინვე სრულიად უსაფუძვლო შიში და ზრუნვა ჩაუდგებათ თვალეებში და ყოვლის ღონისძიებით ცდილობენ ხელი შეგიშალონ.

ქალაქ ანცირაბეში რომ მივემგზავრებოდით, გზის ორივე მხარეს ალიზით შელესილი ნონოლა ქობმახები ჩანდა. ერთი სული მქონდა, გამეგო, როგორია ჩვეულებრივი მადაგასკარელი გლეხის სახლის ინტერიერი. გიდს რამდენჯერმე ჩამოვუგდე სიტყვა ამის შესახებ, მაგრამ უარი განმიცხადა; მაღაგასიელს არ უყვარს, როცა მის სახლში უცხოელი შეიხედავსო, ეშინია თვალი არ ეცესო. მე, რასაკვირველია, არ დამაკმაყოფილა ამ ზრდილობიანმა უარმა, უკან დაბრუნებისას ვისარგებლე ჩვენ პრესატამის არსენ განიევის

კლეთილგანწყობით, რომელმაც სიამოვნებით დამითმო ახალთახალი „ტოიოტას“ საჭე და ჩვენი დელეგაციის ფეშენებელური ავტობუსი თვალს რომ მიეფარა, მანქანა ერთ-ერთ მადაგასკარულ „ვილასთან“ დავამუხრუჭე. ფეხმძიმე ქალი და მზისქუდიანი, მაღალდარღვოსანი მაღაგასიელი გამოგვეგებნენ. დედას ქვედატანზე შემოხვეულ გაურკვეველი ფერის ქსოვილზე ოთხი თვალმაყვალა ბაღლი ეპორნიალეობდა. როცა არსენმა ჩვენი სურვილი აუნყა მასპინძლებს, უნდა გენახათ, ცოლ-ქმრის სიხარულისგან გაბადრული სახეები. სახლის დათვალეიერების თხოვნაზე სიამოვნებით დაგვეთანხმნენ. მაღაგასიელის ტიპიური ალიზით შელესიი სახლი მაღალი იმიტომ ჩანდა, რომ ორსართულიანი ყოფილა. იგი ორი ვინრო ოთახისაგან შედგება. ზედა და ქვედა ოთახები ფარლალა ფიცრებითაა გაყოფილი. „ზემოთ ბავშვებს სძინავთ, ქვემოთ ჩვენო“, გამოგვიცხადა ოჯახის უფროსმა, მაგრამ მე ვერც „ზემოთ და ვერც ქვემოთ“ ვერ აღმოვაჩინე ისეთი რამ, რაზეც შეიძლებოდა ბავშვებს, ან მათს მშობლებს სძინებოდათ. ოთახებში არ იდგა არც სანოლი, არც სკამი, არც მაგიდა. ფანჯრის რაფაზე რამდენიმე თიხის ჯამი იდო. ეგ იყო სულ მაღაგასიელის ავლა-დიდება. ასე რომ, ვერაფერი აღმოვაჩინე იმ სახლში ისეთი, რასაც შეიძლებოდა „თვალი სცემოდა“. მაღაგასიელთ იატაკზე სძინავთ, იატაკზევე (ხის ჯამებით მუხლებზე) სადილობენ და საერთოდ სახლში ძალიან ცოტა ხანს ჩერდებიან. რაკი წლის განმავლობაში აქ ერთი და იგივე ტემპერატურაა, ფანჯრებს მინას არ უკეთებენ, დიდი და პატარა უმეტეს დროს მინდვრად, ბრინჯის და ყავის პლანტაციებში ატარებს.

მსოფლიოს ხალხებს მიცვალებულის გაპატიოსნების სხვადასხვა წესი აქვთ, მაგრამ მაღაგასიური მათ შორის, რბილად რომ ვთქვა, ფრიად ორიგინალურია. წითელი კუნძულის მცხოვრებნი ფლობენ მკვდრის დაბალზამების უძველეს ხალხურ ხელოვნებას. მართალია, ეს წესი ბევრად უფრო პრიმიტიულია, ვიდრე დაბალზამების ფარაონთა ეგვიპტის

მეთოდები და თანამედროვე სამედიცინო დაბალზამებისაგანაც შორს დგას, მაგრამ მაღაგასიელნი ერთგულად მისდევნენ ტრადიციას და მიცვალებულს გარდაცვალების დღიდანვე ბალზამის ემბაზში ატარებენ. დაკრძალვის ცერემონიალი საგვარეულო აკლდამაში შესვენებით (კინალამ წამომცდა შეტანით-მეთქი, რაც ალბათ უხერხული იქნებოდა მსოფლიოს ყველა პატიოსანი მკვდრის მისამართით) გვირგვინდება. აკლდამა ორი მეტრის სიმაღლის ოვალური ნაგებობაა, რომელშიც გამძლე ხის თაროებზე განისვენებენ ჯვალოს სუდარაში გახვეული სხვადასხვა ასაკის მუმიები. წელიწადში ერთხელ აკლდამას გახსნიან და მიცვალებულის ნეშტს სახლისკენ მოასვენებენ. „მკვდრის დღეს“ ჭირისუფლებს ცრემლის გამომოგდება ეკრძალებათ. მუმიას ცეკვა-სიმღერითა და დაფაზურნით გარს უვლიან. საღამოსკენ ახალ სუდარაში გამოაწყობენ და ისევ აკლდამის გზას გაუყენებენ. ასე „მონაწილეობს“ მიცვალებული მაღაგასიელის ცხოვრებაში და შორეული კუნძულის მცხოვრებთ ღრმად სჯერათ, რომ მიცვალებულის მიწაში ჩაფლვა და ჭია-ლუის შესაჭმელად მისი განირვა უდიდესი ცოდვაა, რადგანაც ბიოლოგიური გარდასახვა (სული შორდება სხეულს) ადამიანის საბოლოოდ წასვლას როდი ნიშნავს, სული ყველაფერს გრძნობს და ხედავსო.

რაკი სიტყვას მოჰყვა, აქვე აღვნიშნავ, რომ მაღაგასკარზე ადამიანის სიცოცხლის ხანგრძლივობა საშუალოდ ორმოცდარვა წელია. „სიცოცხლეში“, რასაკვირველია, აკლდამის გარეთ არსებობას ვგულისხმობთ.

მაღაგასკარი მეცხოველეობის ქვეყანაა და ყოველ კუთხეში შეხვდებით გასაყიდად გამოტანილ სისხლმეუმშრალ ხორცს. ამ ქვეყანაში მაცივარს მაინცდამაინც პატივს არ სცემენ და დიდ ქალაქებშიც კი სარეალიზაციოდ (საიდან გაჩნდა ეს არაბუნებრივი სიტყვა ჩემს ლექსიკონში?) ახალ ხორცს იყენებენ.

ახალ ხორცზე გამახსენდა: მაღაგასკარზე ბუზი იშვიათობას წარმოადგენს. ბუზის ნახვა მომენატრა-მეთქი ვერ

გეტყვით, მაგრამ ხორცის ბაზარს რომ ვათვალიერებდი, გიდს ვკითხე, რატომ არ ჩანს ხორცის განუყრელი თანამგზავრი-მეთქი. ბუზი მაღაგასკარის მზის მაღალ რადიაციას ვერ უძლებსო, სამაგიეროდ ღმერთმა ისეთი საშინელი „მხეცი“ მოგვიმრავლა, როგორც მალარიის კოლო გახლავთო. მალარიის კოლოსა და მზის რადიაციის ურთიერთდამოკიდებულებაზე აღარაფერი მიკითხავს. რაღაცას ჩემითაც ხომ უნდა მივმხვდარიყავი.

ოთხ ივნისს დელეგაცია მავრიკიას გაემგზავრა.

მავრიკია მაღაგასკართან შედარებით პატარა სახელმწიფოა, ერთი მილიონი მცხოვრებით. მოსახლეობის უმეტესობას ინდოელები და კრეოლები შეადგენენ. მავრიკიაში რკინიგზა არ არის. სახელმწიფოს ოფიციალურად ერთი გემი და სამადსამი თვითმფრინავი აქვს. ქვეყნის შემოსავლის ძირითადი წყაროა შაქრის ლერწამი და ტურიზმი.

საინტერესოა ის გარემოება, რომ მავრიკიელნი სასმელად, ძირითადად, წვიმის წყალს ხმარობენ. ნალექები აქ, ღვთის შეწევნით, უხვად მოდის და წვიმის წყალს უზარმაზარ რეზერვუარებში აგროვებენ.

დედაქალაქ პორტ ლუისში ჩვენი იქ ყოფნის დროს პარლამენტმა მიიღო კანონი: – ნარკოტიკის მიღებისათვის გაუფრთხილებლად ათი წელი ციხე, ხოლო ნარკოტიკების გავრცელებისათვის დახვრეტა. კუნძულის მოსახლეობა, როგორც გვაცნობეს, კმაყოფილებით შეხვდა ამ ღონისძიებას, რადგანაც ნარკომანიამ ინდოელთა და მავრიკიელთა ამ პატარა სახელმწიფოში ბოლო წლებში არნახული გაქანება ჰპოვა.

მავრიკიას ჯარი არა ჰყავს. მშვიდობიანი ნეიტრალური სახელმწიფოა და დედამიწის პოლიტიკურ ვნებათაღელვებში აქტიურად არ მონაწილეობს.

მეხსიერებაში სამუდამოდ ჩამებეჭდა მავრიკიის ჩვეულებრივი პეიზაჟი: წითელყვავილოვანი ზღაპრული ხეები, კაშკაშა მზე და შაქრის ლერწმის ყანებში მოულოდნელად ცისკენ ავარდნილი, თვალმუდგამი შავი კლდეები. მწვანე

ნალკოტიდან ამოშვერილ ამ გიგანტურ კლდეებზე ბალახის ნატამალიც არ ჩანს. ვულკანური წარმოშობისააო, გამყოლმა. იქნებ მართლაც ასეა.

მავრიკიაში სუფთა ჰაერი და სიმშვიდეა. ხელისუფალნი ყოველ ღონეს ხმარობენ, რომ ზღვა და ატმოსფერო არ გაჭუჭყიანდეს და სახელმწიფომ ტურისტული მაზანდა არ დაკარგოს. ამიტომაც ლამის შეგნებულად ამბობენ უარს მრენველობის მასშტაბურ განვითარებაზე. მძიმე და შავი მეტალურგია საერთოდ არა აქვთ. ელექტროენერჯის ძირითადი წყარო თბოელექტროსადგურებია.

აქ სანატორიუმები და დასასვენებელი სახლები საერთოდ არ არის. ყოველ ფეხის ნაბიჯზეა ზღვისპირა სასტუმროები, სადაც ნომრის დაქირავება ტელეფონითაც შეიძლება. ზოგიერთ კაპიტალისტურ ქვეყანაში რომ სანატორიუმის, ან დასასვენებელი სახლის საგზურის მრისხანე თარიღს უნდა შეუფარდო შენი ცხოვრება (და თუ დაგაგვიანდა შენს ადგილას რომ სხვას მიიღებენ და შენ უბოდიშოდ უკან გამოგისტუმრებენ) აქ ასე არ არის. სასტუმროს კოტეჯებში დასვენების მაღალ პირობებს გიქმნიან და თავაზიანი მენეჯერები თვალეში შეგყურებენ, რათა სხვა დროსაც მათს უწყებაში დაიდო ბინა.

მავრიკია განთქმულია მდიდარი ზოოპარკებითა და აკვარიუმებით. საგულისხმოა ზოოპარკთა მოწყობის წესი. რკინის გალიები აქ მხოლოდ ზოგიერთი სახის ფრინველებსთვის აქვთ. ცხოველები და მათ შორის ისეთი მარდნიც კი, როგორც აფრიკული ზებრა და ჟირაფი გახლავთ, დამთვალეირებელთაგან წყლის არხებით არიან გამოყოფილნი. კუნძულებზე ზოოპარკის ბინადართა ცხოვრება ბუნებრივობის ილუზიასაც ჰქმნის და ჰიგიენური თვალსაზრისითაც უფრო მოსახერხებელიაო, აგვიხსნეს.

მავრიკიელ მწერლებთან შეხვედრაზე დრამატურგ აზის ასგალს ვკითხე: მავრიკიაში დრამატული თეატრი რომ არ არის, თქვენი პიესები სად იდგმება-მეთქი.

ორმოცდაათამდე პიესის ავტორი ვარ, აქედან მხოლოდ ორია დადგემული, ისიც საზღვარგარეთო. მავრიკიის ეროვნული თეატრი დიდხანს სულს ლაფავდა, ამ თხუთმეტი წლის წინათ შესწყვიტა არსებობაო. მიზეზი ვკითხე.

დამსვენებელს ქუდი რომ შეუგდო, ეროვნულ დრამატულ თეატრში არ შევა, ჩვენი პრობლემები მათ არ აინტერესებთ. არ ვიცი თქვენთან როგორ არის, მაგრამ აქ ტელევიზორისაგან მაყურებლის მოგლეჯა უძნელესი საქმეაო.

საერთოდ მწერალი თუ უყვართ-მეთქი მავრიკიაში. მწერალი კი უნდა უყვარდეთ, მაგრამ წიგნებს არ ყიდულობენო. თვით ყველაზე ცნობილ ადგილობრივ მწერალთა წიგნების ტირაჟი ასეულობით განისაზღვრება და ისინიც წლების განმავლობაში დევს მაღაზიათა თაროებზეო, მითხრა მშვენიერმა მავრიკიელმა პოეტმა ქალმა ჰავალდარ საკუნდალამ.

რვა ივნისს მავრიკიის ხელისუფალთ პატივი დაგვდეს და დელეგაციის ყველა წევრი მავრიკიის ხალხთა მეგობრობის ორდენით დაგვაჯილდოვეს.

მავრიკიიდან გამომგზავრების წინა საღამოს ჩვენი ფეშენებლური სასტუმროს ბაღში რომ ვისხედით და ერთმანეთს დღის შთაბეჭდილებებს ვუზიარებდით, უეცრად დაფდაფების ხმა გაისმა და თითქოს მიწიდან ამოიზარდნენო, სიმღერითა და როკვით ბაღში შემოვიდნენ კრეოლები. როგორც შემდეგ გამოირკვა, ადგილობრივი ფოლკლორული ანსამბლი სასტუმროს პატრონს ჩვენი დელეგაციის პატივსაცემად მოენვია. კონცერტი საათზე მეტ ხანს გაგრძელდა. ანსამბლი ინსტრუმენტთა სირთულით და მრავალფეროვნებით როდი გამოირჩეოდა; ზოგს დაირა ეჭირა ხელში, ზოგი რკინის ორ ნაჭერს ერთმანეთს უკაკუნებდა, მაგრამ ისე ბრწყინვალედ პლასტიკური იყო ყოველი მათგანის მოძრაობა, ისე ძალუმიად ფეთქავდა მათს რიტმულ როკვაში სასიცოცხლო ძარღვი და იმდენად ემოციური გახლდათ ბრინჯაოსფერ კრეოლთა ზეიმი, რომ საბოლოოდ ვირწმუნეთ ყველამ, რა განუმეორებელი და მშვენიერია ის, რაც ეროვნულია, რაც უცხოა

მიერ ძნელად ისწავლება და რაც ძეხორციელის გენებში საუკუნეთა წიალიდან ფეთქავს.

სახელმწიფოთა ამ სამეულში ყველაზე უფრო ეგზოტიკური სეიშელის კუნძულები აღმოჩნდა.

წარმოიდგინეთ, ერთმანეთისგან ორასი-სამასი მეტრით დაშორებული ასერთი პატარა კუნძული ლაჟვარდოვან ინდოეთის ოკეანეში. თითოეულ მწვანე ნალკოტს ირგვლივ უზარმაზარი გრანიტის ქვები აკრავს. ზოგი ქვა ჩვენებურ ოდას აღემატება. ქვებს შორის პალმის ფოთლებით დახურული აბორიგენტა ქოხები და პეიზაჟთან განსაცვიფრებლად შეხამებული, ასევე პალმით დახურული, კომფორტაბელური სასტუმროები მოჩანს. ესაა სეიშელი.

ათი წელი არც კია, რაც სეიშელი ინგლის-საფრანგეთის მეურვეობისაგან განთავისუფლდა და დამოუკიდებლობა მიიღო.

ევროპულ-ამერიკული კაპიტალი ათეული წლების განმავლობაში ცდილობდა ქვეყანაში ბუნებრივი ეროვნული განვითარება შეეჩერებინა და სეიშელი მსოფლიოსათვის თავისებურ ნაკრძალად შეენახა.

ასე გასინჯეთ, სეიშელზე ბოლო წლებამდე საშუალო სკოლებიც კი არ იყო. შენდებოდა გიგანტური სასტუმროები და ადგილობრივ მოსახლეობაში წლების განმავლობაში ყალიბდებოდა ჩამოსული კაცის გამრთობისა და სასტუმროს მოსამსახურე პირის ფსიქოლოგია.

სეიშელზე დასვენება ახლაც საკმაოდ ძვირი ღირს.

წლების განმავლობაში სხვებთან ერთად აქეთ მოემურებინან ევროპელი და ამერიკელი ხანშიშესული მილიონერი არისტოკრატი ქალები და ახალგაზრდა ალფონს ბიჭუნებზე ნადირობენ. ასევე მცირე გასამრჯელოს ფასად უმშვენიერესი კრეოლი გოგონები ადვილად უცვივიან ხელში სექსუალურ ეგზოტიკას დახარბებულ ტურისტებს.

ყოველ სასტუმროსთან, ყოველ მოსახვევში დგანან ნახევარზე უფრო მეტად შიშველი გოგონები და გამვლელ-გამოვ-

ლელთ ხელის ქნევით თუ თეთრი კბილების გაელვებით ეროტიკულ სამსახურს სთავაზობენ.

სეიშელმა ზამთარ-ზაფხული არ იცის. აქ ყოველთვის ერთნაირად ცხელა. ტანსაცმელი, ჩვენი წარმოდგენით, აქ თითქმის არ არსებობს. ადგილობრივ მცხოვრებთა უმეტესობას მხოლოდ პერანგის ამხანაგი აცვია, წელს ზემოთ ტიტველია და ფეხშიშველი. ბუნებაში გათქვეფის და ადგილობრივ ცალავართან შეხამების სურვილითაა გამოწვეული, ალბათ, ის მოდაც, სეიშელის თეთრქვიშიან პლაჟებზე რომ არსებობს; მზეს მიფიცხებული მანდილოსნები მხოლოდ საბანაო კოსტიუმების ქვედა ნაწილით არიან შემოსილნი.

სეიშელზე ადგილობრივ კრეოლთა და აბორიგენტა ცხოვრების წესში ორი ათეული წელიც კი არ იქნება, რაც ქორწინება გაჩნდა. მანამდე შვილები მხოლოდ დედას ეკუთვნოდა: გაგიკვირდებათ, მაგრამ ოფიციალურად გვაუწყეს, რომ სეიშელზე ამჟამად დაბადებულ ბავშვთა 75% უკანონოა. ე. ი. არარეგისტრირებული ქორწინების შედეგადაა გაჩენილი. ამ ქვეყანაში ქორწინებაზე და გათხოვებაზე ჩვენგან რამდენადმე განსხვავებული წარმოდგენები აქვთ. უბავშვო პატარძალი იშვიათია. თუ ქალს ორი ბავშვი მაინც არ ჰყავს, მასზე მამაკაცები ხალისით არ ქორწინდებიან. ადვილად თხოვდებიან სამ და მეტშვილიანი ქალები და მით უმეტეს, თუ ერთი შვილი მაინც თეთრკანიანი მამისგან ჰყავთ გაჩენილი.

სასტუმროებში მომსახურება იდეალურის დონეს უახლოვდება. რესტორნებში, ზოგი სხვა ქვეყნისგან განსხვავებით, არსად არ ღრიალებენ ორკესტრები. რესტორნის კუთხეში ზის კრეოლი გიტარით ხელში და ხმადაბლა მღერის მშვენიერსა და ნაღვლიან კრეოლურ სიმღერას. ყოველ რესტორანში ანანასი, ბანანი, მანგო, ფორთოხალი, მანდარინი, პაპაი, ქოქოსი და სხვა ხილი ცალკე უზარმაზარ მაგიდაზეა განწყობილი და შვედური მაგიდის პრინციპით ნაწილდება სტუმრებზე. ეს იმას ნიშნავს, რომ შეგიძლია მიირთვა რამდენიც გაგეხარდება.



სეიშელზე, ლამის, პირველყოფილი ხელშეუხებლობითაა შენარჩუნებული ბუნება. ერთმანეთში არეულ-გადახლართულია ადგილობრივი მცენარეების გარდა, მეზღვაურთა მიერ ნებით თუ უნებლიეთ ჩამოტანილი და თესლიდან აღმოცენებული გიგანტური მიმოზები, საქვოები, ბაობაბები, კაუჩუკის ხეები და სხვა. აქვე გვიჩვენეს განსაკუთრებული ჯიშის პალმა, რომელსაც გაკანრული მერქნიდან სისხლივით წითელი სითხე სდის. ჯუნგლებში, უკეთეს შემთხვევაში, ყოველ წუთს შეიძლება ზურგზე დაგახტეს მაიმუნი და მისი ოჯახის გაკულტურებული ორფეხა წევრის მხრებით გასეირნება მოისურვოს. ასეთ შემთხვევაში, გიდეები გაფრთხილებენ; გარეგნულად არაფერი შეიმჩნეო და ხმამაღლა პროტესტიც არ განაცხადო, თორემ შეიძლება შენს შორეულ წინაპართან შეხვედრა უსიამოვნოდ დასრულდეს. გაურჩებულ „რიქმას“ მაიმუნი მაშინვე დასაპუტად წაეტანება, თითქოს აქ არაფერიო, მშვიდად უნდა განაგრძო გზა მანამ, სანამ მაიმუნს არ მოსწყინდება და ტოტზე არ გადაინაცვლებს. ამ შემთხვევაში სიმშვიდის შენარჩუნება რომ ძნელია, იქედან ვიცი, რომ თვითონ მომიწია მაიმუნის ზურგით ტარებამ და ჩემი დაუპატიჟებელი სტუმარი ისე გამითამამდა, ყურში თითებს მილიტინებდა და, მგონი, ერთი-ორჯერ ცხვირიც მომისინჯა (ძვრება თუ არაო).

„სიყვარულის არქიპელაგის“ (ასე შეარქვეს სეიშელს ევროპელებმა) უნიკალურ მცენარეთა რიცხვში, უპირველესად, სეიშელის ქოქოსს ასახელებენ. აქაურები მას „ორმაგ პალმას“ ეძახიან, ხოლო ინდოელებმა ზღვის პალმა შეარქვეს, რადგანაც ინდოეთის ნაპირებზე ოკეანე გამორიყავდა ხოლმე სეიშელის ქოქოსის ნაყოფს. ორმაგი პალმა მხოლოდ სეიშელზე ხარობს, მისი ნაყოფი უჩვეულოა და, ერთი შეხედვით, ღიმილსაც კი იწვევს, რადგანაც ადამიანის უხერხულად სათქმელ ანატომიურ ნაწილებს წააგავს. წონითაც საკმაოდ მძიმეა, თხუთმეტ კილოგრამამდე აღწევს, სეიშელის პალმარვაასი წელი ცოცხლობს. ოცდამეათე წელს მსხმოიარობს, ხოლო ნაყოფის დამწიფებას ექვსი-რვა წელი სჭირდება.

ნახევრადველურ კუნძულთა ხელშეუხებელ ფაუნას თავისი სიმწარენიც ახლავს. სეიშელთან ინდოეთის ოკეანეში ბანაობა დასაშვებია მხოლოდ სპეციალურად განმენდილ პლაჟებზე, რომელსაც ფხიზლად დარაჯობს პლიაჟის მოვლის სამსახური. საქმე იმაშია, რომ სეიშელის ექვსასმილიონწლიან გრანიტის ქვებქვეშ უხვად ბინადრობენ ზღვის საშიში გველები – მორენები და ოკეანეში უხვადაა შხამიანი ზღვის ზღარბები. ნებადაურთველ ადგილას ბანაობის მსხვერპლი ჩვენი დელეგაციის წევრი, ცნობილი რუსი მხატვარი სტეფანე მალიშევი გახდა სეიშელზე ჩასვლის მეორე დღესვე. როგორც ჩანს, ფეოდოსიაში გაზრდილმა შავი ზღვის პირმშომ ყურად არ იღო გაფრთხილება და ბანაობისას ფეხი ზღვის ზღარბს დააბიჯა. ღრიალი რომ მომესმა, ჩავირბინე, წყალში გადავხტი და გულშეღონებული მალიშევი ნაპირზე გამოვათრიე. მარჯვენა ფეხისგულზე უთვალავი შავი მახათი ერჭო. გავვარდი სასტუმროს ექიმთან, სამწუხაროდ, ადგილზე არ აღმოჩნდა. უკან რომ გამოვრბოდი, თეთრხალათიან მზარეულს, რომელიც ქოქოსს ნაჯახით ხლენდა, შევჩივლე, ჩვენს ამხანაგს ასე დაემართა-მეთქი. ნაჯახი გააგდო, იქვე პაპაის ხეს შეახტა, რამდენიმე ნაყოფი მოგლიჯა და გამომიდგა. მალიშევს ფეხი შესივებოდა და საბჭოურად, ვაჟკაცურად იტანდა ტკივილს. მზარეულმა მხატვრის ფეხისგულს ეკლების შეამსხვრია, პაპაის ნაყოფი შუაზე გადატეხა და წაუსვა. მერე ირგვლივ შემოჯარულთ გვიბრძანა, მალიშევი გაგვეკავებინა, გაიქცა, აჩირალდნებული კვარით ხელში დაბრუნდა და სტეფანეს მოშხამული ფეხისგულის მოწვას შეუდგა. ახლა კი დათმო მხატვარმა დელეგაციის სერიოზული წევრის პოზიციები და ცივი ხმით აყვირდა, მაგრამ გვიან იყო. ღონივრად გვეჭირა. ფეხისგული კარგად რომ ამიშხინდა და დამწვრის სუნი დატრიალდა, თვითნასწავლმა ექიმ-მზარეულმა ერთხელ კიდევ წაუსვა პაპაის ნაყოფი, ფეხი შეუხვია და ურჩია, დილაზე არ გაველო. მეორე დღეს, სალ-სალამათი მალიშევი სეიშელის დედაქალაქის – ვიქტორიას სკოლა-ინტერნატის

ბავშვებს მხატვრობის ღია გაკვეთილს უტარებდა და გუშინ-დელი გოლგოთის საათი აღარც ახსოვდა.

სეიშელის საოცრებათა რიცხვს განეკუთვნება, აგრეთვე, გიგანტური კუ. ერთგან ორას სამოცდათხუთმეტი წლის კუს გვერდით სურათიც კი გადავიღე. სეიშელის უხუცესი ბინადარი, რომელსაც, ვინ იცის, იქნებ ამ ნაპირებზე გადმოსხმული პირველ მეკობრეთა ნავებიც ახსოვს, ფოტოგრაფირების ნებართვის თხოვნით არ შემინუხებია. კვირაში ერთხელ იკვებება, დღელამის უმეტეს ნაწილს გაუნძრევლად ატარებს, თავს არავის უყადრებსო, გიღმა. ბაკანზე როიალი რომ დაადო, არც გადმოაგდებს და არც შელონდება. ატარებს ასე, უთქმელად, თავის დარჩენილ ას წელიწადს. არა, ძმაო, არც ასე დაყუდებულად ყოფნა მინდა და არც ამგვარი სამასი წლის სიცოცხლე.

...და მაინც ყველაზე მეტად რა დამამახსოვრდა? მადაგასკარზე ინტერნაციონალური შეხვედრისას ხუთასკაციან დარბაზში ზანგმა გოგონებმა და ბიჭუნებმა „ციცინათელა“ რომ იმღერეს. სიტყვების მნიშვნელობა არც კი იცოდნენ, კითხვითა და ნდობით აღსავსე თვალებით შემოგვცქეროდნენ, სქელ ტუჩებს ბრონეულის მსგავსად აღებდნენ და მღეროდნენ ცრემლიან ქართულ ჰანგს, მათთან კეთილი ნების მისიის სტუმრად მყოფი ორი ქართველის პატივისაცემად.

ახლაც ყურში ჩამესმის მეგობრობისა და სიყვარულის სითბოთი სავსე, ასე შორს დარხეული ჩვენი „ციცინათელა“.

## თურქეთი – იორდანია – სირია – 1988

### 23 სექტემბერი

მოსკოვიდან დილის ათ საათზე გამოვფრინდით. ორსაათ-ნახევარში ანკარაში ვართ. ერთ საათს მოგვინია აეროპორტის დაკეტილ დარბაზში ყურყუტმა და ნახევარსაათიანი ფრენის შემდეგ სტამბულში ჩავფრინდით.

ჭუჭყიანი, ხმაურიანი სტამბული. ქალაქი – ბაზარი. ნამდვილი აზია, რომელიც ძალად გაევროპელებულის შთაბეჭდილებას სტოვებს. სასტუმრო „ბილგინი“. ჭუჭყიანი, ვიწრო ნომრები. ჩემთან ოთახში მირონ იოსებოვიჩია. მოსკოველი ებრაელი. ცოლი ქართველი ჰყოლია. იცინის, პირველი შემთხვევაა – ურიას ქართველი ცოლი რომ ჰყავსო.

სალამოს ზღვის პირას რესტორან „იულდუზლარში“ გვაჯანყებენ. ჩვეულებრივი ხმაურიანი რესტორანია. ორკესტრი ნერვების მომშლელად ჩხაოდა. დარბაზი ხალხით სავსეა. საოცარია – მარტო ჩემზე მოქმედებს ხმაური ასე საძაგლად?

ქორწილია თურქების. ულამაზო პატარძალი არ არსებობს. ეს პატარძალიც ძალიან ლამაზია.

ცეკვავენ, მხიარულობენ. საერთო ზეიმს ისინიც შეუერთდნენ, ვისაც ქორწილთან საერთო არა აქვს რა. ჩვენი მაგიდის გვერდით, კუთხეში ჩუმად სხედან ასე ოცდაათიოდე წლის კაცი და ქალიშვილი.

თურქები ქართველებს ძალიან ჰგვანან, მაგრამ ის კაცი რატომღაც ქართველად მივიჩნე. საერთო მხიარულებაში არ მონაწილეობდნენ. ჩუმად თავისთვის სხედან. ასე, საათნახევრის მერე ჩავუარე. გურჯი? ვკითხე. ნაღვლიანად ამომხედა, იმ კაცის ამოხედვით, ძალიან დიდი იმედი რომ არა აქვს შემკითხავისა – კიო.

ამაზე ნოველას დავწერ. დიახ, კი გიდმა მითხრა თურქეთში მხოლოდ თურქები ცხოვრობენო. მართლაც პასპორტში თურქეთში მცხოვრებს ყველას უწერია „თურქი“. ეროვნება „თურქი“ და კიდევ – „მუსულმანი“ ან „არამუსულმანი“. მუსულმანები ერთად არიან, ლამის ერთ ეროვნებას შეადგენენ.

## 24 სექტემბერი

დილით კატერზე დაგვსვეს და ბოსფორის სრუტეში გაგვიყვანეს. ულამაზესი სანახაობაა. კონსტანტინოპოლი (სტამბული) გაშენებულია ბოსფორის სრუტის მარჯვენა და მარცხენა ნაპირზე. საოცარი განსხვავებაა მდიდრებსა და ე. წ. „ღარიბ“ უბნებს შორის. ჩვენ რომ ღარიბებს ვეძახით, ყველას თავისი ვილა აქვს. მალაზიები პირთამდე სავსეა. რა ახალი ხორცი, რა თევზი, რა ხილი დაწყებული ანანას-ბანანით გათავებული ატამ-არაქისით. ჩვენ რა ჯანდაბა დაგვემართა? მალაზიებში კაცისშვილი არ შედის. ნუთუ ოხრდება ის თევზი, ხილეული და მერე უნდა გადაყარონ? თურქეთი თუ გადაგვასწრებდა, ვერ წარმოვიდგენდი.

უნარსულო და უკულტურო ხალხმა პირდაპირ აუნყო ფეხი ინგლისურ-ამერიკულ ცივილიზაციას. მუსულმანობა ძლიერი რელიგიაა. იქ ვერ შეაღწია ურბანიზმმა.

ნაშუადღევს თურქეთის ბაზარს გვასტუმრეს. ცნობილი გადახურული „ჩარჩი-ბაზარი“ ოქრო-ვერცხლის ბრწყინვალეობა. აფიორაა ყოველ ფეხის ნაბიჯზე. მირონ იოსებოვიჩი (ებრაელი) და მე (წმინდა ქართველი) ისე გაგვაცურა პატარა თურქის ბიჭმა რომ სიცილით ერთმანეთს ვაწყდებოდით. შევიძინეთ წინდები თითო დოლარად და გახარებული ვართ. ჯერ ბიჭმა ხუთი დოლარი დაგვიფასა. მე არასოდეს შევდივარ ვაჭართან ურთიერთობაში, არც ვაჭრობა შემიძლია და არც ყიდვა-გაყიდვა, მაგრამ მირონმა გაუბა საუბარი და გახარე-

ბულმა დამიძახა: 5 დოლარიანი წინდა ერთ დოლარზე ჩამოვაყვანინეო. გავხსენით და ყველა დახეული (წუნი) აღმოჩნდა.

## 25 სექტემბერი

დილიდან მეჩეთებს ვათვალიერებთ. ჯამე (ე. წ. კათედრალი) სტამბულში რამდენიმეა. განსაკუთრებით გრანდიოზულია „არა კოფია“ (კონსტანტინოპოლის ტაძარი), რომელსაც ახლა სტამბულის დიდი მეჩეთი ჰქვია. გულსაკლავად უგემოვნოდ გადაუკეთებიათ ეს ანტიკურ-ბიზანტიური ტაძარი მუსულმანებს მეჩეთად. ამ ბოლო დროს ნითლად შეუღებავთ და მთლად დაუმახინჯებიათ. შედარებით უფრო ლამაზია „აია სოფიას“ წინ მდებარე ცისფერი მეჩეთი.

ვიყავით კონსტანტინოპოლის უძველეს ანტიკურ ნყალსაცავში (მიწისქვეშაა), ზღაპრულ სანახაობას წარმოადგენს და სტამბულის დიდ მუზეუმში. სელჯუკთა იმპერიის ძეგლნივთებს სასოებით ინახავენ, ბიზანტიურ-ბერძნული კი თითქმის არა აქვთ გამოფენილი იმის დასტურად, რომ ეს ყველაფერი მათია. ისინი არიან ისტორიის ბატონ-პატრონი დღეს აქ და როგორც სურთ, ისე იქცევიან.

## 26 სექტემბერი

სულთანთა სასახლე დავათვალიერეთ.

ცხოვრობდნენ ბრწყინვალედ.

აურაცხელი სიმდიდრეა.

სამზარეულო. ნუგბარ-ნექტართა დასამზადებელი ოთახები. ჰარამხანა.

ჰარამხანიდან საჭურისთა მიერ სულთანთან ცოლების მიცაყვანი საიდუმლო დერეფანი და საწოლის კარები.

-ახლა თუ არის მეთქი თურქეთში მრავალცოლიანობა, გიდს ვკითხე.



ალეპო

კანონით აკრძალულია, მაგრამ არაოფიციალურად თითქმის ყველა თურქს ორი სამი ცოლი ჰყავსო.

ისლამი საროსკიპოსაც კრძალავს, მაგრამ არაოფიციალურად ბევრი საროსკიპოა სტამბულში. ქალი რაც უფრო თეთრია და მსუქანი, მით უფრო ძვირი ღირსო.

რა სიამოვნებით, სიამაყით გვიჩვენებენ ნაძარცვ ქონებას. თურქეთს ხომ არ შეუქმნია ეს ზურმუხტ-ოქრო-მარგალიტით მოსავადებულ-მოოჭვილი სურები, თასები, ყელსაბამები, პატარა სკულპტურები. ყველაფერი მიტაცებული აქვთ.

რომიდან აპოლონის უზარმაზარი ქანდაკებაც წამოუღიათ თავისი პიედესტალით. კარგად ვერ დაუდგამთ, წაქცეულა და დამსხვრეულა.

სალამოს სტამბულის დიდ რესტორანში ვარიეტე-ვახშამი გვექონდა. სხვათა შორის სამი ბიჭი ვირტუოზულად ცეკვავდა. დოლით, უდოლოდ, ხორუმს, ფერხულს, მთიულურს, აჭარულს. ძმები არიან გურჯებიო, რესტორნის მენეჯერმა ვერ მოვახერხე ადგომა და მისვლა.

## 27 სექტემბერი

დილით ცოტა გავისეირნეთ სტამბულში და შუადღისას ამანისკენ ავიღეთ კურსი. იორდანის დედაქალაქში „აირფრანსის“ სააგენტოს თვითმფრინავით, ძველი ბონგით მივფრინავთ.

დილიდანვე თავს ცუდად ვგრძნობ.

გული დამძიმებული მაქვს.

ორი ვალიდოლი ერთად ჩავიდე პირში, ისეთი გრძნობა მაქვს, სადაცაა წავიქცევი.

სალამოს ამანში ჩამოვფრინდით.

## 28 სექტემბერი

მილიონნახევრიანი, კოხტა, სუფთა ქალაქი ამან – იორდანის სამეფოს დედაქალაქი.

ლამე მკვდარივით მეძინა.

დილით იორდანის მეცნიერებათა აკადემიას ვენვიეთ.

აკადემიის ვიცე პრეზიდენტმა გვიამბო ქვეყნის მეცნიერული საქმიანობის შესახებ.

გვითხრა, რომ ჩვენთან მეცნიერი ცალკე და ცხოვრებამრეწველობა ცალკე არ არსებობს.

იორდანელი მეცნიერი ამავე დროს საქმოსანია. აქვს თავისი ქარხანა, ან ფერმა. თავის მიღწევებს იგი ჯერ თავისავე საწარმოში ნერგავს და იქვე ატარებს ექსპერიმენტებს.

იორდანის 80 პროცენტი უდაბნოა. ამიტომ მეცნიერები მუშაობენ იმაზე, თუ როგორ აქციონ უდაბნო სასარგებლოდ. პირველ რიგში ის გაკეთდა, რომ მზის ენერჯიას ვიყენებთ. გარდა ამისა ქვიშა ვაქციეთ სამშენებლო მასალად, კარგი ბლოკები კეთდებაო.



დიდ ყურადღებას ვაქცევთ, აგრეთვე, ეკოლოგიის საკითხებს.

მერე ვნახეთ ფილმი.

იორდანია თურქეთისგან განსხვავდება. ღია, თავისუფალი ქვეყანაა. თურქეთში არ შეიძლება თუნდაც უბრალო სამკერდე ნიშნის ჩუქება უცხოელისგან. იქ არავის შეგვახვედრეს, აქ კი უმაღლეს დონეზე მიგვიღეს.

ვცხოვრობთ ფეშენებელურ სასტუმრო „კომანდორში“. მასპინძლები თავს დაგვტრიალებენ.

ყველაზე იაფი იორდანიაში ასფალტი ღირსო აკადემიის ვიცე პრეზიდენტმა, ამიტომ თუ შეამჩნევთ, ჩვენთან თითქმის ყველა უმნიშვნელო გზაც კი ასფალტირებულიაო.

მერე ვენვიეთ უნივერსიტეტს. ფასიანია. ტაშით შეგვხვდნენ. დაგვათვალისწინებინეს აუდიტორიები და უნივერსიტეტის მუზეუმები. უნივერსიტეტში ბრწყინვალე მუზეუმებია.

აკადემიაში ვნახეთ მზის ენერჯის სადგური, რომელიც ათბობს წყალს.

1962 წლიდან გაიხსნა ერთი ფაკულტეტი – ჰუმანიტარული. მხოლოდ 8 ლექტორი ჰყავდათ. ახლა 14 ფაკულტეტია. 15 ათასი სტუდენტია.

სკოლას 12 წელიწადში ამთავრებს ყმაწვილი და 100 ქულიანი სისტემით აბარებს სახელმწიფო გამოცდებს. იმ გამოცდების მიხედვით ხდება უნივერსიტეტში ჩარიცხვა. აქ არ არის არავითარი მისაღები გამოცდები. ატესტატების კონკურსია. ისე ზოგჯერ მომავალ მასწავლებლებს და ექიმებს გავესაუბრებით მათი ფიზიკური მდგომარეობის შესასწავლადო.

უნივერსიტეტში სწავლა 4-დან 7-წლამდე გრძელდება. შეგიძლია დაამთავრო 4-ში ან 3,5 წელიწადში. 7 წლის მერე თუ ვერ დაამთავრა საგნების ჩაბარება, ეძლევა „მოსმენის“ საბუთი. იმუშავენ და მხმარე სპეციალისტად, მაგრამ წამყვან სპეციალისტად ვერა.

პროფესორი ხელფასს ათასს ექვსას დოლარს იღებს.

სალამოს შეხვედრა მქონდა იორდანის ცენტრალური გაზეთის „დუსტურ“ („კონსტიტუციის“) რედაქციაში. მთავარმა რედაქტორმა ბევრი რამ გვითხრა საინტერესო. თქვენაო, ყოველგვარი საშუალება გაქვთ, რომ კარგად ცხოვრობდეთ, მაგრამ თავი არა გაქვთო. ავლანისტანის საკითხში არ გეთანხმებითო, არც კამპუჩიის დაპყრობაში ხართ მართლებიო.

ილჰამ ბეი და სულეიმან ბეი ლაპარაკობენ მთელი თურქული სამყაროს სახელით. აზერბაიჯანი კინალამ სამყაროს ჭიპად გამოაცხადეს.

## 29 სექტემბერი

მივდივართ მკვდარ ზღვაზე საბანაოდ.

400 მეტრი ზღვაზე დაბლა. გიდი გვიყვება, სამწუხაროდ 1% მუშახელი იორდანიაში ქალებიაო.

ბედუინთა კარვები.

მდინარე იორდანე.

ბიბლიური ადგილები.

გზა უდაბნოში გადის.

ცუდად ახსენებენ იზრაილს, რომელმაც გაამწარა პალესტინაო.

ამანთან მთელი კოლონიაა პალესტინიდან გამოქცეულთა. ავტობუსში ვწერ.

პალესტინის საზღვარი.

იერიოქონი.

სალამოს მეგობრობის საზოგადოებაში შევხვდი მწერალ ვალიდა მუსტაფას. 1986 წელს მერე ხუსეინმა (4 ცოლი გამოიცვალა, ბოლოს სტიუარდესა შეირთო) გააუქმა მწერალთა კავშირი. ლიტ. გაზეთი არ გამოდის. პარასკევობით სამი მთავარი გაზეთი აძლევს ლიტერატურულ-კულტურულ დამატებას – „დუსტურ“.

მკვდარი ზღვა სოდომ-გომორის ადგილას გააჩინა ღმერ-

თმა (ბიბლია). არ მეგონა თუ არსებობდა წყალი, სადაც ჩაყვინთვა და ცურვა არამც და არამც არ შეიძლება. შეგიძლია დაწვე და გაზეთი იკითხო. ისეთი მარილიანია, გეგონება საპონი გაქვსო წასმული. შეიძლება ლამის ფეხით გაიარო წყალზე (ბიბლია). გაღმა ისრაელი ჩანს. იქვე ზღვიდან ამოსულები თბილ თერმულ მტკნარ წყალში ჩავხტით. ვისაც ზღვის წყალი თვალში ან ტუჩზე მოხვდა „ვაი დედა“ აძახებინა.

სალამოს ტანია გავიცანით. არაბი ბიზნესმენის მე-15 ცოლი ვარო. თბილისელია.

ნასადილევს დავბრუნდით მკვდარი ზღვიდან და დედაქალაქის ამანის დათვალეირებას შევუდექით.

დიდებულია ძველი ამანი, დიდი ტაძრის ნანგრევები და ამფითეატრი ექვსიათასი მაყურებლისთვისაა.

### 30 სექტემბერი

დილიდანვე მადების, პეტრის და აკაბისკენ მივდივართ.

წითელ ზღვაში უნდა ვიბანაოთ.

ცუდ ხასიათზე დამაყენა ორი სულელი პროფესორი ქალის – ალას და ანას გამოსვლამ.

იორდანისას ასწავლიდნენ როგორ უნდა იცხოვრონ, რათა კაპიტალიზმიდან სოციალიზმში გადავიდნენ. საოცარია, ამ სოციალიზმმა ჩვენ დაგვამათხოვრა და ახლა სხვებს ვთავაზობთ.

მადებასთან მოსეს მთაზე შევჩერდით. აქედან გადახედა ბიბლიურმა მოსემ იორდანის ნაპირებს. იქ, იორდანის გაღმა უკვე მოჩანდა აღთქმული ქვეყანა. ისრაელს, გუშინ კილომეტრზე დავუახლოვდით, ხოლო იერუსალიმამდე 40 კმ იყო დარჩენილი.

მოსეს მთაზე მეოთხე საუკუნის ქრისტიანული მონასტრის ნანგრევებია ზღაპრული მოზაიკით.

გზის ორივე მხარეს უდაბნოა. არსად ხის ქაჭანება. მაინც ყველანაირი ხილია მაღაზიებში. რა პატარაა მსოფლიო. ცივილიზებული ქვეყნები ყოველდღე ერთმანეთს აწვდიან თავიანთ ნაწარმს, მარტო ჩვენი „ღიადი ქვეყანა“ ყველაფრისთვის დაკეტილი.

მთავარი სასწაული, თურმე წინ გველოდა. ჩვენს წელთაღრიცხვამდე მეექვსე საუკუნეში კლდეში გამოკვეთილი ციხე-ქალაქი პეტრა („წითელი ქვა“). სასწაულია!

უდაბნო გათავდა და ჩვენს წინაშე გიგანტური ქვის მთები აღიმართა. მივუახლოვდით ქვის მთებს. ბედუნთა ცხენები დავიქირავეთ (მანქანა დღემდე ვერ შედის) და გავემართეთ ვარძიის მსგავსი ქვის ქალაქისკენ. კილომეტრამდე გავიარეთ კლდეთა ვიწრო დერეფანში. თვალშეუდგამი კლდეების ძირში მიკარგული საცხენოსნო გზა გაიღია და ჩვენს წინ უეცრად გადაიშალა უზარმაზარი კლდეთა ქალაქი. ცენტრში დიდებული თაღოვანი ტაძარი რომაული სვეტებითა და სვეტისთავეებით – „ეს რომის იმპერიის ნახელავია მეთქი“, ვთქვი, სანამ გიდი ახსნას დაიწყებდა. არაო, ეს იორდანელთა და იემენელ ლტოლვილთა ქალაქია დაწყებული მეექვსე საუკუნეში ჩვენს ერამდე. ხოლო რომაელებმა მეორე საუკუნეში დაიპყრესო. იქნებ მართლაც ასეა, მაგრამ ხომ არ არის ეს სხვისი კულტურის გათავისების ცნობილი ემმაკური ხერხი ჩვენი „აფხაზებისა“ არ იყოს? მომთაბარე აბაზგებმა თავის თავს აფხაზები რომ უწოდეს და ბედიის ქრისტიანული ტაძარი და ბიჭვინთის მონასტერი თავისად რომ გამოაცხადეს?

რა ახლოსა ვარ აქედან პალესტინის ქართველთა ჯვრის მონასტერთან, ვინ გაგიშვებს, თორემ როგორ მინდა ნახვა, რომ იცოდეს ვინმემ.

პეტრას მსგავსი საოცრება მე არ მინახავს. წარმოიდგინეთ კლდეში გამოკვეთილი ათასი სასახლე. გამოქვაბული კი არა, სასახლე თაღებით, სვეტებით, ჩუქურთმებით, საყდრებით, ქალაქის ცენტრში უზარმაზარი ამფითეატრით. პირდაღე-

ბული, მონუსხული შევსცქეროდი ამ საოცრებას. უკანაც ცხენებითვე დავბრუნდით. ღმერთო, რა სილამაზეა, განძის მაძიებელთა კოვბოური ფილმების პერსონაჟი მეგონა თავი.

ვაგრძელებთ გზას საკურორტო ქალაქ აქაბასაკენ. საღამოს 7 საათზე ჩამოვედით და სასტუმრო „ალ კაზარში“ დავბინავდით. ძალიან ცხელა. სუნთქვა ჭირს.

### 1 ოქტომბერი

ქალაქ აქაბაში გავათიეთ წუხელის. ძალიან ცხელოდა. დილით პლაჟს მივაშურეთ. პირველად ვიბანავე წითელ ზღვაში. წყალი საოცრად სუფთაა მიუხედავად იმისა რომ პლაჟი ნავსადგურის გვერდითაა. მერე მინისძირიანი კატერით ზღვაში გაგვიყვანეს და თევზები და ზღვის ფსკერი დაგვათვალეირებინეს. ულამაზესი სანახაობაა. ისევ ზღვაში ვართ, ნასადილევს გავუყვებით ისევ ამანის გზას. ხვალ სირიაში მივდივართ.

გვიან საღამოს დავბრუნდით ამანში. შინ მიგვიწვია ჩერქეზმა მილიონერმა. ნახევარმილიონამდე ჩერქეზი ცხოვრობსო ამანში. მეფე ხუსეინს ძალიან ვუყვარვართ, იმიტომ რომ მისი ძიძა-გამზრდელი ჩერქეზი იყო. მოხუცია ქართველს ჰგავს.

ღამის 12 საათზე მილიონერის სუფრიდან თბილისელმა ქალმა ტანიამ მომიტაცა. იგი ქმრითურთ მოვიდა და ღამის 3 საათამდე თავის ნოსტალგიაზე მელაპარაკა. მართლაც რომ საცოდავია ქართველი, ვერა და ვერ ძლებს სხვაგან. სამი შვილი მყავს, მაგრამ ხანდახან ისეთი გრძნობა მაქვს, სამივეს დავტოვებ და გამოვიქცევიო.

### 2 ოქტომბერი

გავედით სასტუმროდან ავტობუსით. ტანიამ და მისმა

ქმარმა გამოგვაცილეს. შევჩერდით იორდანის ქალაქ ჯერაშში. რომაული ქალაქის ნანგრევები, ამფითეატრი, ტაძრები, ჰიპოდრომი, სასახლეები. განსაცვიფრებელი რომაული ხელწერა არქიტექტურის. სად არ იყო რომის იმპერია, რა კულტურას მიაღწია და გაქრა. როგორ მეშინია ისტორიის ამ ჩარხის მუხანათური ბრუნვის. საქართველოსაც ხომ არ ემუქრება გაქრობის აჩრდილი. რა ვიცი, იღბალია თუ სასწაული საქართველოს მახსოვრობაში საბერძნეთის იმპერია აყვავდა და დაეცა, რომის იმპერია აყვავდა და დაეცა, არაბეთის იმპერია აყვავდა და დაეცა, ბიზანტიის იმპერია აყვავდა და დაეცა, თურქ-სელჯუკთა იმპერია აყვავდა და დაეცა. საქართველო კი, ეს პატარა ნავი ისტორიის ოკეანეში, ისევ ტივტივებს და მიცურავს. ეტყობა, ბედნიერ ვარსკვლავზე ვართ გაჩენილი.

შევედით სირიაში.

ვნახეთ „ბოსრა“ მსოფლიოში ყველაზე დიდი ამფითეატრი.

დამასკო ღამით ძალიან ჰგავს სტამბულს. დიდი ჭუჭყიანი ქალაქია, სავსე ტურისტებით. სასტუმრო „შამპალსში“ დაგვაბინავენ. ისევ ორადგილიანები, ოღონდ უარესი ნომრები, ვიდრე ამანში იყო. დავრეკე ლევან საღარაძესთან. ქალიშვილმა ლიზამ – თვენახევრით ბელგიაში ნავიდაო.

### 3 ოქტომბერი

დილით ფეხი მტკიოდა და სასტუმროდან არ გავსულვარ.

ბრწყინვალე მომსახურებაა. ჯერ დილით გირეკავენ და დილა მშვიდობისას გისურვებენ, მერე, რაკი ვინექი, შვიდჯერ შემოიხედეს სასტუმროს შემკრთალმა თანამშრომლებმა, ხომ არაფერი გჭირდებათო.

მოვიდა ლევან საღარაძის ქალიშვილი – ლიზა თავისი ბიჭით. მაღალი ღამაზი ბიჭი ჰყოლია. ძალიან შეწუხდნენ, რომ

ლევანი სირიაში არ ბრძანდება. შინ მიმიპატიჟეს. ახლა ქუს-  
ლი მტკივა და სხვა დროს გეახლებით მეთქი.

ექვს საათზე კულტურის ცენტრში შეხვედრა გვექონდა. არა-  
ბებმა ბევრი რამ იციან ჩვენს შესახებ. განსაკუთრებით აინ-  
ტერესებდათ, გრომიკოს გამოგდება პოლიტიკურიდან. უამრავი  
შეკითხვა მომცეს. ბევრი ვიცინე. იუმორის გრძნობა ჰქონიათ.  
დავილაღე.

#### 4 ოქტომბერი

გავემგზავრეთ დამასკოდან ქალაქ პალმირაში. პალმირა  
უძველესი ქალაქია. შერეულიაო, გიდი ამბობს, რომაული და  
არაბული კულტურა, მაგრამ არაფერი შერეული არ არის,  
სუფთა რომაული ქალაქის ნანგრევებია.

გრანდიოზული, გაშლილი, ნამდვილი ქალაქი. ირგვლივ  
თვალშეუვლები უდაბნოა. მთელი გზა უდაბნოში ვიარეთ. რა  
უნდოდათ, რამ ააშენებინათ ასე ბრწყინვალე ქალაქი რო-  
მაელებს ასე შორს, უდაბნოში. რა ჟინმა მოიყვანათ აქ, ან  
როგორ ცხოვრობდნენ ამ ქარ-სიცხეში?

მერე დავათვალიერეთ წყალქვეშა გოგირდოვანი მდინარე.  
უდაბნოს ფსკერზე განსაცვიფრებელი, ლურჯი გოგირდო-  
ვანი მდინარე გადის.

ვნახეთ რომაულ-არამეული სასაფლაო. კოშკი მაღალი,  
სვანურივით, ოთხივე მხარეს კუბოების შესადგამი. მკვდარს  
მინა არ ეყრებოდა.

მერე დავათვალიერეთ ასევე უძველესი ქალაქი ხომსი. იქაც  
ნანგრევები და მეჩეთები. სალამოს დავბრუნდით დამასკოში.

ჩემი მირონ ურია, როგორც მოველოდი, ჭირვეული,  
წვრილმანი კაცია. ნუხელის შუალამისას ოთხჯერ გამოართო  
კონდიციონერი, ვცივდებო. თუ ცივდები, თბილად ჩაიცვი,  
შე ოჯახაშენებულო, მე ვუთხარი. არაო, ლოგინში თბილად

ჩაცმა არ შეიძლებაო. ვიფიქრე, ერთს გავუღანუნებ ყბაში  
და ამით მოვრჩები ამასთან ურთიერთობას მეთქი, მაგრამ არ  
გამოვა გავიღანძლები.

#### 5 ოქტომბერი

დილით დამასკოს „მცხეთას“, დამასკოდან ოცი კილომე-  
ტრით მოშორებულ ქალაქ სიდნაიას ვესტუმრეთ. დამასკო  
მსოფლიოში ყველაზე ძველი ქალაქია, მაგრამ სიდნაიაში  
ადამიანის არსებობის კვალი მილიონ წელს ითვლის. რა ძვე-  
ლია მაინც არაბულ-ებრაული სამყარო. მიდიხარ ქუჩაში და  
ფიქრობ: ამათ შექმნეს სწორუპოვარი არაბული პოეზია, ვარ-  
სკვლავთმრიცხველობა, ალქიმია.



ალეპო



სიდნაიას გასწრივ ჩინურ კედელივით გაგრძელებულა უზარმაზარი კლდე. ზედ ქალაქის თავზე ქვის ტალღა აღმართულა. გეგონებათ გადარეული ზღვა სწორედ აქ გაქვავებულაო. კლდეებში პირველყოფილ ადამიანთა გამოქვაბულებია და თანდათანობითი გაკულტურების ნათელი კვალი. ქვის უდაბნო აღმართულია ირგვლივ, რამ მოიყვანა, ღმერთო, აქ ადამიანი!

დავათვალიერეთ სიდნაიას ქალთა მონასტერი. ილუმენიამ თავის საკანში შეგვიყვანა და ტკბილად გვესაუბრა. მონაზვნად ამ ბოლო დროს ბევრი მოდის, მაგრამ ადგილი არა გვაქვსო. შვიდი წელი უნდა გაიაროს გამოსაცდელი ვადა. შვიდ წელიწადს ლურჯი კაბა აცვია, მერე კი მონაზვნის შავ კაბას ჩაიცვამს; შვიდი წლის განმავლობაში შეიძლება გადაიფიქროს და საერო ცხოვრებას დაუბრუნდეს, მერე კი არამც და არამც აღარ შეიძლებაო. ღმერთი, მაშინვე სიკვდილით დასჯისო.

მონაზონთა საკანშიც შევიხედეთ. გრძელ ტახტზე ორი „დაი“ ფეხმეექვეულნი წვანან. „თუ არის მეთქი დაორსულების შემთხვევები“ გიდს გავვხუმრე, ამ მონასტერში არა, მაგრამ სხვაგან კიო.

განვაგრძეთ გზა. როგორც იქნა ოაზისს მივადექი. სასწაულია მწირ მიწაზე მოსავლის მოყვანა. არაბებს მაინც გაუხარებიათ ლეღვი, ფინიკის ხურმა, ბანანი, ბრონეული, ვაშლიც კი და ზეთისხილი. ხორბლის და სიმინდის მოყვანაზე ოცნებაც კი არ შეიძლება.

ლეღვის ბალს შევესიეთ. გემრიელი ლეღვია. მარშრუტში შედის ეს „შესევა“, ფასი გადახდილია.

სირიაში 60% სოფლის მეურნეობაშია დასაქმებული. ჩვენთან მხოლოდ სამი.

ქალაქი მალულა. ეს ხომ ქართული სიტყვაა მეთქი. არაბულადო, გიდმა, „მალულა“ ნიშნავს მოპარვით, მალულად მქროლ ქარს, როცა არ იცი საიდან უბერავს და აგრეთვე ქარსმოფარებულ ადგილსო. მართლაც მალულა კლდეებშია მიკარგული. ესეც შენი „მალულა“. ეს მაინც მეგონა ქართული სიტყვა.

ნასადილევს დამასკოში ვიხეტიალეთ.

## 6 ოქტომბერი

რაც დამასკოში ვართ, ყოველდღე სასტუმროს სუფთა, კამკამა აუზში ვცურავდით. ამ დილით, როგორც კი დახედა არაბმა დარაჯმა ჩემს სავიზიტო ბარათს – შეშვებაზე უარი მითხრა – ნაბრძანები მაქვს საბჭოთა მოქალაქეები არ შეუშვავო. ვითომ რატომ მეთქი? თურმე, გუშინ, რომელიღაც ჩვენი ღორი აუზში დუშისმიულებლად (შხაპი) ჩასულა. წყლის გაჭუჭყიანება კი მაშინვე ასახულა სისუფთავის ბარომეტრზე. აი, ასეთები ვართ ჩვენ.

გიდს ლევან სალარაძისთვის წამოღებული სიგარეტის კოლოფი ვაჩუქე და როგორც იქნა ცალკე ნომერი მომცა. წუხელის მარტო მეძინა. პირველად, ადამიანურად, ამ თოთხმეტი დღის მანძილზე.

ვიკითხე, არცერთი ქვეყნის ტურისტები არ არიან ორადგილიან ნომრებში ერთად. მარტო ჩვენ ვართ. ეს იმისთვის კეთდება, რომ ერთხელ კიდევ დაგვცინოს საბჭოთა მთავრობამ.

დავათვალიერეთ დამასკოს ისტორიული მუზეუმი. აქედან დაწყებული ადამიანის არსებობა. 600 000 წლის წინათ მცხოვრები ადამიანის ნივთები გვიჩვენებს. სალამოს ჩემს ოთახში გამოსათხოვარი ვახშამი მოვანყვეთ. ვითამადე. გავაგიჟე ყველანი. რა ლამაზი ლაპარაკი იციან ქართველებმაო, პირდაპირ ნასვლა არ უნდოდათ. ყველამ ჩამოდგა შავი დღისთვის გადანახული თითო ბოთლი კონიაკი.

ცუდად მეძინა, როგორც ყოველთვის გაფრენის წინ.

## 7 ოქტომბერი

დილით აუზში ვიცურავე. შევიპარე. აქ ყველას არაბი ვგონივარ.

10-ის ნახევარზე აეროპორტში ვართ.  
საბაჟო ცერემონიები.  
ავფრინდით პირველ საათზე.  
ამ სტრიქონებს კუნძულ კვიპროსზე ვწერ.  
ახლა ავფრინდებით და პირს მოსკოვისაკენ ვიზამთ.  
ოთხი საათია.  
ჩამოვფრინდით მოსკოვში.

რვიდან ათ საათამდე გვაყურყუტეს აეროპორტში. საშინე-  
ლი სანახავი იყო: კონვეიერს რომ მოჰყვებოდა დახსნილ-  
დადღლეზილი ჩემოდნები. ვინც გასაღებით დაკეტა სწორედ  
მისი ჩემოდანი დაამტვრიეს.

იმდენად დიდია სურვილი ამ ორი დღის წუთისოფელში  
ქვეყნის ნახვისა, რომ ცდუნებას ვერ ვძლევე ხოლმე, თორემ  
წესიერმა კაცმა, როგორ უნდა იკადრო ამ დამამცირებელ  
„კომპანიაში“ თავის გაყოფა. საბაჟოს ბიჭები, როგორც სპე-  
კულანტს ისე გვიყურებენ და ვართ კიდეც. ცხრამეტკაციან  
ჯგუფში ჩემს გარდა ყველა რალაცას ჩალიჩობდა.

## ტაო-კლარჯეთი – 1998

20–25 აგვისტო

### საქართველოს მოჭრილი ძუძუ

ათი წელია საქართველოდან ფეხი არ გამიდგამს.


ათმა მრისხანე წელმა ჩემი ცხოვრების წესიც შეცვალა და  
ეროვნულმა ბრძოლამ ჩემი არსება ისე მოიცვა, რომ თავს  
ვერავითარ შემთხვევაში ვერ მივცემდი ისეთი „ფუფუნების“  
უფლებას, როგორცაა საზღვარგარეთ წასვლა.

არც ახლა მქონდა დიდი სურვილი მოგზაურის ზურგჩან-  
თის აკიდების, მაგრამ უარი ვერ ვუთხარი ჩემს უსაყვარლეს  
მეგობარს, ყოველთა ქართველთა მსოფლიო კონგრესის პრე-  
ზიდენტს – ბატონ რევაზ ჩხეიძეს.

ცდუნება კი მართლაც დიდი იყო: სამი რამ მქონდა ოც-  
ნებად საზღვარგარეთ მოსახილველი: ტაო-კლარჯეთი, ფე-  
რეიდან და ისრაელი. ყოველთა ქართველთა დელეგაციის  
წევრობა ამ ოცნებათაგან ერთ-ერთს მისრულებდა.

მიზანი – დავათვალიერო თურქეთის მიერ მიტაცებულ  
ტერიტორიაზე მდებარე ტაო-კლარჯეთის ძეგლები.

მიუხედავად იმისა, რომ ჩვენ საქართველოს ე. წ. მენშევიკური  
ხელისუფლებისაგან განსხვავებით გამოვიჩინეთ ორჯონიკიძე-  
ლი კომუნისტური გულუხვობა და ახლახანს თურქეთს ხელი  
მოვუწერეთ, რომ მასთან ტერიტორიული პრეტენზიები აღარ  
გაგვანია, მიუხედავად იმისა, რომ ჩვენი ხელისუფლების ნარ-  
მომადგენელი ნებისმიერ დონეზე თურქეთში გამოსვლისას არც  
კი ახსენებს საქართველოს მოჭრილ ძუძუს – ტაო-კლარჯეთს,  
ქვეყანამ იცის, რომ ლენინის გამცემლური ხელშეკრულების და-  
ლით თურქეთის შემადგენლობაშია დღეს უძველესი ისტორი-  
ული საქართველო, კუთხე, სადაც ქრისტიანობის და ქართული  
ცივილიზაციის აკვანი დაირწა – ტაო-კლარჯეთი. თურქეთში  
დღეს რვა მილიონი ქართველი ცხოვრობს და ამ ქვეყნის ფარგ-  
ლებში 200-მდე ქართული ისტორიული ძეგლი მოიძვევა.






რა მეტაოკლარჯეთებოდა, როცა რაც ახლა გვაქვს, იმასაც გვართმევენ ჩვენი უილაჯობით და უნიათობით. აგერ, ა, გუშინ დავკარგეთ აფხაზეთი და სამაჩაბლო, ხოლო დღეს ჩვენი ბრძნული გადაწყვეტილებით მეორედ დავთმეთ გალი, როცა ოცდახუთმა სომეხმა რომ საქართველოს კუთვნილ ჯავახეთში, ახალქალაქში არ შეგვიშვა, ასევე ბრძნული ტაქტიკით მტერს ზურგი ვუჩვენეთ და სამარცხვინოდ გამოვბრუნდით. ამით საქართველოს ისტორიაში კიდევ ერთი სამარცხვინო ფურცელი ჩავწერეთ, ხოლო ქართველთა პატრიოტულ ალტკინებას ეს უკვე მერამდენედ ლახვარი ჩავეციოთ.

მამ ასე, 20 აგვისტოს დილის 6.30-ზე გავდივართ თბილისიდან.

11 საათზე ახალციხის საბაჟოსთან ვართ. ზრდილობიანმა ქართველმა მებაჟეებმა სალმითა და პირზე კოცნით ათწუთში მწვანე შუქი აგვინთეს, რუსებმა და თურქებმა კი სამი საათი გვაყურყუტეს მოსაწყენი, გამოგონილი საბაჟო პროცედურებით.

მე მგონია, ქართველი მებაჟეები აქ ისე, საოქმოდ დგანან (ჩვენ ხომ დამოუკიდებელ ქვეყანას გვათამაშებენ), სინამდვილეში კი მთავარი მებაჟეები რუსები და თურქები ყოფილან. კიდევ რუსი თუ იდგა ჩვენს საზღვარზე, არ მეგონა. ვინ ხართ-მეთქი, – ვკითხე რუს მებაჟეს – ესენგეს საზღვარს ვაკონტროლებთო. აგერ, თუ არა ვართ იმპერიის საზღვრებში, ძვირფასო ყოფილო პარლამენტარებო, ასე ერთხმად და ზეიმით რომ მიეცით ხმა საქართველოს შესვლას ესენგეში.


არსად მსოფლიოში არ მინახავს ასეთი აზიური სიბრიყვე, რაც ამ საბაჟოზე ხდება, შეიძლება მებაჟის საქმე 15 წუთში გაკეთდეს. დასავლეთში ასეც ხდება. შემოვა მებაჟე, გადასცემ სიას, შეამოწმებს პასპორტებს, მანქანა გაივლის რენტგენოხილზე და თავისუფალი ხარ. აქ არა! სამი საათი უნდა გალოდინონ, დაგამცირონ. უნდა გაგათანაბრონ მარტოხელა კუსტარ-სპეკულიანტთან, გამოგძალონ სწორედ საბაჟოსათვის გადანახული ორიოდე გროში და სამი საათის მერე გაგიშვან.







ოშკი. მაცვალა გონაშვილი, რევან მიშველაძე



ასეთია მკაცრი აზიური (თურქულ-რუსული) საბაჟო სისტემა. ოთხის ნახევარზე, როგორც იქნა, დავაღნიეთ თავი თურქულ-რუსულ საბაჟო-ფაცერს.


რომ არ დამავინყდეს, აქვე ჩამოვთვლი ჩვენი დელეგაციის შემადგენლობას: რეზო ჩხეიძე (ხელმძღვანელი), არქიტექტორი არჩილ მინდიაშვილი (სამების ტაძრის პროექტის ავტორი), კინორეჟისორი დავით ურუშაძე, არქიტექტორი თემურ ბერიძე, ისტორიკოსი ქეთევან აბაშიძე, კინოოპერატორი თენგიზ მოდებაძე და მე.

გავიარეთ გიგანტური დერეფანი მალალი მთებისა, ალპური საძოვრების უნაპირო ამფითეატრი და არტანუში ჩავედით.

ამ გზით გააქციეს გიორგი სააკაძე საქართველოდან. ძლივს ვიპოვეთ ბანა. ტაძრის მახლობლად თურქული სოფელი ფენეკია.

მძლოლებმა ხომ ვერ მიგვასწავლეს, ასეთი სახელი არ გაგვიგონიაო. ფენეკიდან სამას მეტრშია ბანა და ვერც ფენეკელებმა „გაიხსენეს“ ჩვენი ისტორიული ძეგლი. ბოლოს ერთი ჭარმაგი კაცი გამოჩნდა და სომხები ხართო? გვკითხა. არა, გურჯები ვართ და ქართულ მონასტერს ბანას, ვეძებთ – მეთქი. აქაო, ქართული მონასტერი საერთოდ არ გამიგონია, თქვენ, ალბათ, სომხურ საყდარს, ბანას, კითხულობთო.

სომხურსო! ვინ გითხრათ-მეთქი, რომ სომხურია. გაიცინა. შარშან სომეხი ტურისტები იყვნენ ჩამოსულნი და აქ მცხოვრებთ ფურცლები დაგვირიგეს, გთხოვთ, ჩვენს მონასტერს – ბანას მოუაროთო. თანაც ამ თხოვნას საჩუქრებიც მოაყოლესო. ასე „ერთგულად და თანმიმდევრულად“ ეპატრონებიან სომხები ტაო-კლარჯეთის კულტურას. ეს ახლა არ დანყებულა. მსოფლიოს არაერთ სახელოვნებო ცნობარში ოშკი, სახელი, ბანა, იმხანი, ოპიზა, შატბერდი, ოთხთა ეკლესია... სომხური კულტურის ძეგლებადაა მონათლული. უნდა მოიცალონ ჩვენმა ხელოვნებისმცოდნეებმა, ერთხელ კიდევ შეადარონ VII-XII საუკუნეების ქართული და სომხური ხუროთმოძღვრების ძეგლები. საბუთებით უნდა დაამტკიცონ სომეხთა პრეტენზიების უსაფუძვლობა.



შატბერდი





ქართული ციხე. ოქროს კლდეები

ასე კითხვა-კითხვით (რაც ეჭვს ბადებს და ჩვენს გარშემო საიდუმლო სამსახურის მუშაკთა სკისებურ მოძრაობას თვალსაჩინოს ხდის) და უფრო ისტორიულ-გეოგრაფიული რუკების შემწეობით ვიკვალავთ გზას სხვა ძეგლებისაკენ.

საერთო, რაც ყველა უძვირფასეს ძეგლს სჭირს, ისაა, რომ თურქეთის ხელისუფლებას ერთი, თუნდაც უმნიშვნელო ნიუანსითაც კი არ უქცევია ქართველი ერის ღირსება-სიმდიდრე, გენიალური ტაძრები სახელმწიფოებრივი ზრუნვის საგნად. მოსახლეობას კი თვითნებურად უზრუნვია, მეჩეთად უქცევია, ზოგი კი, უბრალოდ, დაუნგრევია და ჩუქურთმოვანი ძვირფასი ქვებით მინური სახლები აუშენებია. ვინ არიან ისინი? ვინ ცხოვრობს ქართული ისტორიული ძეგლების გარშემო? თურქი მოსახლეობა. ორმოციან-ორმოცდაათიან წლებში თურქეთის ემბაკმა ხელისუფლებამ გაითვალისწინა ქართველთა მოსალოდნელი სურვილი ტაო-კლარჯეთის დაბრუნებისა (რისი სუნიც უკვე ტრიალებდა ჰაერში, სტალინის ბოლო საქციელს ეტყობოდა ეს) და ქართველები შუა თურქეთში გაასახლა.

მივდივართ კაპადოკიისკენ. ჩავუარეთ იულიუს კეისრის მიერ დაარსებულ ქალაქ კაისერს. ეს კაპადოკიის ძველი დედაქალაქია. სად ნავიდნენ ქალაქის დამაარსებლები?


როცა თურქებმა დაიპყრეს კაპადოკია და ბერძნები განდევნეს, თურმე კარგა ხანს იძახდნენ დამარცხებული ბერძნები: არა უშავს, ჩვენ დიდი კუტურის ქვეყანა ვართ, მსოფლიო არ შეურიგდება ბერძენტა გენოციდს, მალე დავბრუნდებით ჩვენი ხელით აშენებულ კაპადოკიაშიო, მაგრამ მოტყუვდნენ. მსოფლიო გულგრილი აღმოჩნდა კაპადოკიის ტრაგედიის მიმართ. ამ ფაქტმა აფხაზეთ-სამაჩაბლოს ბედი გამახსენა და გული შემეკუმშა.

კონუსისებური კაპადოკია. მილიონი წლების განმავლობაში კირქვის ქანები რეცხა ქარმა და ქარაშოტმა, დარჩა ეკლესიებისხელა კონუსისებური, გიგანტური თეთრი ქვები. გამზადებულ-გადარჩენილი ნაგებობა, ბუნებრივი გუმბათით დამშვენებული. საჭიროა მიადგე იმ კონუსს და გამოკვეთო გინდა საყდრის ინტერიერი, გინდა საცხოვრებელი ბინა.






კაპადოკია



კაპადოკია. რ. ჩხეიძე, რ. მიშველაძე



კაპადოკიაში ერთმანეთს ერწყმიან პირველყოფილ ადამიანთა სადგომები, ნარმართული სალოცავები და ქრისტიანული კულტურა.

რაც მომთაბარე თურქებმა კაპადოკიელ ქრისტიანებს შეუტიეს, საცოდავ შევიწროვებულ მორწმუნეთ მინისქვეშა სამალავები უკეთებიათ, რამდენიმე ადგილას მთელი მინისქვეშა ქალაქია გაშენებული.

კაპადოკიაში ყოველი ფეხის ნაბიჯზე შეხვდებით გოგრის და ნესვის



ბაღებს. გადაყვითლებულია გოგრით და ნესვით იქაურობა. არავითარი ღობე, არავითარი დარაჯი. წარმოვიდგინე, ეს რომ თბილისთან ახლოს იყოს, ფოთოლს არ შეარჩენდნენ, ყუნწ-შივე მოიპარავდნენ ნაყოფს...



თურქეთის გზები ცალკე თემაა. ლამის მთელი თურქეთი მოვიარეთ და დაკერებული ასფალტი არ გვინახავს. სანი-მუშოდ მოვლილ-დახაზულ გზებზე საგზაო ფირნიშებია და ერთადერთი წარწერა: „იავამ“ „ნელა“. გამახსენდა ჩვენს გზებზე სახიფათო მოსახვევთან წარწერები: „მძლოლო, წინ საშიში მოსახვევია!“, სანამ ამხელა წარწერას წაიკითხავდეს გაქანებული მანქანიდან წერა-კითხვას არც თუ დიდებულად დაუფლებული მძლოლი, ხომ ამოყო თავი ძირულას ცივ ტალღებში. ნუთუ, არაა საკმარისი ერთი სიტყვა: „ფრთხილად“ ან „ნელა“!

ჩვენი გიდი, უნივერსიტეტის კურსდამთავრებული, მახარე ჯანაშვილი – ინგილო ყმანვილი – ნამდვილი პატრიოტი თავისი ქვეყნისა და ქართული კულტურის შესანიშნავი მცოდნეა.

ამ ბოლო წლებში, მოგეხსენებათ, ქართველებმა გაიდარბაზეს თურქეთი. ამიტომაც ქართველს ამ ქვეყანაში იშვიათად როდი შეხვდებით. თუ „საგასტროლოდ“ ჩამოსული ქართველი მეძავეები თავიანთ ეროვნებას მალავენ და უხერხული შეკითხვების აცილების მიზნით თანამემამულეებს, რამდენადაც ახერხებენ, გაურბიან, სამაგიეროდ, ყოველ ფეხის ნაბიჯზე გაჩერებენ თურქეთის მოქალაქე ქართველები. ასე შემოგვარტყეს ალყა არზრუმში ქართველებმა, რომლებიც ამ ქალაქის გარეუბანში დიდ კომპლექსს აშენებენ. ჩვენაო, გვითხრეს, აქ ყველაზე კარგი მშენებლების სახელი გვაქვსო. კაპადოკიაშიც გავიცანით ქართველები, ოჯახებით იყვნენ ჩამოსული ანკარიდან და სტამბულიდან წმინდა ნინოს ქალაქის დასათვალიერებლად.

თურქეთის ტერიტორიის ლამის ორი-მესამედი უდაბნოა.

მიდიხარ რუხ ტრამალებზე. ბუჩქიც არსად გხვდება. ჩერდები კემპინგზე. ხალვათობაა. ქირაობ ტრაქტორის-მოტორიან საბარგო მანქანას და უგზო ბილიკს ზევით მიუყვები. საშიში ციცაბო აღმართი. ერთი კილომეტრი, ორი, სამი... და შუა უდაბნოში იფეთქებს ნალკოტი, მყვირალა



მწვანე, ქვიშისფერი მთების უბეში. მიუახლოვდები და შენს წინ აღიმართება გიგანტური, ოქროსფერი მონასტერი...

ვინ ამენებდა, რა ხელმა და გონებამ დააპროექტა, მასალა როგორ ამოზიდეს ამ სიმაღლეზე...

ოთხთა ეკლესია...

გრანდიოზული სამნავიანი ბაზილიკა. სიმეტრიული გენიალობა. რაც ვნახეთ, სულ სხვადასხვა სტილია. რა მასშტაბები, რა სისადავე... გენიალურია. არაფერი მსგავსი მსოფლიოში არ მინახავს. ვისაც ტაო-კლარჯეთის ეკლესიამონასტრები არ უნახავს, ის ძნელად წარმოიდგენს, რა სიმდიდრის პატრონი ვართ – შეიძლება კოცნით გარსშემოუარო. რა წინაპარი გვყოლია.

ერთი რამ იგრძნობა ამ ზღაპრულ სიღიადეში: ტაძართა მშენებლებს არსად ეჩქარებოდათ, არ იგრძნობა ზურგსუკან არც თურქთა და არც აზიის ტრამალებიდან დაძრულ სხვა მტერთა სუნთქვა. ახლა ყველაფერს ეტყობა, რომ პატრონი ერი ამ საგანძურისა, პატრონი ქვეყანა არ არსებობს. ხავსს შეუჭამია, ხეები ამოსულა ნავთა შეერთებაზე. ავიდეთ, დავიკაპინოთ, ეს ხავსი მაინც მოვაცილოთ, ღამე აქვე გავათენოთ, მოვეპატრონოთ – მეთქი.

ჩამოვუარე ოთხთა ეკლესიას მარტომ და ხავსი ავაგლიჯე, ხელები დამისისხლიანდა, მაგრამ არ მოვეშვი. ბევრი ვერაფერი, მაგრამ ცოტა ხელი ხომ დავატყვე.

ვის ველოდებით. ხომ ვხედავთ, რომ სახელმწიფო უილაჯოა, ხომ უნდა დავინყოთ ოდესმე...

წამოსვლისას მე და რეზო ჩხეიძე ართვინის ვილაიეთის გუბერნატორს (იგივე ართვინის მერი) ომერ ბიუკენტს ვეახლეთ. თავაზიანად მიგვილო.

ვთხოვეთ ქართული საკვირაო სკოლის გახსნაში შემწეობის აღმოჩენა. პასუხის მოცემა გაუჭირდა, განათლების სამმართველოს უფროსს უხმო. სამმართველოს უფროსი გურჯი აღმოჩნდა.

ოთხთა








ოთხთა. ვაჟა აზარაშვილი, რევაზ მიშველაძე, მაყვალა გონაშვილი, გურამ გოგიაშვილი, ომარ მხეიძე, მერაბ დონაძე



პარხალი



ოთხთა. ვაჟა აზარაშვილი, რევაზ მიშველაძე



არტანუჯი

ჩვენ ვუთხარით, რომ გადამჭრელ პასუხს მათგან ახლა არ ველოდებით. უბრალოდ, ორი რამის დასაზუსტებლად მოვედით: ხომ არ არის თვით ბატონი გუბერნატორი ამგვარი სკოლის გახსნის პრინციპული წინაამდგეგი და შეძლებს თუ არა ამგვარი სკოლა სამეურნეო ანგარიშზე არსებობას. დავაზუსტეთ, რომ სკოლა იქნება მხოლოდდამხოლოდ ქართული წერა-კითხვის შემსწავლელი და რასაკვირველია, პოლიტიკისაგან თავისუფალი.

უნდა გენახათ ჩვენი გაოცება, როცა თურქმა მოხელემ თავიდან ბოლომდე მოიწონა ჩვენი წინადადება, თანხმობა ბრძანა და აღგვითქვა, პირადად გამოგიყოფთ ნებისმიერ თურქულ სკოლაში სამ ოთახს თქვენი კურსებისთვის და კონტიგენტის შოვნაშიც დაგეხმარებითო. გამომშვიდობებისას კი დელიკატურად დასძინა – იმედია, სწორად გამიგებთ, რომ ამ საქმეს საგარეო და განათლების სამინისტროების შესაბამისი წერილი და საქართველოს პრეზიდენტის დასტური სჭირდებაო.

მაშ ასე, თურქეთში ქართული სკოლის შექმნას საფუძველი უკვე ჩაყრილი აქვს.

ახლა ჯერი ჩვენზეა.

## ირანი – 2001

პარლამენტის პლენარული სხდომის შემდეგ ზურაბ ჟვანიამ თავის კაბინეტში მიხმო: ბატონო რევაზ, სპარსეთში ხომ არ წამობრძანდებითო.

რა საქმეზე მეთქი, ისე ვკითხე, სიტყვის მასალად.

პარლამენტის დელეგაცია ვართ მიწვეული ჩემი ხელმძღვანელობით და ვფიქრობ, საინტერესო ვიზიტი იქნება თქვენთვის, როგორც მწერლისთვისო. თანაც ოქმით გვევალება, რომ დელეგაციაში ერთი ოპოზიციონერი (ოღონდ მშვიდი ოპოზიციონერი) უნდა გვყავდეს და არჩევანი თქვენზე შევაჩერეთო, ხუმრობით დასძინა.

რასაკვირველია, თანახმა ვარ.

დელეგაციაში ჩვენს გარდა კიდევ ორი წევრი იქნებაო, გივი შუღაროვი და პეტრე ცისკარიშვილი.

...თვითმფრინავმა სიმაღლე რომ აიღო, ზურაბ ჟვანიამ მომიბრუნდა: ბატონო რეზო, წასაკითხი ხომ არაფერი გაქვსო.

ჩანთა გავხსენი და ჩემი ნოველების ახალი ნიგნი ვაჩუქე (რასაკვირველია, წარწერით).

გაუხარდა. დიდი მადლობა გადამიხადა, გადაშალა და მაშინვე დაიწყო კითხვა.

მე ილუმინატორს მივაჭიჭინდი.

ამ საჰაერო გზას პირველად ვსერავ.

აზერბაიჯანს გავცდით თუ არა, ჯერ მცირე მწვანიანი ტრამალები დაიწყო, მერე ასპროცენტისანი უდაბნო.

აქა-იქ პატარპატარა ქოხმახებიანი აული და მერე ისევ ათასი კილომეტრი უდაბნო. მწყემსები ცხვარს აძოვებენ, ზემოდან ასე ჩანს, მაგრამ საძოვარს მე აქ ვერაფერს ვხედავ.



## 16 აპრილი

აეროპორტი. უდაბნო თავდება და თვითმფრინავი ჯდება. მერჰაბადის აეროპორტი.

აეროპორტში გვხდება ირანის პარლამენტის სპიკერი ქაროუბი. საუბარი აეროპორტში.

სასტუმრო „ესტეგნალ გრანდ ჰოტელი“. ქუჩაში ძველი მანქანები.

აიათოლა ხომეინის მავზოლეუმში მისვლა.

მიღება პარლამენტში – ქაროუბი.

სამ საათზე: თეირანის ძვირფასი თვლების მუზეუმი. გეგონებათ, მთელი მსოფლიოს სიმდიდრე აქ არის.

ხუთ საათზე: მიღება ეკონომიკის და ფინანსების მინისტრ ნამაზისთან.

ჩადრიანი ქალები ქუჩებში.



ისპაჰანი

აკრძალულია არა თუ პორნოგრაფიული, ოდნავ „თავისუფალი“ ფილმების ჩვენებაც.

მკაცრი ცენზურა, განსაკუთრებით ნათარგმ ლიტერატურაზე.

ჩვენი ელჩი ჯიმშიდ გიუნაშვილი გვეუბნება, ყველაფერი ისმინება, განსაკუთრებით ხუმრობაზე რეაგირებენო.

მდიდრულ მერსედესებში ვზივართ.

ჟვანიას თავი კარგად უჭირავს.

სალამოს ჩვენმა ელჩმა, ჯიმშიდ გიუნაშვილმა საელჩოში შეგვიპატიჟა. თვითონაც იქვე, საელჩოს შენობაში ცხოვრობს. გვიანობამდე ვისაუბრეთ.

ბატონ ჯიმშიდს ბევრი კარგი საქმე აქვს გაკეთებული. მარტო ის რად ღირს, რომ ფერეიდნელ ქართველებს დედაენას აწვდის და ქართულ ცნობიერებას უღვივებს.

## 17 აპრილი

დილის 9 საათზე შევხვდით ირანის პრეზიდენტს სეიედ მოჰამედ ქათამის.

აქ ვიგრძენი, რომ მგონი მართლა სახელმწიფო ვართ.

პრეზიდენტი ფეხზე დამდგარი შემოგვეგება.

ყველა მიღებაზე მიწის თხილი, ნუგბარი, შარბათები, წვენები, ჩაი, ყავა.

პრეზიდენტი ხომ იგივე შაჰია. შვიდასი წელი ვიარეთ სანყალმა ქართველებმა ისპაჰანის გზაზე, ირანი იყო ჩვენი „ცენტრი“, როგორც მოსკოვი ბოლო ორასი წლის მანძილზე.

ახლა ეს ბილიკი ისევ გაიკვალა, ოღონდ თანასწორობის ნიადაგზე.

აღმოსავლური სიტკბო, ყურადღება, ცბიერი ღიმილი. ჩვენო უფრო ახლოს, უფრო მეგობრულად უნდა ვიყოთ, პრეზიდენტმა, ჩვენ ხომ რუსმა დაგვაშორა, თორემ უახლოესი ხალხი ვართო, დააკვირდით მსგავსებას ფიზიკურსო.

ჟვანიამ თბილი, დიპლომატიური, ჭკვიანური სიტყვა უთხრა.



გამომშვიდობებისას „შაჰს“ რომ ხელს ვართმევდი, კვლავდაკვლავ პაატას მოკვეთილი თავი და თვალებდათხრილი მუამბოხე ქართველები მახსენდებოდა.

პრეზიდენტიდან ეროვნული ნაკეთობების ცენტრში წავედით. რა სურები, რა ოქროს და ვერცხლის თასები, რა სამკაულები უკეთებიათ ირანელ ოქრომჭედლებს და მინანქრის ოსტატებს.

შუადღისას ირანის საგარეო საქმეთა მინისტრმა ქამალ ხარაზიმ მიგვილო.

ყველაზე ძნელი და რთულდიპლომატიური მიღება ეს იყო. გარდა დითირამების გაცვლისა აქ დიპლომატიით (აღმოსავლურით) შენიღბული ცოტა არ იყოს კრიტიკული საუბარი მოვისმინეთ.

ირანს, როგორც ადრე ახლაც სიკეთე უნდა თქვენთვის, საქართველოს ტერიტორიულ მთლიანობას ვაღიარებთ, მაგრამ ვერ მოგიწონებთ საეჭვო ყვანცალს რუსეთსა და დასავლეთს შორისო. ჩვენაო, მეზობლობამ და ისტორიამ გადაგვაბა ერთმანეთზე და ერთად უნდა ვიყოთო.

ამასწინათ თბილისში კარგად მიმიღეთ, კავკასიური რეგიონის სახელმწიფოთა შეხვედრა დავგეგმეთ, ფოთში ტერმინალის გახსნას დაგვირდით, მაგრამ რომ წამოვედი, ჩანს, ყველაფერი დაგავინწყდათო. ასე საქმე არ გამოვაო.

ჟვანიას თავის მართლება არ დაუნყია.

როცა ვსადილობდით სასტუმროში, ჟვანიას ვუთხარი, ტყუილი – ჩვენი დიპლომატიის თვისებადაც ქცეულა მეთქი. არ შეიძლება სახელმწიფოთა ურთიერთობაში ნათქვამის ერთადგილზე დაკიდება მეთქი. ვთქვათ, შევარდნაძეს დაავინწყდა, რისთვის ჰყავს რეფერენტები, ან საგარეო საქმეთა სამინისტრო მეთქი, სხვები? ჩინოვნიკები რას აკეთებენ მეთქი. მართალი ხარო.

სალამოს რვა საათზე პარლამენტის სპიკერმა ბატონმა ქაროუბიმ ოფიციალური ბანკეტი გაგვიმართა.

ღამით არ დამეძინა და ტელევიზორს ვუყურე.

ჩვენს ვიზიტს ყველა არხი აშუქებს.

ირანის ტელევიზიას ბევრი არხი აქვს.

ერთ არხზე მარტო კულტურაა. მწერლობა, მხატვრობა (ძველი, ახალი). ისლამმა დაარღვია პორტრეტის არდახატვის წესი. პორტრეტები (განსაკუთრებით ხომეინის) ბევრგანაა გამოფენილი.

ქალი დიქტორები ჩადრით გამოდიან ეთერში.

სადაა რეკლამა „ოლვეიზის“ საფენზე, ჩვენს ტელევიზიაში რომ გულს მირევს.

სასტუმროში დღეს სპარსულად გამოცემული ჩემი წიგნის ოცი ეგზემპლარი მომართვეს.

ელჩი ბატონი ჯიმშიდი მეუბნება, აქ თარგმნილი წიგნები თითქმის არ გამოდის, მხატვრული ლიტერატურიდან მარტო „ვეფხისტყაოსანია“ გამოცემულიო. შენმა წიგნმა უმკაცრესი ცენზურა გაიარა, არ მეგონა თუ გამოვიდოდაო.



ისპაჰანი

დილით პარლამენტს ვენვიეთ.

პარლამენტის სხდომა აქაც ხმაურიანია.

ოღონდ, ეგ არის, პარლამენტის წევრებს მიკროფონები მაგიდაზე უდგათ და სიტყვის სათქმელად მიკროფონთან მისწრება არ უხდებათ.

თორმეტ საათზე ისპაჰანში გავფრინდით. დავბინავდით ქალაქის საუკეთესო „აბასის“ სასტუმროში.

ისპაჰანი კარგა ხანს იყო საქართველოს „ფაქტიური“ დედაქალაქი, როგორც მოსკოვი.

ყველაფერი შაჰ აბასის ამ ულამაზეს ქალაქში წყდებოდა.

ისპაჰანი გაცილებით უფრო ლამაზია, ვიდრე თეირანი.

ამწვანებული ქუჩები. ქუჩაბანდები. დიდებული ისტორიული ძეგლები. „იუნესკომ“ იგი მსოფლიოს უპირველესად დასაცავ ოთხ ისტორიულ ქალაქთა შორის აღიარა – რომი, ათინა, ისპაჰანი, ვენეცია.

დავათვალიერეთ ისპაჰანის „საკრებულოს“ ათასწლოვანი მთავარი მეჩეთი.

მასპინძლებმა გეგმა გაგვაცვენეს. კიდევ რალაც ისტორიული ძეგლები, მერე დაიძინებთო და დილით კვლავ თეირანში.

შევუნთე ცეცხლი ჟვანიას. როგორ შეიძლება აქედან წასვლა ფერეიდნის უნახავად მეთქი. ამას თქვენი კარიერისთვისაც დიდი მნიშვნელობა აქვს მეთქი.

ჟვანია დაიქოქა. გუბერნატორს პირდაპირ ახალა – რატომ, ვისი სურვილით შეცვალეთ პროგრამაო და მასპინძლები იძულებული გახდნენ დაეთმით.

ორ საათზე ფერეიდნისკენ ავიღეთ გეზი. ორსაათნახევარს ვიარეთ უდაბნოში ავტობუსით და თოვლიანი მთებიც გამოჩნდა.

მთის ფერდობებზე შეფენილ 11 ქართულ სოფელს ფერეიდნის გუბერნია ანუ „ვილაიეთი“ ჰქვია.

ჩვენს მისვლაზე არ იყვნენ გართხილებულნი, მაგრამ ათ წუთში 6 ათასამდე ქართველი შეიკრიბა.

მე ასეთი წუთები არ განმიცდია.

ეს იყო დემონსტრირება იმისა, რომ ეროვნული გენი არ კვდება.

ჟვანიამ კარგი, ეროვნული სიტყვა თქვა.

ტაშით დაინგრა უზარმაზარი დარბაზი.

კინალამ გადაგვთელეს, მოზღვავედა ხალხი. ცრემლიანი სახეები, ყვირილი, კოცნა, ხელის ჩამორთმევა, გულში ჩახუტება.

დავარიგე ყველაფერი რაც მქონდა წიგნად, ხელნაწერად წაღებული. ჩემი სპარსული წიგნიც დავარიგე. ხელიდან მგლეჯდნენ.

მწერალი, მწერალი! ყვიროდნენ.

380 წელია ეს ხალხი შაჰ-აბასმა ფერეიდანში გადაასახლა, ისპაჰანის დამცველ რაზმებად ჩაასახლა ისპაჰანის ჩრდილოეთით მთებში.

380 წელი ეს ხალხი ფაქტიურად რეზერვაციაში იყო.

ფერეიდანში ჯერ არ ჩასულა ხელისუფლების უმაღლესი წარმომადგენელი – პირველი ჟვანიაა და ფერეიდანში ჯერ არ ჩასულა არცერთი ქართველი მწერალი.

ნეტა ასე მართმევდნენ თბილისში ხელიდან წიგნებს.

ეს არ იყო ოდენ ექსტაზი და ემოციურ გულზე ხელის ბრაგუნი შორეთის საქართველოზე.

გავიცანი სოსო უნიკაშვილი, ჰუსეინ ჰრაიმი - ორი ჟურნალისტი ფერეიდნის რადიოდან.

ზოგმა თავისი გადანერვილი „დედაენა“ გვიჩვენა. ერთმა მის მიერ გამოცემული კალენდარი გვაჩუქა. ჩვიდმეტი წლის არსენა ონიკაშვილს თამარ მეფის პორტრეტი დაუხატავს.

მათ სახეებზე ოთხასი წლის წინანდელ ლამის მეხრეს და გუთნისდედას ვეძებდი და ვპოულობდი.

ირანი საოცრად მოწესრიგებული სახელმწიფოა. მკაცრად იცავს თავის ეროვნულ-რელიგიურ შეუვალობას.

ფერეიდანელმა ქართველმა მაგალითი მისცა ყველას, ვისაც შეუძლია ოთხასი წლის განმავლობაში დაკარგოს მშობლიური ენა და პრეტენზია აქვს ქართველობაზე.

ახლა სხვა ირანი და სხვა საქართველოა, თორემ ვინ გამოგვიშვებდა ფერეიდანელებთან შესახვედრად. ესენი 4 საუკუნე რეზერვირებულები იყვნენ.

### 19 აპრილი

ისპაჰანში ვართ ისევ. დავათვალიერეთ ალავერდხანის (უნდილაძე) აშენებული უზარმაზარი ხიდი. ეს არის ულამაზესი ხიდი მთელს ირანში. საერთოდ ირანში უნდილაძეებს და როსტომ ხანს (ისპაჰანის მერი) აღმერთებენ.



ისპაჰანი. ალავერდი ხანის ხიდიდან. მარცხნიდან: გიდი, რ. მიშველაძე, სპარსი, ზ. ჟვანია, ჯ. გიუნაშვილი, გ. შულაროვი.

გრანდიოზული, ზღაპრული შაჰ-აბასის სასახლე ისპაჰანში. ოთხივე კუთხით მეჩეთია. შუაში სასახლე. მეჩეთებს და სასახლეს შუა დიდი მოედანი – სტადიონი.

დავდივართ შაჰის ჰარამხანაში, მის სადარბაზო ტალანებში. რამდენ ქართველს გაუვლია აქ.



ჩვენ უკან შაჰ-აბასის სასახლე ჩანს.

ისევ თეირანში.

ჩემი განწყობა, რა თქმა უნდა, ნასაზრდოები იყო საქართველოს ისტორიით და ლიტერატურით. 700 წელი საქართველო სხვადასხვა დროსა და ვითარებაში სპარსეთის მიერ იყო დაპყრობილი. ძალიან დიდხანს საქართველოს ფაქტიური დედაქალაქი ისპაჰანი იყო. აქ წყდებოდა ჩვენი ბედი. ისიც კარგად ვიცი, თუ რა დიდი კულტურული გავლენა მოახდინა სპარსეთმა საქართველოზე. ასე რომ მარტო უარყოფითი მხარეები არ ვიცოდი ჩვენი ურთიერთობისა. ყველაფერი წინასწარ მოვიძიე საისტორიო წყაროებში, ლიტერატურაში, რათა მომზადებული ვყოფილიყავი და ეს ურთიერთობა ცალსახად არ დამეხასიათებინა. ვიზიტისას თავიდანვე იყო გათვალ-



ისწინებული ფერიდან-შაჰრინში ჩასვლა. ასე ჰქვია ამ გუბერნიას, სადაც ქართველები ცხოვრობენ. ბოლო დღე ჩვენი ვიზიტისა ფერეიდანში ჩასვლას უნდა დათმობოდა, მაგრამ მასპინძლებმა დელიკატურად უარი გვითხრეს. მოტივი ასეთი იყო: სამწუხაროდ, ფერეიდანი ისეთი კეთილმოწყობილი არ არის, რომ თქვენისთანა მაღალი რანგის სტუმრების მიღება შეძლოსო. სინამდვილეში, ამ უარს სხვა რამ ასაზრდოებდა. ბოლო დროს, ძალიან გაიკვალა გზები ფერეიდანისკენ. სპარსული მხარე კი არ არის მოსურნე იმისა, რომ ფერეიდანში ქართული ცნობიერება გაღვივდეს. ამის შემდეგ ზურაბ ჟვანიამ კატეგორიულად მოითხოვა მასპინძლების მიერ იმ პროგრამის შესრულება, რაზეც წინასწარ ვიყავით შეთანხმებულები. ეს შეხვედრა უპრეცედენტო იქნებოდა, რადგან ჯერ არც ერთი ხელისუფლების წარმომადგენელი არ ჩასულა იქ. ეს რუბიკონი ჟვანიას უნდა გადაელახა. ჟვანიამ განაცხადა, მე შემძლია ფეხზე ქალამნები ჩავიცვა და ნებისმიერი ქართველი გლეხის ოჯახში ჩავიდე ღამის გასათევად, ჩემთვის ეს პრობლემას არ წარმოადგენსო. მოკლედ, გზა ფერეიდანისკენ გაიმართა. მთელი სპარსეთი 90% უდაბნოა. თვითმფრინავიდან ქვეწარმავალიც კი შეგიძლია დაინახო. იქ მხოლოდ ქვიშა და ერთფეროვანი პეიზაჟია. მივდიოდით უდაბნოში და ჩემთვის სრულიად მოულოდნელად და გასაოცრად თოვლიანი მთები დავინახე. ისპაჰანიდან ჩრდილო-დასავლეთის მიმართულებით. მთები! – დავიძახე უცებ. ვინც ჩვენ გვახლდა ოფიციალური პირი, ჩაიცინა და თქვა: - გეცნოთ არა?! ეს ფერეიდანის მთებია, რომელიც ძალიან ჰგავს საქართველოს მთებს. ასე რომ თქვენს ისტორიულ წყაროებში რომ წერია, შაჰ აბასმა ქართველები გარეკა და უდაბნოში დაასახლაო, ახლა დარწმუნდებით, რომ სპარსეთში ყველაზე უკეთეს ადგილას, ბალახიან და თოვლიან მთებში ქართველები დაასახლა.

წარმოიდგინეთ, ვუახლოვდებით ფერეიდანს. მე ვისრულებ ჩემი ჭაბუკობის ოცნებას და თანაც საშუალება მეძლევა

ვნახო, რას წარმოადგენს ოთხასი წლის წინათ საქართველოდან გასახლებული კაცი. ფერეიდანის გუბერნატორს გზიდან შეატყობინეს, საქართველოს დელეგაცია მოდისო. მათ მხოლოდ ორი საათი ჰქონდათ მოსამზადებელი დრო.



ფერეიდანი. საქართველოს დელეგაცია ირან-ერაყის ომში დაღუპულ ქართველთა საფლავებთან

ფერეიდანში 11 ქართული სოფელია. როგორც მთის სოფლები, ისინი საკმაოდ დაშორებულები არიან ერთმანეთისაგან. შევედით ფერეიდანში, გამოჩნდა ეზოები, სახლები. ზოგი მინური, ზოგი ტიპიური აღმოსავლური, როგორც ჩვენს ქართულ-აზერბაიჯანულ სასაზღვრო ადგილებშია. ჩვენს მანქანებს ხალხი აედევნა – ახალგაზრდები და ბავშვები. მანქანებს მოსდევდნენ და ყვიროდნენ: -ქართველები! ქართველები! ამ სურათის დანახვისას თვალზე ცრემლი მომადგა. გუბერნატორთან შეხვედრის შემდეგ ქართველთა სასაფლაოებს მი-

ვადექით. ჩემთვის ეს ძალიან მტკივნეული იყო, თქვენთვის ცნობილ მიზეზთა გამო. ამის შემდეგ ოფიციალური შეხვედრისათვის უნდა მივსულიყავით სპორტის სასახლეში, რომელიც 2 ათას კაცს იტევდა. უნდა გენახათ ჩვენი გაოცება, როცა სასახლესთან 5 ათასი ქართველი მოვიდა. ეს გრანდიოზული შეხვედრა იყო. ჩემს ცხოვრებაში ეს სურათი არ დამავიწყდება. შეხვედრა რადიოფიცირებული იყო. მაგრამ ყველას შიგნით უნდოდა შემოსვლა. შენობაში დაცვამ შეგვიყვანა, რადგან ხალხი ხელს გვკიდებდა, გვკოცნიდა ხელებზე, გვეხვეოდნენ, იყო ტირილი: - ქართველი! ქართველი! ბიჭო!... ერთ ადგილას დაცვამ კორდონი ვერ გაარღვია და ცოტა ხანს გაეჩერდით. უცებ ფეხი დამიმძიმდა, დავიხედე და ორივე ფეხზე 11-12 წლის ბავშვები მკოცნიდნენ, უფრო ხნიერები ყვიროდნენ: - „წამოვალთ საქართველოში! რატომ დასთმეთ აფხაზეთი! ჩონ წამოვალთ, ჩონ ვიბრძოლებთ! როგორ დათმეთ, გიორგი სააკაძის ძმები არ ხართ?! ჩონ ვიბრძოლებთ, ქართველი დედალი არასდროს ყოფილა!“ ეს რა ვნახე. ეროვნულად გაღვიძებული 380 წლის წინათ გადასახლებული, თითქმის რეზერვაციაში მყოფი ქართველები!!! ნეტა, საქართველოში მყავდეს ასე ეროვნულად განწყობილი და ეროვნულად მოლაპარაკე 10 მილიონი ქართველი. იქ ყოველი ფეხის ნაბიჯზე გვაგრძნობინებდნენ, ფერეიდანებში ერვნულ ცნობიერებას ნუ გააღვიძებთ, ისინი ქართველები აღარ არიან, არც ენა იციან და არც კულტურაო. მაგრამ რაც იქ ვნახეთ, ეს იყო დასტური ჩემს მიერ გამომუშავებული ეროვნული თეორიისა. იქ, ოჯახებში, ყველგან არის ხელით გადანერილი ქართული დედაენა, ანბანი, თამარ მეფისა და დავით აღმაშენებლის პორტრეტები. იქ ქართულ წერა-კითხვას ჩუმ-ჩუმად სწავლობენ. საქართველოს პრობლემებთან უშუალო დამოკიდებულება აქვთ. აქედან ჩემი ორმოცდაათამდე წიგნი მქონდა წაღებული. წიგნებს ხელიდან მგლეჯდნენ. ვიფიქრე, ნეტავ ასე მგლეჯდნენ საქართველოში წიგნებს ხელიდან-მეთქი. იქიდან სულ სხვა კაცი წამოვედი. ისე სჭირდება ეს

ეროვნულობა ამ ჩაძინებულ და არაეროვნულ საქართველოს, როგორც არასდროს. ისეთი ბანგი ასვეს ქართველებს, რომ ეროვნული ხელისუფლება განუდევნეს საქართველოდან. პარლამენტში ვბლავი, საქართველოში ქართველი გააქრო პარლამენტმა თავისი მიღებული დრაკონული კანონებით-მეთქი, მაგრამ თითქოს არაფერი ხდებოდეს. საქართველო ნადირივით ცოხნის ბალახს და ნადირივითვე სადღაც მიემართება. ვერავინ გავაღვიძე. მაშინაც და ახლაც საქართველოს მიწიდან ქართველებს ერეკებოდნენ და ერეკებიან. მაგრამ ერთი განსხვავებით: 400 წლის წინათ შაჰ-აბასმა ასიათასამდე ქართველი ძალით აპყარა ქართული მიწიდან და სპარსეთს გაამწესა. სამაგიეროდ, დღეს, ჩვენი ხელისუფლების მეშვეობით, მოლიონ-ნახევარი ქართველი თავისი ნებით და დიდი სურვილით (ძალით არავის გაუჩივებს) საზღვარგარეთ არის საცხოვრებლად თუ სამუშაოდ გასული, მილიონ-ნახევარს კი თვალი უჭირავს გაქცევაზე, ოღონდ ამ ყოფას თავი დააღწიოს. რაშია საქმე?

ადამიანი ეროვნულ ცნობიერებას რომ დაკარგავს, ის ცხოველად იქცევა. ქართველები ადრე ძალით გაირეკეს, მაგრამ როგორც ვნახეთ, ეროვნული ცნობიერება არ დაუკარგავთ. აგერ, ე. წ. თურქი მესხები რომ იხვეწებიან, შემოგვიშვითო, 50 წლის წინათ გადასახლებულებს ქართული ენაც კი ისე საფუძვლიანად დავიწყებიათ, რომ ერთი სიტყვითაც არ იციან. 400 წლის წინათ გადასახლებულებმა კი დღემდე საფუძვლიანად შეინარჩუნეს ქართული ცნობიერება. ეს იმიტომ მოხდა, რომ თურქ მესხებშიც თავის დროზეც არ იდო სათანადოდ ქართული გენი. დღეს წასულ ქართველებიდან, ზოგი ლუკმა-პურის საშოვნელად არის წასული და გამოღამებული თვალებით სამშობლოსკენ იყურება. ორ გროშს დავაგროვებ და უკან დავბრუნდებიო, მაგრამ უმეტესობა, ეროვნული ცნობიერებისგან, ეროვნული თავმოყვარეობიგან და პატრიოტული გრძნობისაგან დაცლილი ხალხია. არ ვიცი, რა ჩითილებში გაიზარდა ეს ხალხი. მეც ვცხოვრობდი კომუნისტურ ეპო-

ქაში, მაგრამ რაც უფრო მეტი ზენოლა იყო მათი მხრიდან, ეროვნულ ცნობიერებას თავი დაანებეთო, მით უფრო მეტი გრძნობა გვიჩნდებოდა წინააღმდეგობისა. ესენი კი სად გაიზარდნენ, ასეთი საყველპურო ცნობიერება რომ შეიძინეს? სამშობლოს მოუკვდა პატრონი, სადაც კარგად ვიქნები, ის არის ჩემი სამშობლოო. ეს დამლუპველია. მათ აუცილებლად უნდა იცოდნენ, რომ მათ დანატოვარ ადგილს სხვა, საქართველოში მცხოვრები უცხო ერის შვილი დაიკავებს და შემდეგ ნოსტალგია რომ შემოგანვება, ჩემო ძვირფასო, საქართველოდან იოლი ცხოვრებისთვის ნახეტებულო ქართველო, საქართველოში შენი ადგილი აღარ იქნება. ამიტომაც, ჩამოდი აქ, აქ იბრძოლეთ იმისთვის, გააპანღუროთ ეს ხელისუფლება და თქვენთვის სასურველი ეროვნული ხელისუფლება მოიყვანოთ. სხვა არაფერი უშველის ამ ქვეყანას.



ირანის პარლამენტის თავმჯდომარე საქართველოს დელეგაციას აცილებს.

23 ივნისი

საქართველოს პარლამენტის დელეგაცია – ნინო ბურჯანაძის ხელმძღვანელობით ისრაელში მიემგზავრება. დელეგაციის წევრები: მაია ნადირაძე, გია ბარამიძე, რევაზ მიშველაძე, ჯემალ ავიაშვილი.

სამსაათიანი ფრენის შემდეგ ისრაელის მიწაზე, თელ-ავივის ბენ-გურიონის აეროპორტში დავეშვით.

მადლობელი ვარ შენი, ღმერთო, რომ ეს ოცნებაც ამიხდინე.

ისრაელში ჩასვლა ჩემი სიყრმის დროიდან ადევნებული ოცნება იყო. რაც მეტს ვიგებდი ებრაელთა ცხოვრებაზე და მათ გმირულ ყოფაზე, მით უფრო მიცხოველდებოდა სურვილი, ფეხი დამედგა „წმინდა მიწაზე“.

თელ-ავივში საგარეო საქმეთა მინისტრის მოადგილე, ქნესეთის წარმომადგენელი და ჩვენი ელჩი რევაზ გაჩეჩილაძე გვხვდებიან.

საოქმო დიპლომატიური გასაუბრების მერე, მანქანებში ვსხდებით და თელ-ავივიდან იერუსალიმისაკენ ვიღებთ გეზს. ორმოციოდე წუთში იერუსალიმში ვართ.

პირველი გაოცება: – მეგონა აღმოსავლური, უდაბნომორეული ქალაქი იყო. მთა-გორაკებზე აშენებული, მარადმწვანე ხეებში ჩაფლული ქალაქია. აღმართ-დაღმართი ყოველ ფეხის ნაბიჯზეა. ძალიან ცხელა.

გზადაგზა მდიდრული მანქანები და დიდებულად მოკირწყლული ქუჩებია. ქალაქში ჭარბობს შავ ფრაკსა და ცილინდრში (უმალლესი მორწმუნეობის ნიშანი) გამონყობილი წვეროსანი ებრაელი ხელჯოხით, ბუტბუტით რომ მიაბიჯებს თავის ებრაულ საქმეებზე.



„გვანათლებს“ მანქანაში ქნესეთის წარმომადგენელი:  
„ისრაელში თითქმის არ არის ქურდობა!“  
„არ არის ნარკომანია“.  
„ჩანასახოვან მდგომარეობაშია (თითქმის არ იგრძნობა) პროსტიტუცია“.

„უმაღლეს დონეზეა აყვანილი პატრიოტიზმი“.  
და ეს იცით რის გამო? ფანატიკური რწმენის, ღვთის შიშისა და რიდის გამო.

ებრაელობა რელიგიურობამ გადაარჩინა და რელიგიურობა წარმართავს დღესაც მის ეროვნულ ხასიათს.

რაც ისრაელის სახელმწიფო აღადგინეს, აქ მსოფლიოს სხვადასხვა კუთხიდან დაინყო დინება ებრაელობამ.

ბუნებრივი შერჩევა მოხდა; ჩამოვიდნენ უმთავრესად ძლიერი მორწმუნენი და ძლიერი პატრიოტები.

თან ჩამოიტანეს სხვადასხვა ქვეყნის კულტურა.

ამ კულტურის ერთიან თანამედროვე ებრაულ კულტურად დადულება ხდება დღეს ისრაელში.

„ღმერთო, ღმერთო, ეს ხმა ტკბილი გამაგონე ჩემს მამულში“.

საქართველოდან ჯერჯერობით მხოლოდ გარბიან.

არქიტექტურა – მკაცრი, უსახურავო, თეთრ-ყვითელი ქვით მოპირკეთებული სახლები. ძველსა და ახალ არქიტექტურას შორის განსხვავება თითქმის არ არის.

ეს შეხამებაც გენიალურია. სასტუმრო „დავით ციტადელ ჰოტელში“ დავზინავდით ქალაქის ცენტრში. 669-ე ნომერში ვარ.


ვანშმის მერე ჯემალ აჯიაშვილმა, გია ბარამიძემ და მე ღამის ორ საათამდე ვიხეტიალეთ იერუსალიმის ქუჩებში.

თავი ზღაპარში მგონია.

ოთხი ათასი წლის წინანდელ ქუჩა-შუკებში დავაბიჯებ. იარუსებიან იერუსალიმში რა ტაძრებს, რა აკლდამებს არ ვანყდებით ყოველი ფეხის ნაბიჯზე. გამაოგნა სოლომონის

კედლის გრანდიოზულობამ, დავითის სასახლეთა ნაშთებმა, საფლავეებმა.

და აი, გოდების კედელიც. ღამის პირველი საათია.



გოდების კედელთან

იფიქრებ, აქ შეკრებილანო მთელი დედამიწის მორწმუნე ებრაელები. კოცნიან კედელს, ლოცულობენ.

კედელი სასწაულებრივად გადარჩენილი სოლომონ წინასწარმეტყველის ტაძრის ნაწილია. თვით ტაძრის დანარჩენ ნაწილზე მეჩეთია მიშენებული. რა კარგად იცის ჯემალმა ებრაული და ებრაელთა ისტორია.

მართლაც რომ ბრძენი ებრაელია.

## 24 ივნისი

დილით ისრაელის პარლამენტის სპიკერ რეუვენ რივლინს შევხვდით.

თანამედროვე მსოფლიოს პრობლემებზე, ტერორიზმზე, ებრაელი და ქართველი ხალხის მეგობრობაზე ვისაუბრეთ.

ნინო ბრწყინვალედ ლაპარაკობს იგლისურად. საერთოდ თავი ღირსეულად უჭირავს, დაბადებულია პოლიტიკოსად.

ამის მერე ისრაელის პრეზიდენტი მოშე კაცავმა მიგვილო.

სპარსეთში დაბადებული და გაზრდილი ებრაელი ყოფილა.

გვესაუბრა იმაზე, თუ რა ბედნიერება ეწვია ებრაელ ხალხს, როცა მე-20 საუკუნეში სახელმწიფო დაიბრუნა და როგორ უჭირს ახლა მას ტერიტორიული მთლიანობის შენარჩუნება. ისაუბრა ისრაელის ეკონომიკურ აღმავლობაზე, საგარეო ურთიერთობებზე, ამერიკის მიერ აღმოჩენილ დახმარებაზე.

ჩვენ ვუთხარით, რომ სამაგალითოა ისრაელის ბრძოლა თითოეული გოჯი მიწისათვის.

სადილამდე სამი საათი ისრაელის ჰოლოკოსტის მუზეუმ „იად ვაშემში“ დავყავით.

ეს არის მუზეუმი მე-20 საუკუნეში ეთნონმენდის გამო დაღუპულ ებრაელებზე.

კერძოდ, 1941-45 წლებში მეორე მსოფლიო ომის საშინელებაზე გვიამბობს მუზეუმი. რა ფოტო-მასალა, რა ნივთმტკიცებებია ჰიტლერის ვერაგული ჩანაფიქრის წინააღმდეგ.

ყელში ცრემლი შემეგუბდა.

მუზეუმის ეზოში უამრავი ხეა დარგული და ქვემოთ წარწერა აქვს: „ეს არის თითოეული იმ კეთილი კაცის სახელზე დარგული ხე, ვინც ებრაელი შეიფარა და გადაარჩინა“.

საღამოს ცნობილი ებრაელი მთარგმნელი და მეცნიერი გერშონ ბენ ორენ (წინუაშვილი) მეწვია და ორი ძვირფასი საჩუქრით გამახარა; მომიტანა ებრაულ ენაზე გამოცემული ჩემი წიგნი, ქუთაისელ ებრაელთა წასვლაზე დაწერილი ნოველის სახელწოდებით „სიკვდილი“, 35 ცალი და ბორის გაპონოვის მიერ თარგმნილი „ვეფხისტყაოსანი“.

გვიან ღამემდე ლუდის ბარში ვისხედით გერშონი, ჯემალ აჯიაშვილი და მე.

ვკითხე გერშონს, როგორ არიან-მეთქი ქართველი ებრაელები?

ქარაგმებით, ბრძნულად მიპასუხა (როგორც ებრაელს შეეფერება):

„სახლი რომ იყიდო, კარგა ხანს ხომ ძველი სახლი გახსოვს, იქით გაგირბის კაცს მზერა, მაინც იქ გირჩევნია. ასე ვართ ჩვენცო.“

აქ რომ ქართველმა ებრაელმა ვითხრას, ძალიან კარგად ვარო, არ დაიჯერო.

ყვავილი რომ სხვა ადგილას გადარგა, შეიძლება არ გაიხაროს, დაჭკნეს, იქნებ ფესვები დაუზიანე ამოღების დროს. ასე ვართ ჩვენცო.

ახალი თაობა უფრო ეგუება ახალ ვითარებაში ცხოვრებას, ჩვენ კი ძველებს, გული იქით, საქართველოსკენ გვიხმობს, თუმცა 30 წელია აქა ვართო.



ისრაელი. ჯვრის მონასტერი. რუსთაველის ფრესკასთან

თბილისში თუ მომშვიდებოდა, ან ზურაბ კვიციანი ვთხოვდი პურს, ან შენ, ან რომელიმე ქართველს, აქ კი მსგავსი რამ არ არსებობსო. უტაქტობად ითვლება დახმარების თხოვნაო“.

ამ დღეს ამიხდა ყველაზე დიდი ნატვრა!

ქართველთა ჯვრის მონასტერში რუსთაველის ფრესკას ვემთხვეი.



რუსთაველის ფრესკას ვემთხვევი.  
გაივლის რამდენიმე თვე და ბერძნები თუ ურიები რუსთაველს თვალებს დათხრიან... შური?

ყველაზე დიდი ქართველის ფრესკასთან ვდგავარ. მაქსიმე აღმსარებლის და იოანე დამასკელის ფეხებთან მოკრძალებით მოკალათებულა იგი, დედამინის ყველაზე დიდი მწერალი.

ცრემლი მახრჩობს.

ჯვრის მონასტერს ბერძნები დაპატრონებიან, ჩვენიაო.

არადა გავსებულია ქართული ფრესკებით.

ბევრჯერ გადასულა მე-10 საუკუნის ეს მონასტერი ხელიდან ხელში (მცხეთის ჯვარს ჰგავს შიგნიდან).

დავით აღმაშენებელს მამლუქთა დახმარებით დაუბრუნებია. მე-19 საუკუნეში ბერძნებმა წაგვართვეს.

დღეს ნუთუ არ უნდა არსებობდეს რაიმე საერთაშორისო სამართალი, რომ ისევ მოგვაკუთვნონ?

ორ მილიარდადააო შეფასებული, გვითხრა ელჩმა რევაზ გაჩეჩილაძემ. თუ გამოვისყიდით, ბერძნები თანახმა არიანო. ვინ მოგვცა ორი მილიარდი ჩვენ.

25 ივნისი

შევხვდით ქნესეთის დეპუტატებს.



ისრაელი, თელ-ავივი. ნინო ბურჯანაძე, რევაზ მიშველაძე, ნინო აბესაძე (ჟურნალისტი) და გია ბარამიძე მიღებაზე საქართველოს საელჩოში.

ჟურნალისტთა შორის იყო ულამაზესი ქართველი ქალი ნინო აბესაძე, რომელსაც ებრაულად მიჰყავს სატელევიზიო



გადაცემები. იგი თბილისში გაშორდა ქმარს, თბილისშივე შეიყვარა ისრაელის ელჩი საქართველოში (გავიცანი, 2-მეტრიანი გიგანტია) და იერუსალიმში ცხოვრობს.

შევხდით პარლამენტის ისრაელ-საქართველოს მეგობართა ჯგუფს – რომან ბროფმანის ხელმძღვანელობით.

მიგვილო ცნობილმა შიმონ პერესმა. იგი ისრაელის პრემიერ-მინისტრი იყო. ახლა პარლამენტში ოპოზიციის ლიდერია.

ვენციეთ იერუსალიმის ებრაულ უნივერსიტეტს. უნივერსიტეტში მეგზურობას ქართველი ებრაელი, პროფესორი კონსტანტინე ლერნერი გვინევდა. აღმოვჩნდით საერთაშორისო ურთიერთობათა ფაკულტეტის სტუდენტთა შორის.

ჯერ იყო და, ინგლისურად მოვსინჯეთ ერთმანეთი, შიგა და შიგ რუსულზეც გადავედით, ბოლოს ერთმა სტუდენტმა თქვა: რაღას ვწვალობთ, ჩვენ აქ ქართული ყველას გვესმისო. ვუამბე ჩემს სამწერლო საქმიანობაზე. ვაჩუქე ჩემი პატარა ებრაული წიგნაკი. ძალიან გაიხარეს.

მესამე კურსის სტუდენტთა შორის ქუთაისელი ქართველი გოგონა ნინო ბერიძეც იყო.

სალამოს ქართველ ებრაელებთან აშკელონში გავემგზავრეთ.

ამაღელვებელი შეხვედრა გვქონდა.

აშკელონი პატარა (ასიათასმცხოვრებიანი) ზღვისპირა ქალაქია. ყველაზე მეტი ქართველი ებრაელი აქ ცხოვრობს კომპაქტურად. აშკელონის მერი შაბთაი ცური (ვანელი ებრაელი), პირველი ქართველი ებრაელია ქალაქის მერად ებრაელთა მთელი ისტორიის მანძილზე.

ქართული ცეკვები, სიმღერები, სამშობლოს მონატრების ცრემლი...

აქ არიან რუბენ ენუქაშვილი (ჩემი უნივერსიტეტელი მეგობარი), ფიზიკის პროფესორი დავით ბააზოვი, ცნობილი ქველმოქმედის – ბადრი პატარკაციშვილის დედა და ქუთაისელი, თბილისელი, კულაშელი ებრაელები.

საზეიმო შეხვედრაზე ვილაპარაკე ჩვენს 26 საუკუნოვან გაუბზარავ ძმობაზე, დავურივე (ყველას არ ეყო) ჩემი ებრაული წიგნი. შაბთაი ცურმა, იქნებ ჩვენი თხოვნით კიდევ გამოსცესო გერმონ წინუაშვილმა. თუ საჭიროა ჩვენც დავეხმარებითო.



სტუმრად აშკელონის მერთან

## 26 ივნისი

დილით ისრაელის სახელმწიფოს მეთაურმა, პრემიერ-მინისტრმა, არიელ შარონმა მიგვილო.

73 წლის ტანდაბალი, მსუქანი მოხუცი საოცრად მკვირცხლად მოძრაობს და სალად აზროვნებს.

იუმორის გრძნობაც გააჩნია. იცით თუ არა, რომ ბებია თბილისში მყავს დაკრძალულიო. მერე თქვა, ჩვენს სახელმწიფოსაც იგივე პრობლემები აქვს, რაც თქვენო, იმ განსხვავებით, რომ ამერიკა ყოველწლიურად 3 მილიარდ დოლარს

გვაძლევს საჩუქრად (გრანტის სახით) და აქედან 1,5 მილიონი შეიარაღებაზე უნდა დავხარჯოთო.

თქვენ მაინცდამაიც არ გეტყობათ, რომ აფხაზეთის დაბრუნება გსურთ, თავისი სახლიდან გამოდევნილი ხალხი ასე არ იქცევა, თქვენი ლტოლვილები ერთ ქვასაც არ ისვრიან აფხაზეთის მხარეს, ჩვენი დევნილები კი, ხომ ხედავთ, რა დღეში აგდებენ არაფატიის ხროვასო.

შევარდნაძე ძალიან მიყვარს, ჭკვიანი და ფრთხილი პოლიტიკოსია. ეგ რომ არ გყავდეთ, თქვენ, ფიცხი ქართველები, აქამდე ვინ იცის, რას მოიმოქმედებდით; ან მთლად აშენდებოდით, ან დააქცევდით ქვეყანასო.

ნინომ კარგად ილაპარაკა. ჩვენ რომ ერთმანეთი გვიყვარს, ფაქტია, მაგრამ იქნებ იმაზეც გვეფიქრა, ერთმანეთს იარაღითაც დავხმარებოდით. იქნებ, ოდნავ მოძველებული საომარი ტექნიკა ჩვენთვის გადმოგეცათო. ეს თხოვნა შარონმა დელიკატურად გაატარა ყურიდან ყურში.

მერე გავემგზარეთ მუზეუმ „მინი იზრაელის“ დასათვალიერებლად. ორი საათის განმავლობაში ვიარეთ უზარმაზარ ტერიტორიაზე, სადაც თითქმის ყველა დიდი ქალაქის ყველა ისტორიული ძეგლია.



თუ ამ ღია ცისქვეშ მუზეუმს კარგად შეისწავლი, შეიძლება ჩათვალო, რომ მთელი ისრაელი მოვლილი გაქვს.

შუადღისას ისრაელის გიგანტურ საავიაციო ქარხანას ვენვიეთ. „ისრაელის საჰაერო ინდუსტრიის“ ვიცე-პრეზიდენტმა მთელი ქარხანა დაგვათვალიერებინა.

ხუთი სხვადასხვა ტიპის თვითმფრინავს უშვებენ. თვითმფრინავის მშენებლობა და მოდერნიზება უახლესი კომპიუტერული ტექნოლოგიით სრულდება.

ნასადილევს დავბრუნდით იერუსალიმში და მთელი საღამო ძველი ქალაქი ვათვალიერეთ.

ქრისტეს საფლავი...

გოლგოთა...

აკლდამა, სადაც დაასვენეს და საიდანაც აღსდგა.

იერუსალიმი მინის ზევით რაც არის, ორი იმდენი – ტაძრები, სასახლეები, მინისქვეშაა.

ასე რომ, რელიგიური ცივილიზაცია აქ სამფენოვანია. თანაც სამი რელიგიური მიმდინარეობის შემქნელ ამ უძველეს ქალაქში ძნელი გამოსარჩევია ებრაული, ქრისტიანული და მუსულმანური კულტურის ძეგლები.

ერთ კედელზე, სხვადასხვა, სრულიად სანინაალმდეგო საკულტო ძეგლია მიშენებული.

გოდების კედელი. 26 საუკუნის წინ ნაბუქოდონოსორმა რომ იერუსალიმი დაანგრია, სოლომონის ტაძარი იავარჰყო, გადარჩა მხოლოდ სოლომონის ტაძრის ერთი კედელი (ეს ის ტაძარია, საიდანაც ქრისტემ ვაჭრები გამოიშვა). ამ კედელთან გროვდებოდნენ და მოთქვამდნენ ებრაელები: თუ დაგივიწყო იერუშალიმი, დამავიწყდეს მარჯვენა ჩემი და ენა ჩემი მიეზარდოს სასასა ჩემსას“.

ახლაც მთელი ებრაელობა ამ კედელთან ლოცულობს. ამ კედელმა უდიდესი როლი შეასრულა ისრაელის სახელმწიფოს აღდგენაში.

გადავიღე სურათი გოდების კედელთან მლოცველ ებრაელთა შორის.

სალამოს 8 საათზე ისრაელის საგარეო საქმეთა სამინისტრომ ჩვენს დელეგაციას ვახშამი გაუმართა.

ხვალ ქალაქ ლოდში, მერე ქალაქ იაფოში და კვლავ თელავივიში მივემგზავრებით.

რესტორანში მოგვიახლოვდა ერთი ებრაელი ბიზნესმენი და გვისაყვედურა – აღარ ვიცი, რა წყალში ჩავვარდე; თბილისის ზღვაზე მილიონობით დოლარი ჩავყარე და ვინც ხელშეკრულებაზე ხელი მომიწერა, ის ვიცე-პრემიერი ახლა, როგორც მითხრეს, ოპოზიციონერია. ასე რომ, ხელშეკრულებამ, როგორც ჩანს, ძალა დაკარგა. მსოფლიოში არსად არ ხდება, რომ სახელმწიფო მოხელე როცა თანამდებობას ტოვებს, მის მიერ ხელმოწერილი დოკუმენტებიც უქმდებოდესო.

ვერაფრით ვანუგეშეთ, თუმცა „ამ საკითხით დაინტერესებას“ დავპირდით.

## 27 ივნისი

პროვინციულ ქალაქ ლოდში ვართ.

ეს პატარა ქალაქიც ისტორიული ძეგლებითაა დახუნძლული.

მთელი ისრაელი ტურისტებითაა სავსე.

ღმერთო, ამის მეათედი ტურისტი რომ საქართველოში ჩამოვიდეს, რა გვიჭირდა.

ექსკურსიები ბრწყინვალედაა ორგანიზებული. ავტობუსები ძეგლებთან უმკაცრესი გრაფიკით დგანან. მაღალპროფესიული გიდები ყველა ჩამოსულს თავის ენაზე ელაპარაკებიან.

ისრაელში ძალიან ცხელა. ამიტომაც დღისით ქუჩაში მხოლოდ ტურისტები ჩანან.

ყოველ ორ საათში ერთხელ თავაზიანი გიდები სასტუმროში გაბრუნებენ, რომ გრილი შხაპი გადაივლო. სასტუმროთა ფასი ასატანზე უფრო მაღალია, ნომერი, რომელშიც მე ვცხოვრობ, 170 დოლარი ღირს. ნახევარ ლიტრ უბრალო

სასმელ წყალში, ნომრის მაცივრიდან რომ გამოვიღე, ოთხი დოლარი გადამახდევინეს. როცა მეტრდოტელს ვუთხარი, ასეთი წყალი ჩვენთან მდინარეებად მოედინება და სრულიად გამოუყენებლად ზღვაში ჩადის-მეთქი, კინალამ გაგიჟდა. მთელ მსოფლიოს სასმელი წყალი უჭირს და, თუ თქვენ ასეთი სიმდიდრის პატრონები ხართ, როგორ მოახერხეთ, რომ ღარიბად ცხოვრობთო.

ლოდიდან იაფოში მივემგზავრებით.

წმინდა გიორგის სახელობის ტაძარში, წმინდა გიორგის სიმბოლურ საფლავთან ვდგავართ.

არავინ იცის, ვინ ააშენა ეს ქრისტიანული ტაძარი და როდის.

იქნებ სამშობლოდან ოტებულ ჩვენთა წინაპართა ნახელავია ესეც?



ისრაელი. რევან მიშველაძე წმ. გიორგის საფლავთან



სად არის მუხლჩაახრილი, ჩაკირკიტებული, ფულითა და უფლებით აღჭურვილი მეცნიერი, თორემ ისრაელში ქართველთა ისტორიული კვალი არაერთგან იგრძნობა. ამას ვამბობ როგორც დილეტანტი, თვალის ერთი გადავლებით.

ჩვენი მასპინძლები – საგარეო საქმეთა სამინისტროს თანამშრომლები, გვაჩქარებენ. იოლი როდია ნაბიჯს აუჩქარო, როცა ოთხი ათასი წლის წინანდელ ქვაფენილზე გიდვას ფეხი და ყოველი ნანგრევიდან გარდასულ ათასწლეულთა სუნთქვას გრძნობ.

და მაინც, შუადღის ხვატიდან ლიმუზინის კონდიციონერით გაგრილებულ სალონში თავის შეყოფა დიდი შვებაა.

რევაზ გაჩეჩილაძე საქართველოს საელჩოში გამოსათხოვარ ვახშამს გვიმართავს.

მიღებაზე ისრაელში აკრედიტებულ ელჩთა უმრავლესობა მოუწვევია.

დიპლომატებს ჩვენი ბედკრული ქვეყნის ბედზე ვესაუბრებით. ისინიც, რასაკვირველია, დიპლომატიური ორაზროვნობით გვიღიმიან და თავს გვიქნევენ, მაშინაც კი, როცა ჩვენი (პირადად ჩემზე ვამბობ) დამტვრეული ინგლისურით სათქმელს მთლად კარგად ვერ ვაგებინებთ.

კვლავ ბენ-გურიონის აეროპორტი.

თვითმფრინავმა მაღლა რომ აინია, ღაზის სექტორში აქაიქ ავად დაკლაკნილ კვამლს ვკიდებ თვალი.

რა თქმა უნდა, მშფოთვარედ ცხოვრობს ისრაელის სახელმწიფო და საერთოდ, ნანატრი, სასურველი მშვიდობა ჯერ მსოფლიოში არ დასადგურებულა.

27 ივნისი

5 საათზე ჩავედით ერევანში. გზამ ძალიან დამღალა.

არც თუ ცუდი მძღოლი ვარ. თანაც მანქანის მართვა მიყვარს და გადავწყვიტე ჩემი “მერსედესით” წასვლა. სომხეთში 30 წელია არ ვყოფილვარ და გზაში სომხეთის სანახებს, მათ შორის სევანს თვალს შევაგლებ მეთქი.

ჯერ იყო და რუსთავის მიმართულებით ბაქო-ერევანის ძველ გზას დავდგომივარ. წითელ ხიდამდე რომ მივედი, მეზაჟეებმა ამიხსნეს, რომ სომხეთ-აზერბაიჯანის შორის საომარი მდგომარეობის გამო ერევნის გზა 14 წელია გადაკეტილია. უკან უნდა დაბრუნდე და მარნეულის გავლით სადახლოს საბაჟოდან უნდა გახვიდეო. დაახლოებით 150 კილომეტრი მოუკირწყლავი, ოღრო-ჩოღრო გზებით ვიარეთ. ეს იყო ტანჯვის გზა.

როგორც იქნა, მივალწიე საბაჟოს საზღვარს.

გავედი სომხეთის გზაზე. ყველგან წარწერა სომხურ ენაზეა. სომხური წერა-კითხვა როგორ არ ვიცით, მაგრამ მაინც ავცდენილვართ გზას და წავსულვართ ახლადგაჭრილი მთიანი გზით, ნაცვლად კარაკოკანის გზისა. გვიკვირდა, რომ გზაში არცერთი მანქანა არ შეგვხვდა. თურმე საშიში ზონით მივდივართ აზერბაიჯანის საზღვართან ახლოს და ყოველ წუთს შესაძლებელი იყო ტყვიის მსხვერპლი გავმხდარიყავით. თურმე იმ გზაზე აზერბაიჯანელი სნაიპერები ხშირად ესვრიან და ხოცავენ მანქანით გზაზე მიმავალ მშვიდობიან სომხებს.

მწერალთა კავშირი ბაგრამიანის N№3-შია. ერევანში რომ შემოვედი ავტონისპექტორმა გამაჩერა; ღერძულა ხაზი გადაკვეთეო. მთელი საათი ვუხსნიდი: მსოფლიო მწერალი ვარ,

სომხეთის მეგობარი, მწერალთა კავშირის მდივანი, რუსთაველის პრემიის ლაურეატი, ხვალ მწერალთა ფორუმზე სიტყვით უნდა გამოვიდე მეთქი, მაგრამ შეაყარე კედელს ცერცვი. კინალამ დამაჯარიმა. ავტონისპექცია ყველგან ავტონისპექციაა.

მწერალთა კავშირში მელოდებოდნენ თავმჯდომარე, ლევონ ანანიანი, მისი მოადგილე დავით მურადიანი და აგრეთვე მოადგილე, ცნობილი მთარგმნელი ფელოქ ბაღჩინიანი, ლევონს და ფელოქს ადრევე ვიცნობდი, დავითს არა.

გაეხარდათ ჩემი ნახვა, რომ მეგონა, იმაზე უკეთ მიცნობდნენ თურმე სომხეთში. შენს ნოველებსო ხშირად ვაქვეყნებთ ჟურნალ „გარუნში“ და „ლიტერატურნაია არმენიაში“. ტელეფონით მალაპარაკეს ჩემი წიგნის მთარგმნელთან ჯპრაჩია ბაირამიანთან. ხვალიდან თქვენს გვერდით ვიქნებიო აღმიქვა.

დიდხანს ვისაუბრეთ თავმჯდომარის კაბინეტში.

გავარკვიე; რომ ბიუჯეტი სომხეთის მწერალთა კავშირს ათი წელია არ აფინანსებს. არც სტიპენდიებს აძლევენ მწერლებს. აბა რით არსებობთ მეთქი ვკითხე. პერიოდულად მინისტრთა კაბინეტს პროექტს წარვუდგენთ (იუბილე, კონფერენცია, წიგნების გამოცემა) და მინისტრთა კაბინეტი მოწყალეობასავით რაღაც კაპიკებს გადმოგვიგდებსო. ეს ფული მხოლოდ 5%-ია რაც გვჭირდება, დანარჩენსო ლევონ ანანიანმა ჩემი მიდგომ-მოდგომით ვახერხებო. მაგალითად ჩამოვუვლი სპონსორებს, სომხეთში მწერალი ჯერ კიდევ უყვართ, ცოტას გვინილადებენო. ერთი სიტყვით იმ ანეკდოტისა არ იყოს „ტუმბორკიდან“ ვიღებ ფულსო. ამასწინათ ტელემარათონი ჩავატარე მთელ სომხეთს მივმართე და ცოტა ფული შემოგვივიდაო (სულ 250 ათასი დოლარი).

ახლა თქვენ რომ ჩამობრძანდით, ორ დიდ ღონისძიებაზე ბრძანდებით მოწვეული – ერთი ეს არის მსოფლიო სომეხ მწერალთა ფორუმი და მეორე სომხეთის მწერალთა კავშირის

70 წლისთავის იუბილეო. ამ ღონისძიებათა დასაფინანსებლად მინისტრთა კაბინეტმა გამოგვიყო „კაპიკები“ იმედი გვაქვს, მსოფლიოს სხვადასხვა კუთხიდან მოწვეული მწერლები აქაურ მწერალთა კავშირს ორიოდ გროშს შესწირავენო. ჭკვიანური მოფიქრებაა, ვერაფერს იტყვი.

მინისტრთა კაბინეტის ნაბოძები „კაპიკები“ ჩანს, არც ისე ცოტაა. ასამდე მწერლის ჩამოყვანას და პატივისცემას ცოტა ფული როდი ჭირდება.

ლევონმა, დავითმა, ფელიქსმა და კულტურის მინისტრის მოადგილემ კარინამ საქართველოს დელეგაციის მიმართ განუზომელი ყურადღება გამოამჟღავნეს. მიატოვეს ყველა სტუმარი და მთელი საღამო მე დამითმეს. ქალაქის საუკეთესო რესტორანში შეხვედრა-სადილი გამიმართეს. საუკეთესო სასტუმროში დამაბინავეს. მთელი საღამო ოთხივენი ჩემი ნოველების სიუჟეტებს ყვებოდნენ და სიცილით იხოცებოდნენ. დღეს მსოფლიოში თქვენზე დიდი ნოველისტი არ გვეგულებო.

ოთხივეს იუმორის მაღალი გრძნობა ჰქონდა. საერთოდ სომხები უნიჭიერესი ხალხია.

გვიანობამდე ვიჯექით რესტორანში. საგანგებოდ, ჩემს პატივსაცემად ქართული სიმღერები შეასრულა ორკესტრმა. ფული რასაკვირველია თავმჯდომარემ გადაიხადა რესტორანში. ესეც „ტუმბორკიდან“ მეთქი? არაო, ეს ფული ჩამოსულთა პატივსაცემად, მინისტრმა კაბინეტმა მოგვცაო. ნეტავ, ჩვენც გვყავდეს ასეთი გულიხვი მინისტრთა კაბინეტი.

## 28 ივნისი

ფორუმის დელეგატები მთელ მსოფლიოში მცხოვრებ სომეხ მწერლებს წარმოადგენენ. მითხრეს, რომ მათ შორის არაერთი მილიონერი მწერალია ამერიკიდან, არგენტინიდან,

ლიბიიდან, ისრაელიდან, არაბული ქვეყნებიდან, საფრანგეთიდან, ესპანეთიდან ...

დილიდანვე ყველანი ავტობუსში ჩაგვსხეს და სომხეთის წმინდა ადგილების მოსანახულებლად წაგვიყვანეს.

პატივი ვეცით მესროპ მაშტოცის საფლავს.

ჩავედით ეჩმიაძინში სრულიად სომეხთა კათალიკოსმა ორსაათიანი მიღება გაგვიმართა.

პატრიარქთან და მწერლებთან ჩემი გასაუბრების დროს უმთავრესი პრობლემა იყო – მსოფლიოში სომეხთა ორად გაყოფა. ლამის ორი კულტურის, ორი ენის, თითქმის ორი რელიგიური განშტოების (კათოლიკობა, გრეგორიანელობა), ორი პატრიარქის არსებობა.

სალამოს 6 საათზე მწერალთა სასახლის კლუბში გაიხსნა სომეხ მწერალთა II მსოფლიო ფორუმი.

ესწრებოდნენ მთავრობის წევრები, მსოფლიოს სხვადასხვა კუთხიდან ჩამოსული ჟურნალისტები ...

გახსნა მწერალთა კავშირის თავმჯდომარემ ლევონ ანანიანმა. სხვათაშორის აღნიშნა რომ არცერთი სხვა ქვეყნიდან ჩამოსული არასომეხი არ მოგვინვევია ფორუმზე. ერთადერთი გამონაკლისი საქართველოა და გვეამაყება რომ ფორუმზე გვესწრება მსოფლიოში ცნობილი მწერალი, რუსთაველის პრემიის ლაურეატი, საქართველოს მწერალთა კავშირის პირველი მდივანი რევაზ მიშველაძე.

რამდენიმე ოფიციალური მისალმების შემდეგ სიტყვა მე მომცეს.

ვთქვი იუმორით შეზავებული, თბილი სიტყვა.

ტაში დააქუხეს როცა ამ სიტყვებით დავამთავრე „ჰაოსისა და ქართლოსის ძმობამ გადაგვარჩინა, აქამდე მიგვიყვანა და რთულ XXI საუკუნეშიც ამ ძმობამ უნდა გაგვადლებინოს მეთქი“.

მერე ინტერვიუები ტელევიზიასთან, გაზეთებთან, მოლოცვები სომეხი კოლეგების: ყველაზე კარგად გამოხვედით, გააცოცხლეთ ფორუმი...

## 29 ივნისი

დილიდან ერევნის ღირშესანიშნოებებს ვათვალიერებთ აღარ არის ერევანი ის კოპნია, მოვლილი ქალაქი, მე რომ სიყმანვილეში მინახავს.

ყველგან სილარიბე იგრძნობა.

ქალაქი მტვრიან – ნაგვიანია.

რატომ მეთქი რო ვკითხე ლევონს, მოგეხსენება აზერბაიჯანი თავდასხმას აპირებს, ჩვენც ომისთვის ვემზადებით, უბრძოლველად არცერთ მტკაველს არ დავთმობთ. ყარაბახი სომხური მიწაა და რაკილა ძლივს დავიბრუნეთ, მთელი ძალისხმევა მის შესანარჩუნებლად უნდა მივმართოთ.

ამიტომაც რომ ბიუჯეტის დიდი ნაწილი შეიარაღებისკენაა მიმართული. რუსეთთან ჩვენი ჩახუტება იძულებითაა, თათრული აგრესიისგან რუსმა უნდა გვიხსნასო.

საერთოდ, ჩანს, სომხეთში რუსები მომრავლებულან და მომაგრებულან.

აჰ, ეს შიდაკავკასიური შუღლი, ეს გვლუპავს სწორედ.

ახალქალაქში რომ ზოგი სომეხი ყალყელობს და ავტონომიას ითხოვს, ამაზე რა აზრის ხართ მეთქი.

ახალქალაქში სხვა რამეაო. იგი, რა თქმა უნდა თქვენი ისტორიული ტერიტორიაა, მაგრამ შევარდნაძის უნაპირო ინტერნაციონალიზმმა კინალამ დაგაკარგვინათო. ჩვენ სომხურ ინტელიგენციას ახალქალაქთან პრეტენზია არ გვაქვსო.

სხვათაშორის, ვინროსომხურმა აგრესიამ ფორუმზეც იჩინა თავი. ფორუმზე გამოვიდა ახალქალაქელი პოეტი, რომელმაც თქვა: საქართველოში სომხური სკოლების დახურვას აპირებენო.

მე, რაკილა სომხური არ ვიცი, ეს არავინ მითარგმნა.

დავინახე, როგორ შეეკამათა ვან ბაიბურთი ჟორას.

მეორე დღეს ამიხსნეს საქმის ვითარება. თურმე ვან ბაიბურთს უთქვამს: სწორსაც შვებთან თუ არაქართულ სკოლებს



აუქმებენ საქართველოში. დიახაც, საქართველოს მოქალაქემ ყველამ ქართულად უნდა ისწავლოს. სომხური სკოლების „პროდუქტი“ ქართულის არმცოდნე სომეხი ყოველთვის განწირულია იმისთვის, რათა მეორეხარისხოვან მოქალაქედ ჩაითვალოსო.

სალამოს 7 საათზე სომხეთის მწერალთა კავშირის 70 წლისთავის საიუბილეო საღამო გაიმართა.

პრეზიდენტში 35 მწერალი ვზივართ.

აქვე არიან ხელისუფლების უმაღლესი ეშელონების წარმომადგენლები.

მოსხენება ლევონ ანანიანმა გააკეთა.

მთხოვეს, სიტყვა ქართულად თქვიო. მეც ასე ვაპირებდი. თარგმნიდა ჰრაჩია ბაირამიანი.

კარგი სიტყვა გამოვიდა, როგორც მითხრეს და როგორც ტაშიდან ჩანდა.

35-დან მხოლოდ 14-ს მოგვცეს სიტყვა.

იუბილე რომ დამთავრდა, უკმაყოფილო სომეხი მწერლები მიაწყდნენ ლევონს; როგორ გაგვიბედე და სიტყვა არ მოგვეციო.

ხდება ასეთი რამ, ჩანს ხელისუფლებამ უკარნახა, გამომსვლელები შეამცირეო. როგორც ჩვენთან ხდება, ორატორი 3 წუთის ნაცვლად იქაც 20 წუთს ლაპარაკობს.

გვიან ღამით ლევონმა მე და 2-3 მწერალმა ერთად ვივახშმეთ. მოკლედ დიდი პატივი მცეს.

## 5.VI – 19.VI

5 ივნისს მაყვალა გონაშვილი, მანანა დუმბაძე (ნოდარ დუმბაძის ქალიშვილი), საქართველოს მწერალთა კავშირის წევრი, სომეხი მთარგმნელი ანაიდა ბოსტანჯიანი და მე საბერძნეთში გავემგზავრეთ.

კუნძულ როდოსზე 6 ივნისს იწყება ევროპის მწერალთა ასამბლეა, რომელზეც დაგეგმილია ჩემი მოხსენება.

ასამბლეა 10 წლის წინ შეიქმნა და, როგორც მითხრეს, ორ წელიწადში ერთხელ იკრიბება. ამ ასამბლეაზე ქართული მწერლობისთვის ყურადღების დათმობა და დღის წესრიგში საგანგებო მოხსენების შეტანა, ჩვენი ლიტერატურისთვის დიდი პატივია.

ლურჯად გადასარკულ ცაზე ღრუბლის ერთი ფილაც არ ჩანს. სამსაათიანი ფრენის შემდეგ ათენში ჩავფრინდით.

ათენის აეროპორტში ორსაათიანი ლოდინის შემდეგ როდოსისკენ ავიღეთ გეზი.

თვითმფრინავი ლილისფერ, კამკამა ხმელთაშუა ზღვაზე მიფრინავს.

ზღვაში უამრავი კუნძულია და ზემოდან რომ დავცქერო, ყველა მათგანზე ჩანს უძველესი ბერძნული კულტურის კვალი – ტაძართა თეთრი სვეტები და დანგრეული ამფითეატრები.

როდოსს რომ მივუახლოვდით, სტიუარდესას ვთხოვე როდოსის კოლოსი დამანახეთ, როგორია ამ სიმაღლიდან მაინტერესებს-მეთქი.

მომხიბვლელ სტიუარდესას მსოფლიოს შვიდი საოცრებიდან ერთ-ერთი არც გაუგონია.

როგორ არ იცით, როდოსზე ზღვის პირას წყალში იდგა იუპიტერის უზარმაზარი ქანდაკება, რომელსაც ბერძენი ისტორიკოსები როდოსის კოლოსს უწოდებენ. ახლა მისგან მხოლოდ უმნიშვნელო ნანგრევებია დარჩენილი-მეთქი.

არაო, იქებნ ცდებით და კუნძულის სახელი გეშლებათ, აქ უამრავი კუნძულიაო. როდოსის კოლოსი მესამე წელია ამ რეისზე დავფრინავ და პირველად მესმისო.

რალას ვეტყოდი.

სასტუმრო „ელადაში“ დავბინავდით.

„ელადა“ როდოსის კლდოვან ნაპირზე დგას და ჩემი ნომრის აივნის სულ რაღაც ორიოდ კილომეტრში მწვანე ტყით ახუჭუჭებული პატარა კუნძული ჩანს.

ნასადილევს ტაქსი დავიქირავებ და როდოსის კოლოსისკენ გავწივით.

ნაპირთან ხალხი შეგროვილა.



საბერძნეთის კუნძული როდოსი

ზღვაში დაახლოებით 40-50 მეტრის დაშორებით ორი დულაბიანი ნანგრევი ჩანს. ორივე მათგანი მკვიდრად ნაშენია და ზღვიდან ათიოდე მეტრზეა ამონვერილი. გრანიტის ამ ნანგრევებზე იდგა უზარმაზარი როდოსის კოლოსი, რომლისგანაც მხოლოდ ეს უმხო ნატამალილა დარჩენილა.

კოლოსის ნაშთთან სურათები გადავიღებ და ღმერთს მადლობა შევწირე, რომ კოლოსის ამ ნამტვრევს მაინც მოვუსწარი.

დროთა განმავლობაში ზღვა და უღმობელი დრო-ჟამი ამ ფუნდამენტსაც წაშლის მიწის პირიდან.

6 ივნისს ევროპის მწერალთა ასამბლეის პირველი სხდომა გაიხსნა.

გერმანელმა მწერალმა ჰაინს ლანგემ ილაპარაკა თანამედროვე ევროპული ლიტერატურის პრობლემებზე და ხაზი გაუსვა მწერალთა ერთად ყოფნის აუცილებლობას.

მოსხენებისთვის პირველი სიტყვა მე მომცეს.

ჯერ ინგლისურად დავიწყე, მაგრამ რაკილა ჩემი ინგლისურის დიდი იმედი არ მქონდა, დარბაზს მივმართე: ახლა მე ქართულზე, ჩემს მშობლიურ ენაზე გადავალ და ქალბატონ მანანას ვთხოვ თარგმნოს-მეთქი.

ინგლისურად გააგრძელეთო, სხდომის თავმჯდომარემ, ყველაფერი გვესმისო.

რალას ვიზამდი, მანანა გავათავისუფლე მძიმე ტვირთისაგან.

აი, ძირითადად ის, რაც ევროპის მწერალთა ასამბლეაზე ვთქვი:

„ბატონებო,

არც ისე დიდი ხანია მას შემდეგ, რაც მსოფლიოს პოლიტიკურ რუკაზე საქართველო, როგორც დამოუკიდებელი სახელმწიფო, არ არსებობდა და ასეთ პრესტიჟულ მსოფლიო ფორუმებზე ქართველ მწერალს ან საერთოდ არ იწვევდნენ, ან თუ იწვევდნენ, მხოლოდ როგორც რუსეთის წარმომადგენელს.

მადლობა ღმერთს, იმპერიის კლანჭებს, როგორც იქნა, დავუსხლტით და ახლა ევროკავშირის და ნატოს თვალში ევროინტეგრაციისკენ მიმსწრაფი სახელმწიფო ვართ.

რას ვიზამთ. ჯერჯერობით მსოფლიო ისეა მოწყობილი, რომ პოლიტიკური ორიენტაცია თუ ზუსტად არა გაქვს გაცხადებული, შეიძლება უიალქნო ნავივით მიგასილოს ისტორიამ რომელიმე აისბერგთან.

საქართველოს კი ისევ რუსულ ჯოჯოხეთთან მიბრუნებას ევროკავშირისკენ და ნატოსკენ თუნდაც ისე ნელა, ტაატიტ სვლა ურჩევნია, როგორც ჩვენ მივდივართ.

საქართველო კავკასიის მთების ძირში მდებარე პატარა ქვეყანაა, სამნახევარი მილიონი მოსახლეობით.

საქართველოს ხელისუფლების იურისდიქცია დღეს მხოლოდ 47 ათას კვადრატულ კილომეტრზე ვრცელდება.

ათასი წლის წინათ საქართველოს ეჭირა 300 ათასი კვადრატული კილომეტრი. შაგრენის ტყავივით საუკუნეთა განმავლობაში დაპატარავდა ჩვენი მიწა-წყალი, მეოცე საუკუნეში შემოვალწიეთ 111 ათასი კვადრატული კილომეტრით. XX საუკუნის ოციან წლებში 69 ათას კვადრატულ კილომეტრზე დავედით, ხოლო ჯერჯერობით ბოლო ომში რუსეთთან 1993 წელს 22 ათასი კვადრატული კილომეტრი დავკარგეთ და, როგორც გითხარით, დაგვრჩა 47 ათასი კვ. კმ.

ჩვენი ისტორიული მტერი – რუსეთი დღესაც დამოკლეს მახვილივით ჰკიდია ჩვენს თავზე და შეიძლება ეს ტერიტორიაც არ შეგვარჩინოს.

ეს ციფრები თქვენთვის გულის ასაჩუყებლად არ მომიტანია.

კარგად ვიცი, რომ დღევანდელ მეკობრულ-ბაზრულ მსოფლიოში გულს ვერავის აუჩუყებ, ყველას თავისი სატკივარი ჰყოფნის.

მაგრამ რაკი ეს მაღალი ტრიბუნა დამითმეთ, მოვალე ვარ შეგახსენოთ, რომ საქართველოს ავტოქტონური ერთი გახლავთ უძველესი კულტურის მქონე ქართველი ერი.

როგორც კი რიცხოვნობად პატარა ერი სიტყვა „უძველესს“ ახსენებს, მე ვიცი ზოგიერთ თქვენგანს მთქნარება აუტყდება ხოლმე, მოჰყვება ახლა ეს თავის ძველთაძველ წარსულზე და „განუმეორებელ კულტურაზე“ ლაპარაკსო.

არ შეგეშინდეთ, მე კარგად ვიცი წარსულ დიდებაზე და ისტორიულ მინებზე ლაპარაკი დღეს მოდაში აღარ არის და ჩემი ხალხის გუშინდელ დღეზე თქვენი მაღალი ყურადღების მიპყრობას არ ვაპირებ.

ერთს ვიტყვი მხოლოდ, რომ მაშინ, როცა ევროპაში მგლისთავიანი ქუდებით მეკობრეობდნენ და უცხოტომის წარმომადგენლებს, ანუ „ბარბაროსებს“ განუკითხავად ყველას თავებს აჭრიდნენ, საქართველოში მთელს მსოფლიოში პირველი მეფე ქალი – თამარი გვყავდა თავისი, ასევე დედამინაზე პირველი, პარლამენტით სამასი წლით რომ წინ უსწრებდა ინგლისის პარლამენტს.

როცა ევროპაში რომანი, როგორც ჟანრი, ოცნებაშიც არ მოიაზრებოდა, საქართველოში ჯერ კიდევ მეხუთე საუკუნიდან იწერებოდა რომანები.

ხოლო რვაასი წლის წინათ შოთა რუსთაველმა შექმნა მსოფლიო ლიტერატურის უბრწყინვალესი ნიმუში. ფირდოუსის, ჰომეროსის და დანტე ალიგიერის ნაწარმოებთა ბადალი „ვეფხისტყაოსანი“.

თქვენს სახეზე გაოცებას ვხედავ და ეს სრულიად ბუნებრივია. ალბათ, ამ დარბაზში ღრმად პატივცემულ მწერალთაგან არც ერთ თქვენგანს არ ნაუკითხავს „ვეფხისტყაოსანი“.

შოთა რუსთაველი იმიტომ როდი ვახსენე, თითქოს სურვილი მაქვს, რალაც შეღავათები მოვითხოვო თქვენგან რუსთაველის კვალზე მოსულ ქართველ მწერალთათვის.

კი ბატონო, თანამედროვეობაზე ვილაპარაკოთ.

„სიები“ და ჩამოთვლა, ისე როგორც თქვენ, მეც ჭირივით მძულს და XX საუკუნის მწერალთაგან მხოლოდ ერთს



– გალაკტიონ ტაბიძეს დაგისახელებთ, თანამედროვეობის ერთ-ერთ დიდებულ ლირიკოსს.

ჩვენი ურთიერთობების საჭიროება, რაზეც ჩემს წინ გამომსვლელი ბრძანებდა, თუნდაც იმისთვისაა აუცილებელი, რომ არაპროფესიონალიზმმა არ დაგვრიოს ხელი და ლიტერატურული სუროგატი არ შემოგვეპაროს.

არა და ამის საშიშროება არსებობს.

დღეს მთარგმნელობითი საქმე მხოლოდ პირად კონტაქტებზეა მიგდებული და „ყოჩაღი ბიჭები“ ახერხებენ თავიანთი უნიჭო ნაწერებით მთარგმნელთა დაინტერესებას.

საბოლოოდ ვღებულობთ ამა თუ იმ ქვეყნის ნამდვილი ლიტერატურული სახით ნაცვლად მახინჯი სარკის ანარეკლს და კაცი ვერ გაარკვევს, რა ნიშნით უნდა ირიცხებოდეს ესა თუ ის კულტურა ევროპული ლიტერატურის ელიტურ ოჯახში.

ბატონებო, თუ რამე ღირებული იქმნება თანამედროვე ევროპულ ლიტერატურაში, ჩვენ, ქართველები, მას მაშინვე ვთარგმნით. მე თან ჩამოვიტანე თანამედროვე ევროპულ მწერალთა ქართულად ნათარგმნი წიგნების მთელი ჩემოდანი და იმ წიგნებს, სუვენირების სახით, შესვენებისას ფოიეში დაგირიგებთ.

უხერხულ დღეში არ მინდა ჩაგაგდოთ და არც ერთი თქვენგანი ასეთი ძვირფასი საჩუქრით აქ არ ჩამოსულა.

ინგლისში, გერმანიაში, საფრანგეთში, იტალიაში, ესპანეთში, ჩვენს მასპინძელ საბერძნეთშიც თითქმის არავინ ინტერესდება ქართული ლიტერატურით.

მაპატიეთ, მაგრამ ეს გარემოება მე ვერაფრით ამიხსნია.

რამ გამოიწვია ეს „ზემოდან ყურება“? რაო, ვერა და ვერ გავხდით თქვენი მაღალი, ევროამერიკული ყურადღების ღირსი?

კაცმა რომ თქვას, მე ამ მხრივ ნაკლებად მაქვს სანუნუნო: ჩემი წიგნები საზღვარგარეთის 14 ქვეყანაშია თარგმნილი და

გამოცემული, მაგრამ მე აქ ჩემი ქართველი კოლეგების სახელით გამოვდივარ და მათს პრობლემაზე მოგახსენებთ.

შორი-შორს ვართ ერთმანეთისგან, ბატონებო.

თქვენ არც კი გაგიგიათ, რომ 2007 წლის 21 აგვისტოს საქართველოს დესპოტმა, მწერალთა მოძულე პრეზიდენტმა მიხეილ სააკაშვილმა მწერალთა კუთვნილი სასახლიდან პოლიციის ძალით გამოგვრეკა და ათწლობით ნაგროვები ძვირფასი ისტორიულ-ლიტერატურული რელიქვიები ქუჩაში გამოგვიყარა.

მე ნუნუნო არ მჩვევია. ჩემი ცხოვრების სტილი გაუთავებელი ბრძოლაა. საქართველოში „ქრონიკულ ოპოზიციონერს“ მეძახიან, მაგრამ ოდესმე ხომ უნდა მოელოს ბოლო სიმართლის მიქმელ მწერალთა დევნას ხელისუფლების მხრიდან?

თვალს დავხუჭავ და ვხედავ, როგორ აძევებენ საფრანგეთიდან ჰიუგოს, როგორ ესვრიან ტყვიას პუშკინს, როგორ აწამებენ შანდორ პეტეფ და ფარაჯიან ესპანელ პოეტს – ფედერიკო გარსია ლორკას.

ეს რომ აღარ განმეორდეს, გავუნოდოთ ხელი ერთმანეთს, დავდგეთ ერთმანეთის გვერდით, ბატონებო, სიმართლისათვის ბრძოლის ბარიკადებზე“.

იმ დღესვე ასამბლეამ მიიღო მიმართვა სააკაშვილისადმი – დაუბრუნოს ქართველ მწერლებს კუთვნილი სასახლე. თუმცა არც ამ მიმართვას მოჰყოლია რაიმე შედეგი გათამამებული პრეზიდენტის მხრიდან.

15 ივნისს ათენში, „ქართველთა კულტურის ცენტში“ მაყვალას და მე დიდი შეხვედრა მოგვიწყვეს.

ქართველ ემიგრანტთა გარდა შეხვედრას ბერძნული ინტელიგენციის წარმომადგენლებიც ესწრებოდნენ.

## სომხეთი – 2010

### 6 ივნისი

ექვს ივნისს თბილისში აუტანლად ცხელოდა.

სომხეთის მწერალთა კავშირის თავმჯდომარე ლევონ ანანიანი საიათნოვას ზეიმზე და თბილისიდან ჩვენს წასაყვანად სპეციალურად ჩამოვიდა.

ლევონი ბრწყინვალე კაცია, ღირსეული მოქალაქე, ყურადღებიანი, საქართველო ძალიან უყვარს. ჩემი და მაცვალას უახლოესი მეგობარია. შარშან ლექსი მომიძღვნა, რომელიც შესანიშნავად თარგმნა მაცვალამ და სომხური პოეზიის ანთოლოგიაში მოათავსა.

### 7 ივნისი

თორმეტ საათზე ბაგნოატაშენში ჩავედით. გუბერნატორმა თავაზიანად მიგვიღო. ნოემბერიანი საქართველოს მოსაზღვრე გუბერნიააო და თბილისთან ყოველდღიური კავშირი გვაქვსო. ამიტომაც ჩვენს ძმობას გულით ვუფრთხილდებითო.

საპასუხო სიტყვები მაცვალამ და მე წარმოვსთქვით.

დავავალიერეთ გოშეკანის სამონასტრო კომპლექსი.

იგი მეხუთე საუკუნისაა. იმ პერიოდში დაიწყო მშენებლობა, როცა სომხეთმა სახელმწიფოებრიობა დაკარგა. სომხები ხაზს მაინდამაინც არ უსვამენ, მაგრამ შიგადაშიგ მორცხვად აღნიშნავენ, რომ ათასი წლის განმავლობაში მეხუთედან მეთხუთმეტე საუკუნემდე, სომხეთი საქართველომ შეიფარა და მის შემადგენლობაში იყო. როგორც რიგითი ნაწილი საქართველოსი; ვთქვათ, ქართლი და კახეთი.

გოშეკანის რემონტი დაუწყიათ, მაგრამ უსახსრობის გამო ვერ ამთავრებენ.

გოშეკანის ეპისკოპოსის მონაწილეობით გამართული მშვენიერი ტრაპეზის შემდეგ წახკაძორისკენ გამოვემართეთ.

გზად ლევონმა ნოემბერიანში თავის ულამაზეს მშობლიურ სოფელში შეგვახვევინა. იქაც სოფლის გამგებელმა და კამპანიამ დიდი პატივი გვცეს.

ღამე წახკაძორის მწერალთა სახლში გავათიეთ.

### 8 ივნისი

დილით გავემგზავრეთ ერევნისკენ.

მწერალთა კავშირში შეხვედრა გვექონდა მწერლებთან.



რევაზ მიშველაძე, ლევონ ანანიანი – სომხეთის მწერალთა კავშირის თავმჯდომარე

აქაც იგივე პრობლემებია: უსახსრობა (მწერალი სოციალურად ყველაზე დაუცველი პიროვნებაა), წიგნის გამოცემის გაძნელება (ესენიც, როგორც ჩვენ სპონსორების ამას ძებნაში არიან), ეგ არის მწერალთა კავშირის შენობას არ ართმევენ. როგორც ჩვენ წავგართვა სააკაშვილმა. თორემ სხვა მხრივ ძალიან ჰგავს სომეხი მწერლის ბედი ქართველი მწერლის ბედს.

პირველ საათზე კულტურის მინისტრმა მიგვიღო და მერე კულტურის სამინისტროში პრესკონფერენცია გაიმართა.

პრესკონფერენციაზე, მე, პირადად ჟურნალისტებმა ორი შეკითხვა დამისვეს. როგორ მოგწონთ თქვენი სომხური გამოცემები, რა პრობლემებია საქართველოს მწერალთა კავშირის წინაშე და როგორ გრძნობენ თავს თბილისში სომეხი მწერლები.

გუპასუხე როგორც სიმართლეა და როგორც მეკადრებოდა.

მერე დავათვალიერეთ მატენადარანი. როცა მესროპ მაშტოცის სურათთან გიღმა „შეგვახსენა“, რომ მაშტოცმა შეუქმნა ანბანი ქართველებს და სომხებსო, ვერ მოვითმინე და ჩავერიე. ქალბატონო, სომხურ ანბანს თუ აქვს კავშირი ფინიკიურთან ან ბერძნულთან მეთქი. კიო, ფინიკიურიდან ბერძნებმა გადმოიღეს ანბანი, ხოლო ბერძნულიდან ჩვენ სომხებმაო. ესე იგი მაშტოცს ახალი ანბანი კი არ შეუქმნია ანუ ახალი დამწერლობა კი არ შეუქმნია, არამედ ფინიკიურ-ბერძნულიდან გადმოუღია მეთქი. ასე რომ ქართველებს რანაირად შეუქმნიდა მესროპ მაშტოცი ანბანს, როცა თვით სომხებისთვისაც არ შეუქმნია მეთქი.

გაშრა. ხმა ვერ ამოიღო. მერე წაილულლულა „ჩვენ ასე ვიცითო“.

სადილამდე დავათვალიერეთ ოვანეს თუმანიანის სახლ-მუზეუმი. ერევანში ზუსტად იმ ბინის ასლი გაუკეთებიათ,

რაც ჰქონდა ოვანესს თბილისში (ექვსი ოთახი). მუზეუმი მართლაც რომ შთამბეჭდავია.

სადილის მერე მარტიროს სარიანის სახლი-გამოფენა მოვინახულეთ.

დიდი მხატვარია. განსაკუთრებით შთამბეჭდავია მისი სიმბოლისტურ-მოდერნისტული პერიოდი. მერე როცა კომუნისტურად დააუთოვეს, მარტიროსი ისეთი თვითმყობადი აღარ არის.

სალამოს ტელეარხმა „შანმა“ მიმიწვია. მივედი თუ არა დიქტორმა, რომელ ენაზე ვისაუბროთო! სომხური მე არ ვიცი, ქართული თქვენ არ გეცოდინებათ, ამიტომ იძულებული ვიქნებით რუსულად ვისაუბროთ, მე რუსული კარგად ვიცი და ნუ გაშინიათ, პრობლემას არ შეგიქმნით მეთქი. საერთოდ კი საჯარო გამოსვლებში ოფიციალური პირიც და უბრალო მწერალიც თავის მშობლიურ ენაზე უნდა საუბრობდეს მეთქი.

მოძებნეს ქართულის მცოდნე სომეხი ქალი – ანა და დამისვეს თარჯიმნად.

მეგონა, ეშმაკ სომეხ დიქტორს სომხეთში ქართული ლიტერატურის დღეების შესახებ აინტერესებდა, მან კი პირველი შეკითხვისთანავე პოლიტიკისკენ „დამქაჩა“.

როდის უნდა გადაწყდეს ჯავახეთის პრობლემაო(?!), რატომ ვართ სომხეთი და საქართველო ურთიერთსაწინააღმდეგო ორიენტაციის საგარეო – პოლიტიკურ კურსშიო, ეს ხომ ხელს უშლის ჩვენს მეგობრობასო, რატომ არ ატარებენ ჯავახეთის საზღვარზე სომხურ წიგნებს სომეხი ბავშვებისთვისო, რატომ აპირებს ოვანეს თუმანიანის სახლის გაყიდვას საქართველოს ხელისუფლება და რატომ არ გვიბრუნებს სომხურ ეკლესია-მონასტრებს თბილისიო.

მე მეთქი ექსპერტი არ გახლავართ, მაგრამ „სომხურ“ ეკლესია მონასტრებზე შემოიძლია გითხრათ, რომ კომპეტენ-



ტურ სახელოვნებო – რელიგიურ კომისიას ჯერ არ დაუდასტურებია ამ ძეგლების სომხურობა, ხოლო ორი ხალხის მიერ ერთად, ერთ სახელმწიფოში აშენებული ძეგლის ასე ხელალებით მიკუთვნება რომელიმე სახელმწიფოსთვის სწორი არ იქნება მეთქი.

არ ვიცი რამდენი ქართული სკოლაა სომხეთში (მე მგონი არცერთი არ არის) საქართველოში კი უამრავი სომხური სკოლაა და სახელმძღვანელოებით მათი მომარაგებაც პრობლემად არასოდეს ქცეულა მეთქი.

თბილისში დიდებულად ფუნქციონირებს სომხური თეატრი და მისი დირექტორი არმენი ამჟამად პარლამენტის წევრია მეთქი.

საქართველოს უპირველესი ტაძრის სამების ტაძრის გვერდით არის სომეხ მწერალთა და მოღვაწეთა ხოჯევანქის პანთეონი და თბილისში ყოველწლიურად ვატარებთ საიათნოვას ხსოვნის დღეს, რომელზეც უკვე მე-20 წელია სისტემატურად სიტყვით გამოვდივარ მეთქი. რაც შეეხება ჩვენს სახელმწიფოებრივ კურსს, თქვენ სომხეთის გადარჩენის გზად რუსული ორიენტაცია გესახებათ, საქართველოს ხელისუფლებას პროამერიკული კურსის ერთგულება მეთქი.

ამ ეტაპზე ასეა. შეიძლება ხვალ-ზეგ ეს პოლიტიკა შეიცვალოს. საერთოდ კი უნდა იცოდეთ, რომ პოლიტიკოსები მოდიან და მიდიან, ერები კი რჩებიან. ასე რომ სომხეთის და საქართველოს მეგობრობას ვერავითარი პოლიტიკა ვერ დაარღვევს. საერთოდ კი რაც მეტი გვეყოლება ლევონ ანანიანისთანა საღად მოაზროვნე კაცი, მით უკეთესია ჩვენი ერების მომავლისთვის მეთქი.

ოვანეს თუმანიანის სახლის გაყიდვის შესახებ პირველად მესმის და თუ კი ასეთი სისულელე მართლაც აქვს ვინმეს ჩაფიქრებული ხელისუფლებაში, ჩასვლისთანავე გავარკვევ და ყველაფერს ვილონებ, რათა ასეთი რამ არ მოხდეს მეთქი.

უნდა გავუსვა ხაზი, რომ სომხეთში უფრო მეტად იგრძნობა სიღარიბე ვიდრე 10 წლის წინათ მინახავს. ახალი მშენებლობები, თბილისისგან განსხვავებით, თითქმის არ არის. მძლოლმა, რომელმაც ტელევიზიის გამოსვლის შემდეგ ნახკადორში წამომიყვანა, მითხრა, საშინელი უმუშევრობააო, კორუფციამ შეჭამა სომხეთიო, 80% მანქანების გაზზე მუშაობს, რადგანაც ბენზინს აზერბაიჯანი აღარ გვაძლევს, ხოლო რუსეთიდან ან ირანიდან შემოტანა ძვირი ჯდებაო.

## 10 ივნისი

გვმასპინძლობს გიუმრი (ყოფილი ლენინაკანი).

გიუმრი ის მრავალტანჯული ქალაქია, რომელიც 1988 წლის სპიტაკის მიწისძვრამ მიწასთან გაასწორა.

ანაიდა ბოსტანჯიანი აპირებს ჩემი ნოველების ახალი წიგნის თარგმნას სომხურად და დავპირდი, 1988 წელს სომხეთის ტრაგედიაზე დაწერილ ნოველას მოვძებნი და მოგცემ მეთქი. მიგვიღო ქალაქის მერმა.

სხვათაშორის ისიც გაიხსენა, სანამ ერევნიდან ხელისუფლება მაშველ ჯგუფებს გამოუგზავნიდა, პირველი საქართველოს მაშველთა ჯგუფი ჩამოვიდაო, მიწისძვრიდან სულ რამდენიმე საათში.

ქალაქის მერმა ჩემთვის სრულიად მოულოდნელად გამოაცხადა, რომ კომპეტენტური ჟიურის გადამწყვეტილებით უკანასკნელ წლებში დაწერილი მხატვრული და პუბლიცისტური ნაწარმოებებისათვის, სომხეთსა და საქართველოს შორის მეგობრობის განმტკიცებისათვის და ამ მიმართულებით ავეტიქ ისააკიანის იდეების გაგრძელებისთვის მომენიჭა ავეტიქ ისააკიანის პრემია, იქვე საზეიმოდ გადმომცეს პრემიის მოწმობა და ბაჯალლო ოქროსგან ჩამოსხმული ორდენი.

ვთქვი, რომ ეს უაღრესად საპატიო ჯილდოა ჩემთვის და შევეცდები გავამართლო.

ამის შემდეგ გიუმრის ხელოვნების აკადემიაში გაიმართა მაყვალა გონაშვილის წიგნის „მზის ცრემლების“ პრეზენტაცია. წიგნი თარგმნა გაგიკ დავთიანმა. მაყვალა გონაშვილის ლექსებს მსმენელნი დიდი მონონებით შეხვდნენ. რასაკვირველია, მეც მივესალმე ამ მშვენიერ პოეტს და სომეხ-ქართველთა ძმობისთვის ფრიად გარჯილ ქალბატონს.

დავავალიერეთ მეცხრე საუკუნის სამონასტრო კომპლექსი მარმაშანი.

მარმაშანი მდინარე ახურიანის პირას დაბლობში, მოფარებულ ადგილასაა აშენებული და რაკი ძნელი შესამჩნევია, მტრებს ზოგჯერ გამორჩებოდათ ხოლმეო, გიდმა. ნაგებობა წითელი ტუფისგანაა აშენებული და ისე კარგადაა შემონახული, ათასი წლის კი არა ახლახან დამთარებული გეგონებათ. მარმაშანს თურმე არასოდეს რესტავრაცია არ დასჭირვებია. იგი ერთ-ერთი ულამაზესი ტაძარია სომხეთში.

სალამოს გიუმრის ფემენებელურ რესტორან „ოაზისში“ ბანკეტი გაგვიმართეს და გვიან ღამით დავბრუნდით ნახკადორში.

## 11 ივნისი

დილით 11 საათზე ნახკადორიდან ერევანში გავემგზავრეთ და მწერალთა კავშირში გაიმართა „ქართული პროზის ანთოლოგიის“ პრეზენტაცია.

ანთოლოგიას ჰქვია „სიყვარულმისჯილნი“ ჩემი ნოველის მიხედვით. ეს ნოველები („სიყვარულმისჯილნი“, „თოვლი... თოვლი... თოვლი...“ „რას მერჩოდი“) ჰრაჩია ბაირამიანს შეურჩევია და შეუტანია ანთოლოგიაში.

ანთოლოგიაზე სომეხმა მწერლებმა ბევრი თბილი სიტყვა თქვეს. მეც გამოვედი. რომელიღაც სომხურმა ტელევიზიამ ჩემგან ინტერვიუ აიღო, ვერ გეტყვით, გადაიცა თუ არა.

დავავალიერეთ ბახში ხაჩატრიანის ფოტოგამოფენა და მერე კოჩარის გამოფენა. კოჩარი დიდი მხატვარია. თავის შემოქმედებაში არაერთ სტილს გაულო ხარკი და ყველა მიმართულება შედევრების შექმნით გაიარა.

ვისადილეთ ერევნის უძველეს რესტორანში, რომელიც ხელოვნურ ტბაზე მდებარეობს და სადაც როგორც გაგიკ დავთიანმა გვითხრა, თურმე ტრადიციულად მწერლები და ხელოვნების მუშაკები იკრიბებოდნენ.

ახლავ, გაგიკმა, აქ შემოსვლა ძვირი ღირს და მხოლოდ ახალი სომხები იკრიბებიანო.

სალამოს ნახკადორში დავბრუნდით.

უცნაური ის გახლავთ, რომ სომხეთის ბანკები ახურდავენ მსოფლიოს ყველა ქვეყნის ფულს (მათ შორის აზერბაიჯანულსაც) ლარის გარდა.

სუვენირების და სომხური სუფუნის ყიდვა მინდოდა, ლევონი და გაგიკი თვითონ შემყვენ რამდენიმე სომხურ (მათ შორის ცენტრალურ) ბანკში, მაგრამ ლარის დრაჰმაზე გადაცვლაზე სასტიკი უარი გვითხრეს.

რაშია საქმე ვერავინ ამიხსნა.

ნახკადორში სალამოს მასპინძლებმა დიდებული ბანკეტი გაგვიმართეს.

12 ივნისს თბილისში ვბრუნდებით. გზად სომეხმა მასპინძლებმა სევანის ტბაზე კატერით გაგვასეირნეს.

მკითხველს ყოველშემთხვევისთვის უნდა ვაუწყო, რომ სომხეთის მწერალთა კავშირის განკარგულებაშია ორი ფემენებელური დასასვენებელი სახლი – ნახკადორის და სევანის.

სევანზე ერთ უკაცრიელ კუნძულზე მიგვიყვანეს, რომელსაც თოლიების კუნძული ჰქვია.

ეს იყო დაუჯერებელი სანახაობა. 10 000-ზე მეტი თო-  
ლია ჩვენს კატერს ელოდებოდა. როგორც კი ნაპირს მი-  
ვადექით ერთბაშად დაგვესხენ თავს. იყო გნიასი, ხივილი.  
პირდაპირ კატერზე მოდიოდნენ კლანჭებით და ფრთების  
ტყლაშუნით.

ვერავენ გაბედა ნაპირზე გადასვლა. კატერის კაპიტანმა  
ახლა ხუნდები (ბარტყები, მართვეები) ჰყავთ და ძალიან სა-  
შიშრები არიანო. ჩირგვებში მართლაც იმალებოდა უამრავი  
ბარტყი. დედები მათ ჩირგვებში მალავდნენ და თვითონ იერ-  
იშზე გადმოდიოდნენ.

ნაპირს რომ მოვშორდით, მერეც კარგა ხანს მოსდევდნენ  
ჩვენს კატერს.

სომხეთის მწერალთა კავშირის თავმჯდომარეს ლევონ  
ანანიანს ვუთხარი, თოლიებისგან უნდა ვისწავლოთ მეთქი  
ქართველებმა და სომხებმა მომხდურთაგან თავის დაცვა.

## ასარჩევნი

ფინეთი – 1966.....	5
ინგლისი – 1969.....	25
ამერიკის შეერთებული შტატები – 1973 .....	40
ინდოეთი–ეგვიპტე – 1979 .....	60
საბერძნეთი–კვიპროსი–იტალია.....	94
ევროპის გარშემო – 1981 .....	115
ვიეტნამი – 1982.....	140
რუმინეთი – 1983 .....	194
იაპონია – 1984.....	223
მონღოლეთი – 1986 .....	261
გერმანიის ფედერაციული რესპუბლიკა – 1987.....	271
ბულგარეთი – 1987.....	284
აფრიკა. მადაგასკარი–მავრიკია–სეიშელის კუნძულები – 1988 .....	293
თურქეთი–იორდანია–სირია – 1988.....	329
ტაო-კლარჯეთი – 1998.....	345
ირანი – 2001.....	365
ისრაელი – 2003 .....	379
ერევანი – 2004 .....	393
საბერძნეთი–როდოსი – 2008 .....	399
სომხეთი – 2010 .....	406



**РЕВАЗ МИШВЕЛАДЗЕ**  
**ИЗБРАННЫЕ ПРОИЗВЕДЕНИЯ**

в 25 томах

ТОМ XXII

Издательство „Сакартвелოს მაცნე“

Тбилиси 2013